

龍樹菩薩造

姚秦三藏法師鳩摩羅什譯

大智度論

第五冊
卷八一—卷一百

佛陀教育基金會敬印

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

佛尼牟迦釋師本無南



世間所有我盡見
一切無有如佛者

天上天下無如佛
十方世界亦無比

大智度論卷第八十一

龍 樹 菩 薩 造

姚秦三藏法師鳩摩羅什譯

釋六度相攝品第六十八之下

有本作攝五品

【經】須菩提白佛言：「世尊！云何菩薩摩訶薩住羸提波羅蜜取檀波羅蜜？」佛言：「菩薩從初發心乃至道場於其中間若一切衆生來瞋恚罵詈若節節支解菩薩住於忍辱。作是念：我應布施一切衆生不應不與。是衆生須食與食，須飲與飲，乃至資生所須盡皆與之。持是功德與一切衆生共之。迴向阿耨多羅三藐三菩提。是菩薩迴向時不生二心。誰迴向者？迴向何處？是爲菩薩住羸提波羅蜜取檀波羅蜜。」世尊云何菩薩摩訶薩住羸提波羅蜜取

羅蜜取禪波羅蜜。」佛言：「菩薩住羼提波羅蜜，離欲，離惡不善法，有覺有觀，離生喜樂入初禪，乃至入第四禪，是諸禪中淨心。心數法皆迴向薩婆若。迴向時，是菩薩諸禪及禪支皆不可得。是爲菩薩住羼提波羅蜜取禪波羅蜜。」世尊云何菩薩摩訶薩住羼提波羅蜜取般若波羅蜜？」佛言：「菩薩住羼提波羅蜜，觀諸法若離相，若寂滅相，若無盡相，不以寂滅相作證，乃至坐道場得一切種智，從道場起，便轉法輪。是爲菩薩住羼提波羅蜜取般若波羅蜜，不取不捨故。」

須菩提白佛言：「世尊！云何菩薩摩訶薩住毗梨耶波羅蜜取檀波羅蜜？」佛告須菩提：「菩薩住毗梨耶波羅蜜，身心精進，不懈不息。作是念：我必應當得阿耨多羅三藐三菩提，不應不得。是菩

薩爲利益衆生故，往一由旬，若百千萬億由旬，若過一世界，若過百千萬億世界，住毗梨耶波羅蜜中，若不得一人教令入佛道中，若聲聞道中，若辟支佛道中，或得一人教令行十善道，精進不懈，法施及以財施令具足。持是功德與衆生共之，迴向阿耨多羅三藐三菩提，不迴向聲聞、辟支佛地。是爲菩薩住毗梨耶波羅蜜取尸羅波羅蜜。」「世尊云何菩薩摩訶薩住毗梨耶波羅蜜取尸羅波羅蜜？」佛言：「菩薩住毗梨耶波羅蜜，從初發意乃至坐道場，自不殺生，不教他殺，讚不殺生法，歡喜讚歎不殺生者；乃至自遠離邪見，教他遠離邪見，讚不邪見法，歡喜讚歎不邪見者。是菩薩住尸羅波羅蜜因緣，不求欲界、色界、無色界福，不求聲聞、辟支佛地。持是功德與衆生共之，迴向阿耨多羅三藐三菩提，不生三種心：

不見迴向者，不見迴向法，不見迴向處。是爲菩薩住毗梨耶波羅蜜取尸羅波羅蜜。「世尊云何菩薩摩訶薩住毗梨耶波羅蜜取羼提波羅蜜？」佛言：「菩薩住毗梨耶波羅蜜，從初發意乃至坐道場，於其中間，若人若非人來節節支解，菩薩作是念：割我者誰？截我者誰？奪我者誰？復作是念：我大得善利，我爲衆生故受身，衆生還自來取。是時菩薩正憶念諸法實相，持是功德與衆生共之，迴向阿耨多羅三藐三菩提，不向聲聞、辟支佛地。是爲菩薩住毗梨耶波羅蜜取羼提波羅蜜。」世尊云何菩薩摩訶薩住毗梨耶波羅蜜取禪波羅蜜？」佛言：「菩薩住毗梨耶波羅蜜，離欲、離惡不善法，有覺有觀，離生喜樂，入初禪、第二、第三、第四禪，入慈、悲、喜、捨，乃至入非有想、非無想處，持是禪無量、無色定，不受果報，生於

利益衆生之處，以六波羅蜜成就衆生，所謂檀波羅蜜，乃至般若波羅蜜。從一佛土至一佛土，親近供養諸佛，種善根。是爲菩薩住毗梨耶波羅蜜取禪波羅蜜。「世尊！云何菩薩摩訶薩住毗梨耶波羅蜜取般若波羅蜜？」佛言：「菩薩住毗梨耶波羅蜜，不見檀波羅蜜法，不見檀波羅蜜相，乃至不見禪波羅蜜法，不見禪波羅蜜相；四念處乃至一切種智，亦不見法，亦不見相；不見一切法非法，非法於法中無所著，是菩薩所作如所言。是爲菩薩住毗梨耶波羅蜜取般若波羅蜜。」

須菩提白佛言：「世尊！云何菩薩摩訶薩住禪波羅蜜取檀波羅蜜？」佛言：「菩薩摩訶薩住禪波羅蜜，離諸欲，離惡不善法，有覺有觀，離生喜樂入初禪，第二、第三、第四禪，入慈悲喜捨，乃至入非

有想非無想處，住禪波羅蜜中心不亂，行二施以施衆生，法施財施，自行二施，教他行二施，讚歎二施法，歡喜讚歎行二施者，持是功德與衆生共之，迴向阿耨多羅三藐三菩提，不向聲聞，辟支佛地，是爲菩薩住禪波羅蜜取檀波羅蜜。「世尊！云何菩薩摩訶薩住禪波羅蜜取尸羅波羅蜜？」佛言：「菩薩住禪波羅蜜，不生淫欲、瞋恚、愚癡心，不生惱他心，但修行一切智相應心，持是功德與衆生共之，迴向阿耨多羅三藐三菩提，不向聲聞，辟支佛地，是爲菩薩住禪波羅蜜取尸羅波羅蜜。」世尊！云何菩薩摩訶薩住禪波羅蜜取羼提波羅蜜？」佛言：「菩薩住禪波羅蜜，觀色如聚沫，觀受如泡，觀想如野馬，觀行如芭蕉，觀識如幻，作是觀時，見五衆無堅固相，作是念：割我者誰？截我者誰？誰受？誰想？誰行？誰識？誰罵

者。誰受罵者。誰生瞋恚。是爲菩薩住禪波羅蜜取羸提波羅蜜。

「世尊！云何菩薩摩訶薩住禪波羅蜜取毗梨耶波羅蜜？」佛言：「菩薩住禪波羅蜜，離欲、離惡、不善法，有覺有觀，離生喜樂入初禪，第二、第三、第四禪，是諸禪及支取相生種種神通，履水如地，入地如水，如先說。天耳聞二種聲，若天、若人，知他心，若攝心，若亂心，乃至有上心、無上心。憶種種宿命，如先說。以天眼淨過人眼，見衆生乃至如業受報，如先說。菩薩住是五神通，從一佛世界至一佛世界，親近供養諸佛，種善根，成就衆生，淨佛世界，持是功德與衆生共之，迴向阿耨多羅三藐三菩提。是爲菩薩住禪波羅蜜取毗梨耶波羅蜜。」世尊云何菩薩摩訶薩住禪波羅蜜取般若波羅蜜？」佛言：「菩薩住禪波羅蜜，不得色，不得受、想、行、識，不得檀波

羅蜜、尸羅波羅蜜、羼提波羅蜜、毗梨耶波羅蜜、禪波羅蜜、不得般若波羅蜜；不得四念處，乃至不得一切種智；不得有爲性，不得無爲性。不得故不作，不作故不生，不生故不滅。何以故？有佛無佛，是如法相，法性常住，不生不滅，常一心應薩婆若行。是爲菩薩住禪波羅蜜取般若波羅蜜。」

須菩提白佛言：「世尊！云何菩薩摩訶薩住般若波羅蜜取檀波羅蜜？」佛言：「菩薩住般若波羅蜜，內空、內空不可得，外空、外空不可得，內外空、內外空不可得，空空、空空不可得，乃至一切法空、一切法空不可得。菩薩住是十四空中，不得色相若空、若不空，不得受、想、行、識相若空、若不空，不得四念處若空、若不空，乃至不得阿耨多羅三藐三菩提若空、若不空，不得有爲性、無爲性若空、若

不空。是菩薩摩訶薩如是住般若波羅蜜中，有所布施，若飲食、衣服、種種資生之具，觀是布施空，何等空？施者、受者及財物空，不令慳著心生。何以故？菩薩摩訶薩行般若波羅蜜，從初發意乃至坐道場，無有妄想分別。如諸佛得阿耨多羅三藐三菩提時，無慳著心，菩薩摩訶薩亦如是，行般若波羅蜜時，無慳著心，是菩薩所可尊者。般若波羅蜜是爲菩薩住般若波羅蜜取檀波羅蜜。「世尊！云何菩薩摩訶薩住般若波羅蜜取尸羅波羅蜜？」佛言：「菩薩住般若波羅蜜，不生聲聞、辟支佛心。何以故？是菩薩聲聞、辟支佛地不可得，趣向聲聞、辟支佛心亦不可得。是菩薩摩訶薩從初發意乃至坐道場，於其中間自不殺生，不教他殺，讚不殺法，歡喜讚歎不殺生者；乃至自不邪見，不教他邪見，讚不邪見法，歡喜讚歎

不邪見者。以是持戒無法可取。若聲聞。若辟支佛地。何況餘法。是爲菩薩住般若波羅蜜取尸羅波羅蜜。「世尊。云何菩薩摩訶薩住般若波羅蜜取羼提波羅蜜？」佛言。「菩薩住般若波羅蜜。隨順法忍生。作是念。此法中無有法。若起。若滅。若生。若死。若受罵詈。若受惡口。若割若截。若破若縛。若打若殺。是菩薩從初發意。乃至坐道場。若一切衆生來罵詈惡口。刀杖瓦石。割截傷害。心不動。作是念。甚可怪。此法中無有法。受罵詈惡口。割截傷害者。而衆生受諸苦惱。是爲菩薩住般若波羅蜜取羼提波羅蜜。「世尊。云何菩薩摩訶薩住般若波羅蜜取毗梨耶波羅蜜？」佛言。「菩薩住般若波羅蜜。爲衆生說法。令行檀波羅蜜。尸波羅蜜。羼提波羅蜜。毗梨耶波羅蜜。禪波羅蜜。般若波羅蜜。教令行四念處。乃至八聖道。

分，令得須陀洹果、斯陀含、阿那含、阿羅漢果、辟支佛道，令得阿耨多羅三藐三菩提，不住有爲性中，不住無爲性中。是爲菩薩住般若波羅蜜取毗梨耶波羅蜜。「世尊，云何菩薩摩訶薩住般若波羅蜜取禪波羅蜜？」佛言：「菩薩住般若波羅蜜，除諸佛三昧，入餘一切三昧。若聲聞三昧，若辟支佛三昧，若菩薩三昧，皆行，皆入。是菩薩住諸三昧，逆順出入八背捨。何等八？內有色相外觀色，是初背捨；內無色相外觀色，二背捨；淨背捨，身作證，三背捨；過一切色相，滅有對相，不念種種相故，入無量虛空處，四背捨；過一切虛空處，入無邊識處，五背捨；過一切識處，入無所有處，六背捨；過一切無所有處，入非有想非無想處，七背捨；過一切非有想非無想處，入滅受想處，八背捨。於是八背捨，逆順出入九次第定。何等九？

離諸欲，離諸惡不善法，有覺有觀，離生喜樂入初禪，乃至過非有想非無想處，入滅受想定，是名九次第定，逆順出入。是菩薩依八背捨，九次第定，入師子奮迅三昧。云何名師子奮迅三昧？須菩提！菩薩離欲、惡不善法，有覺有觀，離生喜樂入初禪，乃至入滅受想定，從滅受想定起，還入非有想非無想處，從非有想非無想處起，乃至還入初禪。是菩薩依師子奮迅三昧，入超越三昧。云何爲超越三昧？須菩提！菩薩離欲、離諸惡不善法，有覺有觀，離生喜樂入初禪，從初禪起，乃至入非有想非無想處，非有想非無想處起，入滅受想定，滅受想定起，還入初禪，從初禪起，入滅受想定，滅受想定起，入二禪，二禪起，入滅受想定，滅受想定起，入三禪，三禪起，入滅受想定，滅受想定起，入四禪，四禪起，入滅受想定，滅受想定起。

入空處，空處起入滅受想定；滅受想定起入識處，識處起入滅受
想定；滅受想定起入無所有處，無所有處起入滅受想定；滅受想
定起入非有想非無想處，非有想非無想處起入滅受想定。滅受
想定起入散心中，散心中起入滅受想定；滅受想定起還入散心
中，散心中起入非有想非無想處，非有想非無想處起還入散心
中，散心中起入無所有處，無所有處起入散心中，散心中起入識
處，識處起入散心中，散心中起入空處，空處起入散心中，散心中
起入第四禪；第四禪中起入散心中，散心中起入第三禪；第三禪
中起入散心中，散心中起入第二禪；第二禪中起入散心中，散心
中起入初禪；初禪中起入散心中。是菩薩摩訶薩住超越三昧，得
諸法等相。是爲菩薩住般若波羅蜜取禪波羅蜜。」

論問曰：何以但一波羅蜜爲主？答曰：行因緣次第應爾。菩薩有二種：在家、出家。在家菩薩福德因緣故大富，大富故求佛道因緣，行諸波羅蜜，宜先行布施。何以故？既有財物，又知罪福，兼有慈悲心於衆生故，宜先行布施。隨次第因緣，行諸波羅蜜。出家菩薩以無財故，次第宜持戒、忍辱、禪定。所宜故名爲主。除財施，餘波羅蜜皆出家人所宜行。菩薩以屢提波羅蜜爲主，作是願：若人來割截身體，不應生瞋心。我今行菩薩道，應具足諸波羅蜜。諸波羅蜜中，檀波羅蜜最在初。於檀中所重惜者，無過於身。能以施人，不惜不瞋，能具足忍辱波羅蜜。攝取檀。菩薩住忍辱中，布施衆生衣食等諸物，盡給與，受者逆罵、打害菩薩，破其施忍。菩薩作是念：我不應爲虛誑身故，毀波羅蜜道。我應布施，不應生惡心，不以小惡因緣故。

而生廢退。是菩薩命未盡間，增益施心；若命終時，二波羅蜜力故，即生好處，續行布施。取尸羅波羅蜜者，問曰：住忍辱時，不爲惡，即是戒，何以故？更說住忍取戒波羅蜜，應當住戒攝忍。答曰：此中說相，不說次第相生。雖和合而各各有相，若次第法，應先戒後忍；戒名不奪他命，忍名不自惜命，是故於忍辱中別說戒相。復次，忍名自攝其心，不起瞋恚。持戒有二種：一者，不惱衆生；二者，自爲生禪定根本故。有菩薩行忍辱，未受持戒法，但以畏罪故忍辱，未能深憐愍衆生。是人或從師聞，或自思惟，持戒是佛道因緣，不憍衆生。我今已能忍辱，則行此事易；是名說忍辱能取尸羅波羅蜜。復次，忍辱是心數法，持戒是色法；持戒名心生，口說受持，忍辱但是心生，非受持法。復次，身口清淨名持戒，意清淨名忍辱。問曰：禪智波

羅蜜亦是心清淨法，何以但說忍辱？答曰：禪智力大故不說，持戒時心未能清淨，須忍辱守心故。此經中自說因緣：有菩薩大功德智慧利根，於現在佛所發心行諸波羅蜜，是故世世增益，乃至阿耨多羅三藐三菩提，不墮惡處。爲是菩薩故，說從初發心，乃至坐道場，不生瞋心，奪衆生命，亦不著二乘，皆是二波羅蜜功德故。離三種心，迴向阿耨多羅三藐三菩提。三心者，無人、無法、無迴向處，無有我心、顛倒心。取毗梨耶波羅蜜者，若自集功德，若度衆生，發心不懈，乃至成辦其事；若有遮道因緣，心不沒、不退，能堪受衆苦，不以久遠勤苦爲難。如經中說：是菩薩乃至過千萬由旬，乃至不得一人令入實法得涅槃，是時心亦不愁；若得一人令持五戒等，爾時心歡喜，不作是念：我過此無量國土，正得此一人，以爲愁苦。

何以故？一人相即是一切人相，一切人相是一人相，是諸法相不二故。取禪波羅蜜者，是菩薩忍辱力故，其心調柔，心調柔故易得禪定；於禪定中得慈、悲等諸清淨心，心數法皆以是不著心迴向阿耨多羅三藐三菩提。取般若波羅蜜者，菩薩住衆生忍中，忍一切衆生加惡事，行大慈悲，是故得大福德，得大福德故心柔軟，心柔軟故易得法忍，所謂一切畢竟無生。住是法忍中，觀一切法空相、離相、無盡、寂滅相，如涅槃相。爾時，還增長衆生忍，如是畢竟空中誰有罵者？誰有害者？爾時，具足二忍故，不見三事：忍法、忍者、忍處。如是不戲論一切法故，能見一切法空寂滅相，如涅槃。本願求佛道，不著是畢竟空法故，乃至未坐道場，不證實際。坐道場已，具得佛法，得佛道，轉法輪，隨意利益衆生，皆是般若波羅蜜力。

住毗梨耶波羅蜜，取檀波羅蜜者，菩薩初用精進門入諸波羅蜜中，勤行五波羅蜜，身心精進，不休不息，精進更無異體。住是精進中，不畏阿鼻泥犁苦，何況餘苦！菩薩亦知一切法畢竟空，從畢竟空出，以慈悲心故，還起善業，不取涅槃，是精進力。菩薩住精進中，應作是念：我久久必應當得阿耨多羅三藐三菩提，不應不得。是人過一由旬乃至百千由旬，以財法二事施惠衆生，乃至過百千萬億國土，正使不得一人入三乘，菩薩心亦不悔不沒。不作是念：我爾所佛土而不得一人可度，云何可得度一切人。過百千國土，或得一人可令行十善，不中入三乘，不以一人不得實相故，心懷輕悔。復作是念：我今并使此人行十善道，漸以三乘而度脫之；教十善已，復以財法二施滿足衆生，持是功德迴向阿耨多羅三藐

三菩提。身心精進，過無數國，爲衆生說法。問曰：一切布施皆以精進，何以但言此二施從精進生？答曰：雖一切施皆由精進生，此以多精進力生故。如經說：過百千國土，以二施滿足衆生。取尸羅波羅蜜者，菩薩具行十善道，是名尸羅波羅蜜，或從忍辱等波羅蜜生。若菩薩從初發心，乃至坐道場，捨十不善道，行四十種善道，不休不息，是名精進波羅蜜力。有人一種不能行，何況四種！亦以尸羅^{「尸羅」應爲「精進」之誤。}波羅蜜故，不生三界，不受二乘。衆生以懈怠煩惱心故，生三界中，厭惡生死，故捨佛道，取小乘，此皆是懈怠相。是故說是菩薩不貪三界，不證二乘。取羸提波羅蜜者，菩薩從初發心，乃至坐道場，若人若非人來割截身體持去。爾時，菩薩破我顛倒，善業畢竟空故，作是念：此中無有割者、截者，是事皆是凡夫虛誑所見。

我得大利，我知諸法實時，能入涅槃，但爲憐愍衆生故受身；衆生自來取去，我不應惜。爾時，深入諸法實相，此中無有定相，衆生自生怖畏。以此功德與衆生共，迴向阿耨多羅三藐三菩提。是中若有罵詈、打害、能忍者，是爲忍；歡喜不退，是爲精進。是二法，或從精進生忍辱，或從忍辱生精進，今從精進生忍辱。取禪波羅蜜者，有人自然得禪定，如劫盡時，或有退得，生得，或上地生，下地得；如是雖得禪定，不從精進生。有因大布施，破慳貪等五蓋，即得禪定；或有人持戒清淨，修集忍辱故，因小厭心，便得禪定；或有人大智慧力故，知欲界無常虛誑不淨，即得禪定；禪定雖亦虛誑，猶勝欲界。如是雖有精進，更因餘法得禪故，不名從精進生。有人不因五法爲主，但日夜精進，經行坐禪，常與心鬪，以信等五力，深御五蓋，若

心馳散，便攝令還，如與賊鬪，乃至流汗。如是等人得禪定，從精進。或有菩薩鈍根，宿罪所覆，深著世樂，馳逸難制；如是人深加精進，爾乃得定。譬如有福德之人，安坐無事，福祿自至；薄福之人，勤設方便，鬪戰乃得。有福之人自然得者，名爲福德自至；方便戰鬪得者，名爲精進而得。如是一切處雖有精進，多處受名，取般若波羅蜜者，菩薩精進力故，得禪波羅蜜，得禪波羅蜜故，生菩薩神通力。二事因緣故，以神通力徧至十方，未具足功德，欲令具足，又欲教化一切衆生。除四波羅蜜所生般若，餘智慧多從精進生，故住精進爲主，取智慧。般若波羅蜜者，有二種：一者、觀諸法實相，於一切法中不見法相，不見非法相；二者、如所說行。人有懈怠心，故不能行二事，精進力故能具足行二事。

住禪波羅蜜爲主取五波羅蜜者，菩薩住禪波羅蜜中，心調柔不動，能觀察諸法實相。譬如密室然燈，光照明了，是名住禪波羅蜜。生智慧。爾時，不惱一切衆生，又加憐愍，是名甚深清淨持戒、忍辱。以神通力變化財物，具足布施，又遣化人爲一切說法；又菩薩從禪起，以清淨柔軟心爲衆生說法，是名布施。因禪定力起神通，周至十方，導利一切而不懈怠，是名精進。又因禪定令四波羅蜜增益，是名禪定生精進。餘義，如經廣說。

住般若波羅蜜爲主取五波羅蜜者，如經中佛自廣說。問曰：佛雖廣說，其中猶有不解者，今當問。十八空中，何以故不說四空？答曰：第十四名一切法空，言一切者，法無不盡，是故不說。問曰：若爾者，但應說十四，何以有十八？答曰：彼中分別一切法相空，一切空皆

總入十八空。此中爲行者說，行者或行一空、二空乃至十四空，隨本所著多少故。有深著邪見者，以餘四空。所以者何？有法無法等，是外道邪見，是菩薩修慈悲心柔軟故，不生如是有無見。復次，菩薩以十四空熏心故，於有無中了了不錯，是故不說後四空。問曰：何以故說菩薩如諸佛無貪著心，此說有何義？答曰：佛斷諸煩惱，習不起，菩薩以般若力制令不起；今欲讚歎般若力故，結使雖未斷，與佛斷無異，令人知貴般若力故。發心作是念：此中無有法若生若滅，若受罵詈割截等。問曰：此即是無生忍，何以言柔順忍？答曰：此中說破五衆和合假名衆生，不能破法，是故經說無生者滅者，無受罵詈者。又是人破我，雖觀法空，未能深入，猶有著法愛故。如得無生忍法，而有慈愍衆生，柔順忍中亦有念法空。是二法中。

一、處衆生不可得故，名衆生忍；二、於法不可得故，名爲法忍。法忍者不妨衆生忍，衆生忍不妨法忍，但以深淺爲別。問曰：超越三昧，不得超二，又不從散心而入滅盡定，此中何以如是說？答曰：大小乘法異，不超二者，小乘法中說菩薩無量福德智慧，深入禪定力故，能隨意超越。如人力士蹕躑，不過丈數，若以天力士蹕之，無廣遠之難。又阿毗曇中，皆爲凡夫人聲聞人說，菩薩則不然，智慧力故，入師子奮迅三昧，能於諸法得自在，般若力故，能隨意自在說諸法，應適衆生。復有菩薩多行般若波羅蜜，知諸法實相，安住不動法中，一切世間天及人無能難詰，令傾動者。若得財物布施二種衆生，若施佛，若施衆生。以衆生空故，其心平等，不貴著諸佛，不輕賤衆生，若施貧賤人，輕賤故福少；若施諸佛，貪著故福不具足。

若以金銀寶物及施草木，以法空故，亦等無異。斷諸分別一異等諸妄想，入不二入法門布施，是名財施。法施亦如是，不貪貴有智能受法者，不輕無智不解法者。所以者何？佛法無量，不可說，不可思議故。若說布施等淺法，及說十二因緣、空、無相、無作、空、無相、無作等諸甚深法，等無異。何以故？是法皆入寂滅不戲論法中故。如是等名般若生布施。復次，是菩薩於十方三世諸佛，及弟子所修三種功德隨喜，皆與一切衆生共之，迴向阿耨多羅三藐三菩提。智慧力故，無所不施，能與衆生福德分。復有菩薩若布施時生種種好心，拔出慳貪根本而行布施，慈心施故滅諸瞋恚；見受者得樂，歡喜故滅嫉妬心；恭敬心施受者故，破憍慢；了了信知布施果報故，破疑及無明；不得與者、受者、定實故，破有無等餘邪見。觀受

者如佛，觀物如阿耨多羅三藐三菩提相，觀己身從本已來畢竟空。若如是布施，不虛誑故，直至阿耨多羅三藐三菩提。如是等相，名般若波羅蜜生檀波羅蜜。復次，菩薩深入清淨般若波羅蜜故，非無衆生而能受持十善等諸戒；欲破殺生顛倒故，有不殺生戒，非實相中有。復次，有人爲百由旬衆生故持戒不殺，有爲一閻浮提衆生故持戒不殺，如是等爲有量衆生持戒。或有一日持戒，或受五戒、十戒，如是等有量持戒。菩薩行般若，爲無量國土一切衆生故持戒，不爲一世二世。如如虛空法性實際住，以畢竟空相故，不取是戒相，不憎破戒，不著持戒，是名菩薩般若波羅蜜生具足無分別戒。忍辱有二種：一者衆生忍，二者法忍。菩薩深入般若波羅蜜故，得諸法忍，能信受無量佛法，心無是非分別，如是相，名般

若波羅蜜中生忍辱。復有菩薩勤精進具足五波羅蜜故。行般若波羅蜜得諸法實相。滅三業。身無所作。口無所說。心無所念。如人夢中沒在大海。動以手足求渡。覺已夢心即息。是名從般若波羅蜜中生第一精進。如持心經中說。我得是精進故。於然燈佛得受記莚。佛言。雖離智慧無禪定。多用智慧力得禪定。是故從智慧生禪定。如佛說辟支佛經中。有一國王見二特牛淫欲故鬪死。自覺悟。我以財色故。征伐他國。與此何異。即捨離五欲。得禪定。成辟支佛。菩薩亦如是。少多因緣厭患五欲。籌量五欲樂。禪樂。相去懸遠。我豈可以五欲少樂而棄禪定樂。禪定樂者。福德清淨徧身受樂。如是等。從分別智慧生禪定。禪定義。如經中說。

復次。是菩薩於無量劫爲佛道故種善根。離欲故於諸禪定得自

在，深入如法性、實際、精進、方便、慈悲力故，出於甚深法，還修功德。是人勝伏其心，一念中能行六波羅蜜；所謂菩薩布施時如法捨財，是爲檀波羅蜜；安住十善道中布施，不向二乘，是爲尸羅波羅蜜；若慳貪等諸煩惱，及魔人民來，不能動心，是名羸提波羅蜜；布施時身心精進，不休不息，是名精進波羅蜜；攝心在布施，不令散亂，無疑無悔，正向阿耨多羅三藐三菩提，是名禪波羅蜜；布施時與者、受者、財物不可得，不如邪見取相，妄見一定相，如諸佛賢聖觀物相，受者、與者相及迴向處相，法施時亦如是，是名般若波羅蜜。菩薩盡受諸戒，善心起正語、正業，三種律儀：戒律儀、禪定律儀，無漏律儀。住是戒中，施一切衆生無畏，是名檀波羅蜜。淫欲、瞋恚等諸煩惱欲破戒，能制能忍。復次，人來罵詈打害，畏破戒故，忍而

不報；又復飢渴寒熱諸苦所逼，爲持戒故，如是等悉皆能忍，是名
羸提波羅蜜。分別諸戒相輕重，有殘無殘，因緣本末，或遮、或聽等，
是心精進，能如戒法行，有犯則下意懺除，是名身精進。以是持戒
精進，不求天王、人王，乃至不求小乘涅槃，但爲戒是菩薩道住處
故，持戒能修集五波羅蜜，是名精進波羅蜜。菩薩若持戒清淨，不
離禪定。何以故？持戒清淨，破諸煩惱力，心則調伏；譬如老奪壯力，
死來易壞。行者不得禪定故，念五欲，生五蓋，侵害持戒；是故爲戒
堅牢故，求禪定樂。禪定者，攝諸心，心數法一處和合，名爲禪定。行
者能除惡身口破戒業，次除三惡覺觀，然後除三細覺觀，所謂國
土、親里、不死，如是除已，即得禪定，是名禪波羅蜜。持戒時知戒能
生，如是今世後世功德果報，是名智慧。復次，戒、持戒、破戒者，三事

不可得，是名智慧。人有三種：下人破戒，中人著戒，上人不著戒。是菩薩思惟：若我憎破戒及破戒者，愛戒及持戒者，而生愛、悲，則還受罪業因緣；譬如象浴洗已，還以土塗，是故不應生憎、愛。復次，一切法皆屬因緣，無自在者，諸善法皆因惡生，若因惡生，云何可著？惡是善因，云何可憎？如是思惟，直入諸法實相：觀持戒、破戒皆從因緣生，從因緣生故無自性，無自性故畢竟空，畢竟空故不著。是名般若波羅蜜。菩薩行忍辱時，作是念：若衆生來割截我身，我即布施，不令衆生得劫盜之罪。或修忍時，因忍說法，種種因緣分別世間，涅槃，令衆生住六波羅蜜中，得衆生忍，能以身施，是名財施；得法忍，深入諸法，爲衆生說，是爲法施。是二施從二忍生，故名檀波羅蜜。菩薩行忍辱時，不惜身命爲忍辱，何況惱衆生而破戒，是

故因忍持戒，憐愍一切衆生欲度脫之。持戒名一切諸善法安立住處，是名尸羅波羅蜜。菩薩於忍中，身心勤行四波羅蜜，是名精進。於忍中心調柔不著五欲，攝心一處；我於一切衆生能忍如地，是名禪波羅蜜。菩薩知忍辱果報，相好嚴身等。菩薩修忍，能障諸煩惱，能忍衆生過惡，能忍受一切深法，後得諸法實相；是時行者心中得是無生法忍，即是般若波羅蜜。菩薩住精進，生諸波羅蜜，精進雖是一切善根本，離精進則無善法可得，但以精進力多生五波羅蜜故，名精進。菩薩常行三種施，未曾捨離，財施、法施、無畏施，是名檀波羅蜜。菩薩善身、口、正業，直向佛道，不貪二乘，是名尸羅波羅蜜。勤行精進，有人來毀壞菩薩道，能忍不動，是名羸提波羅蜜。菩薩雖行種種餘法，心不散亂，一心念薩婆若，是名禪波

羅蜜。有二種精進：一、動相，身心勤行；二、滅一切戲論故，身心不動。菩薩雖勤行動精進，亦不離不動精進，不動精進不離般若波羅蜜。菩薩入禪定慈悲心力故，施一切衆生無畏；或禪定力故，變化寶物如須彌山充滿一切，雨衆華香等供養諸佛，及施貧窮衆生衣服、飲食等；或入禪定中爲十方衆生說法，是名檀波羅蜜。此中隨禪定行身、口善業，及離聲聞、辟支佛心，是名尸羅波羅蜜。菩薩入禪定得清淨柔軟樂，能不著禪味；禪定力故能深入諸法空，能忍受是法，心不疑悔，是名羸提波羅蜜。菩薩忍辱時，欲起諸三昧，超越三昧、師子奮迅三昧等，無量諸菩薩三昧，不休不息，是名精進波羅蜜。菩薩禪定力故，心清淨不動，能入諸法實相，諸法實相即是般若波羅蜜。菩薩行般若波羅蜜，能觀三種布施相，如阿耨

多羅三藐三菩提，滅諸非有非無等戲論，是名無量無盡般若中檀波羅蜜。身、口業隨般若行，得般若故，能牢固清淨持戒，是名尸羅波羅蜜。住般若心中，衆生忍，法忍，轉深清淨，是名羸提波羅蜜。行般若菩薩身心清淨，得不動精進，觀動精進如幻，如夢，得不動精進故，不入涅槃，是名精進波羅蜜。菩薩行是無礙般若故，雖常入禪定，得般若波羅蜜力故，不起於禪而能度衆生，是名禪波羅蜜。如是等菩薩利智慧故，一心中一時能具六波羅蜜。

大智度論卷第八十一

音釋

羸提

梵語也此云忍辱羸初限切

言

力智切旁斥曰言

奮迅

奮方問切迅思晉切

嬌

乃了切亂也

輒

乳充切柔也

踔躑

踔敎教切躑直豕切躑躅躍也

大智度論卷第八十二

龍 樹 菩 薩 造

姚秦三藏法師鳩摩羅什譯

釋方便品第六十九之上

經作大方便品

經爾時，須菩提白佛言：「世尊是菩薩摩訶薩如是方便力成就者，發意已來幾時？」佛告須菩提：「是菩薩摩訶薩能成就方便力者，發心已來無量億阿僧祇劫。」須菩提言：「世尊是菩薩摩訶薩如是成就方便力者，爲供養幾佛？」佛言：「是菩薩成就方便力者，供養如恆河沙等諸佛。」須菩提白佛言：「世尊菩薩得如是方便力者，種何等善根？」佛言：「菩薩成就如是方便力者，從初發意已來，於檀波羅蜜無不具足，於尸羅波羅蜜、羼提波羅

蜜毗梨耶波羅蜜、禪波羅蜜、般若波羅蜜無不具足。」須菩提白佛言：「世尊！菩薩摩訶薩成就如是方便力者，甚希有！」佛言：「如是如是！須菩提！菩薩摩訶薩成就如是方便力者，甚希有。須菩提！譬如日月周行照四天下，多有所益；般若波羅蜜亦如是，照五波羅蜜，多有所益。須菩提！譬如轉輪聖王，若無輪寶，不得名為轉輪聖王，輪寶成就故得名轉輪聖王；五波羅蜜亦如是，若離般若波羅蜜，不得波羅蜜名字，不離般若波羅蜜故，得波羅蜜名字。須菩提！譬如無夫婦人，易為侵凌；五波羅蜜亦如是，遠離般若波羅蜜，魔若魔天壞之則易。譬如有夫婦人，難可侵凌；五波羅蜜亦如是，得般若波羅蜜，魔若魔天不能沮壞。須菩提！譬如軍將，鎧仗具足，鄰國強敵所不能壞；五波羅蜜亦如是，不遠離般若波羅蜜，魔若

魔天若增上慢人，乃至菩薩旃陀羅所不能壞。須菩提！譬如諸小國王，隨時朝侍轉輪聖王；五波羅蜜亦如是，隨順般若波羅蜜。譬如衆川萬流，皆入於恆河，隨入大海；五波羅蜜亦如是，般若波羅蜜所守護，故隨到薩婆若。譬如人之右手所作事，便般若波羅蜜亦如是；如人左手造事不便，五波羅蜜亦如是。譬如衆流，若大若小，俱入大海，合爲一味；五波羅蜜亦如是，爲般若波羅蜜所護。隨般若波羅蜜入薩婆若，得波羅蜜名字。譬如轉輪聖王四種兵，輪寶在前導，王意欲住，輪則爲住，令四種兵滿其所願，輪亦不離其處；般若波羅蜜亦如是，導五波羅蜜到薩婆若，常是中住，不過其處。譬如轉輪聖王四種兵，輪寶在前導，般若波羅蜜亦如是，導五波羅蜜到薩婆若住。般若波羅蜜亦不分別，檀波羅蜜隨從我，尸

羅波羅蜜、羼提波羅蜜、毗梨耶波羅蜜、禪波羅蜜不隨從我。檀波羅蜜亦不分別。我隨從般若波羅蜜，尸羅波羅蜜、羼提波羅蜜、毗梨耶波羅蜜、禪波羅蜜不隨從。尸羅波羅蜜、羼提波羅蜜、毗梨耶波羅蜜、禪波羅蜜亦如是。何以故？諸波羅蜜性無所能作，自性空，虛誑如野馬。」

爾時，須菩提白佛言：「世尊！若一切法自性空，云何菩薩摩訶薩行六波羅蜜，當得阿耨多羅三藐三菩提？」須菩提：菩薩摩訶薩行六波羅蜜時，作是念：是世間心皆顛倒，我若不行方便力，不能度脫衆生生死。我當爲衆生故行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。是菩薩爲衆生故，捨內外物，捨時作是念：我無所捨。何以故？是物必當壞敗。菩薩作如

是思惟能具足檀波羅蜜。爲衆生故，終不破戒。何以故？菩薩作是念：我爲衆生發阿耨多羅三藐三菩提，若殺生是所不應；乃至我爲衆生發阿耨多羅三藐三菩提，若作邪見，若貪著聲聞、辟支佛地，是所不應。菩薩摩訶薩如是思惟，能具足尸羅波羅蜜。菩薩爲衆生故不瞋，乃至不生一念。菩薩如是思惟：我應利益衆生，云何而起瞋心？菩薩如是能具足羼提波羅蜜。菩薩爲衆生故，乃至阿耨多羅三藐三菩提，常不生懈怠心。菩薩如是行，能具足毗梨耶波羅蜜。菩薩爲衆生故，乃至得阿耨多羅三藐三菩提，不生散亂心。菩薩如是行，能具足禪波羅蜜。菩薩爲衆生故，乃至阿耨多羅三藐三菩提，終不離智慧。何以故？除智慧，不可以餘法度脫衆生故。菩薩如是行，能具足般若波羅蜜。須菩提白佛言：「世尊！若

諸波羅蜜無差別相，云何般若波羅蜜於五波羅蜜中第一、最上、微妙？」佛告須菩提：「如是！如是！諸波羅蜜雖無差別，若無般若波羅蜜，五波羅蜜不得波羅蜜名字，因般若波羅蜜，五波羅蜜得波羅蜜名字。須菩提！譬如種種色鳥，到須彌山王邊，皆同一色；五波羅蜜亦如是，因般若波羅蜜到薩婆若中，一種無異，不分別是檀波羅蜜，是尸羅波羅蜜，是羼提波羅蜜，是毗梨耶波羅蜜，是禪波羅蜜，是般若波羅蜜。何以故？是諸波羅蜜無自性故，以是因緣故，諸波羅蜜無差別。」須菩提白佛言：「世尊！若隨實義無分別，云何般若波羅蜜於五波羅蜜中最上、微妙？」佛言：「如是！如是！須菩提！雖實義中無有分別，但以世俗法故，說檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。爲欲度

衆生生死，是衆生實不生不死，不起不退。須菩提！衆生無所有故，當知一切法無所有，以是因緣故。般若波羅蜜於五波羅蜜中最上、最妙。須菩提！譬如閻浮提衆女人中，玉女寶第一、最上、最妙。般若波羅蜜亦如是，於五波羅蜜中第一、最上、最妙。須菩提！佛言：「世尊！佛何意故說般若波羅蜜最上、最妙？」佛告須菩提：「般若波羅蜜取一切善法到薩婆若中，住不住故。」須菩提白佛言：「世尊！般若波羅蜜有法可取，可捨不？」佛言：「不也！須菩提！般若波羅蜜無法可取，無法可捨。何以故？一切法不取不捨故。」世尊！般若波羅蜜於何等法不取不捨？」佛言：「般若波羅蜜於色不取不捨，於受、想、行、識，乃至阿耨多羅三藐三菩提，不取不捨。」

「世尊！云何不取色，乃至不取阿耨多羅三藐三菩提？」佛言：「若

菩薩不念色，乃至不念阿耨多羅三藐三菩提，是名不取色，乃至不取阿耨多羅三藐三菩提。」須菩提言：「世尊！若不念色，乃至不念阿耨多羅三藐三菩提，云何得增益善根？善根不增，云何具足諸波羅蜜？若不具足諸波羅蜜，云何得阿耨多羅三藐三菩提？」佛告須菩提：「若菩薩不念色，乃至不念阿耨多羅三藐三菩提，是時善根增益，善根增益故，具足諸波羅蜜；諸波羅蜜具足故，得阿耨多羅三藐三菩提。何以故？不念色，乃至不念阿耨多羅三藐三菩提時，便得阿耨多羅三藐三菩提。」世尊！何因緣故，色不念時，乃至阿耨多羅三藐三菩提不念時，便得阿耨多羅三藐三菩提？」佛言：「以念故著欲界、色界、無色界，不念故無所著。如是，須菩提！菩薩摩訶薩行般若波羅蜜，不應有所著。」世尊！菩薩摩訶

薩如是行般若波羅蜜，當住何處？」佛言：「菩薩摩訶薩如是行，不住色，乃至不住一切種智。」世尊！何因緣故，色中不住，乃至一切種智中不住？」佛言：「不著故不住。何以故？是菩薩不見有法可著可住。如是須菩提！菩薩摩訶薩以不著不住法，行般若波羅蜜。」

「須菩提！若菩薩摩訶薩作是念：若能如是行，如是修，是行般若波羅蜜，我今行般若波羅蜜，修般若波羅蜜；若如是取相，則遠離般若波羅蜜；若遠離般若波羅蜜，則遠離檀波羅蜜，乃至遠離一切種智。何以故？般若波羅蜜無有著處，亦無著者，自性無故。菩薩摩訶薩若復如是取相，則於般若波羅蜜退；若退般若波羅蜜，則是退阿耨多羅三藐三菩提，不得受記。菩薩摩訶薩復作是念：住

是般若波羅蜜，能生檀波羅蜜，乃至能生大悲。若作是念，則爲失般若波羅蜜；失般若波羅蜜者，則不能生檀波羅蜜，乃至不能生大悲。菩薩若復作是念：諸佛知諸法無受相故，得阿耨多羅三藐三菩提。菩薩若作如是演說，開示教詔，則失般若波羅蜜。何以故？佛於諸法無所知，無所得，亦無法可說，何況當有所得！無有是處！須菩提白佛言：「世尊！菩薩行般若波羅蜜，云何無是過失？」佛言：「若菩薩摩訶薩行般若波羅蜜，作是念：諸法無所有，不可取，若法無所有，不可取，則無所得。若如是行，爲行般若波羅蜜。若菩薩摩訶薩著無所有法，則遠離般若波羅蜜。何以故？般若波羅蜜中無有著法故。」須菩提白佛言：「世尊！般若波羅蜜遠離般若波羅蜜耶？檀波羅蜜遠離檀波羅蜜耶？乃至一切種智遠離一切」

種智耶？世尊！若般若波羅蜜遠離般若波羅蜜，乃至一切種智遠
離一切種智，菩薩云何得般若波羅蜜？乃至得一切種智？」佛言：
「菩薩摩訶薩行般若波羅蜜時，不生色，是色，誰色，乃至一切種
智不生，是一切種智，誰一切種智。如是菩薩能生般若波羅蜜，乃
至能生一切種智。復次，須菩提！菩薩摩訶薩行般若波羅蜜時，不
觀色若常，若無常，若苦，若樂，若我，若非我，若空，若不空，若離，若非
離。何以故？自性不能生自性，乃至一切種智，亦如是。若菩薩摩訶
薩行般若波羅蜜，如是觀色，乃至觀一切種智，能生般若波羅蜜，
乃至能生一切種智。譬如轉輪聖王有所至處，四種兵皆隨從；般
若波羅蜜亦如是，有所至處，五波羅蜜皆悉隨從；到薩婆若中住。
譬如善御駕馭，不失平道，隨意所至；般若波羅蜜亦如是，御五波

羅蜜不失正道，至薩婆若。」

須菩提言：「世尊！何等是菩薩摩訶薩道？何等是非道？」佛言：「聲聞道非菩薩道，辟支佛道非菩薩道；一切種智道是菩薩摩訶薩道。須菩提！是名菩薩摩訶薩道，非道。」須菩提言：「世尊！諸菩薩摩訶薩般若波羅蜜，爲大事故起，所謂示是道，是非道。」佛言：「如是！須菩提！般若波羅蜜爲大事故起，所謂示是道，是非道。須菩提！是般若波羅蜜爲度無量衆生故起，爲利益阿僧祇衆生故起。般若波羅蜜雖作是利益，亦不受色，亦不受受、想、行、識，亦不受聲聞、辟支佛地。須菩提！般若波羅蜜是諸菩薩摩訶薩導，示阿耨多羅三藐三菩提，能令離聲聞、辟支佛地，住薩婆若。般若波羅蜜無所生，無所滅，諸法常住故。」須菩提言：「世尊！若般若波羅蜜

無所生、無所滅。云何菩薩摩訶薩行般若波羅蜜時應布施？云何應持戒？云何應修忍？云何應勤精進？云何應入禪定？云何應修智慧？佛告須菩提：「菩薩摩訶薩念薩婆若應布施，念薩婆若應持戒、忍辱、精進、禪定、智慧。是菩薩摩訶薩持是功德與衆生共之，迴向阿耨多羅三藐三菩提。若如是迴向，則具足修六波羅蜜及慈悲心諸功德。須菩提！若菩薩摩訶薩不遠離六波羅蜜，則不遠離薩婆若。以是故，須菩提！菩薩摩訶薩欲得阿耨多羅三藐三菩提，應學應行六波羅蜜。菩薩摩訶薩行六波羅蜜，具足一切善根，當得阿耨多羅三藐三菩提。以是故，須菩提！菩薩摩訶薩應習行六波羅蜜。」須菩提言：「世尊！云何菩薩摩訶薩應習行六波羅蜜？」佛言：「菩薩摩訶薩如是觀色，不合不散，受、想、行、識，不合不

散乃至一切種智不合不散。是名菩薩摩訶薩習行六波羅蜜。復次須菩提！菩薩摩訶薩應作是念：我當不住色中，不住受、想、行、識中，乃至不住一切種智中。如是應習行六波羅蜜。何以故？是色無所住，乃至薩婆若無所住。如是須菩提！菩薩摩訶薩以無住法習行六波羅蜜，應當得阿耨多羅三藐三菩提。須菩提！譬如士夫欲食菴羅果，若波羅那婆果，當種其子，隨時澆灌守護，漸漸生長，時節和合，便有果實得而食之。須菩提！菩薩摩訶薩亦如是，欲得阿耨多羅三藐三菩提，當學六波羅蜜，以布施攝取衆生，持戒、忍辱、精進、禪定、智慧攝取衆生，度衆生生死。以如是行，當得阿耨多羅三藐三菩提。是故須菩提！菩薩摩訶薩欲不隨他人語，當學般若波羅蜜，欲淨佛國土，成就衆生，欲坐道場，欲轉法輪，當學般若波

羅蜜！須菩提白佛言：「世尊！應如是學般若波羅蜜耶？」佛言：「菩薩應如是學般若波羅蜜。欲於諸法得自在，當學般若波羅蜜。何以故？學是般若波羅蜜，於一切諸法中得自在故。復次，般若波羅蜜，於一切諸法中最大。譬如大海，於萬川中最大；般若波羅蜜亦如是，於一切法中最大。以是故，諸欲求聲聞、辟支佛及諸菩薩道，應當學般若波羅蜜。檀波羅蜜乃至一切種智，須菩提！譬如射師，執如意弓箭，不畏怨敵，菩薩摩訶薩亦如是，行般若波羅蜜乃至一切種智，魔若魔天所不能壞。以是故，須菩提！菩薩摩訶薩欲得阿耨多羅三藐三菩提，應學般若波羅蜜。是行般若波羅蜜菩薩爲十方諸佛所念。」須菩提白佛言：「世尊！云何十方諸佛念是菩薩摩訶薩？」佛告須菩提：「菩薩摩訶薩行檀波羅蜜時，十方

諸佛皆念行尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜時，十方諸佛皆念云：何念？布施不可得，持戒、忍辱、精進、禪定、智慧不可得，乃至一切種智不可得。菩薩能如是不得諸法故，諸佛念是菩薩摩訶薩。復次，須菩提：諸佛不以色故念，不以受、想、行、識故念，乃至不以一切種智故念。須菩提言：「世尊！菩薩摩訶薩多有所學，實無所學。」佛言：「如是！如是！須菩提！菩薩多有所學，實無所學。何以故？是菩薩所學諸法皆不可得。」須菩提白佛言：「世尊！佛所說法，若略、若廣。於此法中，諸菩薩摩訶薩欲求阿耨多羅三藐三菩提，六波羅蜜若略、若廣，應當受持、親近、讀誦、讀誦已思惟、正觀、心、心數法不行故。」佛告須菩提：「如是！如是！菩薩摩訶薩略、廣學六波羅蜜，當知一切法略、廣相。」須

菩提言：「世尊！云何菩薩摩訶薩知一切法略廣相？」佛言：「知色如相，知受、想、行、識，乃至知一切種智如相，如是能知一切法略廣相。」須菩提言：「世尊！云何色如相？云何受、想、行、識，乃至一切種智如相？」佛告須菩提：「色如，無生、無滅、無住異，是名色如相；乃至一切種智如相，無生、無滅、無住異，是名一切種智如相。是中菩薩摩訶薩應學。復次，須菩提！菩薩摩訶薩知諸法實際時，知一切法略廣相。」世尊！何等是諸法實際？」佛言：「無際是名實際。菩薩學是際，知一切諸法略廣相。須菩提！若菩薩摩訶薩知諸法法性，是菩薩能知一切法略廣相。」世尊！何等是諸法法性？」佛言：「色性是名法性，是性無分無非分。須菩提！菩薩摩訶薩知法性故，知一切法略廣相。」須菩提白佛言：「世尊！復云何應知

一切法略廣相。佛言：若菩薩摩訶薩知一切法不合不散。須菩提言：世尊！何等法不合不散。佛言：色不合不散，受、想、行、識不合不散，乃至一切種智不合不散。有爲性、無爲性不合不散。何以故？是諸法自性無，云何有合有散？若法自性無，是爲非法，非法不合不散。如是，應當知一切法略廣相。須菩提言：世尊！是名菩薩摩訶薩略攝般若波羅蜜。世尊！是略攝般若波羅蜜中，初發意菩薩摩訶薩應學，乃至十地菩薩摩訶薩亦應學。是菩薩摩訶薩學是略攝般若波羅蜜，則知一切法略廣相。」

論釋曰：須菩提聞菩薩摩訶薩大利根相，所謂一波羅蜜邊能生五波羅蜜，行一波羅蜜即能具五波羅蜜，如上品中說。是事希有，故問佛：是菩薩發心已來，爲幾時能得如是方便。佛答：是菩薩發

心已來，除大菩薩，於餘衆生無量億阿僧祇劫。或有菩薩發心已來，無量億阿僧祇劫，大罪因緣覆心，故不見佛，不親近供養。是故問：是菩薩爲供養幾佛？佛答：是菩薩爲已供養如恆河沙等諸佛。上言無量億阿僧祇，今言恆河沙者，多數理同故。有菩薩久發心，雖多以華香供養諸佛，而未能種善根。作是念：我必當得果報，深心行六波羅蜜故。若以深心行六波羅蜜，爲阿耨多羅三藐三菩提，故作功德，是名種善根。是故第三問：種何等善根？佛答：是菩薩從初發心已來，具足行六波羅蜜，一切福德無不作者，一切善法無不修集。須菩提聞已，歡喜白佛：希有！世尊！是菩薩能如是行方便，所謂未斷諸煩惱，未離生死，而能勝斷煩惱，離生死法者。無始生死已來，集諸惡法，菩薩心後來，而能用後來心，不隨先所集惡

心，是爲希有！一切衆生無恩於菩薩，而菩薩常欲利益；是諸衆生或欲奪菩薩命，割截身體，菩薩欲以第一佛樂智慧命，欲與衆生，如是等是爲希有！佛可須菩提所說，欲令此事明了，故作譬喻：如日月照四天下，若無日月則百穀藥草及衆生無以生長。月是陰氣，日是陽氣，二氣和合，故萬物成長；是故日月於四天下，大有利益。菩薩亦如是，於四生中，以大悲心憐愍衆生故，能隨所願行一切善法；大智慧力故，破衆生著善法心。如是六波羅蜜等諸善增長成就，直至阿耨多羅三藐三菩提。又復衆生雖復有眼，若無日月，則無所見；衆生雖有世俗善根利智，不得般若波羅蜜照明，尚不得二乘，何況得阿耨多羅三藐三菩提！又復菩薩雖行五波羅蜜，不得般若波羅蜜，不得名波羅蜜，以不破著心故。若菩薩乃至

能自以身命布施，若無般若，其心易破，如無夫之婦，侵凌則易；若有般若，則不可破壞。菩薩雖行種種諸餘深法，不得般若，不名爲行波羅蜜，但名爲行善法，有量有盡故。此中說：譬喻轉輪聖王雖有千子，八萬四千小王及六寶，不得名爲轉輪聖王，不能飛到四天下；若天遣金輪寶至，乃得名爲轉輪聖王。菩薩亦如是，雖有布施等諸善法，不得般若波羅蜜故，不名爲菩薩；爲行六波羅蜜人，不能除障礙，行菩薩道故。譬如健將，善知戰法，器仗具足，不畏怨敵；健將即是菩薩，器仗是般若。增上慢者，未得聖道，意謂已得；菩薩說畢竟空法，是人行善法，心不同故，毀壞菩薩；外道、梵志等及諸魔民，乃至菩薩、旃陀羅者。菩薩、旃陀羅者，如魔品中說：聞魔來稱其名字而與授記，而生輕慢。復次，爲般若波羅蜜故，說五波羅

蜜，若人能直行諸法實相，則不爲說布施等，入般若初門。以人鈍根罪重故，種種因緣說以布施破慳，持戒折薄，諸煩惱，忍辱開福德門，能行難事，精進如風吹火，熾然不息，禪定攝心一定，觀諸法實相故。是五波羅蜜，皆趣向般若波羅蜜。如諸小王朝宗轉輪聖王，如一切衆流皆入大海，布施等諸善法亦如是，爲般若波羅蜜所守護故，得至薩婆若。問曰：五波羅蜜如諸川流，般若應如大海，今何以言五波羅蜜爲般若所守護，得入薩婆若？答曰：汝不聞先說般若，有種種名字耶？薩婆若即是般若異名，五波羅蜜福德，入般若波羅蜜中，即得清淨般若，般若清淨故得佛道，變名薩婆若。是故言入薩婆若，即是入般若。有人疑諸波羅蜜各各有力，何以獨言般若波羅蜜功用爲大？是故言譬如人之右手，自然穩便。

五波羅蜜如左手，不得般若波羅蜜，則所作不便。如人開目造事，所作皆成；如導師在前，餘伴隨逐，進止取捨，皆隨導師，不得自在。般若波羅蜜亦如是，導五波羅蜜，所可修集成辦，皆仰般若。此中佛自說譬喻：如轉輪聖王輪寶，在四兵前導，輪住餘寶則住；輪是般若波羅蜜，常在五波羅蜜前導，五波羅蜜隨逐。如般若初品中說：菩薩欲具足檀波羅蜜，不見施者、受者及財物，先籌量分別斷一切著，然後布施，是則般若在前導。如輪寶伏四天下已，常在王宮，住虛空中；聖王是菩薩，輪是般若，破諸魔民煩惱已，入薩婆若宮中住。是輪無所分別，我常在前，餘寶在後，無憎愛心，是可來，是不可來。般若無分別亦如是：檀波羅蜜隨我來，尸羅波羅蜜勿來，如經中廣說。此中佛自說因緣：一切法性無所能作。

※廿二面六行「六一」字，疑是「五一」字之誤。

須菩提聞是已，白佛言：若一切法性空無所有，云何菩薩行六波羅蜜能得阿耨多羅三藐三菩提？佛答：菩薩行般若，作是念：諸法雖畢竟空，衆生狂顛倒故，深著不解；我若不以方便力，則不可得度。方便者，所謂金色身、三十二相、八十隨形好、無量光明、神通變化，能以一指動十方三千大千國土，梵音說法，無厭色身，十力、四無所畏、十八不共法，無礙解脫，一切種智、大慈大悲等，具足無量諸佛法，然後能教化衆生，衆生必能信受。得如是力，假令妄語，人猶當信，何況實語！如經說：我雖知諸法實相，能入涅槃，但爲衆生故行檀波羅蜜等。如經中廣說，乃至不可以異事度衆生。須菩提白佛言：世尊！若諸波羅蜜畢竟空，故無差別，云何般若波羅蜜於諸波羅蜜中最尊？佛可須菩提，畢竟空中諸波羅蜜實無差別，若

無般若波羅蜜，諸波羅蜜畢竟空無差別，誰能知者？若無般若，五法云何得波羅蜜名字？五波羅蜜未入般若時，有差別，既入般若則無差別。如諸異色物，到須彌山邊，皆同一色，不得言餘物色皆同，何以獨稱須彌爲大！檀波羅蜜等亦如是，雖無差別，皆是般若力故，不得言何以獨稱般若爲大！須菩提雖蒙開釋，猶未善解，復以異塗而問世尊：若實義中無差別，云何般若於五波羅蜜爲上？先說未得聖道空，今說得聖道空，是故說第一實義。第一實義聖道，是最可信，是中亦無差別。佛可言：如是！如是！我說六波羅蜜分別，皆爲世俗故。何以故？世人不可但爲說諸法實相，聞則迷悶，生於疑悔，是故以第一義爲心，用世俗語言爲說；是故說分別有諸波羅蜜教化衆生。衆生實無有法，皆是空，不生不死，不退不起，色

等法亦如是。是故般若波羅蜜雖空，能示如是事故；譬如玉女寶，於衆女中最爲第一而最上，最妙。須菩提白佛：佛以何意故常說般若最上者？須菩提種種因緣說般若。五波羅蜜無差別，佛亦然。可其所說，而復言般若最上。佛言：般若波羅蜜守護一切善法，至薩婆若中住者，一切法雖空，若無般若，一切諸善法皆不能至。薩婆若善法者，五波羅蜜三十七品，大慈悲等諸菩薩法。問曰：若行諸善法，亦能至薩婆若，何以但說般若故得至？答曰：雖諸善法和合能破煩惱，得阿耨多羅三藐三菩提，而般若波羅蜜於中功力最大。譬如大軍摧敵，而主將得功名。復有人言：諸善法不得般若，不得至薩婆若。般若不得諸善法，獨能至薩婆若。如經說：師子雷音佛國，寶樹莊嚴，其樹常出無量法音，所謂一切法畢竟空，無生

無滅等。其土人民生便聞此法音故，不起惡心，得無生法忍。如此人何有布施、持戒等諸功德？亦有狂人、醉人從佛聞四諦，即時得道。如是等無有智慧，行餘法得道，無有是處！須菩提問佛：般若畢竟空，不取聖法，不捨凡夫法，云何佛言是般若？若能至薩婆若，住佛可其言，如是如是！是般若波羅蜜無取無捨。雖言取薩婆若，以不取法故取；住義亦如是。此中佛自說因緣：所謂一切法不取相。一切法者，色乃至菩提。是法虛誑，從因緣生，自性無故不取，不取故不捨，以不憶念取相故。須菩提言：若不憶念色等法，云何增長善根？善根不增長，云何得阿耨多羅三藐三菩提？佛答：若菩薩能滅一切法中憶念，即是空、無相、無作、解脫門，解脫即是諸法實相。雖有善根，以取相著心顛倒故不增長；譬如種穀，其苗雖好，穢草多

故不能增長。此中說因緣：以衆生憶念故，生三界善不善處；若無憶念則不著，不著則不生。須菩提從佛聞是已，思惟籌量，是法畢竟空無所有，若行是法，亦應無所得，無住處。何以故？因果相似故。是故問佛：菩薩作是念行般若，何所住，何所得？佛答：色等一切法中不住，乃至不住中亦不住，不取相故不著，不著故則不住。此中佛自說因緣：是菩薩不見法有可著可住，著者住者。此中法難破故，但說法，不說著者。

須菩提：若菩薩住是衆生空、法空，作是念：我能如是行者，則是失，則是離。何以故？般若波羅蜜是不著相，是菩薩以我心，外著空，內著我，不如般若行故，言遠離般若。何以故？般若波羅蜜是不著相，以性無故。上以著空故失，今以破空得般若，而著般若無性故失。

失故不得受記。若作是念：住般若中能生檀波羅蜜等者，亦復是失。問曰：上二失因緣可爾，今以何爲失？答曰：上二失以著空、著無性法故，更不能修檀波羅蜜等功德而生邪見故，作是念：若法都空，復何所行？是人以不著空、不著無性故，行檀波羅蜜等。作是念：能不著空無性而能行是功德，是爲眞道，是亦爲失，以其心有希望故。若失般若，則不能行檀波羅蜜乃至大悲。何以故？阿耨多羅三藐三菩提，是眞實法，般若波羅蜜與此相似，檀等諸善法不相似，以其取相著故。若菩薩自憶想分別一切法不取相，諸佛知是已得阿耨多羅三藐三菩提。不取相者，名畢竟空，不可取，諸相滅故，亦爲他開示演說，則失般若。是人以求空則失，無性亦失，我是凡夫生死人，諸煩惱未盡，云何能得？但隨佛語，自不分別，而定心。

爲他人說不取一切相是佛法。種種因緣，以此事開示教詔，是亦爲失。何以故？諸佛於諸法無所得，取義亦如是。是不取相法，乃至假名字不可說，何況有所得！諸法寂滅相，無諸戲論，一切語言道斷故。須菩提作是念：若空有失，空空中亦有失，無取法中亦有失，然不可無道。今當問佛：云何行者無是過失？佛答：若菩薩知諸法畢竟空，無所有，不可取，是法不可得知，如是行者則無失。菩薩著畢竟空，著無性，著菩薩所行道，佛說三種皆失。菩薩聞是已，則捨著心，今猶著佛所行未息，如佛所行，必是真道，我但當隨佛行，一切法無所有，不取相，是故爲失。今能如佛心中所得法，如是法相，佛亦無所得，無所得故不貪貴佛，不輕賤餘人，於一切衆生其心平等。此更問：如是，是清淨般若，無有過失，離自相不著，不離自相

是即有著法。若離自相，云何可行？佛答：若菩薩於一切法不生，是名能行般若。是菩薩不說是色若常，若無常等，是色、誰色。是色、破色，誰色、破人；色乃至一切種智，亦如是。若法如是畢竟空，推求不可得，是不可生。所以者何？性不能生性，無性不能生無性；如是等破顛倒，得實論議，皆是般若波羅蜜力。餘波羅蜜皆隨從；譬如轉輪聖王有所至處，四種兵常隨從。聖王福故，四種兵皆能飛；般若力故，諸餘法皆是實性，同至佛道。復次，譬如善御駕駟，不失平道，馬雖有致車之力，若無御者，則不能有所至；布施等如是，雖有功德果報力，無般若調御，不能至佛道。如是種種譬喻，五波羅蜜入般若中，雖無差別，以是事故而般若波羅蜜最尊、最妙。

須菩提聞佛種種因緣說般若最大，又聞不行是行般若波羅蜜，

是故問佛：世尊！何等是菩薩道？何等非菩薩道？佛答：二乘非菩薩道，雖有凡夫及諸煩惱非菩薩道，粗故不說；二乘同行空，同求涅槃，故說非菩薩道。粗事人不疑，細事人疑故。薩婆若是菩薩道，因中說果故。須菩提歡喜讚歎般若，作是言：世尊！般若波羅蜜爲大事故起，如經中廣說，乃至諸法常住故。須菩提難若般若無所生無所滅，云何行布施持戒等？佛答：以般若無所生無所滅，即是畢竟空，畢竟空故，不妨行六波羅蜜。菩薩聞種種因緣讚一切智，爲一切智故，行布施等法，是法爲度一切衆生故，迴向阿耨多羅三藐三菩提，是六波羅蜜功德，安立諸法實相中，迴向阿耨多羅三藐三菩提。如是菩薩具足六波羅蜜，慈等諸功德，不顛倒，正行善根故。須菩提問：菩薩云何應習六波羅蜜？佛答：菩薩觀色等諸法

不合不散。色等諸法顛倒煩惱和合故合，以正智慧觀故散；菩薩以利智慧深觀，則無法合，顛倒煩惱皆虛誑故非合；如先破染，染者事中說。是故菩薩知諸法本不合故亦無散，則不生高心。復次，菩薩不應作是念：我以真智慧令色等諸法清淨而住其中。何以故？色等法無住處，如地住於水，水住於風，風住於空，空無所住；以本無住處故，一切都無住。菩薩應如是住，無住法中得阿耨多羅三藐三菩提。此中說譬喻：子是般若波羅蜜，果是阿耨多羅三藐三菩提；若人欲得阿耨多羅三藐三菩提，應當種般若波羅蜜。子是人是行者，水是五波羅蜜；如人溉灌樹時，雖未見果實，時至則得。時節和合，是具足諸法。如經中說讚歎般若：若菩薩欲不隨他行，得諸法實相，若有邪見人來破壞，覺而不隨；若欲淨佛國土，坐道

場轉法輪，當學般若。須菩提問佛：如佛所教，菩薩當學般若？佛言：我教令學般若，須菩提作是念：一切法平等相，何以故？但教學般若？佛答：學是般若波羅蜜，於一切法得自在故。我教學般若波羅蜜。般若波羅蜜於一切法中最大，如佛於一切衆生中最尊；又如萬川大海爲大。如經中說射師喻。若菩薩能如是一切法中行自在，般若、魔若、魔人所不能勝，何況增上慢及邪見人！是菩薩爲十方諸佛所念，諸佛念義，如先說。此中佛說：若菩薩行六波羅蜜，亦能觀六波羅蜜畢竟空；如是人有大功夫故，爲諸佛所念。譬如勇士入陣，破賊而不被創，則爲主所念；菩薩亦如是，破諸煩惱賊，具足六波羅蜜，而不著六波羅蜜，則爲諸佛所念。諸佛不取是菩薩色故念，不取受、想、行、識故念。何以故？色等諸法，虛誑不實故；諸佛

觀是菩薩身如實相故念。須菩提歡喜言：菩薩多有所學，亦學佛法，亦學道法，亦學諸波羅蜜，亦學畢竟空，亦學起，亦學滅。凡人學起不能學滅，聲聞學滅不能學起，菩薩亦學起亦學滅，是故言多有所學。是起滅如幻如夢，畢竟空故，實無所學。佛可其言，自說因緣。菩薩所學，皆無所得。

須菩提白佛言：世尊，佛所說法，若略若廣，菩薩所應學，何以故？言所學皆無所得？須菩提意：如佛所說八萬四千法聚，十二部經，若廣若略，諸三乘人所學。此中說菩薩欲得阿耨多羅三藐三菩提，應學六波羅蜜若略若廣，學者應當受持，親近是法，讀誦、思惟、正觀，乃至入無相三昧，心心數法不行。菩薩能如是學，則能知諸法略、廣相。廣者，從八萬四千法聚已來無量佛法；略者，乃至小品、小

品中一品，一品中一段。復次，略者，知諸法一切空，無相，無作，無生，無滅等；廣者，諸法種種別相分別，如後善知識中說。須菩提問：云何菩薩知一切法略、廣相？佛答：若知諸法如如相者，所謂不生、不滅、不住、異。問曰：若如一相無生相，云何菩薩知是如故？知諸法總相、別相、總相、別相，即是略、廣相。答曰：如名諸法實相，常住不壞，不隨諸觀。菩薩得是如，即破無明邪見等諸顛倒，是人得實法故，一切世間法，總相、別相，了了知先。凡夫時智慧眼病，以無明顛倒覆故，不能實知。問曰：實法相者，所謂空、無相、無作，諸智滅，云何言得如實相故？了了知諸法總相、別相。答曰：我已先答，而汝於如中取相故，復作是難。汝若知如，不應作是難。是如畢竟無相故，不妨知諸法總相、別相，以智慧眼，了了故。復次，譬如人年既長大，乃知小

時所行，皆愚癡可笑。菩薩亦如是，入諸法實相起已，還在顛倒果報六情中念寂滅解脫樂，乃知世間六情所著，皆是虛誑可捨法，是名總相。於此中分別不淨，有上、中、下。無常、苦、空、無我等亦如是，乃至八萬四千種諸錯謬。復次，知如法性實際故，亦知諸法略、廣相。如法性實際差別義，如初品中說。此中佛說非際是實際。非際者，無相可取，無定法可著，得法性故。知色等十八性皆是法性。法性相者，佛說無分無非分。無分者，不可示此示彼，無分別，無相無量；無非分者，不著是無相、無量等破量相。法性二事妨故不見。一、有相有量；二、無相無量。有相有量爲粗，無相無量爲細，是故說法性相無分無非分。菩薩入三解脫門，住如等三實法，則能籌量知一切法總相、別相。須菩提聞佛答已，欲更問無量佛法異門事。佛

答：知一切法無合無散故，則知諸法總相別相。問曰：眼見二指有合散，云何言無合散？答曰：我先言肉眼所見，與牛羊無異，不可信！復次，三節皮肉具足爲指，指無定法。復次，設有指法，亦不盡合，一分合，多分不合，多分不合故，不得言指合。問曰：以少合故，名爲合！答曰：指少分不名爲指，云何言指合？若多分不合，不名爲不合，何以少分合故名爲合？是故不得言二指合。復次，指與分不異，一故，即是無指，無指故無合；入破一異門中，則都無合。如佛此中說：一切法自性無性，無故即是無法，無法云何有合散？須菩提聞佛說如法性實際，不合不散四門，知略廣相，是故須菩提言：世尊！是名略攝般若波羅蜜。略攝門是安隱道故，一切菩薩所應學。

大智度論卷第八十二

大智度論卷第八十三

龍 樹 菩 薩 造

姚秦三藏法師鳩摩羅什譯

釋方便品第六十九之下

經「世尊，是門，利根菩薩摩訶薩能入。」佛言：「鈍根菩薩亦可入是門，中根菩薩，散心菩薩亦可入是門；是門無礙，若菩薩摩訶薩一心學者皆入是門。懈怠、少精進、妄憶念、亂心者所不能入；精進、不懈怠、正憶念、攝心者能入。欲住阿鞞跋致地，欲速一切種智者能入。是菩薩摩訶薩如般若波羅蜜所說當學，乃至如檀波羅蜜所說當學；是菩薩摩訶薩當得一切智。是菩薩摩訶薩行般若波羅蜜，所有魔事欲起即滅。以是故，菩薩摩訶薩欲得方便力，當

行般若波羅蜜。若菩薩摩訶薩如是行，如是習，如是修，般若波羅蜜，是時，無量阿僧祇國土，現在諸佛，念是行，般若波羅蜜，菩薩何以故？是般若波羅蜜中生過去、未來、現在諸佛故。以是故，菩薩摩訶薩應如是思惟：過去、未來、現在諸佛所得法，我亦當得。如是，須菩提！菩薩摩訶薩應習般若波羅蜜，若如是習，般若波羅蜜，疾得阿耨多羅三藐三菩提。以是故，菩薩摩訶薩常應不遠離薩婆若念。若菩薩摩訶薩如是行，般若波羅蜜，乃至彈指頃，是菩薩福德甚多。若有人教三千大千世界中衆生，自恣布施，教令持戒、禪定、智慧，教令得解脫、解脫知見，教令得須陀洹果，乃至阿羅漢果，辟支佛道，不如是菩薩修般若波羅蜜，乃至彈指頃。何以故？是般若波羅蜜中生布施、持戒、禪定、智慧，須陀洹果，乃至辟支佛道。今十

方現在諸佛，亦從般若波羅蜜中生；過去未來諸佛亦從般若波羅蜜中生故。復次，須菩提！菩薩摩訶薩應薩婆若念，行般若波羅蜜，若須臾時，若半日，若一日，若一月，若百日，若一歲，若百歲，若一劫，若百劫，乃至無量無邊阿僧祇劫，是菩薩修是般若波羅蜜福德甚多，勝於教十方恆河沙等世界中衆生布施、持戒、禪定、智慧、解脫、解脫知見，教令得須陀洹果，乃至辟支佛道。何以故？諸佛從般若波羅蜜中生，說是布施、持戒、禪定、智慧、解脫、解脫知見，須陀洹果，乃至辟支佛道。

若有菩薩摩訶薩如般若波羅蜜所說住，當知是菩薩摩訶薩是阿鞞跋致，爲諸佛所念。如是方便力成就，當知是菩薩親近供養無量千萬億諸佛種善根，與善知識相隨，久行六波羅蜜，久修十

八空、四念處乃至八聖道分，佛十力乃至一切種智。當知是菩薩住法王子地，滿足諸願，常不離諸佛，不離諸善根，從一佛國至一佛國。當知是菩薩辯才無盡，具足得陀羅尼，身色具足，受記具足，故爲衆生受身。當知是菩薩善知字門，善知非字門，善於言，善於不言，善於一言，善於二言，善於多言，善知女語，善知男語，善知色乃至識，善知世間性，善知涅槃性，善知法相，善知有爲相，善知無爲相，善知有法，善知無法，善知自性，善知他性，善知合法，善知散法，善知相應法，善知不相應法，善知相應不相應法，善知如，善知不如，善知法性，善知法位，善知緣，善知無緣，善知陰，善知界，善知入，善知四諦，善知十二因緣，善知禪，善知無量心，善知無色定，善知六波羅蜜，善知四念處，乃至善知一切種智，善知有爲性，善知

無爲性；善知有性，善知無性；善知色觀，善知受、想、行、識觀，乃至善知一切種智觀；善知色、色相空，善知受、想、行、識、識相空，乃至善知菩提、菩提相空；善知捨道，善知不捨道；善知生，善知滅；善知住異；善知欲，善知瞋，善知癡；善知不欲，善知不瞋，善知不癡；善知見，善知不見；善知邪見，善知正見；善知一切見；善知名，善知色；善知名色；善知因緣，善知次第緣，善知緣緣，善知增上緣；善知行相；善知苦；善知集，善知滅；善知道；善知地獄，善知餓鬼；善知畜生，善知人；善知天；善知地獄趣，善知餓鬼趣，善知畜生趣，善知人趣，善知天趣；善知須陀洹，善知須陀洹果；善知須陀洹道；善知斯陀含，善知斯陀含果；善知阿那含，善知阿那含道；善知阿那含果；善知阿羅漢，善知阿羅漢果；善知阿羅漢道；善知辟支佛，善

知辟支佛果，善知辟支佛道；善知佛，善知一切種智，善知一切種智道；善知諸根，善知諸根具足；善知慧，善知疾慧，善知有力慧，善知利慧，善知出慧，善知達慧，善知廣慧，善知深慧，善知大慧，善知無等慧，善知實慧，善知過去世，善知未來世，善知現在世，善知方便，善知待衆生，善知心，善知深心，善知義，善知語，善知分別三乘。須菩提！菩薩摩訶薩行般若波羅蜜，生般若波羅蜜，修般若波羅蜜，得如是等利益。」

論釋曰：須菩提意以四種門雖安隱，以甚深故，利根者乃得入。佛答：無不入者。須菩提明智慧利根者能入，佛意但一心精進欲學者可入。譬如熱時清涼池，有目有足皆可入，雖近不欲入者則不入；四門般若波羅蜜池亦如是，四方衆生無有遮者，不懈怠者是

正精進，不妄念者是正念，不亂心者是正定，如等四門是正見，正見等安住是戒行。此八聖道能得般若波羅蜜。須菩提小乘智短故，但說利根者能入佛大乘大智故，說雖中根鈍根，八法和合故，能入是四門。佛此中以大悲氣故，說中根鈍根皆可得入。若菩薩能如般若所說六波羅蜜學，不久當得薩婆若。如聲聞法中，不但以正見得道，以八分合行故，大乘法亦如是，不但學般若故得薩婆若，與五波羅蜜合故得。是故說菩薩如所說般若波羅蜜，當學得一切智。問曰：上說但般若能至一切種智，今何以言與五波羅蜜合故得至？答曰：常說與六波羅蜜合故得至，或時有清淨佛國，但聞實相得至薩婆若，不用次第行諸波羅蜜。此中說菩薩得薩婆若，則般若功報已足，今但讚行般若人力勢。如經中說：是菩薩

行般若，所有魔事起即滅。

從上諸佛所念來至此，皆是讚菩薩行般若功德，乃至分別善知三乘。善知字門者，如文字陀羅尼中說。非字名，如法性、實際，此中無文字。略說義，是菩薩無量福德力故。善知二法，世間及涅槃。若厭世苦，則念涅槃；若欲沒涅槃，還念世間。集諸福德道故。善知字，破福德中顛倒故。善知無字，語不語，亦如是。一語者，以是一語能分別多少淨語不淨語。一語、二語、多語，男語、女語等，音聲各異。菩薩善知是事故，能伏諸邪道及諸豪勝。善知色乃至識二種相，若常若無常，如先說。善知捨道者，菩薩從一地至一地，捨下地不憂，得上地不貪；不捨道者，住是地中。邪見、次世間正見，一切見、學無學等諸見行者，十六行。善知須陀洹者，人也；須陀洹道者，見諦道。

也。須陀洹果，第十六心數法，及無漏戒等諸法。乃至佛亦如是。善知諸根者，善分別二十二根。有人言：觀可度衆生根有利鈍，具足者可度，不具足者未可度。又菩薩亦自知善根具足不具足，如鳥子自知毛羽具足，爾乃可飛。慧者，一切智慧總相。疾慧者，速知諸法。有人雖疾而智力不强，如馬雖疾而力弱；有人雖有强智力而不利，譬如鈍斧雖有大力，不能破物。出慧者，於種種難中能自拔出，亦能於諸煩惱中自拔出三界入涅槃。達慧者，究盡通達，於佛法中乃至漏盡，得涅槃，破壞諸法到法性中。廣慧者，道俗種種經書論議，於佛法中有無，無不悉知。深慧者，觀一切法無礙無相，不可思議。世間深智慧者，能知久遠事，利中有衰，衰中有利。大慧者，總具上諸慧名爲大；又復一切衆生中佛爲大，諸法中般若爲

大知佛信法與大法和合，故名爲大。無等慧者，於般若中不著般若，能如是深入，更無法可喻。復次，菩薩漸漸行道，到不可思議性中，無有與等者，故名無等。實慧者，如如意寶，自無定色，隨前物而變，般若亦如是，自無定相，隨諸法行。又如如意珠，隨願皆得，般若亦如是，有人行者能得佛願，何況餘者！過去已滅，未來未起，不得言有，不得言無，於是中能行實相，是名善知。現在法念念生滅，故不可知，而能通達，是名善知。現在世方便，名欲成辦其事，能具足因緣多少得所，於中不令有失。如菩薩雖行空，不證實際，雖行福德，亦復不著。待衆生者，如賈客，大將雖乘快馬，能疾到所止，故待衆人，菩薩亦如是，乘智慧快馬，雖能疾入涅槃，亦待衆生故不入。善知衆生種種善惡心。深心者，現在雖惡，其本則好，如父母搗子，

外惡內善。如佛度央掘魔羅，知其淺心雖惡，深心實善。菩薩觀衆生信等五善根，從深心中來，是時可度。義者有二，亦法亦名。語者語言，以名字名物。得善無礙，法無礙故，名善知義；辭無礙，樂說無礙故，名善知語。菩薩住是二善知中，能以三乘度衆生，是名善知分別三乘。如是難解故說，易解者不說。問曰：何以故先說善知色乃至識，後說知衆界入？何以先說善知緣？後說因次第緣，增上答曰：先廣說，後略說。復有人言：先五衆有三種善，不善無記。戒衆等五，亦名爲五衆緣。先略說，後廣說。

釋三慧品第七十之上

經須菩提白佛言：「世尊！菩薩摩訶薩云何行般若波羅蜜？」云何生般若波羅蜜？云何修般若波羅蜜？」佛言：「色寂滅故，色空故，

色虛誑故，色不堅實故，應行般若波羅蜜；受、想、行、識亦如是。如汝所問云何生般若波羅蜜，如虛空生故，應生般若波羅蜜。如汝所問云何修般若波羅蜜，修諸法破壞故，應修般若波羅蜜。」須菩提言：「世尊！行般若波羅蜜，生般若波羅蜜，修般若波羅蜜，應幾時？」佛言：「從初發意，乃至坐道場，應行、應生、應修般若波羅蜜。」須菩提白佛言：「世尊！次第心應行般若波羅蜜。」佛言：「常不捨薩婆若心，不令餘念得入，爲行般若波羅蜜，爲生般若波羅蜜，爲修般若波羅蜜。若心、心數法不行故，爲行般若波羅蜜，爲生般若波羅蜜，爲修般若波羅蜜。」

須菩提白佛言：「世尊！若菩薩摩訶薩修般若波羅蜜，當得薩婆若不？」佛言：「不。」世尊不修般若波羅蜜，得薩婆若不？」佛言：

「不。」世尊！修不修，得薩婆若不？佛言：「不。」世尊！非修非不修，得薩婆若不？佛言：「不。」世尊！若不爾，云何當得薩婆若？佛言：「菩薩摩訶薩得薩婆若，如如相。」世尊！云何如如相？「如實際。」云何如實際？「如法性。」云何如法性？「如我性，衆生性，壽命性。」世尊！云何我性，衆生性，壽命性？佛告須菩提：「於汝意云何？我，衆生，壽命法，可得不？」須菩提言：「不可得。」佛言：「若我，衆生，壽命不可得，云何當說有我性，衆生性，壽命性？若般若波羅蜜中不說有一切法，當得一切種智。」須菩提言：「世尊！但般若波羅蜜是不可說，禪波羅蜜，乃至檀波羅蜜亦不可說。」佛告須菩提：「般若波羅蜜不可說，檀波羅蜜乃至一切法，若有爲，若無爲，若聲聞法，若辟支佛法，若菩薩法，若佛法，亦不可說。」世尊！若

一切法不可說，云何說是地獄、是畜生、是餓鬼、是人、是天、是須陀洹、是斯陀含、阿那含、阿羅漢、辟支佛、是諸佛？佛告須菩提：「於汝意云何？是衆生名字實可得不？」世尊不可得。」佛言：「若衆生不可得，云何當說有地獄、餓鬼、畜生、人、天、須陀洹，乃至佛？如是須菩提！菩薩摩訶薩行般若波羅蜜時，應當學一切法不可說。」須菩提言：「世尊！菩薩摩訶薩學般若波羅蜜時，應學色、受、想、行、識，乃至應學一切種智？」佛告須菩提：「菩薩摩訶薩學般若波羅蜜時，應學色不增不減，乃至應學一切種智不增不減。」須菩提言：「世尊！云何色不增不減學？乃至一切種智不增不減學？」佛言：「不生不滅故學。」世尊！云何名不生不滅學？佛言：「不起不作諸行業，若有若無故。」世尊！云何不起不作諸行業，若有若

無。佛言：「觀諸法自相空故。」世尊云：「何應觀諸法自相空？」佛言：「應觀色、色相空，應觀受、想、行、識、識相空，應觀眼、眼相空，乃至意、色乃至法、眼、識、界乃至意識界、意識界相空，應觀內空、內相空，乃至應觀自相空、自相空相空，應觀四禪、四禪相空，乃至滅受想定、滅受想定相空，應觀四念處、四念處相空，乃至阿耨多羅三藐三菩提、阿耨多羅三藐三菩提相空。如是，須菩提，菩薩行般若波羅蜜時，應行諸法自相空。」世尊若色、色相空，乃至阿耨多羅三藐三菩提、阿耨多羅三藐三菩提相空，云何菩薩摩訶薩應行般若波羅蜜？」佛言：「不行，是名行般若波羅蜜。」世尊云：「何不行是行般若波羅蜜？」佛言：「般若波羅蜜不可得故，菩薩不可得，行亦不可得，行者行法，行處亦不可得故，是名菩薩摩訶薩行，不行。」

般若波羅蜜，一切諸戲論不可得故。「世尊！若不行是菩薩摩訶薩行般若波羅蜜，初發意菩薩云何行般若波羅蜜？」須菩提！菩薩從初發意已來，應學空無所得法。是菩薩用無所得法故，布施、持戒、忍辱、精進、禪定，以無所得法故，修智慧，乃至一切種智，亦如是。「須菩提！白佛言：「世尊！云何名有所得？云何名無所得？」佛告須菩提：「諸有二者，是有所得；無有二者，是無所得。」世尊！何等是二有所得？何等是不二無所得？」佛言：「眼、色爲二，乃至意、法爲二，乃至阿耨多羅三藐三菩提，佛爲二，是名爲二。」世尊！從有所得中無所得，從無所得中無所得。」佛言：「不從有所得中無所得，不從無所得中無所得。須菩提！有所得、無所得平等，是名無所得。如是，須菩提！菩薩摩訶薩於有所得、無所得平等法中應

學須菩提！菩薩摩訶薩如是學般若波羅蜜，是名無所得者，無有過失。」須菩提白佛言：「世尊，若菩薩行般若波羅蜜，不行有所得，不行無所得，云何從一地至一地，得一切種智？」佛告須菩提：「菩薩摩訶薩行般若波羅蜜時，不住有所得中，從一地至一地，何以故？有所得中住，不能從一地至一地，何以故？須菩提，無所得是般若波羅蜜相，無所得是阿耨多羅三藐三菩提相，無所得亦是行般若波羅蜜者相。須菩提，菩薩摩訶薩應如是行般若波羅蜜。」須菩提白佛言：「世尊，若般若波羅蜜不可得，阿耨多羅三藐三菩提亦不可得，行般若波羅蜜者亦不可得，云何菩薩摩訶薩分別諸法相，是色，是受，想，行，識，乃至是阿耨多羅三藐三菩提？」佛告須菩提：「菩薩摩訶薩行般若波羅蜜時，不得色，不得受，想，行，

識，乃至不得阿耨多羅三藐三菩提。「世尊！若菩薩摩訶薩行般若波羅蜜時，色不可得，乃至阿耨多羅三藐三菩提不可得，云何具足檀波羅蜜，乃至具足般若波羅蜜，入菩薩法位中，入已，淨佛國土，成就衆生，得一切種智，得一切種智已，轉法輪作佛事，度衆生生死？」佛告須菩提：「菩薩摩訶薩不爲色故行般若波羅蜜，乃至不爲阿耨多羅三藐三菩提故行般若波羅蜜。」須菩提白佛言：「世尊！菩薩爲何事故行般若波羅蜜？」佛言：「無所爲故行般若波羅蜜。何以故？一切諸法無所爲，無所作，般若波羅蜜亦無所爲，無所作，阿耨多羅三藐三菩提亦無所爲，無所作，菩薩亦無所爲，無所作。如是，須菩提！菩薩摩訶薩應行般若波羅蜜，無所爲，無所作。」

論釋曰：聽者聞種種讚般若功德，得善知一切事，而貴愛是般若波羅蜜，方便欲得。須菩提知衆人意，是故問佛：世尊！云何行般若？云何生？云何修？有人言：行者在乾慧地，生者得無生忍法，修者得無生忍法後，以禪波羅蜜熏修般若。佛答：五衆是一切世間心所行結縛處，涅槃是寂滅相，菩薩以般若波羅蜜利智慧力故，能破五衆通達令空，即是涅槃寂滅相。從寂滅出住六情中，還念寂滅相，知世間諸法皆是空虛誑不堅實，是名般若。行般若無定相故，不可得說。若有若無，言語道斷故。空如虛空，是故說如虛空生。又如虛空，虛空中無有法生，虛空亦不能有所生，所以者何？無法無形，無觸，無作相故。般若波羅蜜亦如是。復有人言：有是虛空，但以常法，無作故不能生，是爲定相。摩訶衍中，虛空名無法，不得說常。

不得說無常，不得言有，不得言無，非有非無亦不可得，滅諸戲論，無染無著，亦無文字。般若波羅蜜亦如是，能觀世間似如虛空，是名生般若波羅蜜。菩薩得般若已，入甚深禪定，以般若力故觀禪定及禪定緣，皆破壞。何以故？般若波羅蜜捨一切法，不著相故，是名修般若波羅蜜。聽者作是念：一切法皆有時節，是故須菩提問：般若波羅蜜應幾時行？佛答：從初發心，乃至坐道場應行。問曰：菩薩從初發心應行十地、六波羅蜜、三十七品，一切善法，何以但說行般若？答曰：須菩提，但問般若故。佛答：以行般若。又復是一切法皆與般若波羅蜜和合，以般若大故，不說餘法。問曰：般若波羅蜜無量無限，何以故以道場爲限？答曰：先已答，是般若到佛心中轉名薩婆若。理雖一名變故，言至道場應行。菩薩至道場發意已來

所得諸法皆捨，得無礙解脫故，皆通達三世。問曰：彈指頃六十念，念念生滅，云何一心常念薩婆若，不令餘念得入？答曰：心有二種：一者念念生滅心，二者相續次第生，總名一心。以相續次第生故，雖多名爲一心，是時不令貪恚等心相續得入。何以故？貪恚等心久住，則能障般若波羅蜜，念少則不能爲害，此爲新發意菩薩故。說復有大菩薩，雖行餘諸善法，皆與般若和合，能令念念中餘心不入。菩薩多於般若中起種種戲論，及諸邪心，是故佛教常念薩婆若，不令餘心得入。常念者，心不餘向，縱使死急事至，不忘薩婆若。般若波羅蜜行相者，所謂心心數法不行。問曰：凡夫人入無想定，若生無想天，聖人住有餘涅槃入滅盡定，一切聖人入無餘涅槃，心心數法皆不行，是則心心數法不行。菩薩行般若時，云何心

心數法不行。答曰：是事阿毗曇中說，非大乘中義。小乘、大乘種種差別，如先說，是故不應以阿毗曇難摩訶衍。復次，無相三昧中，色等諸相滅，故名無相，以無相故，不應生心心數法。此亦非無想定、滅盡定。問曰：無相義，佛種種說，或名見諦道，信行、法行爲無相，人以疾故，或說無色定，想微細難覺故，亦名無相；或以三解脫門中緣涅槃故，名無相。是故不得但以無相故，名心心數法不行，乃至緣涅槃無相法，心心數法不滅，何況緣有相法。答曰：見諦道中，無色定中說無相可爾，若言緣涅槃無相法，是事不然！佛常種種讚歎涅槃無相無量，不可思議法，即是無相無緣法。汝云何言緣。問曰：滅男、女色等相，故名無相，不言無涅槃相。行者取是涅槃相，生心心數法，是名緣。答曰：佛說一切有爲生法，皆是魔網，虛誑不實。

若緣涅槃心心數法是實，則失有爲虛誑相；若不實，不能見涅槃。是故汝言涅槃有相可緣，是事不爾！問曰：佛自說涅槃法有三相，云何言無相？答曰：是三相假名無實，何以故？破有爲三相故，說無生、無滅、無住異，無爲更無別相。復次，生相先已種種因緣破，生畢竟不可得故，云何有無生？離有爲相無爲相不可得，是故無爲但有名字，無有自相。復次，佛法真實寂滅無戲論，若涅槃有相，即是有定相可取，便是戲論，戲論故而生諍訟；若諍訟瞋恚，尚不得生天人中，何況涅槃！是故如佛說涅槃無相，無量不可思議，滅諸戲論。此涅槃相，即是般若波羅蜜，是故不應有心心數法。如先品說，菩薩行般若，離心非心相。若有非心相，應當難言；無心相云何行般若？今離此二邊，故不應難。復次，先世無明顛倒邪見因緣故，得

是身。是身中心心數法雖有善，因緣生故無自性，虛誑不實，是善心果報，受人天福樂，皆是無常故，能生大苦，亦是虛誑不實；何況不善無記心，因虛誑故，果亦虛誑。般若波羅蜜真故，心心數法不行。

須菩提聞是心心數法不行，故問佛世尊：修般若波羅蜜得薩婆若不？佛言：不。何以故？修名常行積集，皆應是心心數法力，是故言不修。修尚不得，何況不修！修不修者，是般若無爲法，故不修，能觀實相，故言修。二俱有過，故言不。問曰：若第三中有過，第四有何過？復言不。答曰：須菩提以取相著心問故，佛言不。以受修不修故，有非修非不修，是故佛言不。若不取相心，說非修非不修，則無有過。須菩提四種問，佛皆不聽，心惑故復問世尊。今云何當得薩婆

若佛答如如相。如亦不解，是故佛言如實際。問曰：如品中，須菩提自善說如，今云何有疑？答曰：是如無一定相，是故不得不問。若如有一定相者，便應已解；是如甚深無量故，須菩提有處解，有處不解。譬如大水，有人入深者，入淺者，皆名入水，不得言入淺者不入水。問曰：何以不以如喻實際，而以實際喻如？實際有何易解？故譬喻。答曰：如實際雖是一物，觀時異；如是諸法體性，實際是行者心取證。佛以須菩提得是實際爲證，故以爲譬喻。問曰：常說法性次如，實際次法性，今法性何以在後？答曰：今欲以我性、衆生性說畢竟空故，轉次在後。復次，從見諦道、學道中能觀諸法如；無學道中煩惱盡故，定心作證，定心作證故，於一切總相、別相中通達，名爲法性。諸法本生處名爲性，是故以法性喻實際。法性有聲聞分，有

大乘分須菩提於聲聞分中不疑，大乘分中有疑故問。佛欲以凡人所可解事爲證，故言如我性、衆生性、壽命性。須菩提更無所問，佛欲結句故，反問須菩提：於汝意云何？我法實有不須菩提得道，故言無。須陀洹尚不見我，何況阿羅漢！佛言：汝以小乘鈍智尚不得我，何況佛！佛以智慧求我不可得，云何可說？如我不可說有一切法亦如是。菩薩能行是不可說法故，當得薩婆若。不可說者，不可分別。若有若無，須菩提問：世尊！諸法若不可分別，云何分別說有地獄等五道？須陀洹等諸聖道？佛答：衆生無有定法，地獄但有假名字，云何當分別說有等？衆生及諸聖人，從分別衆生等故，有諸道名，衆生實不可得。如是，須菩提！菩薩應如是學，不可說般若波羅蜜。

須菩提問：世尊！菩薩應學色等諸法，今何以言學一切法不可說？佛答：菩薩雖應學色等法，但應作不增不減故學。不增不減義，如先說。此中佛自說得不增不減因緣：若菩薩學不生不滅法，即是學不增不滅。須菩提問：云何學不生不滅？佛答：不起不作諸行業，若有若無故。有名三有，欲有色有，無色有，無名斷滅邊，離八聖道，強欲求滅。以是二事，凡夫人起諸行業，若善，若不善，是菩薩知諸法實相，所謂不生不滅，是故不作三種業，不起業相應諸法，是名無作解脫門。不生不滅，是無相解脫門。復問：世尊！何等方便故，能不作不起諸行業？佛答：若菩薩能觀諸法自相空，所謂色、色相空，乃至阿耨多羅三藐三菩提，阿耨多羅三藐三菩提相空。菩薩爾時能作二事：一、能不作不起諸行業；二、能於一切法中行自相空。

復問：世尊！若色等法自相空，云何菩薩應般若波羅蜜中行？佛答：不行，是名菩薩般若中行。此中自說因緣：般若波羅蜜體不可得，行者行法、行處不可得。法空故，般若波羅蜜不可得，行處亦不可得；衆生空故，行者不可得。一切戲論不可得故，菩薩不行，名爲般若波羅蜜行。須菩提問：若不行是般若行者，初發心菩薩云何應行般若？須菩提意：若不行爲行者，初發心菩薩心則迷悶；若以行爲行者，是則顛倒，是故問。佛答：初發心菩薩應學無所得法，無所得法即是無行。學名以方便力漸漸行，所謂布施時，以無所得法故應布施。諸法實相畢竟空，畢竟空中無有法可得，若有若無，菩薩住如是智慧心中，應若多若少布施。布施物、與者、受者，平等觀故，所謂皆不可得；乃至薩婆若亦如是。須菩提作是念：有所得故

則是世間顛倒，無所得故。即是涅槃，是故問佛：云何有所得？云何無所得？佛略答：二相是有所得，無二相是無所得。二相者，眼一色一，兩一和合名爲二。以眼故知是色，以色故知是眼，眼色是相待法。問曰：若不見色時，亦有眼，云何眼不離色？答曰：以曾見色，故名爲眼。今雖不觀色，以本爲名，是故一切有爲法皆屬因緣，因屬果，果屬緣，無有定自在者。乃至意、法、菩薩、佛，亦如是。凡夫無智，各各分別，作善不善業，智者知是二法皆虛誑，屬因緣，不以是二爲二。須菩提問：是二法即是有所得，不二法即是無所得。世尊！從有所得法中無所得，從無所得法中無所得，爲緣諸法取相行道故，得是畢竟空無所得，爲不作緣不取相行道故，得是畢竟空無所得。若有所得中無所得者，有所得即是顛倒，行顛倒云何得實？若無

所得中得無所得者，無所得即是無所有，無所有云何能生無所有。佛以二俱過故，皆不聽。有所得，無所得，二事皆能平等觀，平等即是畢竟空無所得，因無所得破有所得，事既辦亦捨無所得，如是菩薩於有所得、無所得平等般若中應學。若菩薩能如是學，是名真無所得者，無有過失。從一地至一地，義亦如是。須菩提問：世尊！般若不可得，菩提不可得，菩薩不可得，云何菩薩學般若，分別諸法相，所謂惱相是色，苦樂相是受等。若菩薩行般若波羅蜜，色等法不可得，云何能具足檀波羅蜜等諸善法。云何能入菩薩位中。如經中廣說。佛語須菩提：菩薩不以得色等諸法相故行般若。復問：爲何等事故行般若。佛答：以無所得故行般若。何以故。一切法空、無相、無作、無起，般若波羅蜜、菩薩、菩提，亦無相、無作、無起。

菩薩爲一切法實相故行般若，非以顛倒故。須菩提！菩薩應如是無作般若中行，無作無起故。

大智度論卷第八十三

音釋

阿鞞跋致

梵語也此云不退轉鞞駢迷切

過

陟瓜切擊也

央掘魔羅

梵語也此云指髮掘其月切

摩訶衍

梵語也此云大乘衍以淺切

大智度論卷八十三 釋三慧品第七十之上

三三

大智度論卷第八十四

龍樹菩薩造

姚秦三藏法師鳩摩羅什譯

釋三慧品第七十之下

【經】須菩提白佛言：「世尊！若諸法無所爲、無所作，不應分別有三乘：聲聞、辟支佛、佛乘。」佛告須菩提：「諸法無所爲、無所作中，無有分別；有所爲、有所作中有分別。何以故？凡夫愚人，不聞聖法，著五受衆，所謂色、受、想、行、識，著檀波羅蜜，乃至著阿耨多羅三藐三菩提。是人念有是色，得是色，乃至念有是阿耨多羅三藐三菩提，得是阿耨多羅三藐三菩提。是菩薩作是念：我當得阿耨多羅三藐三菩提，我當度衆生生死。須菩提！我以五眼觀，尚不得色，乃至

阿耨多羅三藐三菩提。是狂愚人無目，而欲得阿耨多羅三藐三菩提，度脫衆生生死！須菩提白佛言：「世尊！若佛以五眼觀，不見衆生生死中可度者，今世尊云何得阿耨多羅三藐三菩提，分別衆生有三聚：正定、邪定、不定？」須菩提！我得阿耨多羅三藐三菩提，初不得衆生三聚，若正定、若邪定、若不定。須菩提！以衆生無法有法想，我以除其妄著，世俗法故說有得，非第一義。「世尊！不住第一義得阿耨多羅三藐三菩提耶？」佛言：「不也！」「世尊！顛倒得阿耨多羅三藐三菩提耶？」佛言：「不也！」「世尊！若不住第一義中得，亦不住顛倒中得，將無世尊不得阿耨多羅三藐三菩提耶？」佛言：「不也！我實得阿耨多羅三藐三菩提，無所住，若有爲相，若無爲相。須菩提！譬如佛所化人，不住有爲相，不住無爲

相，化人亦有來有去，亦坐亦立。須菩提！是化人若行檀波羅蜜，行尸羅波羅蜜，羼提波羅蜜，毗梨耶波羅蜜，禪波羅蜜，般若波羅蜜，行四禪，四無量心，四無色定，五神通，行四念處，乃至行八聖道分，入空三昧，無相三昧，無作三昧，行內空，乃至無法有法空，行八背捨，九次第定，佛十力，四無所畏，四無礙智，大慈大悲，得阿耨多羅三藐三菩提，轉法輪。是化人化作無量衆生，有三聚。須菩提！於汝意云何？是化人有行檀波羅蜜，乃至有三聚衆生不？須菩提言：「不也！」須菩提！佛亦如是，知諸法如化，如化人度化衆生，無有實衆生可度。如是，須菩提！菩薩摩訶薩行般若波羅蜜，如佛所化人行！須菩提白佛言：「世尊！若一切法如化，佛與化人有何等差別？」佛告須菩提：「佛與化人無有差別。何以故？佛能有所作，

化人亦能有所作。「世尊！若無佛，化獨能有所作不？」佛言：「能有所作。」須菩提言：「世尊！云何無佛，化能有所作？」須菩提譬如過去有佛名須扇多，爲欲度菩薩故，化作佛已，而自滅度。是化佛住半劫作佛事，授應菩薩行者，記已滅度。一切世間衆生，知佛實滅度，須菩提化人實無生無滅。如是，須菩提！菩薩行般若波羅蜜，當信知諸法如化。「世尊！若佛，佛所化人，無差別者，云何令布施清淨，如人供養佛，是衆生乃至無餘涅槃，福德不盡；若供養化佛，是人乃至無餘涅槃，福德亦應不盡耶？」佛告須菩提：「佛以諸法實相故，與一切衆生天及人作福田；化佛亦以諸法實相故，與一切衆生天及人作福田。」佛告須菩提：「置是佛及於化佛所種福德，若有善男子、善女人，但以敬心念佛，是善根因緣，乃至

畢苦其福不盡。須菩提！置是敬心念佛，若有善男子、善女人，但以一華散虛空中念佛，乃至畢苦其福不盡。須菩提！置是敬心念佛，散華念佛，若有人一稱南無佛，乃至畢苦其福不盡。如是，須菩提！佛福田中種其福無量。以是故，須菩提！當知佛與化佛無有差別。諸法法相無異故。須菩提！菩薩摩訶薩應如是行般若波羅蜜，入諸法實相中，是諸法實相不應壞。所謂般若波羅蜜相，乃至阿耨多羅三藐三菩提相不應壞。須菩提！佛言：「世尊！若諸法實相不應壞，佛何以壞諸法相？言是色、是受、想、行、識，是內法，是外法，是善法，是不善法，是有漏，是無漏，是世間，是出世間，是有諍法，是無諍法，是有爲法，是無爲法等。世尊！將無壞諸法相？」佛告須菩提：「不也！以名字相故，示諸法，欲令衆生解，佛不壞諸法法相。」

須菩提白佛言：「世尊！若以名字相故說諸法，令衆生解。世尊！若一切法無名無相，云何以名相示衆生欲令解？」佛告須菩提：「隨世俗法有名相，實無著處。須菩提！如凡人聞說苦，著名隨相。須菩提！諸佛及弟子不著名，不隨相。須菩提！若名著名，相著相，空亦應著空，無相亦應著無相，無作亦應著無作，實際應著實際，法性應著法性，無爲性應著無爲性。須菩提！是一切法但有名相，是法不住名相中。如是，須菩提！菩薩摩訶薩但名相中住，應行般若波羅蜜，是名相中亦不應著。」世尊！若一切有爲法但名相者，菩薩摩薩爲誰故發阿耨多羅三藐三菩提心，受種種勤苦？菩薩行道時，布施、持戒、行忍辱、勤精進、入禪定、修智慧、行四禪、四無量心、四無色定、四念處乃至八聖道分、行空行、無相行、無作行，佛十力乃至

具足大慈大悲！佛言：「如須菩提所說，若一切有爲法但名相者，菩薩摩訶薩爲誰故行菩薩道？須菩提！若有爲法但名相等，是名相，名相相空，以是故，菩薩摩訶薩行菩薩道得一切種智；得一切種智已，轉法輪，轉法輪已，以三乘法度脫衆生，是名相，亦無生、無滅、無住異。」

爾時，須菩提白佛言：「世尊！世尊說一切種智。」佛告須菩提：「我說一切種智。」須菩提言：「佛說一切智，說道種智，說一切種智，是三種智有何差別？」佛告須菩提：「薩婆若是一切聲聞、辟支佛智，道種智是菩薩摩訶薩智，一切種智是諸佛智。」須菩提白佛言：「世尊！何因緣故，薩婆若是聲聞、辟支佛智？」佛告須菩提：「一切名所謂內外法，是聲聞、辟支佛能知，不能用一切道，一切

種智。須菩提言：「世尊！何因緣故，道種智是諸菩薩摩訶薩智？」
佛告須菩提：「一切道，菩薩摩訶薩應知。若聲聞道、辟支佛道、菩薩道，應具足知，亦應用是道度衆生，亦不作實際證。」須菩提白佛言：「世尊！如佛說菩薩摩訶薩應具足諸道，不應以是道實際作證耶？」佛告須菩提：「是菩薩未淨佛土，未成就衆生，是時不應實際作證。」須菩提白佛言：「世尊！菩薩住道中，應實際作證。」佛言：「不也！」
佛言：「不也！」世尊住非道中，實際作證。」佛言：「不也！」世尊住道非道，實際作證。」佛言：「不也！」世尊住非道，亦非非道，實際作證。」佛言：「不也！」世尊菩薩摩訶薩住何處，應實際作證？」佛告須菩提：「於汝意云何？汝住道中，不受諸法故，漏盡心得解脫不？」須菩提言：「不也！」世尊！「汝住非道，漏盡心得解脫不？」

「不也！世尊！」汝住道非道，漏盡心得解脫不？「不也！世尊！」汝住非道亦非非道，漏盡心得解脫不？「不也！世尊！我無所住，不受諸法，漏盡心得解脫。」佛告須菩提：「菩薩摩訶薩亦如是，無所住，應實際作證。」須菩提言：「世尊！云何爲一切種智相？」佛言：「一相故名一切種智，所謂一切法寂滅相。復次，諸法行類相貌，名字顯示說，佛如實知，以是故名一切種智。」須菩提白佛言：「世尊！一切智、道種智、一切種智，是三智結斷有差別，有盡有餘不？」佛言：「煩惱斷無差別，諸佛煩惱習一切悉斷，聲聞、辟支佛煩惱習不悉斷。」世尊是諸人不得無爲法，得斷煩惱耶？」佛言：「不也！」世尊無爲法中可得差別不？」佛言：「不也！」世尊若無爲法中不可得差別，何以故說是人煩惱習斷，是人煩惱習不斷？」

佛告須菩提：「習非煩惱，是聲聞，辟支佛身，口有似淫欲、瞋恚、愚癡相，凡夫愚人爲之得罪。是三毒習，諸佛無有。」須菩提白佛言：「世尊，若道無法，涅槃亦無法，何以故分別說是須陀洹，是斯陀含，是阿那含，是阿羅漢，是辟支佛，是菩薩，是佛？」佛告須菩提：「是皆以無爲法而有分別，是須陀洹，是斯陀含，是阿那含，是阿羅漢，是辟支佛，是菩薩，是佛。」世尊實以無爲法故分別，有須陀洹乃至佛。」佛告須菩提：「世尊言說故有差別，非第一義，第一義中無有分別說。何以故？第一義中無言說，道斷結故說後際。」須菩提言：「世尊，諸法自相空中，前際不可得，何況說有後際！」佛告須菩提：「如是，如是，諸法自相空中，無有前際，何況有後際！無有是處，須菩提，以衆生不知諸法自相空故，爲說是前際，是後際，諸

法自相空中，前際、後際不可得。如是，須菩提！菩薩摩訶薩應以自相空法行般若波羅蜜。須菩提！若菩薩行自相空法，則無所著。若內法、若外法，若有爲法、若無爲法，若聲聞法、辟支佛法，若佛法。

須菩提白佛言：「世尊！常說般若波羅蜜，般若波羅蜜以何義故名般若波羅蜜？」佛言：「得第一度，一切法到彼岸，以是義故，名般若波羅蜜。復次，須菩提！諸佛、菩薩、辟支佛、阿羅漢，用是般若波羅蜜得度彼岸，以是義故，名般若波羅蜜。復次，須菩提！分別、籌量、破壞一切法，乃至微塵，是中不得堅實，以是義故，名般若波羅蜜。復次，須菩提！諸法如法性、實際，皆入般若波羅蜜中，以是義故，名般若波羅蜜。復次，須菩提！是般若波羅蜜無有法若合、若散，若有

色、若無色、若可見、若不可見、若有對、若無對、若有漏、若無漏、若有爲、若無爲、何以故？是般若波羅蜜無色、無形、無對、一相所謂無相。復次、須菩提、是般若波羅蜜能生一切法、一切樂說辯、一切照明。須菩提、是般若波羅蜜、魔若魔天、聲聞、辟支佛人及餘異道梵志、怨讐惡人、不能壞菩薩行般若波羅蜜。何以故？是人輩般若波羅蜜中皆不可得故。須菩提、是菩薩摩訶薩應如是行般若波羅蜜。義復次、須菩提、菩薩摩訶薩欲行深般若波羅蜜義、應行無常義、苦義、空義、無我義、亦應行苦智義、集智義、滅智義、道智義、法智義、比智義、世智義、他心智義、盡智義、無生智義、如實智義。如是、須菩提、菩薩摩訶薩爲般若波羅蜜義故、應行般若波羅蜜。須菩提、白佛言：「世尊、是深般若波羅蜜中、義與非義皆不可得、云何苦

薩爲深般若波羅蜜義故，應行般若波羅蜜。」佛告須菩提：「菩薩摩訶薩爲波般若波羅蜜義故，應如是念：貪欲非義，如是義不應行；瞋恚、愚癡非義，如是義不應行；一切邪見無義，如是義不應行。何以故？三毒如相，無有義，無有非義；一切邪見如相，無有義，無有非義。復次，須菩提，菩薩摩訶薩應作是念：色非義，非非義，乃至識非義，非非義，檀波羅蜜乃至阿耨多羅三藐三菩提非義，非非義。何以故？須菩提，佛得阿耨多羅三藐三菩提時，無有法可得，若義、若非義。須菩提，有佛無佛，諸法法相常住，無有是義，無有非義。如是，須菩提，菩薩摩訶薩行般若波羅蜜，應離義及非義。」須菩提白佛言：「世尊，何以故般若波羅蜜非義，非非義？」佛告須菩提：「一切有爲法無作相，以是故，般若波羅蜜非義，非非義。」世

尊！一切賢聖，若佛若佛弟子，皆以無爲爲義，云何佛言般若波羅
無有義非義？佛言：「雖一切賢聖，若佛若佛弟子，皆以無爲爲
義，亦不以增，亦不以損。須菩提！譬如虛空如，不能益衆生，不能損
衆生。如是，須菩提！菩薩摩訶薩般若波羅蜜無有增，無有損。」世
尊！菩薩摩訶薩不[※]學無爲般若波羅蜜得一切種智耶？佛
言：「如是如是，須菩提！菩薩摩訶薩學是無爲般若波羅蜜，當得
一切種智，不以二法故。」世尊！不二法能得不二法耶？佛言：「不
也！」須菩提言：「二法能得不二法耶？」佛言：「不也！」須菩提言：
「世尊！菩薩摩訶薩若不以二法，不以不二法，云何當得一切種
智？」須菩提無所得，即是得，以是得無所得。」

論釋曰：須菩提復問世尊：若一切法無作、無起相，云何分別有三

乘佛可其意，更說因緣。凡夫人未得道，著五衆故，亦著是空、無作、無起法，故生疑。云何分別有三乘？汝已得道，不著五衆，亦不著空、無作、無起。云何生疑？佛此中自說因緣：我以五眼，尚不得色等諸法，狂人無眼而欲得，須菩提問：若無法，無衆生，云何說有三聚衆生？佛答：我觀衆生一聚不可得，云何有三？但爲欲破顛倒故，分別有三：能破顛倒者名正定，必不能破顛倒者是邪定，得因緣能破，不得則不能破，是名不定，皆以世俗法故說，非是第一義。問曰：佛實住第一義中得道，何以答須菩提言不答？曰：須菩提爲新發意者故問，是故佛言不。何以故？顛倒有法中尚不可住，何況第一義無所有中住！是故須菩提疑：若二處不住，將無世尊不得正覺耶？佛答：實得阿耨多羅三藐三菩提道，但無所住。有爲性虛誑不實。

無爲性空無所有，故不可住。此中佛欲明了是事故，說化佛譬喻，如化佛不住有爲性，不住無爲性，而能來去說法。問曰：化人來去說法可爾，云何能行檀波羅蜜等？答曰：不言化人能實行，衆生眼見似有所行，是化事，如經中說，乃至須扇多。須菩提意已信伏，種種因緣，化佛、眞佛等無異，今猶少疑問佛：若無分別者，供養眞佛乃至無餘涅槃，福故不盡，供養化佛亦爾。不佛答：供養化佛、眞佛，其福不異。何以故？佛得諸法實相故，供養福無盡；化佛亦不離實相故，若供養者，心能不異，其福亦等。問曰：化佛無十力等諸功德，云何與眞佛等？答曰：十力等諸功德，皆入諸法實相；若十力等離諸法實相，則非佛法，墮顛倒邪見。問曰：若爾，眞化中定有諸法實相者，何以言惡心出佛身血得逆罪，不說化佛？答曰：經中但說惡

心出佛身血，不辯眞化。若供養化佛得具足福者，惡心毀謗亦應得逆罪；惡人定謂化佛是眞而惡心出血，血則爲出，便得逆罪。問曰：若爾者，毗尼中何以言殺化人不犯殺戒？答曰：毗尼中皆爲世間事，攝衆僧故結戒，不論實相。何以故？毗尼中有人有衆生，逐假名而結戒，爲護佛法故，不觀後世罪多少。又後世罪重，戒中便輕，如道人鞭打殺牛羊等，罪重而戒輕；讚歎女人，戒中重，後世罪輕。殺化牛羊，則衆人不嫌，亦不譏論，但自得心罪；若殺眞化牛羊，心不異者得罪等。然制戒意，爲衆人譏嫌故爲重，是故經中說意業最大，非身口業。如人大行布施不及行慈三昧，行慈三昧衆生無所得，而自得無量福；邪見斷善根人，不惱衆生而入阿鼻地獄。是故供養化佛、眞佛，以心等故，其福不異。復次，此中佛說，置是化佛

光相具足，有人見石泥像等，慈心念佛，是人乃至畢苦其福不盡。佛言：復置泥像，若有恭敬心，雖不見佛像，念佛故以華散空中，其福亦得畢苦。復置散華，但一稱南無佛，是人亦得畢苦其福不盡。問曰：云何但空稱名字，便得畢苦其福不盡？答曰：是人曾聞佛功德，能度人老病死苦，若多若少供養，及稱名字，得無量福，亦至畢苦不盡。是故福田無量故，雖輒心布施，其福亦無盡。如是種種因緣譬喻故，眞佛化佛無異，於佛福田供養者，其福無量，以一切法實相無別無異故。爾時須菩提問佛：世尊！若諸法實相無壞故，二佛無異，今佛分別說諸法，是色，是受，想，行，識，乃至是有爲，是無爲法，將無壞諸法相耶？佛答：須菩提！佛雖種種分別說諸法，但以言說，欲令衆生得解脫，心無所著。若二佛共語，不應說諸法名字，以

衆生無及佛者，欲牽引令解故，說是善、是惡。如法華經說火宅，以三乘引出諸子，但以名相說諸法，不壞第一義。須菩提問：雖以名相爲衆生說，無有實事，將無虛妄耶？佛答：聖人隨世俗言說，於中無有名相著處。佛此中自說因緣：如凡夫說苦，著名取相；諸佛及弟子，口說苦而心不著，若著不名苦。聖諦苦諦即是名相等，無有定實。凡夫著者亦是名相，無有定實，云何空名相中著空名相？若空名相中著名相者，空亦應著空，無相亦應著無相，無作亦應著無作，乃至無爲性亦應著無爲性。是法皆如凡夫苦諦相，但有名相，名相亦不住名相中。菩薩入是名相等諸法門中，住是名相般若中，應觀一切法無有實。須菩提問：若一切法但有名相，菩薩爲何等故發心？如經中說。佛答：若一切法但有名相者，名相中名相

亦空，是法皆畢竟空，入如法性實際中，是故菩薩能發阿耨多羅三藐三菩提，乃至能以三乘度衆生。若諸法有定實，非名相者，即是無生滅，無生滅故，無苦、無集、無盡、無道，云何以三乘度衆生？若諸法但是空名相，無實者，亦無生滅，無生滅故，無苦、集、盡、道，亦云何可度？今菩薩知一切法名相等空，則離世間顛倒，亦知名相空，亦離名相空，如是離有離無處中道，能度衆生。佛意：菩薩行是中道般若，得一切種智。

爾時，須菩提欲難故，先定佛語。乃問：世尊說一切種智耶？佛言：我說一切種智。復問：佛常說三種智，三種智有何差別？佛答：薩婆若是聲聞、辟支佛智，何以故？一切名內外十二入，是法聲聞、辟支佛總相智，皆是無常、苦、空、無我等。道種智，是諸菩薩摩訶薩智。道有

四種：一者、人天中受福樂道，所謂種福德；并三乘道爲四。菩薩法應引導衆生，著大道中；若不任入大道者，著二乘中；若不任入涅槃者，著人天福樂中，作涅槃因緣。世間福樂道，是十善布施諸福德；三十七品是二乘道；三十七品及六波羅蜜，是菩薩道。菩薩應了了知是諸道。菩薩以佛道自爲爲人，以餘三道但爲衆生，是菩薩道。種智須菩提問：何以道種智爲菩薩事？佛答：菩薩應具足一切道，以是道化衆生，雖出入是道，未教化衆生，淨佛國土而不取證，具足是事已，然後坐道場，乃取證。是故，須菩提！道種智是菩薩事。須菩提復問：是菩薩住何處實際作證？須菩提意：若住道中作證，是事不然，有二過故：一者、有結使人，不應有畢竟清淨正智，若有則與佛無異；若異者，有煩惱習氣，故應有錯謬；二者、一切有爲

法皆是虛誑，和合故有，假名無有定實，是故佛言不也。若住道中，尚不得，何況非道！道非道亦有二過故：非道非不道，以著心取相故，亦言不也。爾時，須菩提意或作是念：佛所得道甚深，不可得底，是故復問：菩薩住何處實際作證？佛反問須菩提：問曰：佛何以故不直答而反問須菩提？答曰：須菩提既於所得道中了了無惑，貴尚佛所證故，四句戲論，如有著心不了故問，是故佛以須菩提所得證反問：汝得道時住四句中得證耶？答言：不也！我無所住而得漏盡。汝以無所住而心得解脫，當知菩薩摩訶薩亦如是，不住四句而證實際，是故佛反問。復有人言：四種答中，是名反問答。問曰：須菩提住金剛三昧心，得解脫，云何言不住道中？答曰：住，名取相定，有是法；是人更求無爲勝法故，不名爲住，有爲法，爲不用故，不

於中住。復有人言：是名相，凡夫法中便有分別，是金剛，是解脫；得無相法，則無所分別。佛爲無相法故，反問須菩提，汝不應以名相故問，汝不應以名相爲難。一切種智是佛智。一切種智，名一切三世法中通達無礙智，知大小精粗，無事不知。佛自說一切種智義，有二種相：一者通達諸法實相故寂滅相，如大海水中風不能動，以其深故波浪不起，一切種智亦如是，戲論風所不能動；二者一切諸法可以名相文字言說，了了通達無礙，攝有無二事故，名一切種智。有人言：十力、四無所畏、四無礙法、十八不共法，盡是智慧相和合，名爲一切種智。復有人言：金剛三昧次第得無礙解脫故，若大小、近遠、深淺、難易，無事不知。如是等種種無量因緣，名一切種智。須菩提聞是已，問：佛智慧故，有上、中、下分別，煩惱斷復有差

別不佛言：無差別。斷時有差別，斷已無差別。譬如刀有利鈍，斷時有遲速，斷已無差別。如來煩惱及習都盡，聲聞辟支佛但煩惱盡，而習氣有餘。須菩提問：佛世尊三種斷，是有爲、是無爲？佛答：皆是無爲。復問：世尊！無爲法中可得差別不？佛答：是法無相無量，云何可得差別？復問：世尊！若無差別，云何說是斷中有餘，是斷中無餘？須菩提！是習不名真煩惱，有人雖斷一切煩惱，身口中亦有煩惱相出，凡夫見聞是相已，則起不清淨心。譬如蜜婆私吒阿羅漢，五百世在獼猴中，今雖得阿羅漢，獨騰跳樹木，愚人見之，即生輕慢，是比丘似如獼猴；是阿羅漢無煩惱心，而猶有本習。又如畢陵伽婆蹉阿羅漢，五百世生婆羅門中，習輕憊心故，雖得阿羅漢，猶語恆水神言：小婢！止流！恆神瞋恚，詣佛陳訴，佛教懺悔，猶稱小婢！如

是等身、口業煩惱習氣，二乘不盡，佛無如是事。如一婆羅門惡口，一時以五百事罵佛，佛無愠色；婆羅門心乃歡喜，即復一時以五百善事讚歎於佛，佛亦無喜色。當知佛煩惱習氣盡故，好惡無異。又復佛初得道，實功德中出好名聲，充滿十方，唯佛自知，而孫陀梨梵志女，殺身謗佛，惡名流布；佛於此二事，心無有異，亦不憂喜。又入婆羅門聚落中，空鉢而出；天人種種供養。又復三月食馬麥；釋提桓因恭敬，以天食供養。阿羅婆伽林中，棘刺寒風，佛在中宿；又於歡喜園中，在天白寶石上，柔軟滑澤，又敷天臥具；於此好惡事中，心無憂喜。又提婆達多瞋心，以石墮佛，羅睺羅敬心，合手禮佛；於此二人，其心平等，如愛兩眼。如是等種種干亂，無有異想，譬如真金，燒磨鍛煉，其色不變。佛經此衆事，心無增減，是故可知諸

佛愛恚等諸煩惱習氣都盡。須菩提意：若諸法實相中，若道，若涅槃無所有，若無所有，何以分別是須陀洹乃至辟支佛習氣未盡，佛習氣盡？佛言：三乘聖人，皆以無爲法而有差別。雖因無爲有差別，而有爲法中可得說。須菩提欲定佛語，故問：世尊，實以無爲法故有差別耶？佛答：世俗法語言名相故可分別，第一法中無分別。何以故？第一義中一切語言道斷，以一切心所行斷故；但以諸聖人結使斷故，說有後際。後際者，所謂無餘涅槃。須菩提問：世尊，諸法自相空故，前際不可得，何況後際？何以故？因前際故有後際。佛可其意，以衆生不知諸法自相空故，說是前際，是後際，自相空諸法中，前後際不可得。何以故？若先有生，則後有老死；若離老死有生，是則不死而生，是生無因無緣；若先老死後有生者，不生云何。

有老死。先後既不可得，一時亦不可得，以是故說自相空法中，無有前後際。佛言：如是須菩提，菩薩應以自相空法行般若，內外法乃至佛法不著故。

問曰：上來常說般若波羅蜜相，今何以更問？答曰：不但問相，人常說般若波羅蜜，般若波羅蜜以何義故名般若？佛言：以第一度，一切法到彼岸，名般若波羅蜜。第一度者，聲聞人以下智度，辟支佛以中智度，菩薩以上智度，故名第一度。復次，煩惱有九種，上、中、下各有三品；智慧亦有九種，下下智慧從鈍根須陀洹來，乃至上上是第一聲聞舍利弗等；上中是大辟支佛，上上是菩薩。以上上智慧度故，名第一度。聲聞、辟支佛但總相度，於別相少；菩薩一切法總相、別相皆了了知，故名第一度。復次，菩薩度時，智慧徧滿可知。

法中，二乘人可知法中不能徧滿，是故名第一度。復次，第一度者，大乘福德、智慧、六波羅蜜、三十七品具足滿，故安隱度。又十方諸佛、大菩薩諸天皆來佐助，安隱得度。如人乘七寶船，牢治行具，上有種種好食，有好導師，遇隨意好風，則爲好度。若人乘草椳度，恐怖，不名好度。復次，佛說三乘人，以是般若波羅蜜度到彼岸涅槃，滅一切憂苦，以是義故，名般若波羅蜜。復次，是般若波羅蜜中一切法，內外大小，思惟籌量，分別推求，乃至如微塵不得堅實，既到微塵，則不可分別；心心數法，乃至一念中，亦不可分別。是般若波羅蜜中，心、色二法破壞，推求不得堅實，以是義故，名般若波羅蜜。復次，般若名慧，波羅蜜名到彼岸，彼岸名盡一切智慧邊。智慧名不可破壞相，不可破壞相即是如法性實際，以其實故，不可破壞。

是三事攝入般若中故，名爲般若波羅蜜。復次，般若波羅蜜，無有法與法有合有散，畢竟空故。是般若無色、無形、無對，一相所謂無相，是義如先說。如是等種種因緣故，名般若義。今當說般若力，所謂般若能生一切智慧、禪定等諸法，能生一切樂說辯才。以般若力故演說一句，種種莊嚴窮劫不盡。星宿日月不能照處，般若能照，能破邪見無明闇故。魔若魔人、求聲聞、辟支佛人、外道、惡人所不能壞。何以故？菩薩行般若，此諸惡人於般若中皆不可得故。復次，若行者，一心信受，諷誦，諸惡不能得便，何況正憶念，如說行。如是，須菩提！菩薩應行般若義。般若義者，所謂無常義、苦、空、無我義、四諦智、盡智、無生智、法智、比智、世智、知他心智、如實智義故。應行般若。是般若如大海有種種寶物，或大或小，唯一是如意寶。般

若波羅蜜亦有種種諸智慧寶，無常等四聖行，十智，唯有如實智，如如意寶。問曰：如先品說，若常，若無常等行，不名行般若波羅蜜。今何以言行無常等義故，應行般若波羅蜜？答曰：我已先答，無常有二種：若著心戲論無常，是不名行般若；若以無著心不戲論無常，爲破常倒，又不自生著心，是名行般若。問曰：三藏中但有十智，此中何以有如實智？答曰：是故名大乘，大法能受小法，小不能受大。問曰：十智各各有體相，如實智有何等相？答曰：有人言：能知諸法實相，所謂如法性實際，是名如實智相。佛此中說如實智，唯是諸佛所得。何以故？煩惱未盡者，猶有無明故，不能知如實。二乘及大菩薩，習未盡故，不能徧知一切法，一切種，不名如實智；但諸佛於一切無明盡無遺餘故，能如實知。問曰：若除佛更無如實智者，

二乘云何得涅槃？大菩薩得無生忍。答曰：如實智有二種：一者徧滿具足；二者未具足。具足者佛，不具足者二乘及大菩薩。譬如闇室中爲有所作，故燃燈，所爲已辦，後來燈，其明益增。黑闇有二分：一分初燈已除，第二分後燈所除。第二分闇與初燈明和合，若不爾，第二燈則無所用。如是，二乘及大菩薩智慧，雖已破無明，佛智慧所除無明分，是諸人所不能除。不得言初燈無照，如是，不得言二乘及菩薩智慧是徧如實知。徧如實智是佛，但如實智，二乘及菩薩所共。爾時，須菩提問佛：世尊！若深般若中義非義不可得，云何言菩薩爲深般若義？故行般若？佛答：貪欲等煩惱非義，不應行者，諸法有三分：貪欲等諸煩惱是非義；六波羅蜜等諸善法是義；色等法無記故，非義非非義。若人於煩惱及行煩惱者中，生怨憎

心於六波羅蜜等諸善法及行善法者中，生愛念心；於色等無記法及行無記法者中，即生癡心。如經中說：凡人得受樂時生貪心，受苦時生瞋心，受不苦不樂時生癡心。是故說菩薩應作是念：欲貪等非義，不應念以爲非，如經廣說。此中自說因緣：惡法、善法、無記法，一如相，無有義、非義，如相無二無分別故。復次，佛得道時，不見一法若義若非義。諸法實相，有佛無佛常住，不作義、非義。若如是知，即是義，但破分別心故，說義、非義不應行。如是，須菩提！菩薩應行是離義、非義般若波羅蜜。須菩提復問：何緣故般若、非義、非義？佛答：一切法無作無起相故，無所能作，云何般若波羅蜜作義以非義？須菩提復問：世尊！若一切諸佛及弟子，皆以無爲法爲義，佛何以說般若波羅蜜不能作義以非義？佛答：一切聖人雖以

無爲法爲義，不作義以非義，無增無損故。此中說譬喻：如虛空如不能益衆生，不能損衆生，虛空無法故，無有義以非義，何況虛空如虛空雖無法，一切世間因虛空故得有所作；般若波羅蜜亦如是，雖無相無爲，而因般若能行五波羅蜜等一切佛道法。以著心故，說般若無義非義；無著心故，說第一實義。以世諦故說言義，第一義中無有義。復次，般若有二種：一者有爲，二者無爲。學有爲般若，能具足六波羅蜜，住十地中，學無爲般若，滅一切煩惱，習成佛道。今須菩提問佛：世尊！菩薩學無爲般若得一切智，云何言無義？佛答：雖得薩婆若，不以二法故得。分別取相者，是名二法。復問：不二法能得不二法耶？佛答：不也！何以故？不二法即是無爲，無爲無有得不得相，是無爲法不可行故。復問：若以不二法不得，可以二

法得不二法不答言不也何以故？二法虛誑不實故，云何行不實而得實法？復問：世尊！若不以二、不以不二，云何當得一切種智？佛答：無所得，即是得。此中二、不二，即是無分別，皆無所得。是無所得，不以有所得為行，雖行有為法，得是無所得，心不取相故無所得。何以故？與空、無相、無作合行故。

大智度論卷八十四

音釋

憊

莫結切 都回切 與埴同 輕易也

鍛

丁貢切 治金曰鍛

杖

房越切 禱杖也

大智度論卷第八十五

龍 樹 菩 薩 造

姚秦三藏法師鳩摩羅什譯

釋道樹品第七十一

經須菩提白佛言：「世尊！是般若波羅蜜甚深！世尊！諸菩薩摩訶薩不得衆生，而爲衆生求阿耨多羅三藐三菩提，是爲甚難！世尊！譬如人欲於虛空中種樹，是爲甚難！世尊！菩薩摩訶薩亦如是，爲衆生故，求阿耨多羅三藐三菩提，衆生亦不可得。」佛告須菩提：「如是！如是！諸菩薩摩訶薩所爲甚難，爲衆生故，求阿耨多羅三藐三菩提，度著吾我顛倒衆生。須菩提！譬如人種樹，不識樹根、莖、枝、葉、華、果，而愛護澆灌，漸漸長大，華、葉、果實成就，皆得用之。如是，

須菩提！諸菩薩摩訶薩爲衆生故，求阿耨多羅三藐三菩提，漸漸行六波羅蜜，得一切種智，成佛樹，以葉華果實益衆生。須菩提！何等爲葉益衆生？因菩薩摩訶薩得離三惡道，是爲葉益衆生。何等爲華益衆生？因菩薩得生刹利大姓、婆羅門大姓、居士大家、四天王天處，乃至非有想非無想處，是爲華益衆生。何等爲果益衆生？是菩薩得一切種智，令衆生得須陀洹果、斯陀含果、阿那含果、阿羅漢果、辟支佛道、佛道，是衆生漸漸以三乘法，於無餘涅槃而般涅槃，是爲果益衆生。是菩薩摩訶薩，不得衆生實法，而度衆生，令離我顛倒著，作是念：「一切諸法中無衆生，我所爲衆生求一切種智，是衆生實不可得。」須菩提白佛言：「世尊！當知是菩薩爲如佛。何以故？是菩薩因緣故，斷一切地獄種，一切畜生種，一切餓鬼

種，斷一切諸難，斷一切貧窮下賤道，斷一切欲界、色界、無色界。」
佛言：「如是如是！須菩提！當知是菩薩摩訶薩如佛。須菩提！若菩薩摩訶薩不發心求阿耨多羅三藐三菩提，世間則無過去、未來、現在諸佛，世間亦無辟支佛、阿羅漢、阿那含、斯陀含、須陀洹；三惡趣及三界亦無斷時。須菩提！汝所說是菩薩摩訶薩當知如佛，如是如是！須菩提！當知是菩薩實如佛。何以故？以如故說如來，以如故說辟支佛、阿羅漢，一切賢聖；以如故說爲色乃至識，以如故說一切法，乃至有爲性、無爲性。是諸如，如實無異，以是故說名爲如。諸菩薩摩訶薩學是如，得一切種智，得名如來。以是因緣故，說菩薩摩訶薩當知如佛，以如相故。如是，須菩提！菩薩摩訶薩應學如般若波羅蜜，菩薩學如般若波羅蜜，則能學一切法如學一切法。

如，則得具足一切法如；具足一切法如已，於一切法如得自在；於一切法如得自在已，善知一切衆生根，善知一切衆生根已，知一切衆生根具足，亦知一切衆生業因緣；知一切衆生業因緣已，得願智具足；願智具足已，淨三世慧；淨三世慧已，饒益一切衆生；饒益一切衆生已，淨佛國土；淨佛國土已，得一切種智；得一切種智已，轉法輪；轉法輪已，安立衆生於三乘，令入無餘涅槃。如是，須菩提，菩薩摩訶薩欲得一切功德，自利利人，應發阿耨多羅三藐三菩提心。須菩提白佛言：「世尊，是諸菩薩摩訶薩，能如說行深般若波羅蜜，一切世間天及人，阿修羅，應當爲作禮。」佛告須菩提：「如是，如是，是菩薩摩訶薩，能如說行般若波羅蜜，一切世間天及人，阿修羅，應當爲作禮。」世尊是初發意菩薩摩訶薩，爲衆

生故求阿耨多羅三藐三菩提，得幾所福德？」佛告須菩提：「若千世界中衆生，皆發聲聞、辟支佛意，於汝意云何？其福多不？」須菩提言：「甚多無量！」佛告須菩提：「其福不如初發意菩薩摩訶薩百倍、千倍、巨億萬倍，乃至算數譬喻所不能及。何以故？發聲聞、辟支佛意者，皆因菩薩出故，菩薩終不因聲聞、辟支佛出。二千世界、三千大千世界中亦如是。置是三千大千世界中住聲聞、辟支佛地者，若三千大千世界中衆生皆住乾慧地，其福多不？」須菩提言：「甚多無量！」佛言：「不如初發意菩薩百倍、千倍、巨億萬倍，乃至算數譬喻所不能及。置是住乾慧地衆生，若三千大千世界中衆生，皆住性地、八人地、見地、薄地、離欲地、已辦地、辟支佛地，是一切福德，欲比初發意菩薩百倍、千倍、巨億萬倍，乃至算數

譬喻所不能及。須菩提！若三千大千世界中初發意菩薩，不如入法位菩薩百千萬倍，巨億萬倍，乃至算數譬喻所不能及。若三千大千世界中入法位菩薩，不如向佛道菩薩百千萬倍，巨億萬倍，乃至算數譬喻所不能及。若三千大千世界中向佛道菩薩，不如佛功德百千萬倍，巨億萬倍，乃至算數譬喻所不能及。」

須菩提白佛言：「世尊！初發心菩薩摩訶薩，當念何等法？」佛言：「應念一切種智。」須菩提言：「何等是一切種智？一切種智何等緣？何等增上？何等行？何等相？」佛告須菩提：「一切種智無所有，無念，無生，無示。如須菩提所問，一切種智何等緣？何等增上？何等行？何等相？須菩提！一切種智無法緣，念爲增上，寂滅爲行，無相爲相。須菩提！是名一切種智緣、增上行、相。」須菩提白佛言：「世

尊！但一切種智無法，色、受、想、行、識亦無法，內外法亦無法，四禪、四無量心、四無色定、四念處、四正勤、四如意足、五根、五力、七覺分、八聖道分、空三昧、無相三昧、無作三昧、八背捨、九次第定、佛十力、四無所畏、四無礙智、十八不共法、大慈、大悲、大喜、大捨、初神通、第二、第三、第四、第五、第六神通、有爲相、無爲相亦無法。」佛告須菩提：「色亦無法，乃至有爲相、無爲相亦無法。」須菩提言：「世尊！何因緣故一切種智無法，色、無法乃至有爲相、無爲相亦無法？」佛言：「一切種智自性無故，若法自性無，是名無法；色乃至有爲相、無爲相亦如是。」世尊！何因緣故諸法自性無？」佛言：「諸法和合因緣生法中無自性，若無自性，是名無法。以是故，須菩提！菩薩摩訶薩當知一切法無性，何以故？一切法性空故，以是故當知一

切法無性。」

須菩提白佛言：「世尊！若一切法無性，初發意菩薩，以何等方便力能行檀波羅蜜、淨佛世界、成就衆生？能行尸波羅蜜、羼提波羅蜜、毗梨耶波羅蜜、禪波羅蜜、般若波羅蜜。行初禪乃至第四禪，行慈心乃至捨心，行空處乃至非有想非無想處，內空乃至無法有法空，四念處乃至八聖道分，空三昧、無相三昧、無作三昧、八背捨、九次第定、佛十力、四無所畏、四無礙智、十八不共法、大慈大悲，能行一切種智，淨佛世界，成就衆生？」佛告須菩提：「菩薩摩訶薩能學諸法無性，亦能淨佛世界，成就衆生。知世界衆生亦無性，即是方便力。須菩提！是菩薩摩訶薩行檀波羅蜜、修學佛道，行尸波羅蜜、羼提波羅蜜、毗梨耶波羅蜜、禪波羅蜜、般若波羅蜜，修學佛道，行羼提波羅蜜、毗梨耶波羅蜜、禪波羅蜜、般若

波羅蜜修學佛道，乃至行一切種智修學佛道，亦知佛道無性。是菩薩摩訶薩行六波羅蜜修學佛道，乃至未成就佛十力、四無所畏、四無礙智、十八不共法、大慈大悲、一切種智，是爲修學佛道。能具足是佛道因緣已，用一念相應慧，得一切種智。爾時，一切煩惱習永盡，以不生故。是時，以佛眼觀三千大千世界，無法尚不可得，何況有法！如是，須菩提！菩薩摩訶薩，應行無性般若波羅蜜。須菩提！是名菩薩摩訶薩方便力。無法尚不可得，何況有法！須菩提！是菩薩摩訶薩若布施時，布施無法尚不知，何況有法！受者及菩薩心，無法尚不知，何況有法！乃至一切種智得者，得法得處，無法尚不知，何況有法！何以故？一切法本性爾，非佛作，非聲聞、辟支佛作，亦非餘人作，一切法無作者故。」須菩提白佛言：「世尊！諸法、諸

法性離耶？」佛言：「如是如是！諸法、諸法性離。」世尊！若諸法、諸法性離，云何離法能知離法？若有若無？何以故？無法不能知無法，有法不能知有法，無法不能知有法，有法不能知無法。世尊！如是一切法無所有相，云何菩薩摩訶薩作是分別？是法若有若無？」佛言：「菩薩摩訶薩，以世諦故，示衆生若有若無，非以第一義。」世尊！世諦第一義諦有異耶？」須菩提！世諦第一義諦無異也。何以故？世諦如，即是第一義諦如。衆生不知不見，是如故。菩薩摩訶薩以世諦示，若有若無。復次，須菩提！衆生於五受衆中，有著相故，不知無所有，爲是衆生故，示若有若無，令知清淨無所有。如是，須菩提！菩薩摩訶薩，應當作是行般若波羅蜜！」

論釋曰：須菩提從佛聞無所得，即是得，歎未曾有。白佛言：世尊！是

般若甚深，如經中廣說。以樹爲譬喻，葉、華、果實，從薄轉厚。如樹葉蔭，熱時涼樂，衆生因菩薩道樹蔭，得離三惡道熱苦。何以故？遮惡故。如華色好香淨柔軟，衆生因菩薩以布施、持戒教化故，受人天中福樂。如樹果色香味力，衆生因菩薩故，得須陀洹等諸聖道果。須菩提聞是歡喜言，是菩薩如佛無異。此中自說因緣：因菩薩故斷地獄等惡道。佛可其意，更說因緣：須菩提！菩薩不發心求阿耨多羅三藐三菩提，乃至三界無斷時。復次，得諸法如故，說名如來，乃至名須陀洹，以如故，說色乃至無爲性，是諸法如，皆一無異。菩薩學是如，必當得薩婆若，是故言如佛無異，不以我心貪貴菩薩故，說言如佛，以得如故言如佛。是如在佛，亦在菩薩，以一相故，是名菩薩爲如佛，離如，更無有法不入如者。問曰：若以同如故，名菩

薩如佛，乃至畜生中亦有是如，何以不名如佛？答曰：畜生雖亦有如，因緣未發故，不能利益衆生，不能行如至薩婆若故。如是，須菩提，菩薩應學是如般若波羅蜜，菩薩學是如般若故，則能具足一切法如。具足名得諸法實相，能以種種門令衆生得解，以得具足故，於一切法如得自在，得是諸法如自在已，能善知衆生根故，能知衆生諸根具足。諸根者，信等五善根，三乘人各各有，能分別是人，是人無，是人得力，是人不得力，具足者，信等善根具足，是人能出世間。信根得力，則決定能受持不疑，精進力故，雖未見法，一心求道，不惜身命，不休不息，念力故，常憶師教，善法來聽入，惡法來不聽入，如守門人，定力故，攝心一處不動，以助智慧，智慧力故，能如實觀諸法相。得根有二種：一者，在大心人身中，則成菩薩

根；二者、在小心人身中，則成小乘根。得是具足根，則可度。或有菩薩見人雖得信等五根而不可度，由先世惡業罪重故，是故言知一切衆生業因緣。欲知無數劫業因緣，要得宿命通。既知己爲衆生說過去罪業因緣。衆生以是過去罪，故不畏，是故求願智。欲知三世事，既知己爲衆生說未來世罪業因緣，當墮地獄。衆生聞已，則懷恐怖，恐怖已，心伏易度。衆生若欲知未來世福報因緣，爲說已則歡喜可度。是故說知業因緣已，願智具足。願智具足故，得三世慧淨，通達無礙，知過去善惡業，又知未來善惡果報，知現在衆生諸根利鈍，然後說法教化，多所利益不虛。大利益衆生故，能淨佛國土；淨佛國土已，得一切種智；得一切種智故，轉法輪；轉法輪已，以三乘安立衆生，入無餘涅槃。如是利益，皆從學如中來，是故

佛說菩薩欲得一切功德，自利利人，當發阿耨多羅三藐三菩提心。須菩提聞是菩薩功德甚多，白佛言：世尊！菩薩能如說行般若波羅蜜，一切世間應當作禮。如經中廣說，分別初發意菩薩功德。爾時，須菩提知是甚深般若無憶想，非初學所得，是故問佛：初發心菩薩，應念何等法？佛答：應念一切種智。一切種智者，即是阿耨多羅三藐三菩提；薩婆若、佛法、佛道，皆是一切種智異名。問曰：佛何以答言念一切種智？答曰：初發意菩薩，未得深智慧，既捨世間五欲樂，佛教繫心念薩婆若，應作是念：雖捨小雜樂，當得清淨大樂；捨顛倒虛誑樂，得實樂；捨繫縛樂，得解脫樂；捨獨善樂，得共一切衆生善樂。得如是等利益故，佛教初發意者，常念薩婆若。須菩提問：世尊！是一切種智，爲是有法？爲是無法？何等緣？何等增上？何

等行。何等相？佛答：須菩提！一切種智無所有，無所有名非法，無生無滅。諸法如實緣亦無所有，念爲增上，寂滅爲行，無相爲相。問曰：皆是畢竟空，念何以獨言增上？答曰：諸法各各有力，佛智慧是畢竟空，如法性實際，無相，所謂寂滅相。佛得一切種智，不復思惟，無復難易遠近，所念皆得故，言念爲增上。須菩提問：世尊！但一切種智無法，色等法亦無法。佛答：色等一切法，亦是無法。自說因緣，若法從因緣和合生，即無自性；若法無自性，即是空無法。以是因緣故，當知一切法無所有性。

須菩提問：初發心菩薩，以何方便行檀波羅蜜，乃至一切種智，淨佛世界，教化衆生？佛答：無所有法性中學，入觀亦能集諸功德，教化衆生，淨佛世界，即是方便力。所謂有無二法，能一時行故，所謂

畢竟空，集諸福德。是人行六波羅蜜時，亦修治佛道；如佛心以畢竟空無所有法，行六波羅蜜，乃至一切種智。是菩薩行是道，能具足佛十力、四無所畏、四無礙智、十八不共法、大慈大悲。行菩薩道時，具足是法，坐道場，用一念相應慧，得一切種智；如人夜失寶珠，電光暫現，即時還得，故煩惱及習永盡，更不復生。得佛已，以佛眼觀一切十方世界中，一切物尚不見無，何況有法！畢竟空法能破顛倒，令菩薩成佛，是事尚不可得，何況凡夫顛倒有法！是故，須菩提！當知一切法無所有相，是名菩薩方便。空尚不得，何況有！須菩提！菩薩應行無所有般若波羅蜜。是菩薩行是無所有般若波羅蜜，若布施時，即知布施物空，無所有，受者及菩薩心，亦無所有；乃至一切種智，得者得法，得處無法，尚不知，何況有法！得者菩薩得

法，是阿耨多羅三藐三菩提。用得法是菩薩道，皆知是法無所有。何以故？一切法本性爾，不以智慧故異，非凡夫作，亦非諸聖人作。一切法無作，無作者故。須菩提意：若諸法都是無所有相，誰知是無所有？是故問佛：世尊！諸法、諸法性離，云何離法能知離法？若有、若無，何以故？無法不能知無法，有法不能知有法，無法不知有法，有法不知無法。世尊！如是一切法無所有相，云何菩薩作是分別？是法若有、若無？佛答：菩薩世俗故，爲衆生說。若有、若無，非第一義。若有是實有，無亦應有實。若有不實，無云何應實？須菩提問：世俗第一義有異耶？若異，破壞法性故，是故言不異。世俗如即是第一義。如衆生不知是如故，以世俗爲說。若有、若無。復次，衆生五受陰中有所著，爲是衆生離所有，得無所有故。菩薩說無所有，世俗法

故分別諸法，欲令衆生知是無所有。如是，須菩提！菩薩應學無所有般若波羅蜜。

釋菩薩行品第七十二

〔經〕須菩提白佛言：「世尊！世尊說菩薩行，何等是菩薩行？」佛言：「菩薩行者，爲阿耨多羅三藐三菩提行，是名菩薩行。」世尊！云何菩薩摩訶薩爲阿耨多羅三藐三菩提行，是菩薩行？」佛言：「若菩薩摩訶薩，行色空，行受、想、行、識空，行眼空，乃至意、行、色空，乃至法行、眼界空，乃至意識界，行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜；行內空，行外空，行內外空，行空空，行第一義空，有爲空，無爲空，畢竟空，無始空，散空，諸法空，性空，自相空，無法空，有法空，無法有法空；行初禪，第二、第三、第四

禪、行慈、悲、喜、捨、行無量虛空處、無量識處、無所有處、非有想非無想處、行四念處、行四正勤、四如意足、五根、五力、七覺分、八聖道分、行空三昧、行無相、無作三昧、行八背捨、九次第定、行佛十力、行四無所畏、行四無礙智、行十八不共法、行大慈大悲、行淨佛國土、行成就衆生、行諸辯才、行文字入無文字、行諸陀羅尼門、行有爲性、行無爲性、如阿耨多羅三藐三菩提不作二。如是、須菩提、菩薩摩訶薩行般若波羅蜜、名爲阿耨多羅三藐三菩提行、是爲菩薩行。須菩提白佛言：「世尊、世尊說言佛、何義故名佛？」佛告須菩提：「知諸法實義故名爲佛。復次、得諸法實相故名爲佛。復次、通達實義故名爲佛。復次、如實知一切法故名爲佛。」須菩提言：「何義故名菩提？」須菩提、空義是菩提義、如義、法性義、實際義是菩

提義。復次，須菩提！名相言說是菩提義。須菩提！菩提實義不可壞，不可分別，是菩提義。復次，須菩提！諸法實相不誑不異，是菩提義。以是故名菩提。復次，須菩提！是菩提，是諸佛所有故，名菩提。復次，須菩提！諸佛正徧知故，名菩提。須菩提白佛言：「世尊！若菩薩摩訶薩，爲是菩提行六波羅蜜，乃至行一切種智，於諸法何得何失？何增何減？何生何滅？何垢何淨？」佛告須菩提：「若菩薩摩訶薩行六波羅蜜，乃至行一切種智，於諸法無得無失，無增無減，無生無滅，無垢無淨。何以故？菩薩摩訶薩行般若波羅蜜，不爲得失，增減，生滅，垢淨故出。」須菩提白佛言：「世尊！若菩薩摩訶薩行般若波羅蜜，不爲得失，乃至不爲淨垢故出，菩薩摩訶薩云何行般若波羅蜜，能取檀波羅蜜，尸羅波羅蜜，羼提波羅蜜，毗梨耶波

羅蜜、禪波羅蜜、般若波羅蜜。云何行內空乃至無法有法空？云何行禪、無量心、無色定？云何行四念處乃至八聖道分？云何行空、無相、無作解脫門？云何行佛十力、四無所畏、四無礙智、十八不共法、大慈大悲？云何行菩薩十地？云何過聲聞、辟支佛地入菩薩位中？

佛告須菩提：「菩薩摩訶薩行般若波羅蜜時，不以二法行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，不以二法乃至行一切種智。」須菩提言：「世尊，若菩薩摩訶薩不以二法故，行檀波羅蜜乃至般若波羅蜜，不以二法故，乃至行一切種智。菩薩從初發意乃至後意，云何善根增益？」佛告須菩提：「若行二法者，善根不得增益。何以故？一切凡夫皆依二法，不得增益善根。菩薩摩訶薩行不二法，從初發意乃至後意，

於其中間增益善根。以是故，菩薩摩訶薩，一切世間天及人、阿修羅，無能伏，無能壞其善根，令墮聲聞、辟支佛地，及諸衆惡不善法，不能制菩薩，令不能行檀波羅蜜，增益善根，乃至般若波羅蜜，亦如是。須菩提！菩薩摩訶薩應如是行般若波羅蜜。「世尊！菩薩摩訶薩爲善根故，行般若波羅蜜不？」佛言：「不也！須菩提！菩薩亦不爲善根故，行般若波羅蜜，亦不爲非善根故，行般若波羅蜜。何以故？須菩提！菩薩摩訶薩法，未供養諸佛，未具足善根，未得真知識，不能得一切種智。」須菩提言：「世尊！云何菩薩摩訶薩供養諸佛，具足善根，得真知識，能得一切種智？」佛告須菩提：「菩薩摩訶薩從初發意供養諸佛，諸佛所說十二部經，修妒路，乃至憂波提舍，是菩薩聞持誦利心觀了達了達，故得陀羅尼，得陀羅尼

故能起無礙智。起無礙智故，所生處乃至薩婆若，終不忘失。亦於諸佛所種善根，爲是善根所護，終不墮惡道諸難。以是善根因緣故，得深心清淨，得深心清淨故，能淨佛國土，成就衆生。以善根所護故，常不離真知識。所謂諸佛、諸菩薩摩訶薩，及諸聲聞能讚歎佛法衆者。如是，須菩提！菩薩摩訶薩應供養諸佛，種善根，親近善知識。

論釋曰：上品中須菩提問佛：經常說般若波羅蜜，何以故名般若波羅蜜？佛種種因緣答。因此事故，此品中復問世尊。經常說菩薩行，何等是菩薩行？是故須菩提問菩薩行。問曰：若般若波羅蜜中攝一切法，又般若即是菩薩行，何以故更問？答曰：一切菩薩道，名菩薩行；悉徧知諸法實相智慧，名般若波羅蜜，是爲異。若般若經

菩薩行等共相攝，無異。復次，有人言：菩薩行者，菩薩身、口、意業，諸有所作，皆名菩薩行。以是事故，須菩提但欲分別菩薩正行故問。是故佛答：菩薩行者，爲阿耨多羅三藐三菩提諸善行，是名菩薩正行；菩薩不善、無記及著心行善法，非菩薩行；但以悲心故及空智慧，爲阿耨多羅三藐三菩提行，是名菩薩行。何等是清淨行？所謂色空行、受、想、行、識空行，乃至有爲性、無爲性空行。於是諸法，不分別是空、是實，乃至是有爲、是無爲，如阿耨多羅三藐三菩提滅戲論不二相，是名菩薩行。無能壞者，亦無過失。須菩提聞是菩薩行已，歡喜問：菩薩行果報得作佛，經常言佛，何等是佛義？佛答：知諸法實義，故名爲佛。問曰：若爾者，阿羅漢、辟支佛及大菩薩，是人亦知諸法實義，何故不名爲佛？答曰：上已說然燈喻，於凡夫爲實。

於佛不爲實。以煩惱習所覆故，不名爲實，不能得一切種智，斷一切法中疑悔故，不名正智實義，如上分別。問曰：知諸法實義，得諸法實相，通達實義，一切法如實知，是四有何異？答曰：有人言：義無異，名字異。有人言：有差別。義名諸法實相，不生不滅，法相常住如涅槃。知是義故，名爲佛。是義中常覺悟，無錯謬，於是義以種種名相法，令衆生解第一實義。是故四無礙中，別說義無礙、法無礙。有人雖得諸法實義，不能通達，有二因緣故：一者煩惱未盡；二者未得一切智故。如須陀洹、斯陀含、阿那含，未斷煩惱故，不能通達；阿羅漢、辟支佛、大菩薩煩惱雖盡，未得一切種智故，不能通達。是故說通達實義故，名爲佛。如實知一切法者，總上三事，亦義、亦法，一切法若有、若無，種種了知故，如一切種智義中說，亦知寂滅相，亦

知有爲相。復次，菩提名智，佛名智者，得是智故，名爲智者。須菩提問：世尊！何等是菩提？佛答：空如、法性、實際，名爲菩提。空三昧相應實相智慧，緣如、法性、實際，菩提名實智慧。三學道未斷煩惱，雖有智慧，不名爲菩提。三無學人，無明永盡無餘故，智慧名菩提。二無學人，不得一切智，正徧知諸法故，不得名阿耨多羅三藐三菩提。唯佛一人智慧，名阿耨多羅三藐三菩提。復次，名相語言文字故，名菩提，菩提實義不可分別破壞。復次，菩提是如不異，常不虛誑。何以故？一切衆生智慧轉轉有勝，至佛更無勝者；諸法亦轉轉有勝，先者虛妄，後者真實，至菩提更無實者，是故菩提名爲實。復次，如得菩提，故名爲佛，今以佛得，故名菩提。復次，有人言：盡智知生永盡，是名菩提。有人言：盡智、無生智，名菩提。有人言：無礙解脫名

菩提，何以故？得是解脫，於一切法皆通達。有人言：四無礙智是菩提，何以故？佛知諸法實相，是義無礙；知諸法名相分別，是名法無礙；分別種種語言，使衆生得解，是名辭無礙；有所說法教化，無窮無盡，是名樂說無礙。以四無礙具足，利益衆生故，名菩提。有人言：佛十力、四無所畏、四無礙智、十八不共法、大慈大悲、一切種智，如是無量佛法，盡名菩提。何以故？以智慧大故，諸法皆名菩提。有人言：眞菩提名佛，無漏十智是。十智相應受、想、行、識、身、口業及心，不相應諸行，皆名菩提。共緣、共生、共相佐助故，皆名菩提。復有人言：菩提義無量無邊，唯佛能徧知，餘人知其少分。譬如轉輪聖王寶藏中諸寶，無能分別知其價者，聖王出寶賜人，正可知其所得者。此中，須菩提問佛菩提相已，更問世尊：若菩提畢竟空不壞相，菩

薩行六波羅蜜諸法，增益何等善根？佛答：若菩薩行是菩提實相，於一切法無所增益，何況善根！何以故？般若波羅蜜，不爲得失，乃至垢淨故出，畢竟清淨故。佛可其意。復更問：若無增減，云何菩薩行般若取檀波羅蜜等諸菩薩行？佛答：菩薩雖行是法，不以二法故行，畢竟空和合共行，是故不應難。復問：世尊！若是菩薩不行二法，云何從初發意乃至後心增長善根？佛答：若人行二法，即是顛倒，不能增長善根。如人夢中雖大得財，竟無所得，覺已所得多少，眞名爲得。佛語須菩提：一切凡人，皆著二法故，不能增益善根。菩薩行諸法實相，所謂不二法，從初發心來乃至後心，增益善根，無有錯謬。是故菩薩，一切天人、阿修羅，無能壞其善根，令墮二乘；及餘衆惡，亦不能壞。餘惡者，慳貪等煩惱，破檀波羅蜜諸善法等。復

問：世尊！菩薩爲善根故行般若耶？佛答：不爲善，不爲不善故行般若。問曰：不爲不善根故行般若可爾，云何不爲善根故行？答曰：此中佛意：貴阿耨多羅三藐三菩提故，雖行諸善根，爲辦事故行，不以爲貴。如棧喻經說：善法尙應捨，何況不善法！善根是助佛道法，若人不爲棧故渡，爲到彼岸故渡。此中佛說因緣：菩薩未供養諸佛，未得真知識，不能得一切種智，是故雖種善根，不以爲貴，但爲阿耨多羅三藐三菩提故。須菩提言：云何菩薩雖不爲善根，而能供養諸佛，乃至得一切種智？佛答：菩薩從初發心已來，供養諸佛，如經中說：供養佛大故，但說佛，當知已供養辟支佛，乃至住乾慧地。凡人爲聞法故，從其聞說十二部經，以不能常得師故，皆當受持以喜^{「喜」疑是「善」}忘故，誦讀令利；心觀者，常繫心經卷，次第憶念；先以

語言宣義，後得了達，即得陀羅尼。陀羅尼有二種：一者聞持陀羅尼；二者得諸法實相陀羅尼。讀誦修習常念故，得聞持陀羅尼；通達義故，得實相陀羅尼。住是二陀羅尼門中，能生無礙智，爲衆生說法故，具足四無礙智。問曰：若菩薩有無礙智，與佛何異？答曰：無礙有二種：一、眞無礙；二、名字無礙。此中除佛無礙，餘者隨菩薩所得無礙。是菩薩讀經等因緣故，所生之處，乃至得一切種智，終不忘失。何以故？深入誦讀諸法故，煩惱折薄，爲善根所護故，終不墮惡道諸難；如盲人爲有目者所將護故，終不墜落溝壑。集善根福德故，得深心清淨。深心清淨者，慈愛一切衆生，雖怨賊中人亦不加惡，所謂奪命等。復次，智慧福德大集故，煩惱微少，不能徧覆菩薩善心。復次，深心者，於衆生中得慈悲心，不捨心，救度心，於諸法

中得無常、苦、空、無我，畢竟空心，乃至佛不生佛想、涅槃想，是名深
心清淨。深心清淨故，能教化衆生，何以故？是煩惱薄故，不起高心。
我心瞋心故，衆生愛樂，信受其語，教化衆生。教化衆生故，得淨佛
世界，如毗摩羅鞞佛國品中說：衆生淨故，世界清淨。爲善根所護
故，終不離善知識。善知識者，諸佛、大菩薩、阿羅漢。略說善知識相，
能讚歎三寶者。如是菩薩應供養諸佛，種善根，親近善知識。何以
故？如病人應求良醫藥草，佛爲良醫，諸善根爲藥草，瞻病人爲善
知識。病者具此三事故，病得除愈。菩薩亦如是，具此三事，滅諸煩
惱故，能利益衆生。

※ 三行語下「教化衆生」
一句是衍文，依石本應刪。

釋種善根品第七十三

經須菩提白佛言：「世尊！菩薩摩訶薩，若不供養諸佛，不具足善

根，不得真知識，當得薩婆若不？」佛告須菩提：「菩薩摩訶薩供養諸佛，種善根，得真知識，一切種智尚難得，何況不供養諸佛，不種善根，不得真知識！」須菩提白佛言：「世尊！菩薩摩訶薩供養諸佛，種善根，得真知識，何以故難得一切種智？」佛告須菩提：「菩薩摩訶薩遠離方便力，不從諸佛聞方便力，所種善根不具足，不常隨善知識教。」世尊！何等是方便力？菩薩摩訶薩行是方便力，得一切種智。」佛言：「菩薩摩訶薩，從初發意行檀波羅蜜，應薩婆若念，布施佛，若辟支佛，若聲聞，若人，若非人，是時不生布施想，受者想，何以故？觀一切法自相空，無生，無定相，無所轉，入諸法實相，所謂一切法無作無起相。菩薩以是方便力故，增益善根，增益善根故，行檀波羅蜜，淨佛國土，成就衆生，布施不受世間果報，但

欲救度一切衆生故，行檀波羅蜜。復次，須菩提！菩薩摩訶薩從初發意，行尸羅波羅蜜，應薩婆若念，持戒時不墮淫怒癡中，亦不墮諸煩惱、纏縛及諸不善破道法，若慳貪、破戒、瞋恚、懈怠、亂意、愚癡、慢、大慢、慢慢、我慢、增上慢、不如慢、邪慢、若聲聞心，若辟支佛心。何以故？是菩薩摩訶薩觀一切法自相空，無生，無定相，無所轉，入諸法實相，所謂一切法無作無起相。菩薩成就是方便力故，增益善根，增益善根故，行尸羅波羅蜜，淨佛國土，成就衆生。持戒不受世間果報，但欲救度一切衆生故，行尸羅波羅蜜。復次，須菩提！菩薩摩訶薩從初發意，行羼提波羅蜜，應薩婆若念，方便力成就故，行見諦道、思惟道，亦不取須陀洹果、斯陀含、阿那含、阿羅漢果。何以故？是菩薩摩訶薩知諸法自相空，無生，無定相，無所轉，雖行是助

道法，過聲聞、辟支佛地。須菩提！是名菩薩無生法忍。復次，須菩提！菩薩摩訶薩從初發意，行毗梨耶波羅蜜，入初禪乃至第四禪，入四無量心、四無色定，雖出入諸禪，而不受果報。何以故？是菩薩成就是方便力故，知諸禪定自相空，無生，無定相，無所轉，淨佛國土，成就衆生。精進不受世間果報，但欲救度一切衆生故，行毗梨耶波羅蜜。復次，須菩提！菩薩摩訶薩從初發意，行禪波羅蜜，應薩婆若念，入八背捨、九次第定，亦不證須陀洹果，乃至不證阿羅漢果。何以故？是菩薩摩訶薩，知諸法自相空，無生，無定相，無所轉。復次，須菩提！菩薩摩訶薩從初發意，行般若波羅蜜，學佛十力，四無所畏，四無礙智，十八不共法，大慈大悲，乃至未得一切種智，未淨佛國土，未成就衆生，於其中間應如是行。何以故？是菩薩摩訶薩，知

諸法自相空，無生，無定相，無所轉。須菩提！菩薩摩訶薩，應如是行般若波羅蜜，不受果報。」

論問曰：須菩提何以故作是粗問，不供養諸佛，不具足善根，不得真知識，當得薩婆若不？答曰：有人言：若一切諸法無所有性畢竟空，畢竟空中，種善根不種善根等無異。若爾者，可不供養諸佛，不種善根，不得真知識，得薩婆若耶？復有人疑言：得薩婆若更有種種門，可不須種善根等，是故問佛。佛答：若供養諸佛，種善根，得真知識，尚難得，何況不也！須菩提問：以畢竟空中無有福，以非福，何以但以福德故得？佛答：以世諦中有福故得。須菩提爲衆生著無所有故問，佛以不著有法答。所謂精進修福，尚不可得，何況不修福！如受乞食道人，至一聚落，從一家至一家，乞食不得，見一餓狗

饑臥，以杖打之言：汝畜生無智，我種種因緣，家家求食尚不得，何況汝臥而望得！須菩提問：世尊，有是供養諸佛等因緣，何故不得其果報？佛答：離方便故。方便者，所謂般若波羅蜜。雖見諸佛色身，不以智慧眼見法身；雖少種善根，而不具足；雖得善知識，不親近諮受。又佛自說因緣：所謂菩薩從初發意，以有無心行檀波羅蜜。有心者，所謂應薩婆若心布施，念諸佛種種無量功德，憐愍衆生，故布施；無心者，若施佛乃至凡夫，不生三想，所謂施者、受者、財物。何以故？施物等一切法自相空，從本已來常不生，無定相，若一若異，若常若無常等；是法自相空故，不可轉，安住如中故。如是觀，即入諸法實相，所謂無作無起相。一切法無所能作，不生高心，無所希望。如是方便力故，能增益善根，離不善根，教化衆生，淨佛世界。

布施若多若少，不受世間果報，但欲救度一切衆生故。菩薩布施衆生，有量有限，作是念：我先世不行深福德，今不能廣施衆生，我今當深實多行檀波羅蜜，得是果報已，能具足利益，廣施無量衆生，若今世利，若後世利，若道德利，無如是方便，菩薩雖供養諸佛，種善根，得眞知識，尚不得，何況不供養，餘五波羅蜜，亦如是。

大智度論卷第八十五

音釋

修妬路

梵語也亦云修多羅此云契經妬當故切

毗摩羅鞋

梵語也此云淨名鞋苦吉切

大智度論卷八十五

釋種善根品第七十三

三八

大智度論卷第八十六

龍 樹 菩 薩 造

姚秦三藏法師鳩摩羅什譯

釋徧學品第七十四

經爾時，須菩提白佛言：「世尊！是菩薩摩訶薩大智慧成就，行是深法，亦不受果報。」佛告須菩提：「如是！如是！菩薩摩訶薩大智慧成就，行是深般若波羅蜜，亦不受果報。何以故？是菩薩摩訶薩諸法性中不動故。」世尊！何等諸法性中不動？」佛言：「於無所有性中不動。復次，菩薩摩訶薩，色性中不動，受、想、行、識性中不動。檀波羅蜜性中不動，尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜性中不動。四禪性中不動，四無量性中不動，

四無色定性中不動，四念處性中不動，乃至八聖道分性中不動，空三昧無相無作三昧，乃至大慈大悲性中不動。何以故？須菩提！是諸法性即是無所有。須菩提！以無所有法，不能得所有法。須菩提言：「世尊！所有法能得所有法不？」佛言：「不也！」世尊！所有法能得無所有法不？」佛言：「不也！」世尊！無所有法能得無所有法不？」佛言：「不也！」世尊！若無所有不能得所有，所有不能得所有，所有不能得無所有，無所有不能得無所有，將無世尊不得道耶？」佛言：「有得，不以此四句。」世尊！云何有得？」佛言：「非所有，非無所有，無諸戲論，是名得道。」須菩提白佛言：「世尊！何等是菩薩摩訶薩戲論？」佛告須菩提：「菩薩摩訶薩觀色，若常若無常，是爲戲論；觀受、想、行、識，若常若無常，是爲戲論；觀色

若苦若樂，受、想、行、識若苦若樂，是爲戲論；觀色若我若非我，受、想、行、識若我若非我，色若寂滅若不寂滅，受、想、行、識若寂滅若不寂滅，是爲戲論。苦聖諦應見，集聖諦應斷，滅聖諦應證，道聖諦應修，是爲戲論。應修四禪、四無量心、四無色定，是爲戲論。應修四念處、四正勤、四如意足、五根、五力、七覺分、八聖道分，是爲戲論。應修空、解脫門、無相解脫門、無作解脫門，是爲戲論。應修八背捨、九次第定，是爲戲論。我當過須陀洹果、斯陀含果、阿那含果、阿羅漢果，辟支佛道，是爲戲論。我當具足菩薩十地，是爲戲論。我當入菩薩位，是爲戲論。我當淨佛國土，是爲戲論。我當成就衆生，是爲戲論。我當生佛十力、四無所畏、四無礙智、十八不共法，是爲戲論。我當得一切種智，是爲戲論。我當斷一切煩惱習，是爲戲論。須菩提！是苦

薩摩訶薩行般若波羅蜜時，色若常若無常，不可戲論，故不應戲論。受、想、行、識若常若無常，不可戲論，故不應戲論。乃至一切種智不可戲論，故不應戲論。何以故？性不戲論，性無性不戲論，無性離性，更無法可得。所謂戲論者，戲論法，戲論處。以是故，須菩提！色無戲論，受、想、行、識，乃至一切種智無戲論。如是，須菩提！菩薩摩訶薩，應行無戲論般若波羅蜜。須菩提白佛言：「世尊！云何色不可戲論，乃至一切種智不可戲論？」佛告須菩提：「色性無，乃至一切種智性無。須菩提！若法性無，即是無戲論。以是故，色不可戲論，乃至一切種智不可戲論。須菩提！若菩薩摩訶薩能如是行，無戲論般若波羅蜜，是時得入菩薩位。」

須菩提白佛言：「世尊！若諸法無有性，菩薩行何等道入菩薩位？」

爲用聲聞道？爲用辟支佛道？爲用佛道？」佛告須菩提：「不以聲聞道，不以辟支佛道，不以佛道，得入菩薩位；菩薩摩訶薩徧學諸道，得入菩薩位。須菩提！譬如八人先學諸道，然後入正位，未得果而先生果道；菩薩亦如是，先徧學諸道，然後入菩薩位；亦未得一切種智，而先生金剛三昧，爾時以一念相應慧得一切種智。」須菩提白佛言：「世尊！若菩薩摩訶薩徧學諸道入菩薩位者，八人向須陀洹，得須陀洹，向斯陀含，得斯陀含，向阿那含，得阿那含，向阿羅漢，得阿羅漢，辟支佛道，佛道，是諸道各各異。世尊！若菩薩摩訶薩徧學諸道，然後入菩薩位者，是菩薩若生八道，應作八人生見道，應作須陀洹，生思惟道，應作斯陀含，作阿那含，作阿羅漢；若生辟支佛道，作辟支佛；世尊！若菩薩摩訶薩作八人，然後入菩薩

位，無有是處！不入菩薩位，得一切種智，亦無是處！作須陀洹乃至作辟支佛，然後入菩薩位，亦無是處！不入菩薩位，得一切種智，亦無是處！世尊！我云何當知菩薩摩訶薩徧學諸道，得入菩薩位？」佛告須菩提：「如是！如是！若菩薩摩訶薩作八人得須陀洹果，乃至得阿羅漢果，得辟支佛道，然後入菩薩位，無有是處。不入菩薩位，當得一切種智，無有是處。須菩提！若菩薩摩訶薩，從初發意行六波羅蜜時，以智觀過八地，何等八地？乾慧地、性地、八人地、見地、薄地、離欲地、已辦地、辟支佛地；以道種智入菩薩位，入菩薩位已，以一切種智斷一切煩惱習。須菩提！八人若智若斷，是菩薩無生法忍；須陀洹若智若斷，斯陀含若智若斷，阿那含若智若斷，阿羅漢若智若斷，辟支佛若智若斷，皆是菩薩忍。菩薩學如是聲聞、辟

支佛道，以道種智入菩薩位；入菩薩位已，以一切種智斷一切煩惱習，得佛道。如是，須菩提！菩薩摩訶薩徧學諸道具足，應得阿耨多羅三藐三菩提；得阿耨多羅三藐三菩提已，以果饒益衆生。」

須菩提白佛言：「世尊！世尊所說道聲聞道、辟支佛道、佛道，何等是菩薩道種智？」佛告須菩提：「菩薩摩訶薩應生一切道種淨智。須菩提！何等是道種淨智？若諸法相貌所可顯示法，菩薩應正知正知已，爲他演說開示，令諸衆生得解。是菩薩摩訶薩，應解一切音聲語言，以是音聲說法，徧滿三千大千世界，如響相。以是故，須菩提！菩薩摩訶薩，應先具學一切道。道智具足已，應分別知衆生深心：所謂地獄衆生、地獄道、地獄因、地獄果，應知、應障；畜生、餓鬼道、畜生、餓鬼因、畜生、餓鬼果，應知、應障；諸龍、鬼神、提闍婆、緊

那羅、摩睺羅伽、阿修羅道因果，應知、應障；人道因果，應知；諸天道因果，應知；四天王天、三十三天、夜摩天、兜率陀天、化樂天，他化自在天、梵天、光音天、徧淨天、廣果天、無想天、阿婆羅訶天、無熱天、易見天、喜見天、阿迦尼吒天道，因果，應知；無邊虛空處、無邊識處、無所有處，非有想、非無想處，道，因果，應知；四念處、四正勤、四如意足、五根、五力、七覺分、八聖道分，因果，應知；空解脫門、無相解脫門、無作解脫門，佛十力、四無所畏、四無礙智、十八不共法、大慈大悲，因果，應知。菩薩以是道，令衆生入須陀洹道，乃至阿羅漢、辟支佛道，乃至阿耨多羅三藐三菩提道。須菩提！是名菩薩摩訶薩淨道種子。菩薩學是道，種智已，入衆生深心相，入已，隨衆生心如應說法，所言不虛。何以故？是菩薩摩訶薩，善知衆生根相，知一切衆生心。

心數法生死所趣。須菩提！菩薩摩訶薩，如是應行道般若波羅蜜！何以故？一切諸善助道法，皆入般若波羅蜜中，諸菩薩摩訶薩，聲聞、辟支佛所應行！」

須菩提白佛言：「世尊！若四念處，乃至阿耨多羅三藐三菩提，是一切法，皆不合不散，無色、無形、無對，一相所謂無相。世尊！云何是助道法，能取阿耨多羅三藐三菩提？世尊！是不合不散，無色、無形、無對，一相所謂無相法，無所取，無所捨，譬如虛空無取無捨。」佛言：「如是！如是！須菩提！諸法自相空，無所取，無所捨。須菩提！有眾生不知諸法自相空，爲是衆生故，顯示助道法，能至阿耨多羅三藐三菩提。復次，須菩提！所有色、受、想、行、識，所有檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，所有內

空、外空乃至無法有法空，初禪乃至非有想非無想處，四念處乃至八聖道分，三解脫門，八背捨，九次第定，佛十力，四無所畏，四無礙智，十八不共法，大慈大悲，一切種智等諸法，於是聖法中，皆不合不散，無色、無形、無對，一相所謂無相。以世俗法故，爲衆生說令解，非以第一義。須菩提！於是一切法中，菩薩摩訶薩以智見如法應學。學已，分別諸法，應用不應用。」須菩提言：「世尊！何等法菩薩分別已，應用不應用？」佛言：「聲聞、辟支佛法，分別知不應用；一切種智，分別知應用。如是，須菩提！菩薩摩訶薩於是聖法中，應學般若波羅蜜。」須菩提白佛言：「世尊！何以故說名聖法？何等是聖法？」佛告須菩提：「諸聲聞、辟支佛法，菩薩摩訶薩及諸佛，於欲、瞋、癡不合不散，身見、戒取、疑不合不散；欲染、瞋恚不合不散，

色染、無色染、掉慢、無明、不合不散。初禪乃至第四禪，不合不散。慈、悲、喜、捨、虛空處，乃至非有想非無想處，不合不散。四念處乃至八聖道分，不合不散。內空乃至大悲，有爲性、無爲性，不合不散。何以故？是一切法皆無色、無形、無對，一相所謂無相。無色法與無色法，不合不散；無形法與無形法，不合不散；無對法與無對法，不合不散；一相法與一相法，不合不散；無相法與無相法，不合不散。須菩提，是無色、無形、無對，一相所謂無相。般若波羅蜜，諸菩薩摩訶薩，應學、學已，不得諸法相。須菩提白佛言：「世尊，菩薩摩訶薩，不學色相耶？不學受、想、行、識相耶？不學眼相乃至意相？不學色相乃至法相？不學地、種相乃至識、種相？不學檀波羅蜜相、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜相？不學內空

乃至無法有法空相？不學初禪相？乃至第四禪相？不學慈相？乃至捨相？不學無邊空相？乃至非有想非無想相？不學四念處相？乃至八聖道分相？不學空三昧相、無相、無作三昧相？不學八背捨、九次第定相？不學佛十力相、四無所畏、四無礙智相、十八不共法相、大慈大悲相？不學苦聖諦相、集滅道聖諦相？不學逆順十二因緣相？不學有爲性相、無爲性相耶？世尊！若不學諸法相，菩薩摩訶薩云何學諸法相？若有爲、若無爲？學已，過聲聞、辟支佛地？若不過聲聞、辟支佛地，云何入菩薩位？若不入菩薩位，云何當得一切種智？若不得一切種智，云何當轉法輪？若不轉法輪，云何以三乘度衆生生死？」佛告須菩提：「若諸法實有相，菩薩應學是相。須菩提！以一切法實無相、無色、無形、無對，一相所謂無相。以是故，須菩提！菩薩

摩訶薩不學相，不學無相。何以故？有佛無佛，諸法一相，性常住。」
須菩提白佛言：「世尊！若一切法非有相非無相，菩薩摩訶薩云
何修般若波羅蜜？若不修般若波羅蜜，不能過聲聞、辟支佛地；若
不過聲聞、辟支佛地，不能入菩薩位；若不入菩薩位，不得無生法
忍；若不得無生法忍，不能得諸菩薩神通；若不得菩薩神通，不能
淨佛國土、成就衆生；若不淨佛國土、成就衆生，不能得一切種智；
若不得一切種智，不能轉法輪；若不轉法輪，不能令衆生得須陀
洹果、斯陀含、阿那含、阿羅漢果、辟支佛道，不能令得阿耨多羅三
藐三菩提，亦不能令衆生得布施福，亦不能令得持戒、修定福。」
佛告須菩提：「如是！如是！諸法無相，非一相，非異相，若修無相，是
修般若波羅蜜。」須菩提言：「世尊！云何修無相？是修般若波羅

蜜。佛言：「修諸法壞，是修般若波羅蜜。」世尊云何修諸法壞，是修般若波羅蜜？」佛言：「修色壞，是修般若波羅蜜；修受、想、行、識壞，是修般若波羅蜜；修眼、耳、鼻、舌、身、意法壞，是修般若波羅蜜；修色法壞，聲、香、味、觸法壞，是修般若波羅蜜；修不淨、觀壞，是修般若波羅蜜；修初禪壞，第二、第三、第四禪壞，是修般若波羅蜜；修慈悲、喜、捨壞，是修般若波羅蜜；修無邊空處、無邊識處、無所有處，非有想、非無想處壞，是修般若波羅蜜；修念佛、念法、念僧、念戒、念捨、念天、念滅、念安般壞，是修般若波羅蜜；修無常相、苦相、無我相、空相、集相、因相、生相、緣相、閉相、滅相、妙相、出相、道相、正相、跡相、離相壞，是修般若波羅蜜；修十二因緣壞，我相、衆生、壽命相，乃至知者、見者相壞，是修般若波羅蜜；修常相、樂相、淨相、我相壞，是修般

若波羅蜜。修四念處，乃至八聖道分壞，是修般若波羅蜜。修空三昧，無相三昧，無作三昧壞，是修般若波羅蜜。修八背捨，九次第定壞，是修般若波羅蜜。修有覺有觀三昧，無覺有觀三昧，無覺無觀三昧壞，是修般若波羅蜜。修苦聖諦，集聖諦，滅聖諦，道聖諦壞，是修般若波羅蜜。修苦智，集智，滅智，道智壞，是修般若波羅蜜。修盡智，無生智壞，是修般若波羅蜜。修法智，比智，世智，他心智壞，是修般若波羅蜜。修檀波羅蜜壞，是修般若波羅蜜。修尸羅波羅蜜，羼提波羅蜜，毗梨耶波羅蜜，禪波羅蜜，般若波羅蜜壞，是修般若波羅蜜。修內空，外空，內外空，空空，大空，第一義空，有爲空，無爲空，畢竟空，無始空，散空，性空，諸法空，自相空，不可得空，無法空，有法空，無法有法空壞，是修般若波羅蜜。修佛十力，四無所畏，四無礙智，

十八不共法壞，是修般若波羅蜜。修須陀洹果、斯陀含果、阿那含果、阿羅漢果、辟支佛道壞，是修般若波羅蜜。修一切智壞，是修般若波羅蜜。修斷一切煩惱習壞，是修般若波羅蜜。」須菩提白佛言：「世尊！云何名修色壞，乃至修斷一切煩惱習壞，是修般若波羅蜜？」佛告須菩提：「菩薩摩訶薩行般若波羅蜜時，不念有色法是修般若波羅蜜，不念有受、想、行、識，乃至不念有斷一切煩惱習法，是爲修般若波羅蜜。何以故？有法念者，不修般若波羅蜜。須菩提！有法念者，不修檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。何以故？須菩提！是人著法，不行檀波羅蜜，乃至般若波羅蜜。如是著者，無有解脫，無有道，無有涅槃。有法念者，不修四念處、四正勤、四如意足、五根、五力、七覺分、八聖

道分，不修空三昧，乃至不修一切種智。何以故？是人著法故。」須菩提白佛言：「世尊！何等是有法？何等是無法？」佛告須菩提：「二者是有法，不二者是無法。」世尊！何等是二？佛言：「色相是二，受、想、行、識相是二，眼相乃至意相是二，色相乃至法相是二，檀波羅蜜乃至佛相，阿耨多羅三藐三菩提相，有爲、無爲性相是二。須菩提！一切相皆是二，一切二皆是有法，適有法便有生死，適有生，死不得離生，老、病、死、憂、悲、苦、惱。以是因緣故，須菩提！當知二相者，無有檀波羅蜜，乃至般若波羅蜜，無有道，無有果，乃至無有順忍。何況見色相，乃至見一切種智相！若無修道，云何得須陀洹果，乃至阿羅漢果，辟支佛道，阿耨多羅三藐三菩提，及斷一切煩惱習？」

論釋曰：佛說菩薩行六波羅蜜，不受世間果報，須菩提歎未曾有。

白佛言：世尊！是菩薩大智慧成就，行是深法，能作因而不受果；是菩薩爲大利故，不受小報。佛可其意已，更自說因緣：所謂菩薩於諸法性中不動。諸法性者，無所有畢竟空，如法性、實際、菩薩定心安住是中不動。須菩提問：世尊！何等性中不動？佛答：色性中不動，乃至大慈大悲等性中不動。何以故？是諸法性，衆因緣生故不自在、無定相、無定相故無所有。諸法者，所謂色等法。因是色法故說無爲，是故無爲法亦無所有。何以故？不可以無所有法得所有法。須菩提言：若無所有不能得所有者，豈可以所有法得所有法耶？佛答：不。何以故？無所有法，一切聖人所稱讚，所住處，尚不能有所得，何況所有法！所有法得無所有？佛言：不。何以故？所有、無所有、二俱有過故言不。可以無所有得無所有？佛言：不。何以故？所有

法有生相、住相，以虛誑故，尚無所得，何況無所有，從本已來畢竟空，而有所得！此中須菩提更問：世尊！若以四句皆不得，將無道無得果耶？佛答：實有得道法，但不以是四句。何以故？四句有如上失故，若離是四句戲論，即是道。復問：世尊！何等是菩薩戲論相？佛答：色等若常、若無常，是菩薩戲論。何以故？若常則不生不滅，無罪福好醜；無常亦不然，何以故？因常說無常，常既不可得，何況無常！復次，若無常定是色等實相，亦不應有業因緣果報，何以故？色等諸法念念滅失故。若業因緣果報滅，則不名無常相。如是等種種因緣故，無常非是色等實相，如先破無常中說。乃至作是念：我當斷一切煩惱習，是爲戲論。色等諸法不可戲論，而凡夫人戲論諸法，菩薩於不可戲論，隨法不戲論。何以故？自性不能戲論自性，所以

者何？性從因緣生故，但有假名，云何能戲論？若性不能戲論，何況無性！離性、無性，更無第三法可戲論。所謂戲論者，戲論法，戲論處，是法皆不可得。須菩提！色等法是不可戲論相，如是菩薩應行無戲論般若波羅蜜。復次，佛自說不可戲論因緣：色等法無性，若法無性，即是不可戲論。若菩薩能行是不可戲論般若，便得入菩薩位。

須菩提意：無戲論是三乘道，菩薩以何道入無戲論菩薩位？佛答：皆言不，何以故？菩薩大乘人故，不應用二乘道；六波羅蜜未具足故，不能用佛道。此中佛自說因緣：菩薩應徧學諸道，入菩薩位。此中說譬喻：如見諦道中八人，先時徧學諸道，入正位，而未得須陀洹果；菩薩亦如是，先徧學諸道，入菩薩位，而未得一切種智果；若

菩薩住金剛三昧，以一念相應慧，得一切種智果。須菩提問：世尊！若菩薩徧學諸道，然後入菩薩位，是諸道各各異，若菩薩徧學是道，若生八道即是八人，乃至生辟支佛道即是辟支佛。世尊！若菩薩作八人乃至作辟支佛，然後入菩薩位，無有是處；若不入菩薩位，得一切種智，亦無有是處。我當云何知菩薩學諸道入菩薩位，佛可其意已，更自說因緣。菩薩初發意，行六波羅蜜時，以智見觀入八地直過，如人親親繫獄故，入而看之，亦不與同著桎梏。菩薩欲具足道種智故，入菩薩位，徧觀諸道，入菩薩位，入菩薩位已，得一切種智，斷煩惱習。佛示須菩提：二乘人於諸佛菩薩智慧得少氣分，是故八人若智若斷，乃至辟支佛若智若斷，皆是菩薩無生法忍。智名學人八智，無學或九或十。斷名斷十種結使，所謂上、下

分十結。須陀洹、斯陀含、略說斷三結，廣說斷八十八結；阿那含、略說斷五下分結，廣說斷九十二；阿羅漢、略說三漏盡，廣說斷一切煩惱；是名智斷，智斷皆是菩薩忍。聲聞人以四諦得道，菩薩以一諦入道；佛說是四諦皆是一諦，分別故有四。是四諦二乘智斷，皆在一諦中。菩薩先住柔順忍中，學無生、無滅，亦非無生、非無滅，離有見、無見，有無見，非有非無見等，滅諸戲論，得無生忍。無生忍者，佛後品中自說：乃至作佛，常不生惡心，是故名無生忍。論者言：得是忍，觀一切法畢竟空，斷緣心心數不生，是名無生忍。又復言：能過聲聞，辟支佛智慧，名無生忍。聲聞、辟支佛智慧，觀色等五衆生滅，心厭離欲得解脫。菩薩以大福德智慧觀生滅時，心不怖畏。如小乘人，菩薩以慧眼求生滅實定相不可得，如先破生品中說。但

以肉眼粗心，見有無常生滅；凡夫人於諸法中著常見，是所著法還歸無常，衆生得憂悲苦惱。是故佛說欲離憂苦，莫觀常相！是無常破常顛倒故，不爲著無常故說，是故菩薩捨生滅觀，入不生不滅中。問曰：若入不生不滅，不生不滅即復是常，云何得離常顛倒？答曰：如無常有二種，一者破常顛倒，不著無常；二者著無常生戲論。無生忍亦如是：一者雖破生滅，不著無生無滅故，不墮常顛倒；二者著不生滅故，墮常顛倒。眞無生者，滅諸觀，語言道斷，觀一切法如涅槃相。從本已來常自無生，非以智慧觀故令無生；得是無生無滅畢竟清淨，無常觀尚不取，何況生滅！如是等相，名無生法忍。得是無生忍故，即入菩薩位；入菩薩位已，以一切種智斷煩惱及習，種種因緣度一切衆生，如好果樹，多所饒益。須菩提白佛言：

世尊！何等是菩薩道種智？佛答：菩薩住無生忍法，得諸法實相。從實相起，取諸法名相語言，既自善解，爲衆生說，令得開悟。菩薩福德因緣故，解一切衆生音聲語言，以是音聲徧三千大千世界，亦不著是聲，知如響相。是音聲，即是梵音相。以是故，菩薩應知一切道，徧觀衆生心，知其本末，以善法利益，遮不善法，如經中廣說：菩薩先知諸法實相故，於二乘道入出自在，觀已直過，入菩薩位，爲度衆生故，起道慧。欲爲衆生說法，解一切衆生語言音聲，以梵音聲說法，所謂遮惡道，開善道。惡道者，三惡道；善道者，三善道。人、天、阿修羅種種因緣，訶惡道，讚善道。遮惡道者，所謂地獄道、地獄因、地獄果、地獄，如先說。地獄道者，三不善道。地獄因者，三毒；貪欲增長起貪嫉不善道，瞋恚增長起恚惱不善道，愚癡增長起邪見不

善道。三毒，三不善道因；三不善道是七不善道因。地獄果者，以是因故受地獄身，心受種種苦惱，是名果。菩薩應示衆生地獄果，然後爲說法，令斷地獄道及因果。十不善道，有上、中、下；上者地獄，中者畜生，下者餓鬼。十善道亦有上、中、下；上者天，中者人，下者鬼神。住十善道，能離欲生色界，離色生無色界。三惡道中常受苦，故言應知應遮。天、人中有得道因緣，爲涅槃故，或時應遮，以不定故不說。餘助道法故，不應說遮，乃至阿耨多羅三藐三菩提。菩薩能如是分別已，知衆生應以小乘法度者，以小乘法而度之；應以大乘法度者，以大乘法而度之。是菩薩知衆生深心數事，及宿命業因緣，又知未來世果報因緣，又知衆生可化時節及知處所，諸餘可度因緣，盡皆知之，是故所說不虛。如是道種慧及諸助道法，皆攝

在般若中，是故菩薩當行道慧般若。

須菩提白佛：若助道法、菩提，是法皆不合不散，無色、無形、無對，一相所謂無相。是助道法皆空，云何能取阿耨多羅三藐三菩提？空無所有法，應無取無捨，譬如虛空，無法故無取無捨。須菩提所說，真實無著心故，佛可言如是！如是！更說因緣：有衆生不知如是諸法自相空，故爲分別是助道法，能得阿耨多羅三藐三菩提。須菩提！非但三十七品空不合不散，所有色等乃至一切種智，於聖法中亦自相空不合不散。不合不散者，是畢竟空義。如此中說一相，所謂無相。是法雖空，以世諦故爲衆生說，欲令得入聖法，非第一義。是中菩薩皆應以知、見學是法。初知名知，後深入名見；知名未了，見名已了。問曰：知、見有何差別？答曰：有人言：有知非見，有見非

知，有亦知亦見，有非知非見。有知非見者，盡智、無生智，除世間正見及五見，餘慧皆名知，是慧非見；見非知者，五見、世間正見，見諦道中入忍，是見非知；餘無漏慧，亦名知亦名見；離是見，知餘法非見非知。復次，有人言：定心名爲見，定未定通名爲知。如轉法輪經中說：苦諦知已應見，知已分別知，是法應見，是苦諦；是法應斷，是集諦；是法應證，是滅諦；是法應修，是道諦。或知煩惱斷名爲見，如九斷知。須菩提聞般若異名字，所謂聖法，故問何等是聖法。佛答：聖法中諸賢聖，若佛、若辟支佛、聲聞等，以欲等諸法不合不散。不合者，一切煩惱名顛倒，顛倒即無所有，若無所有，云何可合？若不合，云何有散？不合故不輕凡人，不散故不自高於一切衆生，不憎不愛。又復此中佛自說不合不散因緣，所謂是法皆無色、無形、無

對，一相所謂無相。無色與無色法不合不散，乃至無相法與無相法不合不散。何以故？是法皆一性故。自性不與自性合，是名一相。無相般若波羅蜜，菩薩應學。學已，無法可得相。須菩提白佛言：世尊！菩薩不學色相耶？乃至不學有爲、無爲相耶？世尊！若不學是諸法相，云何經中說菩薩先學諸法相？後過聲聞、辟支佛地？若不過聲聞、辟支佛地，云何入菩薩位？如此中廣說。佛告須菩提：若諸法實有相，應當學是相。須菩提！一切法實無相，是故菩薩不應學相。無相亦不應學，以取相故。破相事，如問相品中說。有佛無佛，諸法常住，一相所謂無相。

須菩提從佛聞一切法無相，今還問佛：世尊！若一切法非有相非無相，云何菩薩修般若？若有無相，因無相可修般若，今相以無相

皆無，因何事得修般若？若不修般若，不能得過聲聞、辟支佛地，乃至不能安立於三福田。佛可其言，如是如是，而更說修般若因緣。所謂菩薩不以修相故，是修般若；修無相故，是修般若。復問：世尊！云何修無相是修般若？若無相云何可修？佛答：修諸法壞是修般若，以諸法壞故，無相相亦壞。譬如車分壞故，車相亦滅；又如輪分壞故，輪相亦滅，如是乃至微塵。世尊！何等是諸法可破壞者？佛答：修色法壞，即是修般若；波羅蜜，乃至修斷一切煩惱習壞，即是修般若；波羅蜜，須菩提白佛：云何修色壞乃至修斷一切煩惱習壞，是修般若？佛答：菩薩一心念薩婆若，憐愍衆生，欲得正行般若；波羅蜜，不念色是有法，如是修，是修般若。以色是定實，有相過故。所以者何？佛此中自說因緣：有相者不修般若，般若中無法尚無，何

況有法！是人。不修般若波羅蜜，亦不修五波羅蜜，是人著有法戲論，不修布施等。如是著者，無有解脫，無道，無涅槃。無三解脫門故，言無解脫，無聖人空法故，言無道，無道故，無涅槃。問曰：何以故無道？答曰：是人戲論諸法，不厭老病死，著法故，生邪見，邪見故，不能如實觀身不淨等，不能觀身故，不修身念處，不修身念處故，不能修受心法念處，不修四念處故，不能修乃至一切種智。何以故？著有法故。須菩提問佛世尊：何等有法？何等是無法？凡人或於有法中生無想，無法中生有想，欲分別是事故。問佛答：二相是有，不二相是無。復問：何等是二相？佛答：取色相即是二，如先品中說。離色無眼，離眼無色，乃至有爲無爲性。何以故？離有爲不得說無爲，離無爲不得說有爲實相。是故是二法不得相離，凡夫謂此爲二。

是故顛倒。佛略說二相：一切法中取相皆是二，一切二皆是有，適有便有生死。何以故？有中生著心，著心因緣生諸煩惱，煩惱因緣往來生死，生死因緣憂悲苦惱，是故說適有法便有生死，有生死不得免老病憂苦。須菩提！以是當知二相人無有檀波羅蜜，乃至無有順忍。何況見色實相！乃至見一切種智實相！是人若不見色等諸法實相，則無修道。云何有須陀洹果，乃至斷一切煩惱習？六波羅蜜有二種：世間、出世間。此人無有出世間六波羅蜜故，是故說是有相人無有六波羅蜜。若有者，但有世間波羅蜜，此中不說世間波羅蜜。聲聞道果尚無，何況有佛道！問曰：順忍是何等順忍？答曰：是小乘順忍，小乘順忍尚無，何況大乘！問曰：頂法已不退，何以說乃至忍法？答曰：聲聞法中亦說頂墮，摩訶衍亦說頂墮，汝何

以故言頂法不墮。有人言：雖頂法不墮，不牢固不能一定故不說。忍是久住，已入正定，雖未得無漏而與無漏同。以隨順苦法，忍故名爲忍；未曾見是法故，見便能忍，是故名忍。是人於諸佛聖人爲小，於凡夫爲大。見色有二種：一者見色實相了了；二者斷繫諸色煩惱，故名爲見。如色乃至一切種智，一切煩惱習事亦如是。若人見色，修道尚無，何況能得修須陀洹果，乃至斷煩惱習。

釋三次第學品第七十五之上

經作三次
第行品

爾時須菩提白佛言：「世尊，若有法相者，尚不得順忍，何況得道！世尊，若無法相者，當得順忍不？若乾慧地，若性地，若八人地，若見地，若薄地，若離欲地，若已辦地，若辟支佛地，若菩薩地，若佛地，若修道，因是修道當斷煩惱不？以是煩惱故，不得過聲聞，辟支佛。」

地入菩薩位；若不入菩薩位，則不得一切種智；不得一切種智，則不能得斷一切煩惱習。世尊！若無有法相，是諸法則不生，若不生是諸法，則不能得一切種智。」佛告須菩提：「如是！如是！若無有法者，則有順忍，乃至斷一切煩惱習。」須菩提白佛言：「世尊！菩薩摩訶薩行，般若波羅蜜時，有法相不？所謂色相，乃至識相，眼相，乃至意相，色相，乃至法相，眼界相，乃至意識界相，四念處相，乃至一切種智相。若色相，若色斷相，乃至識相，識斷相，十二入，十八界，亦如是。若無明相，若無明斷相，乃至憂悲愁惱相，憂悲愁惱斷相；若欲相，若欲斷相，若瞋相，若瞋斷相，若癡相，若癡斷相；若苦相，若苦斷相，若集相，若集斷相，若盡相，若盡斷相，若道相，若道斷相；乃至一切種智相，斷一切煩惱習相。」佛言：「不也！須菩提！菩薩摩

訶薩，行般若波羅蜜時，無有法相，非法相，即是菩薩順忍。若無有法相，無有非法相，即是修道，亦是道果。須菩提！菩薩摩訶薩，有法是菩薩道，無法是菩薩果，以是因緣故，當知一切法無所有性。」

須菩提白佛言：「世尊！若一切法無所有性，佛云何知一切法無所有性，故得成佛，於一切法得自在力？」佛告須菩提：「如是！如是一切法無所有性，我本行菩薩道，修六波羅蜜，離諸欲，離惡不善法，有覺有觀，離生喜樂，入初禪，乃至入第四禪，於是諸禪及支取相，不念有是諸禪，不受禪味，不得是禪，無染清淨，行四禪，我於是諸禪不受果報。依四禪住，起五神通，身通、天耳、知他人心、宿命通、天眼證。於諸神通不取相，不念有是神通，不受神通味，不得是神通，我於是五神通不分別行。須菩提！我爾時用一念相應慧，得

阿耨多羅三藐三菩提。所謂是苦聖諦，是集，是盡，是道聖諦，成就十力，四無所畏，四無礙智，十八不共法，大慈大悲，得作佛，分別三聚衆生，正定，邪定，不定。」須菩提白佛言：「云何世尊於諸法無所有性中起四禪，六神通，亦無衆生而分別作三聚？」佛告須菩提：「若諸欲、惡、不善法當有性，若自性，若他性，我本爲菩薩行時，不能觀諸欲、惡、不善法無所有性，入初禪，以諸欲、惡、不善法無有性，若自性，若他性，皆是無所有性故，我本行菩薩道時，離諸欲、惡、不善法入初禪，乃至入第四禪，須菩提！若諸神通有性，若自性，若他性，我不能知，是神通無所有性，得阿耨多羅三藐三菩提。須菩提！以神通無有性，若自性，若他性，皆無所有性，以是故，諸佛於神通，知無所有性，得阿耨多羅三藐三菩提。」

論問曰：諸法空一義，何以故須菩提種種因緣重問？此中間有法相者不得順忍，乃至若不生是諸法，不能得薩婆若。答曰：是諸法畢竟空義，甚深難解，說者尚難，何況受者、行者？是故須菩提以般若垂訖，恐人多疑多惑，故種種因緣重問。復次，所問義雖一，所因處異。或問：世尊若一切法空，云何分別有五道？或問：若一切無所有相，云何分別有三乘？或問：世尊有相者，乃至不得順忍，云何當觀八地入菩薩位？如是等種種問，異問故義得差別。般若無一定相故，佛可須菩提意。如是！如是！須菩提先問順忍者，是小乘順忍。今須菩提問菩薩順忍法。若菩薩行般若時，有法相不？佛答：菩薩行般若時，無法生是相。若有無，何以故？見有無，二俱有過故。則是菩薩順忍於一切法中不生有相，即是修道。須菩提：有法是菩薩

道。無法是果；有法名有爲法，無是無爲法。行有爲八聖道，斷諸煩惱得無爲果。復次，有人言：五波羅蜜名有法，是菩薩道；般若波羅蜜畢竟空，故無有法，是菩薩果。有人言：般若波羅蜜智慧相，有爲法，故是爲道；如法性實際，不從因緣生，常有故名爲果。如是等有無差別。以是因緣故，須菩提！當知一切法皆是無所有性，名爲無法。

復問：世尊！若一切法無所有性，佛云何於無所有性中正智得阿耨多羅三藐三菩提？於諸法中得自在？佛可其言。菩薩以無所有智合行一切法，能斷一切著故，得阿耨多羅三藐三菩提。此中佛自引爲證：我本爲菩薩時，行六波羅蜜，離欲、離惡、不善法，有覺有觀，離生喜樂入初禪。離欲者，離五欲；離惡不善法者，離五蓋。將人

入惡道，名爲惡障。善法故，名不善。有覺有觀，初禪所攝。善覺觀，離生喜樂者，捨離五欲生喜樂。喜樂者，色界中有二種樂。一者，有喜樂；二者，無喜樂。喜樂，初禪、二禪中；無喜樂，三禪中。初禪、二禪俱有喜樂，有何差別？初禪中喜樂，從離欲故生；二禪喜樂，從定生。問曰：亦離初禪煩惱，得二禪，何以不說離生？答曰：欲界中散亂故，無定稱。行者能離欲，故名爲離生。初禪中有定，二禪因初禪定生，故名爲定生。復次，欲界煩惱不善相，故障初禪。行者欲離大障，故說離生。色界煩惱，名無記，爲患微弱，以覺觀因緣，故失禪。是故佛說滅諸覺觀，內心清淨，故得二禪。三禪、四禪，如先說。我於是諸禪支，取相得已，不念有是禪。初習禪時，取相乃至得已，恐著味，故觀無常；不念有是禪，不得是禪定相，亦不受味，無染心行。四禪，異於外

道。於是諸禪，修不受果報禪。依四禪住，起五神通，亦如禪法不受其味。宿命通故，知一切衆生本業因緣，來生是間。天眼通力故，見衆生未來世所生之處。隨其業行，知一切衆生本末已，心生大悲，云何斷衆生生死相續苦。爾時，心迴向入漏盡通，即時以一念相應慧，得阿耨多羅三藐三菩提。所謂是苦相，苦因是愛，愛斷苦盡，爲到苦盡是道。通達四諦故，得十力，四無所畏，四無礙智，十八不共法，分別衆生作三聚。住三神通，度是衆生，所謂天耳，知他心，身通，爲衆生說法，令度生死。須菩提復問：若諸法無所有，云何佛爲菩薩時，起四禪、六神通？若無衆生，云何分別衆生作三聚？佛答：諸欲、諸惡若當有性，若自性，若他性，我本爲菩薩時，不能觀諸欲、惡不善法無所有性入初禪。佛意：若諸欲、不善法有定性實法，若多

若少自相者，若身中若有淨、常等性。性有二種，若自性、若他性。自性名自身不淨性，他性名衣服等莊嚴身具。此皆無常虛誑苦惱因緣，內外五欲中，無有常樂。我淨實。若有者，我本行菩薩道時，不能觀五欲空無所有性入初禪。今欲惡不善法無有實性，若自性、若他性，是故我爲菩薩時，離五欲惡不善法入初禪，乃至入第四禪。若諸神通有性，若自性、若他性，我本行菩薩時，不能知神通無所有故，得阿耨多羅三藐三菩提。須菩提問：若諸法定無所有性，佛云何於諸法中得自在力？佛答：我以四禪故，於諸煩惱得解脫；六神通故，於諸法得自在度衆生。須菩提意：以四禪、六神通是有，云何於空得自在力？佛示：我觀五欲等空，虛誑無定相故，不著此禪，而起諸神通。諸禪有相有量，故可捨，得阿耨多羅三藐三菩

提。初離欲時，以無所有性爲因，得阿耨多羅三藐三菩提果，亦無所有。若禪定空，阿耨多羅三藐三菩提不空，可有是難，今皆空故，不應有難！

大智度論卷第八十六

校譌

第三十六面

七行異問之間
宋南藏作門

音釋

桎 之日切
足械也 梏 古沃切
手械也

大智度論卷八十六
釋三次第學品第七十五之下

四二

大智度論卷第八十七

龍 樹 菩 薩 造

姚秦三藏法師鳩摩羅什譯

釋第三次第學品第七十五之下

【須菩提言：「世尊！若菩薩摩訶薩知諸法無所有性，因四禪、五神通，得阿耨多羅三藐三菩提。世尊！新學菩薩摩訶薩，云何於諸法無所有性中次第行、次第學、次第道？以是次第行、次第學、次第道，得阿耨多羅三藐三菩提？」佛告須菩提：「菩薩摩訶薩，若初從諸佛聞，若從多供養諸佛菩薩聞，若諸阿羅漢，若諸阿那含，若諸斯陀含，若諸須陀洹所聞，得無所有故是佛，得無所有故是阿羅漢，阿那含，斯陀含，須陀洹，一切賢聖，皆得無所有故有名。一切

有爲作法，無所有性，乃至無有如毫末許所有。是菩薩摩訶薩聞是已，作是念：若一切法無有性，得無所有故，是佛，乃至得無所有故，是須陀洹；我若當得阿耨多羅三藐三菩提，若不得一切法常無有性，我何以不發心得阿耨多羅三藐三菩提？得阿耨多羅三藐三菩提已，一切衆生行於有相，當令住無所有中。須菩提！菩薩摩訶薩如是思惟已，發阿耨多羅三藐三菩提心，爲度一切衆生故，菩薩摩訶薩所行次第行、次第學、次第道者，如過去諸菩薩摩訶薩所行道，得阿耨多羅三藐三菩提。是新發意菩薩，應學六波羅蜜，所謂檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。是菩薩摩訶薩，若行檀波羅蜜時，自行布施，亦教人布施，讚歎布施功德，歡喜讚歎行布施者，以是布施因緣

故，得大財富。是菩薩遠離慳心，布施衆生飲食、衣服、香華、瓔珞、房舍、臥具、燈燭，種種資生所須，盡給與之。菩薩摩訶薩行是布施及持戒，生天人中，得大尊貴。以是持戒、布施故，得禪定衆。以是布施、持戒、禪定故，得智慧衆、解脫衆、解脫知見衆。是菩薩因是布施、持戒、禪定衆、智慧衆、解脫衆、解脫知見衆故，過聲聞、辟支佛地，入菩薩位；入菩薩位已，得淨佛國土，成就衆生，得一切種智；得一切種智已，轉法輪，轉法輪已，以三乘法度脫衆生生死。如是，須菩提，菩薩以是布施，次第行，次第學，次第道，是皆不可得。何以故？自性無所有故。復次，須菩提，菩薩摩訶薩從初發意，自行持戒，教人持戒，讚歎持戒功德，歡喜讚歎行持戒者。持戒因緣故，生天人中，得大尊貴。見貧窮者，施以財物，不持戒者，教令持戒，亂意者，教令禪定，

愚癡者教令智慧，無解脫者教令解脫，無解脫知見者教令解脫知見。以是持戒、禪定、智慧、解脫、解脫知見故。過聲聞、辟支佛地，入菩薩位；入菩薩位已，得淨佛國土；淨佛國土已，成就衆生；成就衆生已，得一切種智；得一切種智已，轉法輪；轉法輪已，以三乘法度衆生。如是須菩提！菩薩以是持戒、次第行、次第學、次第道，是事皆不可得。何以故？一切法自性無所有故。復次，須菩提！菩薩摩訶薩從初已來，自行屢提波羅蜜，教人行屢提，讚歎屢提功德，歡喜讚歎行屢提者。行屢提波羅蜜時，布施衆生，各各令滿足，教令持戒，教令禪定，乃至解脫知見。以是布施、持戒、禪定、智慧因緣故。過阿羅漢、辟支佛地，入菩薩位中；入菩薩位中已，得淨佛世界；淨佛世界已，成就衆生；成就衆生已，得一切種智；得一切種智已，轉法輪。

轉法輪已，以三乘法度脫衆生。如是，須菩提！菩薩以屢提波羅蜜，次第行、次第學、次第道，是事皆不可得。何以故？一切法自性無所有故。復次，須菩提！菩薩摩訶薩從初已來，自行毗梨耶，教人行毗梨耶，讚歎行毗梨耶功德，歡喜讚歎行毗梨耶者，乃至是事不可得，自性無所有故。復次，須菩提！菩薩摩訶薩從初已來，自入禪，入無量心，入無色定，亦教人入禪，入無量心，入無色定，讚歎入禪，入無量心，入無色定功德，歡喜讚歎行禪，無量心，無色定者。是菩薩住諸禪定，無量心，布施衆生，各令滿足，教令持戒，教令禪定，智慧。以是布施、禪定、智慧、解脫、解脫知見因緣故，過阿羅漢、辟支佛地，入菩薩位，入菩薩位已，淨佛世界，淨佛世界已，成就衆生，成就衆生已，得一切種智，得一切種智已，轉法輪，轉法輪已，以三乘法度

脫一切衆生。乃至是事不可得。自性無所有故。復次。須菩提。菩薩摩訶薩。從初已來。行般若波羅蜜。布施衆生。各令滿足。教令持戒。禪定。智慧。解脫。解脫知見。是菩薩行般若波羅蜜時。自行六波羅蜜。亦教他人。令行六波羅蜜。讚歎六波羅蜜功德。歡喜讚歎行六波羅蜜者。是菩薩以是檀波羅蜜。尸羅波羅蜜。羼提波羅蜜。毗梨耶波羅蜜。禪波羅蜜。般若波羅蜜。因緣及方便力。過聲聞。辟支佛地。入菩薩位。乃至是事不可得。自性無所有故。須菩提。是名初發意菩薩摩訶薩。次第行。次第學。次第道。」

「復次。須菩提。菩薩摩訶薩。次第行。次第學。次第道。菩薩摩訶薩。從初已來。以一切種智相應心。信諸法無所有性。修六念。所謂念佛。念法。念僧。念戒。念捨。念天。須菩提。云何菩薩摩訶薩修念佛。菩

薩摩訶薩念佛，不以色念，不以受、想、行、識念。何以故？是色自性無，受、想、行、識自性無；若法自性無，是爲無所有。何以故？無憶故。是爲念佛。復次，須菩提！薩摩訶薩念佛，不以三十二相念，亦不念金色身，不念丈光，不念八十隨形好。何以故？是佛身自性無故。若法無性，是爲無所有。何以故？無憶故。是爲念佛。復次，須菩提！不應以戒衆念佛，不應以定衆、智慧衆、解脫衆、解脫知見衆念佛。何以故？是衆無有自性。若法無自性，是爲非法；無所念，是爲念佛。復次，須菩提！不應以十力念佛，不應以四無所畏、四無礙智、十八不共法念佛，不應以大慈大悲念佛。何以故？是諸法自性無。若法自性無，是爲非法；無所念，是爲念佛。復次，須菩提！不應以十二因緣法念佛，何以故？是因緣法自性無。若法自性無，是爲非法；無所念，是爲

念佛。如是，須菩提！菩薩摩訶薩行般若波羅蜜時，應念佛，是爲菩薩初發意。次第行，次第學，次第道。是菩薩摩訶薩次第行，次第學，次第道中住，能具足四念處、四正勤、四如意足、五根、五力、七覺分、八聖道分，修行空三昧、無相、無作三昧，乃至一切種智。諸法性無所有故。是菩薩知諸法性無所有，是中無有性，無無性。須菩提！云何菩薩摩訶薩應修念法？須菩提！菩薩摩訶薩行般若波羅蜜時，不念善法，不念不善法，不念記法，無記法，不念世間法，不念出世間法，不念淨法，不念不淨法，不念聖法，不念凡夫法，不念有漏法，不念無漏法，不念欲界繫法，色界繫法，無色界繫法，不念有爲法，無爲法。何以故？是諸法自性無，若法自性無，是爲非法，無所念，是爲念法。念法中學無所有性故，乃至當得一切種智。是菩薩得阿

耨多羅三藐三菩提時，得諸法無所有性，是無所有性中，非有相、非無相。如是，須菩提！菩薩摩訶薩應修念法，於是法中，乃至無少許念，何況念法！須菩提！菩薩摩訶薩云何應修念僧？須菩提！菩薩摩訶薩念僧，無爲法故，分別有佛弟子衆，是中乃至無有少許念，何況念僧！如是，菩薩摩訶薩應念僧。須菩提！菩薩摩訶薩云何應修念戒？須菩提！菩薩摩訶薩，從初發意已來，應念聖戒，無缺戒，無隙戒，無瑕戒，無濁戒，無著戒，自在戒，智者所讚戒，具足戒，隨定戒。應念是戒無所有性，乃至無少許念，何況念戒！須菩提！菩薩摩訶薩，從初發意已來，應念捨，若自念捨，若念他捨，若捨財，若捨法，若捨煩惱，觀是捨不可得，乃至無少許念，何況念捨！如是，須菩提！菩薩摩訶薩應念捨。須菩提！云何菩薩摩訶薩應念天？須菩提！菩薩

作是念：四天王諸天所有信、戒、施、聞、慧，此間命終，生彼天處，我亦有是信、戒、施、聞、慧；乃至他化自在天所有信、戒、施、聞、慧，此間命終，生彼天處，我亦有是信、戒、施、聞、慧。如是，須菩提！菩薩摩訶薩應念是天無所有性中，尚無少許念，何況念天！須菩提！菩薩摩訶薩於是六念，是名次第行、次第學、次第道。」

爾時，須菩提白佛言：「世尊！若一切法無所有性，所謂念色乃至識、眼乃至意、色乃至法，是無所有性；眼界乃至意識界，是無所有性；檀波羅蜜乃至般若波羅蜜，內空乃至無法有法空，四念處乃至八聖道分，佛十力乃至一切種智，是無所有性。世尊！若一切法無所有性者，是則無道、無智、無果。」佛告須菩提：「汝見是色性實有不？乃至一切種智實有不？」須菩提言：「不見也。世尊！」佛告

須菩提：「汝若不見諸法實有，云何作是問？」須菩提言：「世尊！我於是法不敢有疑，但爲當來世諸比丘求聲聞、辟支佛道、菩薩道者。是人當如是言：若一切法無所有性，誰垢誰淨？誰縛誰解？是知不解故而破於戒，破正見，破威儀，破淨命。是人破此事故，當墮三惡道。世尊！我畏當來世有如是事，以是故問佛。世尊！我於是法中信，不疑不悔。」

論釋曰：須菩提信受佛語，一切諸法雖空，而能起四禪、神通，是大菩薩近成佛者能行；今未知新發意者云何行，是故疑問佛。世尊！新學菩薩摩訶薩，云何於諸法無所有性中，次第行、次第學、次第道，用是次第行得阿耨多羅三藐三菩提？以次第行、次第學、次第道故，當知是新發意菩薩，雖無量劫發意，未得諸法實相，皆名新

學問曰：若如是人是新學，但應教行布施、持戒等，佛何以教令於無所有、畢竟空性中行？答曰：今明始入無所有、畢竟空法故，令行無所有，而是菩薩，以無所有、畢竟空和合布施、持戒等行，譬如小兒服藥，須蜜乃下。是故雖新發意，亦觀深空無咎。佛答須菩提：菩薩若初從諸佛聞，若從多供養諸佛者聞，諸佛者，若過去、若現在，多供養諸佛者，徧吉、觀世音、得大勢菩薩、文殊師利、彌勒菩薩等，四種聲聞聖人義，如先說。辟支佛不樂說法故，不說。諸佛等聖人，皆因無所有故，有是分別。聖人雖有禪定等諸功德，皆爲涅槃故，涅槃即是寂滅相，無所有法，是故說諸聖人，皆因涅槃有是差別。一切有爲作法，從因緣和合起故，無有實定性，乃至如毫末許所有。有爲有二種：一者色，二者無色。色法破壞，分別乃至微塵，無有

定實。無色法中，乃至無有一念定實。破義，如上說。是菩薩從諸佛聖人聞是法，餘人多以著心說，諸聖人以無著心說，是故但從聖人聞。爾時，次第學菩薩，聞是法，以比智籌量決定，知諸法究竟必空，皆入佛所得實相中，所謂寂滅無戲論相。我若得作佛，若不作佛，一等無異。何以故？諸法實相不增不減，更無新法可得故。法亦不失。若度衆生，衆生畢竟空，本末不可得。我所聞所作功德，及成佛時神通力，皆如夢如幻故，無一定實相，畢竟空。得不得雖同，我何以不發心作佛？問曰：若知諸法畢竟空，無所有者，云何復言我何以不發心作佛？答曰：畢竟空無所有，無所障礙，何妨發心？復次，若說畢竟空，滅諸戲論，云何障發心？若障即是有性，云何言無所有性？問曰：若不障發心，亦應不障不發心，菩薩何不安住而發心？

受諸勤苦。答曰：有人言：是菩薩有種種因緣應發心。或以多諸親屬知識，皆不聞不知，不得是諸法實相，是故今世後世受諸苦惱。我幸有力，能使人得離衆苦。譬如人得好良藥，親里知識受諸病苦，云何不與？是故菩薩雖知諸法性無所有，因親里故而發心，利益衆生。菩薩復作是念：我雖聞諸法實相，心未深入，未有禪定，智慧未熟，受諸苦惱，是故發心求阿耨多羅三藐三菩提，集諸功德，以無所有法作證，自爲亦爲他人。是菩薩復聞大乘深義，住衆生等法中，無別異心，可得佛。雖復中人及怨，都無異心。所以者何？是菩薩以畢竟空心，煩惱微薄，怨親平等。作是念：怨親無定，以因緣故，親或爲怨，怨或爲親。以此大因緣，具足忍波羅蜜故，得作佛。由何而得？由忍怨故，是以菩薩視怨如親。譬如欲過峻道，應當

敬重頂戴導師；又如良醫雖賤，爲貴者所重。如是思惟、籌量、分別、中人、怨家，雖於我無用，而是佛道因緣，是故發阿耨多羅三藐三菩提心。是名一種次第行、次第學、次第道，是故以過去菩薩所行爲證。問曰：次第行、次第學、次第道，有何差別？答曰：有人言：無差別，若行若學若道，義一而語異。有人言：初名行，中名學，後名道；行名布施，學名持戒，道名智慧。復次，行名持戒，學名禪定，道名智慧。復次，行名正語、正業、正命，學名正精進、正念、正定，道名正見、正思惟。此八事雖名爲道，然分別有三分：正見是道體，發起是道，名正思惟，正語、正業、正命，助益正見，故名爲行；正精進、正念、正定，能成就正見，使令牢固，是名學。復次，有人言：檀波羅蜜、毗梨耶波羅蜜，名爲行，初入道故；尸羅波羅蜜[※]，名爲學，人心常隨五欲難

「蜜」下疑脫「禪波羅蜜」四字，宜補。

禁難制，無須臾停息，漸以尸羅波羅蜜、禪波羅蜜制伏其心，是故名學。羸提波羅蜜，般若波羅蜜，名爲道。何以故？忍爲善，般若爲智慧，善智具足故名道。譬如人有眼有足，隨意所至，如是等，名爲三事差別。問曰：何以名次第？答曰：以須菩提意，若一切法無所有，初發心菩薩於是空法中，云何能漸次第學？以是故說次第。諸法雖空難解，次第行得力故，能得成就。譬如緣梯，從一初杪漸上，上處雖高雖難，亦能得至。次第行者，四種行六波羅蜜，如經中說：自行檀，教人行檀，讚檀功德，歡喜讚行檀者，善拔慳貪根，深愛檀波羅蜜，慈悲於衆生，通達諸法實相，以此因緣故，能四種行檀波羅蜜。或有人自行布施，不能教人布施；或畏他瞋，或畏爲己教布施，以之爲恩。如是等因緣故，不能教人。或有人教人布施，自不能施；或

有人種種讚歎布施之德，勸人令施而不能自行。有人自行布施，亦教人布施，稱讚布施之德，而見人布施，不能歡喜。所以者何？或有破戒惡人行施而不喜見，有人喜見施主而不讚歎，以其邪見不識施果故。如是，各各不能具足。菩薩大悲心，深愛善法故，能行四事，如上說。菩薩若但自布施，不教他人，但能今世少許利益，是衆生隨業因緣墮貧窮處，是故菩薩教衆生言：我不惜財物，我雖多施汝，汝亦不得持至後世；汝今當自作，後當自得。以布施實功德，種種因緣教衆生行施。見行施者，雖是破戒惡人，但念其好心布施之德，不念其惡，是故歡喜讚歎。復次，見三寶無盡福田中施故，福不盡，必至佛道，觀其未來無盡功德，故歡喜。行是四種布施，世世財富，是菩薩雖不爲財富布施，未具足阿耨多羅三藐三菩

提六波羅蜜等法中間而財富自至；譬如人爲穀故種禾，而稊草自至。菩薩得財物報時，離慳貪心，隨衆生意布施，須食與食等。問曰：是菩薩布施時，先施何等人？答曰：是菩薩雖因衆生起大悲心，而菩薩布施，必先供養諸佛、大菩薩、辟支佛、阿羅漢及諸聖人。若無聖人，次第施持戒、精進、禪定、智慧、離欲人。若無此人，施一切出家佛弟子。若無是人，次施持五戒、行十善道，及持一日戒、三歸。若無此人，次施中人，非正非邪者。若無此人，次施五逆惡人，及諸畜生，不可不與。菩薩以施攝一切衆生故。有人言：應先布施五逆罪人，斷善根者，貧窮、老病、下賤、乞丐者，乃至畜生。譬如慈母，多有衆子，先念羸病，給其所須；又如菩薩爲餓虎欲食子故，以身施之。問曰：如是種種，應先施何者？答曰：一切衆生皆是菩薩福田，能生大

悲故，菩薩常欲以阿耨多羅三藐三菩提施衆生，何況衣食等而有分別！又菩薩得無生忍法，平等無差；未得無生忍者，或慈悲心多，或分別心多，此二心不得俱行。悲心多者，先施貧窮惡人，作是念：種福田中，果報雖大，憐愍衆生故，先利貧者；如是田雖不良，以慈悲心得大果報。分別心多者，作是念：諸佛有無量功德，故應先供養；以分別諸法，著佛身故心小，其心雖小，福田良故，功德亦大。若得諸法實相，入般若波羅蜜方便力中，心得自在，二事俱行，慈愍衆生，又視皆如佛。如是等菩薩隨因緣行布施。問曰：經何以不言與衣食等，而言須食與食？答曰：有人須食與飲，須飲與衣，以不稱受者意故，福德少故，是故言須食與食。問曰：有人若羞若怖，雖有所須，不能發言，云何知其所須？答曰：菩薩觀其相貌，隨時所須，

土地所宜；或有知他心者，資生之具，隨意而與。是人因是布施，得成戒衆。復作是念：我憐愍衆生，以衣食布施，所益甚少，不如持戒，常以無惱無畏施於衆生。菩薩住是持戒中，爲守護戒故，生禪定，心不散清淨故，得成慧衆。無戲論捨著是慧相，以是慧破諸煩惱，縛得解脫衆；了了知見證解脫故，名解脫知見衆。是人先行布施及五衆因緣故，過聲聞、辟支佛地，入菩薩位。問曰：菩薩應行六波羅蜜，入菩薩位，此中何以說五衆？答曰：法雖一，以種種異名說，是故說五衆無咎。是人從一波羅蜜中，欲起諸波羅蜜，布施爲主，已先說持戒衆名尸波羅蜜，定衆解脫衆名禪波羅蜜，慧衆解脫知見衆是般若波羅蜜。行諸波羅蜜時，能忍諸惡事，是名羸提波羅蜜。能起諸波羅蜜，不休不息，是名毗梨耶波羅蜜。問曰：若爾者，何

以不但說諸波羅蜜名，而說五衆。答曰：是人欲入菩薩位，此中不但以持戒、禪定、得和合衆戒、清淨戒、無盡戒，以要言之，攝一切戒名爲戒衆，能破煩惱，過二乘，入菩薩位。譬如一人、二人，不名爲軍，和合多人，乃成爲軍，能破怨敵。餘衆亦如是。菩薩自得禪定等衆，亦令衆生得，是名菩薩教化衆生。教化衆生已，持自功德及衆生功德，盡迴向淨佛國土，具此二法，即得一切種智，轉法輪，以三乘法度衆生，是名菩薩次第行、次第學、次第道。先粗後細，先易後難，漸習學，名爲次第。餘五波羅蜜，亦應隨義分別。諸法性雖無所有，而隨世諦行，爲破顛倒故。

復次，念佛等六念，是初次第行，以易行易得故。問曰：六念中亦言不以色念佛，云何言易？答曰：有法共行，故名爲易。譬如服苦藥，以

蜜下之則易。六念義，如初品中廣說。六波羅蜜、六念等，柔軟易行，不生邪見，是菩薩次第學法。餘三解脫門等，思惟籌量，或生邪見故，不說。

此中須菩提難世尊，若實無所有，云何有次第行等？佛反問須菩提：汝以聲聞智慧，見色等法，是一定實法不？答言：不見色等一切法，但從因緣和合，假有其名，無有定實，云何言有？佛語須菩提：汝若不見實定有，云何以次第等難空？而次第法不離於空。爾時，須菩提受解了了，是故說：我無所疑，爲當來世求三乘人，聞佛說空無所有性，以罪重智鈍故，取空相，便言誰垢誰淨？凡夫惡人，何以名垢？出家得道人，何以名淨？是人不解佛語深義，以何事而說，著是空故，言何用持戒等爲？以是因緣，即生邪見，破正見，破正見故。

以少因緣而破戒及威儀，無所畏忌。出家人資仰白衣，便妄語求利衣食等，破於正命等。種此罪故，墮三惡道，或重於白衣。見有是失，故問佛。我已得道，於諸法無所受，又常聞佛說空法，云何戲論生疑？又我常修無諍三昧，憐愍衆生，是故問佛。

釋一念具萬行品第七十六

經作一念品

經須菩提白佛言：「世尊！若一切法性無所有，菩薩見何等利益故，爲衆生求阿耨多羅三藐三菩提？」佛告須菩提：「以一切法性無所有故，菩薩爲衆生求阿耨多羅三藐三菩提。何以故？須菩提！諸有得有著者，難可解脫。須菩提！諸得相者，無有道，無有果，無有阿耨多羅三藐三菩提。」須菩提白佛言：「世尊！無得相者，有道，有果，有阿耨多羅三藐三菩提不？」須菩提！無所得即是道，即

是果，即是阿耨多羅三藐三菩提，法性不壞故。若無所得法，欲得道，欲得果，欲得阿耨多羅三藐三菩提，爲欲壞法性。」須菩提白佛言：「世尊，若無所得法，即是道，即是果，即是阿耨多羅三藐三菩提，云何有菩薩初地，乃至十地？云何有無生忍法？云何有報得神通？云何有報得布施、持戒、忍辱、精進、禪定、智慧？住是果報法中，能成就衆生，能淨佛國土，及供養諸佛、衣服、飲食、香華、瓔珞、房舍、臥具、燈燭，種種資生所須之具，乃至得阿耨多羅三藐三菩提，不斷是福德，乃至般涅槃後舍利，及弟子得供養，爾乃滅盡。」佛告須菩提：「以諸法無所得相故，得菩薩初地，乃至十地，有報得五神通、布施、持戒、忍辱、精進、禪定、智慧，成就衆生，淨佛國土，亦以善根因緣故，能利益衆生，乃至般涅槃後舍利，及弟子得供養。」須

菩提白佛言：「世尊！若諸法無所得相，布施、持戒、忍辱、精進、禪定、智慧、諸神通，有何差別？」佛告須菩提：「無所得法，布施、持戒、忍辱、精進、禪定、智慧、神通，無有差別。以衆生著布施，乃至神通故，分別說。」世尊云：何無所得法，布施，乃至神通，無有差別？」須菩提：菩薩摩訶薩行般若波羅蜜時，不得布施，施者、受者皆不可得而行布施，不得戒而持戒，不得忍而行忍，不得精進而行精進，不得禪而行禪，不得智慧而行智慧，不得神通而行神通，不得四念處而行四念處，乃至不得八聖道分而行八聖道分，不得空三昧、無相、無作三昧而行空、無相、無作三昧，不得衆生而成就衆生，不得佛國土而淨佛國土，不得諸佛法而得阿耨多羅三藐三菩提。須菩提！菩薩摩訶薩，應如是行，無所得般若波羅蜜，菩薩摩訶薩行。

是無所得般若波羅蜜時，魔若魔天不能破壞。」

須菩提白佛言：「世尊！云何菩薩摩訶薩行般若波羅蜜時，一念中具足行六波羅蜜、四禪、四無量心、四無色定、四念處、四正勤、四如意足、五根、五力、七覺分、八聖道分、三解脫門、佛十力、四無所畏、四無礙智、十八不共法、大慈大悲、三十二相、八十隨形好？」佛告須菩提：「菩薩摩訶薩所有布施，不遠離般若波羅蜜；所修持戒，忍辱、精進、禪定，不遠離般若波羅蜜；四禪、四無量心、四無色定、修四念處，乃至八十隨形好，不遠離般若波羅蜜。」須菩提白佛言：「世尊！云何菩薩摩訶薩不遠離般若波羅蜜故，一念中具足行六波羅蜜，乃至八十隨形好？」佛言：「菩薩行般若波羅蜜時，所有布施，不遠離般若波羅蜜；不二相，持戒時亦不二相，修忍辱、勤

精進入禪定，亦不二相，乃至八十隨形好，亦不二相。」須菩提白佛言：「世尊！云何菩薩摩訶薩布施時不二相，乃至修八十隨形好不二相？」須菩提！菩薩摩訶薩行般若波羅蜜時，欲具足檀波羅蜜、檀波羅蜜中攝諸波羅蜜，及四念處，乃至八十隨形好。」世尊！云何菩薩布施時攝諸無漏法？」佛告須菩提：「若菩薩摩訶薩行般若波羅蜜，住無漏心布施，於無漏心中不見相，所謂誰施誰受，所施何物，以是無相心，無漏心，斷愛、斷慳、貪心而行布施，是時不見布施，乃至不見阿耨多羅三藐三菩提法。是菩薩以無相心、無漏心持戒，不見是戒，乃至不見一切佛法。無相心、無漏心忍辱，不見是忍，乃至不見一切佛法。以無相心、無漏心精進，不見是精進，乃至不見一切佛法。以無相心、無漏心入禪定，不見是禪定，

乃至不見一切佛法。以無相心、無漏心修習智慧，不見是智慧，乃至不見一切佛法。以無相心、無漏心修四念處，不見是四念處，乃至八十隨形好。」

「世尊！若諸法無相、無作，云何具足檀波羅蜜、尸羅波蜜、羼提波羅蜜、毗梨耶波羅蜜、禪波羅蜜、般若波羅蜜？云何具足四念處、四正勤、四如意足、五根、五力、七覺分、八聖道分？云何具足空、三昧、無相、無作、三昧、佛十力、四無所畏、四無礙智、十八不共法、大慈、大悲？云何具足三十二相、八十隨形好？」佛告須菩提：「菩薩摩訶薩行般若波羅蜜，以無相心、無漏心布施，須食與食，乃至種種所須，盡給與之。若內若外，若支解其身，若國城、妻子，布施衆生。若有人來與菩薩言：何用是布施爲？是無所益！行般若波羅蜜，菩薩作是

念是人雖來訶我布施，我終不悔，我當勤行布施，不應不與。施已，與一切衆生共之，迴向阿耨多羅三藐三菩提，亦不見是相。誰施誰受？所施何物？迴向者誰？何等是迴向法？何等是迴向處？所謂阿耨多羅三藐三菩提，是相皆不可見。何以故？一切法以內空故空，外空故空，內外空故空，空空，有爲空，無爲空，畢竟空，無始空，散空，性空，一切法空，自相空故空。如是觀，作是念：迴向者誰？迴向何處？用何法迴向？是名正迴向。爾時，菩薩能成就衆生，淨佛國土，能具足檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，乃至三十七助道法，空，無相，無作三昧，乃至十八不共法。是菩薩如是具足檀波羅蜜而不受世間果報，譬如他化自在諸天，隨意所須，即皆得之。菩薩亦如是，心生所願，隨意即得。是

菩薩摩訶薩，以是布施果報故，能供養諸佛，亦能滿足一切衆生，天及人、阿修羅。是菩薩以檀波羅蜜攝取衆生，用方便力，以三乘法度脫衆生。如是，須菩提，菩薩摩訶薩於無相、無得、無作諸法中，具足檀波羅蜜。」

「須菩提，菩薩摩訶薩云何於無相、無得、無作法中，具足尸羅波羅蜜？須菩提，是菩薩摩訶薩行尸波羅蜜時，持種種戒，所謂聖無漏入八聖道戒、自然戒、報得戒、受得戒、心生戒，如是等不缺、不破、不雜、不濁、不著，自在戒、智所讚戒。用是戒，無所取。若色，若受、想、行、識，若三十二相、八十隨形好，若刹利大姓，若婆羅門大姓，居士大家，四天王天、三十三天、夜摩天、兜率陀天、化樂天，他化自在天、梵衆天、光音天、徧淨天、廣果天、無想天、無煩天、無熱天、妙見天、喜見

天、阿迦尼吒天、空處天、識處天、無所有處天、非有想、非無想處天；若須陀洹果、若斯陀含果、若阿那含果、若阿羅漢果、若辟支佛道；若轉輪聖王、若天王，但爲一切衆生共之，迴向阿耨多羅三藐三菩提，以無相、無得、無二迴向，爲世俗法故，非第一實義。是菩薩具足尸羅波羅蜜，以方便力起四禪，不味著，故得五神通。因四禪得天眼，是菩薩住二種天眼，修得報得天眼已，見東方現在諸佛，乃至得阿耨多羅三藐三菩提，如所見事不失。南、西、北、方、四維、上下現在諸佛，乃至得阿耨多羅三藐三菩提，如所見不失。是菩薩用天耳淨，過於人耳，聞十方諸佛說法，如所聞不失，能自饒益，亦益他人。是菩薩以知他心智，知十方諸佛心，及知一切衆生心，亦能饒益一切衆生。是菩薩用宿命智，知過去諸業因緣，是諸業因

緣不失故，是衆生在在處處所生悉知。是菩薩用是漏盡智，令衆生得須陀洹果，乃至阿羅漢果，辟支佛道，在在處處能令衆生入善法中。如是，須菩提，菩薩摩訶薩於諸法無相、無得、無作，具足尸羅波羅蜜。」

「世尊！云何諸法無相、無作、無得，菩薩摩訶薩能具足尸羅提波羅蜜？」須菩提，菩薩摩訶薩從初發意已來，乃至坐道場於其中間，若一切衆生來以瓦石、刀杖加是菩薩，菩薩是時不起瞋心，乃至不生一念。爾時，菩薩應修二種忍：一者一切衆生惡口罵詈，若加刀杖、瓦石、瞋心不起；二者一切法無生、無生法忍。菩薩若人來惡口罵詈，或以瓦石、刀杖加之。爾時，菩薩應如是思惟：罵我者誰？譏訶者誰？打擲者誰？誰有受者？是時菩薩應思惟諸法實性，所謂畢

竟空，無法，無衆生；諸法尚不可得，何況有衆生！如是觀諸法相時，不見罵者，不見割截者。是菩薩如是觀諸法相時，即得無生法忍。云何名無生法忍？知諸法相常不生，諸煩惱從本已來亦常不生。是菩薩摩訶薩住是二忍，能具足四禪、四無量心、四無色定、四念處，乃至八聖道分、三解脫門、佛十力、四無所畏、四無礙智、十八不共法、大慈大悲。是菩薩住是聖無漏出世間法，不共一切聲聞、辟支佛，具足聖神通。住聖神通已，以天眼見東方諸佛，是人得念佛三昧，乃至阿耨多羅三藐三菩提，終不斷絕。南、西、北方，四維、上下亦如是。菩薩用天耳聞十方諸佛所說法，如所聞爲衆生說。是菩薩亦知十方諸佛心，及知一切衆生念，知己，隨其心而說法。是菩薩以宿命智知一切衆生宿世善根，爲衆生說法，令其歡喜。是菩

薩以漏盡神通，教化衆生，令得三乘。是菩薩摩訶薩行般若波羅蜜，以方便力成就衆生，具足一切種智，得阿耨多羅三藐三菩提，轉法輪。如是須菩提，菩薩摩訶薩無相、無得、無作法中，具足羼提波羅蜜。」

須菩提言：「世尊！菩薩摩訶薩，云何於諸法無相、無作、無得，能具足毗梨耶波羅蜜？」佛告須菩提：「菩薩摩訶薩行般若波羅蜜時，成就身精進，心精進。入初禪，乃至入第四禪，受種種神通力，能分一身爲多身，乃至手捫摸日月，成就身精進故，飛到東方過無量百千萬諸佛世界，供養諸佛飲食、衣服、醫藥、臥具、香華、瓔珞種種所須，乃至阿耨多羅三藐三菩提，福德果報，終不減盡。是菩薩得阿耨多羅三藐三菩提時，一切世間天及人，勤設供養衣服、飲

食乃至入無餘涅槃後舍利及弟子得供養亦以是神通力故至諸佛所聽受法教乃至阿耨多羅三藐三菩提終不違失是菩薩修一切種智時淨佛世界成就衆生如是須菩提菩薩摩訶薩行般若波羅蜜成就身精進能具足毗梨耶波羅蜜須菩提云何菩薩成就心精進能具足毗梨耶波羅蜜須菩提菩薩摩訶薩心精進以是心精進聖無漏入八聖道分精進不令身口不善業得入亦不取諸法相若常若無常若苦若樂若我若無我若有爲若無爲若欲界若色界若無色界若有漏性若無漏性若初禪乃至第四禪若慈悲喜捨若無邊虛空處乃至非有想非無想處若四念處若四正勤四如意足五根五力七覺分八聖道分若空無相無作若佛十力乃至十八不共法不取相若常若無常若苦若樂若

我若無我，若須陀洹果、斯陀含果、阿那含果、阿羅漢果，若辟支佛道，若菩薩道，若阿耨多羅三藐三菩提，若是須陀洹、斯陀含、阿那含、阿羅漢，若是辟支佛，是菩薩，是佛，不取相。是衆生斷三結故，得須陀洹；是衆生三毒薄故，得斯陀含；是衆生斷下分結故，得阿那含；是衆生斷上分結故，得阿羅漢；是衆生以辟支佛道故，作辟支佛；是衆生行道種智故，名菩薩，亦不取是諸相。何以故？不可以性取相，是性無故。是菩薩以是心精進故，廣利益衆生，亦不得衆生，是爲菩薩具足毗梨耶波羅蜜。具足諸佛法，淨佛國土，成就衆生，不可得故。是菩薩身精進，心精進，成就故，攝取一切諸善法，是法亦不著故。從一佛國至一佛國，爲利益衆生，所作神通，隨意無礙。若雨諸華，若諸名香，若作伎樂，若動大地，若放光明，若示七寶莊

嚴國土，若現種種身，若放大智光明，令知聖道，令遠離殺生乃至邪見，或以布施利益衆生，或以持戒，或支解身體，或以妻子，或以國城，或以己身給施，隨所方便，利益衆生。如是，須菩提！菩薩摩訶薩行般若波羅蜜，無相、無作、無得諸法中，用身心精進，能具足毗梨耶波羅蜜。」

「世尊！云何菩薩摩訶薩行般若波羅蜜，住無相、無作、無得法中，能具足禪波羅蜜？」須菩提！菩薩摩訶薩，除佛諸禪定，餘一切諸禪、三昧，皆能具足。是菩薩離諸欲、諸惡、不善法，離生喜樂，有覺有觀，入初禪，乃至入第四禪。以是慈悲、喜捨心，徧滿一方，乃至十方，一切世間徧滿。是菩薩過一切色相，滅有對相，不念別異相故，入無邊空處，乃至入非有想非無想處。是菩薩於禪波羅蜜中住，逆

順入八背捨、九次第定、入空三昧、無相、無作三昧、或時入如雷光三昧、或時入聖正三昧、或時入如金剛三昧。是菩薩住禪波羅蜜中、修三十七助道法、用道種智入一切禪定、過乾慧地、性地、八人地、見地、薄地、離欲地、已辦地、辟支佛地、入菩薩位、入菩薩位已、具足佛地。是諸地中行、乃至阿耨多羅三藐三菩提、不中道取道果。是菩薩住是禪波羅蜜中、從一佛國至一佛國、供養諸佛、從諸佛所植諸善根、淨佛國土。從一佛國、至一佛國、利益衆生、以布施攝取衆生、或以持戒、或以三昧、或以智慧、或以解脫、或以解脫知見、攝取衆生。教衆生、令得須陀洹果、斯陀含果、阿那含果、阿羅漢果、辟支佛道、諸有善法、能令衆生得道、皆教令得。是菩薩住此禪波羅蜜中、能生一切陀羅尼門、得四無礙智、報得神通。是菩薩終不

入母人胞胎，終不受五欲，無生不生，雖生不爲生法所汙。何以故？是菩薩見一切作法如幻，而利益衆生，亦不得衆生，及一切法教衆生，令得無所得處。是世俗法故，非第一實義。住是禪波羅蜜，一切行禪、定、解脫、三昧，乃至阿耨多羅三藐三菩提，終不離禪波羅蜜。是菩薩行如是道種智時，得一切種智，斷一切煩惱習，斷已，自益其身，亦益他人。自益益他已，爲一切世間天及人、阿修羅作福田。如是，須菩提！菩薩摩訶薩行般若波羅蜜時，具足無相禪波羅蜜。

「世尊！云何菩薩摩訶薩行般若波羅蜜時，住無相、無作、無得法中，修具足般若波羅蜜？」須菩提！菩薩摩訶薩行般若波羅蜜時，於諸法不見定實相。是菩薩見色不定、非實相，乃至見識不定、非

實相。不見色生，乃至不見識生；若不見色生，乃至不見識生，一切法若有漏，若無漏，不見來處，不見去處，亦不見集處。如是觀時，不得色性，乃至識性，亦不得有漏，無漏法性。是菩薩行般若波羅蜜時，信解一切諸法無所有相。如是信解已，行內空，乃至無法有法空，於諸法無所著，若色、受、想、行、識，乃至阿耨多羅三藐三菩提。是菩薩行無所有般若波羅蜜，能具足菩薩道。所謂六波羅蜜，乃至三十七助道法，佛十力，四無所畏，四無礙智，十八不共法，三十二相，八十隨形好。是菩薩住空淨佛道中，所謂六波羅蜜，三十七助道法，報得神通，以是法饒益衆生。宜以布施攝，教令布施；宜以戒攝，教令持戒；宜以禪定、智慧解脫，解脫知見攝，教修禪定、智慧解脫。解脫知見，宜以諸道法教者，教令得須陀洹果，得斯陀含果，阿

那含果、阿羅漢果、辟支佛道，宜以佛道化者，教令得菩薩道，具足佛道。如是等，隨其所應道地而教化之，各令得所。是菩薩現種種神通力時，過無量恆河沙國土，度脫衆生，隨其所須，皆化給之，各令滿足。從一國土至一國土，見淨妙國土，以自莊嚴己佛國土。譬如他化自在天中，資生所須，隨意自至；亦如諸淨佛國，離於求欲。是人以是報得檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，報得五神通，行菩薩道種智，成就一切功德，當得阿耨多羅三藐三菩提。是菩薩爾時不受色法，乃至識，不受一切法。若善，若不善，若世間，若出世間，若有漏，若無漏，若有爲，若無爲，如是一切法皆不受。是菩薩得阿耨多羅三藐三菩提時，國土一切所有資生之物，皆無有主。何以故？菩薩行一切法不

受以不可得故。如是須菩提！菩薩摩訶薩無相法中，能具足般若波羅蜜。」

論問曰：問者答者，俱言無所有，云何分別知是問，是答？答曰：所言法雖一而心異，問者以著心問，答者以無著心答。須菩提意謂：無所有中不應發心，須菩提爲聽者著心，故作是問。諸法空中不見菩薩發心者，不見衆生可利益者，不見阿耨多羅三藐三菩提，是故於無所有法中作難。若一切法無所有性，菩薩見何利故發心？須菩提於菩薩衆生、阿耨多羅三藐三菩提中不疑，但問無所有法。佛答正以無所有空故能發心，若無所有空，菩薩衆生、阿耨多羅三藐三菩提，亦皆空無所有，云何起難？若衆生、菩薩及阿耨多羅三藐三菩提，離無所有空者，可有是難。如先說，畢竟空於諸

法無所障礙，何妨發心？佛還以無所有空，破須菩提所問。亦復自說因緣：須菩提！著心者難得解脫。是人從無始生死中來，以一切煩惱故，染著諸法，聞有亦著，聞空亦著，得失亦著，如是衆生難可勉出。是故菩薩發無上道心，自以相好嚴身，得梵音聲，有大威德，知衆生三世心根本，以種種神通力，因緣譬喻，爲說無所有法，空解脫門，引導其心。衆生見如是希有事，即時其心柔輒，信佛受法。是故經說：著有者難得解脫；有所得者，無道、無果、無阿耨多羅三藐三菩提。須菩提問：世尊！若有所得者，無道、無果、無阿耨多羅三藐三菩提，無所得者有道、有果不？佛答：無所有即是道，即是果，即是阿耨多羅三藐三菩提。若人不分別，是有所得，是無所得，入諸法實相，畢竟空中，是亦無所得，即是道，即是果，即是阿耨多羅三

藐三菩提。不破壞諸法實相故。法性即是諸法實相。須菩提意謂：法性，正行，邪行，常不可破壞，何以佛言不壞法性是道，是果？佛答：法性雖不可破壞，衆生邪行故，名爲破壞。如虛空雲霧生塵，雖不能染，亦名不淨。如人實欲染汙虛空，是人爲欲染汙法性，無是事故。佛說譬喻：若人欲壞法性，是人欲於無所有法中，得道，得果，得阿耨多羅三藐三菩提。須菩提白佛言：若無所有即是道，云何有十地等諸菩薩法？如經廣說。問曰：此事佛已先答，所謂若法空，菩薩見何事故發心？今言若法空，云何有初地等？佛皆以空答，今須菩提何以更問？答曰：以衆生著心難解，故更問。是衆中，有新發意菩薩，聞是諸法實相空，即生著心。佛破其著，亦著所破法，須菩提爲是人故更問。佛答須菩提：以無所得故，有初地，乃至般涅槃後。

舍利得供養。有所著中，不可說初地及諸功德，亦以無所得因緣故，從布施乃至諸神通，無有差別，無有差別，故不應難。須菩提復問：云何無所得布施，乃至諸神通，無有差別？佛答：菩薩從初發心已來，似阿耨多羅三藐三菩提寂滅相，布施畢竟空，所謂不得施者、受者、財物而行布施，如是布施中無有分別，乃至不得菩提而得阿耨多羅三藐三菩提，亦如是。是名菩薩行無所得般若波羅蜜。行是無所得般若波羅蜜，魔若魔天不能破壞。

一念中行六波羅蜜者，問曰：須菩提何以故問一念中行六波羅蜜等諸功德？答曰：須菩提從佛聞般若波羅蜜甚深無所有相，於諸法中無礙相，若爾者，則無所不能，無事不作，云何菩薩一念中能攝六波羅蜜，乃至八十隨形好？初發心時，以著有無心重故，漸

漸次第行；今有無悉捨故，無所不能，是故問。佛答：菩薩不離般若波羅蜜，行布施等諸功德，無障礙故，能一念中行；若遠離般若波羅蜜，則漸漸次第行。須菩提問：云何名不遠離？佛答：菩薩不以二相行布施等。復問：云何不以二相？佛答：菩薩行般若波羅蜜時，欲具足檀波羅蜜於布施一念中攝一切善法，如先說。何等是一念？所謂菩薩得無生法忍，斷一切煩惱，除諸憶想分別，安住無漏心中，布施一切。無漏心是無相相，菩薩住是心中，不見誰施，誰受，誰物，離一切相心布施。不見有一法，乃至阿耨多羅三藐三菩提尚不見，何況餘法！是名不二相。乃至八十隨形好，亦如是。須菩提更以異事問此義。世尊！諸法無相，無作，無起，云何能具足檀波羅蜜等，乃至八十隨形好？佛答：菩薩無相，無作法中，不取相故，無障礙。

心布施，須食與食等，經中已委悉。又先品中亦廣說，是故更不解。無漏、無相、六波羅蜜有二種：一者得無生法忍菩薩所行；二者未得無生法忍菩薩所行。得無生法忍菩薩所行，如中所說。何以故？住無相、無漏心中，行布施等諸法故。問曰：生身菩薩貪惜未除，故割截甚痛，是則爲難；得無生法忍菩薩，如化人所作，割截無痛，有何恩分？答曰：得無生法忍菩薩，行是六波羅蜜爲難。所以者何？得無生法忍寂滅心，應受涅槃樂，而捨此寂滅樂，入衆生中受種種身，或爲賤人，或爲畜生等，是則爲難。生身菩薩貪愛未除，著佛身故，以身布施，是爲希望，非清淨施，是故不如。復次，行無漏、無相、六波羅蜜，是時能具足，有漏、有相則不能具足，是故能具足者，有大恩分。

大智度論卷第八十七

音釋

隙

乞逆切
罅隙也

桃

古曠切
桃橫木也

丐

古太切
乞也

捫

捫莫奔切

摸

摸紫各切

大智度論卷第八十八

龍 樹 菩 薩 造

姚秦三藏法師鳩摩羅什譯

釋六喻品第七十七

經須菩提白佛言：「世尊！云何無相不可分別、自相空諸法中，具足修六波羅蜜，所謂檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜？世尊！云何無異法中而分別說異相？云何般若波羅蜜攝檀、尸羼精進、禪？云何行異相法，以一相道得果？」佛告須菩提：「菩薩摩訶薩，住五陰如夢、如響、如影、如燄、如幻、如化，住是中行布施、持戒、修忍辱、勤精進，入禪定、修智慧。知是五陰實如夢、如響、如影、如燄、如幻、如化，五陰如夢無相，乃至如

化無相。何以故？夢無自性，響、影、燄、幻、化，皆無自性。若法無自性，是法無相。若法無相，是法一相，所謂無相。以是因緣故，須菩提！當知菩薩布施無相，受者無相。能如是知布施，是能具足檀波羅蜜，乃至能具足般若波羅蜜；能具足四念處，乃至八聖道分；能具足內空，乃至無法有法空；能具足空三昧、無相、無作三昧；能具足八背捨九次第定、五神通、五百陀羅尼門；能具足佛十力、四無所畏、四無礙智、十八不共法。是菩薩住是報得無漏法中，飛到東方無量國土，供養諸佛衣服、飲食，乃至隨其所須而供養之。亦利益衆生：應以布施攝者，而布施攝之；應以持戒攝者，教令持戒；應以忍辱、精進、禪定、智慧攝者，教令忍辱、精進、禪定、智慧而攝取之。乃至應以種種善法攝者，以種種善法而攝取之。是菩薩成就是一切善

法受世間身，不爲世間生死所汙，爲衆生故，於天人中受尊貴富樂，以是尊貴富樂攝取衆生。是菩薩知一切法無相故，知須陀洹果亦不於中住，知斯陀含果、阿那含果、阿羅漢果亦不於中住，知辟支佛道亦不於中住。何以故？是菩薩用一切種智知一切法已，應當得一切種智，不與聲聞、辟支佛共。如是，須菩提！菩薩摩訶薩知一切法無相已，知六波羅蜜無相，乃至知一切佛法無相。」

「復次，須菩提！菩薩摩訶薩住五陰如夢、如響、如影、如燄、如幻、如化，能具足無相尸羅波羅蜜，是戒不缺、不破、不雜、不著，聖人所讚無漏戒，入八聖道分，住是戒中，持一切戒，所謂名字戒、自然戒、律儀戒、作戒、無作戒、威儀戒、非威儀戒。是菩薩成就諸戒，不作是願：我以此戒因緣故，生刹利大姓、婆羅門大姓、居士大家，若小王家，

若轉輪聖王家，若四天王天處生，若三十三天、夜摩天、兜率陀天、化樂天，他化自在天。不作是願：我持戒因緣故，當得須陀洹果。斯陀含果、阿那含果、阿羅漢果，辟支佛道。何以故？一切法無相，所謂一相。無相法不能得無相法，有相法不能得有相法，無相法不能得有相法，有相法不能得無相法。如是，須菩提！菩薩摩訶薩行般若波羅蜜時，能具足無相尸羅波羅蜜而入菩薩位。入菩薩位已，得無生法忍，行道種智，得報得五神通，住五百陀羅尼門，得四無礙智。從一佛國，至一佛國，供養諸佛，成就衆生，淨佛國土，雖入五道中，生死業報不能染汙。須菩提！譬如化轉輪聖王，雖坐臥行住，不見來處，不見去處，不見住處，坐處、臥處，而能利益衆生，亦不得衆生，菩薩亦如是。須菩提！譬如須扇多佛，得阿耨多羅三藐三菩

提爲三乘轉法輪，無有得菩薩記者；化作佛已，捨壽命，入無餘涅槃。須菩提！菩薩亦如是，行般若波羅蜜時，能具足尸羅波羅蜜；具足尸羅波羅蜜已，攝一切善法。」

「復次，須菩提！菩薩摩訶薩行般若波羅蜜時，住五陰如夢，如響，如影，如燄，如幻，如化，具足無相羸提波羅蜜。」世尊！云何菩薩摩訶薩具足無相羸提波羅蜜？」「須菩提！菩薩摩訶薩住二忍中，能具足羸提波羅蜜。何等二忍？生忍、法忍。從初發意，乃至坐道場，於其中間，若一切衆生來罵詈、粗惡語，或以瓦石、刀杖加是菩薩，是菩薩欲具足羸提波羅蜜故，乃至不生一念惡。是菩薩如是思惟：罵我者誰？割我者誰？以惡言加我，以瓦石、刀杖害我者誰？何以故？是菩薩於一切法得無相忍故，云何作是念，是人罵我，害我！若菩

薩摩訶薩如是行，能具足羸提波羅蜜，以是羸提波羅蜜具足故，得無生法忍。須菩提白佛言：「世尊！云何爲無生法忍？是忍何所斷？何所知？」佛告須菩提：「得法忍，乃至不生少許不善法，是故名無生忍。一切菩薩所斷煩惱盡，是名斷；用智慧知一切法不生，是名知。」須菩提白佛言：「世尊！諸聲聞、辟支佛無生法忍，菩薩無生法忍，有何等異？」佛告須菩提：「諸須陀洹若智、若斷，是名菩薩忍；斯陀含若智、若斷，是名菩薩忍；阿那含若智、若斷，是名菩薩忍；阿羅漢若智、若斷，是名菩薩忍；辟支佛若智、若斷，是名菩薩忍；是爲異。須菩提！菩薩摩訶薩成就是忍，勝一切聲聞、辟支佛。住是報得無生忍中行菩薩道，能具足道種智；具足道種智故，常不離三十七助道法，及空、無相、無作三昧，常不離五神通；不離五

神通故，能成就衆生，淨佛國土；成就衆生，淨佛國土已，當得一切種智。如是，須菩提！菩薩摩訶薩具足無相，屢提波羅蜜。」

「復次，須菩提！菩薩摩訶薩住無相五陰，如夢、如響、如影、如燄、如幻、如化，行身精進、心精進。以身精進故起神通，起神通故，到十方國土，供養諸佛，饒益衆生；以身精進力教化衆生，令住三乘。如是，須菩提！菩薩摩訶薩行般若波羅蜜，能具足無相精進波羅蜜。是菩薩以心精進、聖無漏精進，入八聖道分中，能具足毗梨耶波羅蜜。是毗梨耶波羅蜜，皆攝一切善法，所謂四念處、四正勤、四如意足、五根、五力、七覺分、八聖道分、四禪、四無量心、四無色定、八解脫、九次第定、佛十力、四無所畏、四無礙智、十八不共法。是中菩薩行是法，應具足一切種智；具足一切種智已，斷一切煩惱習，具足滿

三十二相，身放無等無量光明；放光明已，三轉十二行法輪；法輪轉故，三千大千世界六種震動，光明徧照三千大千世界，三千大千世界中衆生，聞說法聲，皆以三乘法而得度脫。如是，須菩提！菩薩摩訶薩住精進波羅蜜中，能大饒益，及能具足一切種智。」

「復次，須菩提！菩薩住無相五陰，如夢、如響、如影、如燄、如幻、如化，能具足禪波羅蜜。」世尊！云何菩薩住五陰如夢、如響、如影、如燄、如幻、如化，能具足禪波羅蜜？」「須菩提！菩薩摩訶薩入初禪，乃至第四禪，入慈悲喜捨無量心；入無邊虛空處，乃至非有想非無想處；入空三昧、無相、無作三昧；入如電光三昧，入如金剛三昧，入聖正三昧，除諸佛三昧，諸餘三昧，若共聲聞、辟支佛三昧，皆證皆入，亦不受三昧味，亦不受三昧果。何以故？是菩薩知是三昧無相、無

所有性，當云何於無相法受無相法味？無所有法受無所有法味？若不受味，則不隨禪定力生。若色界、若無色界。何以故？是菩薩不見是三界，亦不見是禪，亦不見入禪者，亦不見用法入禪者。若不得是法，即能具足無相禪波羅蜜；菩薩用是禪波羅蜜，能過聲聞、辟支佛地。須菩提白佛言：「世尊！云何菩薩具足無相禪波羅蜜故，能過聲聞、辟支佛地？」佛告須菩提：「菩薩善學內空，善學外空，乃至善學無法有法空。於是諸空，無法可住處。若須陀洹果，若斯陀含果、阿那含果、阿羅漢果，乃至一切種智。是諸空亦空，菩薩摩訶薩行如是諸空，能入菩薩位中。」須菩提白佛言：「世尊！云何菩薩摩訶薩位？云何非位？」須菩提：「一切有所得是非菩薩位，一切無所得是菩薩位。」世尊！何等是有所得？何等是無所得？」

「須菩提！色是有所得，受、想、行、識是有所得；眼、耳、鼻、舌、身、意，乃至一切種智有所得，是非菩薩位。須菩提！菩薩位者，是諸法不可示、不可說。何等法不可示、不可說？若色乃至一切種智，何以故？須菩提！色性是不可示、不可說，乃至一切種智性是不可示、不可說。須菩提！如是名菩薩位。是菩薩入位中，一切禪定、三昧具足，尚不隨禪定、三昧力生，何況住淫、怒、癡，於中起罪業生！菩薩但住如幻法中，饒益衆生，亦不得衆生及如幻法。若無所得，是時能成就衆生，淨佛國土。如是，須菩提！是名菩薩具足無相禪波羅蜜，乃至能轉法輪，所謂不可得法輪。」

「復次，須菩提！菩薩摩訶薩行般若波羅蜜，知一切法如夢、如響、如燄、如影、如幻、如化。」須菩提白佛言：「世尊！菩薩摩訶薩云何

知一切法，如夢、如響、如影、如燄、如幻、如化。「須菩提！菩薩摩訶薩行般若波羅蜜時，不見夢、不見見夢者，不見響、不見聞響者，不見影、不見見影者，不見燄、不見見燄者，不見幻、不見見幻者，不見化、不見見化者。何以故？是夢、響、影、燄、幻、化，皆是凡夫愚人顛倒法故。阿羅漢不見夢、不見見夢者，乃至不見化、不見見化者；辟支佛、菩薩摩訶薩、諸佛，亦不見夢、不見見夢者，乃至不見化、亦不見見化者。何以故？一切法無所有性，不生、不定。」若法無所有性，不生、不定，菩薩摩訶薩當云何行般若波羅蜜？「是中取生相、定相，是處不然。何以故？若諸法少多有性，有生、有定，不名修般若波羅蜜。如是，須菩提！菩薩摩訶薩行般若波羅蜜，不著色乃至不著識，不著欲、色、無色界，不著諸禪、解脫、三昧，不著四念處乃至八聖道分，不

著空三昧、無相、無作三昧、不著檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。不著故能具足菩薩初地。於初地中亦不生著。何以故？是菩薩不得是地。云何生貪著？乃至十地亦如是。是菩薩行般若波羅蜜，亦不得般若波羅蜜。若行般若波羅蜜時，不得般若波羅蜜，是時見一切法皆入般若波羅蜜中，亦不得是法。何以故？是諸法與般若波羅蜜無二無別。何以故？諸法入如法性實際故，無分別。須菩提白佛言：「世尊！若諸法無相、無分別，云何說是善、是不善、是有漏、是無漏？是世間、是出世間？是有爲、是無爲？」須菩提於汝意云何？諸法實相中，有法可說是善、是不善，乃至是有爲、是無爲，是須陀洹果乃至是阿羅漢，是辟支佛，是菩薩，是阿耨多羅三藐三菩提不？」世尊不可說也！」

「須菩提！以是因緣故，當知一切法無相、無分別、無生、無定、不可示。須菩提！我本行菩薩道時，亦無有法可得性。若色、若受、想、行、識，乃至若有爲、若無爲，須陀洹果乃至阿耨多羅三藐三菩提。如是，須菩提！菩薩摩訶薩行般若波羅蜜，從初發意，乃至阿耨多羅三藐三菩提，應善學諸法性。善學諸法性故，是名阿耨多羅三藐三菩提道。行是道，能具足六波羅蜜，成就衆生，淨佛國土，住是法中，得阿耨多羅三藐三菩提，以三乘法度脫衆生，亦不著三乘。如是，須菩提！菩薩摩訶薩，以無相法應學般若波羅蜜！」

論問曰：須菩提問佛，若諸法無相、無分別，云何差別說六波羅蜜？佛還答：菩薩住是如夢五衆中，能具足六波羅蜜。須菩提以空問，佛還以空答，此問答云何得別異？答曰：須菩提問：若諸法空，今眼

見菩薩行六波羅蜜作佛。佛答：凡人遠實智慧取相，見菩薩行六波羅蜜作佛，著是空法故難。菩薩雖住五衆，住五衆如幻、如夢、空法中，亦以空心行布施，是故雖行諸法，具足波羅蜜，不妨於空。譬如雲霧，遠視則見，近之則無所見；凡人亦如是，遠實相故，見諸佛、菩薩，近實相故，見皆空，是故不妨。不妨故，能於檀波羅蜜一念中，具足行諸善法。是人常修無漏清淨波羅蜜故，轉身還報得無漏波羅蜜。報得名，更不修行，自然而得，譬如報得眼根，自然能見色。得是報得無漏波羅蜜已，能變一身作無量阿僧祇身，於十方佛所具足聞諸佛甚深法，度脫十方衆生，漸漸淨佛世界，隨願作佛。問曰：若諸法空無相，云何分別？云何得知行檀波羅蜜等，各各具足餘波羅蜜？答曰：行者雖不自分別，而諸佛、菩薩說其行檀、行尸、

具足諸行。如聲聞人入見諦，無漏、無相、無分別法中，餘聖人亦數其所入法。知諸法實相，所謂無相相，是名正見；正見得力已，名爲正行。是時不惱衆生，不作諸惡，是名正語、正業、正命。是時雖無所說，亦無所造，而名爲正語、正業。所以者何？是名深妙正語、正業，所謂畢竟不惱衆生故。是中發心有所造作，是名精進；繫念緣中，是名正念；攝心一處，是名正定。見身受、心、法實相，是名四念處。乃至七覺意，亦如是。於四念處中，亦如八直聖道中，諸聖人爲數。菩薩亦如是，行是無相檀波羅蜜，能具足尸羅波羅蜜等諸善法。如檀波羅蜜、尸羅波羅蜜等攝諸善法，亦如是。問曰：上品中以一波羅蜜具諸波羅蜜，此無相攝一切法，有何差別？答曰：上一念中能具諸波羅蜜，此以諸法雖空無相而能具諸波羅蜜，爲異。

釋四攝品第七十八之上

釋須菩提白佛言：「世尊！若諸法如夢、如響、如影、如燄、如幻、如化，無有實事，無所有性，自相空者，云何分別是善法、是不善法？是世間法、是出世間法？是有漏法、是無漏法？是有爲法、是無爲法？是法能得須陀洹果、能得斯陀含果、阿那含果、阿羅漢果、能得辟支佛道、能得阿耨多羅三藐三菩提？」佛告須菩提：「凡夫愚人得夢、得見夢者，乃至得化、得見化者，起身口意善業、不善業、無記業，起福業、若起罪業、作不動業，是菩薩摩訶薩行般若波羅蜜，住二空中，畢竟空、無始空。爲衆生說法，作是言：諸衆生！是色、空、無所有、受、想、行、識、空、無所有。十二入、十八界、空、無所有。色是夢、受、想、行、識是夢，十二入、十八界是夢。色是響、是影、是燄、是幻、是化，受、想、行、識亦

如是。十二入、十八界是夢、是響、是影、是燄、是幻、是化、是中無陰入、界、無夢亦無見夢者、無響亦無聞響者、無影亦無見影者、無燄亦無見燄者、無幻亦無見幻者、無化亦無見化者。一切法無根本、實性無所有。汝等於無陰中見陰、無入見有入、無界見有界、是一切法皆從因緣和合生、以顛倒心起、屬業果報。汝等何以故於諸法空無根本中而取根本相？是時菩薩摩訶薩行般若波羅蜜、以方便力故、於慳法中拔出衆生、教行檀波羅蜜、持是布施功德、得大福報；從大福報拔出、教令持戒、持戒功德、生天上尊貴處、復拔出令住初禪、初禪功德、生梵天處、二禪、三禪、四禪、無邊空處、識處、無所有處、非有想、非無想處亦如是。衆生行是布施及布施果報、持戒及持戒果報、禪定及禪定果報、種種因緣拔出安置、無餘涅槃。

及涅槃道中。所謂四念處、四正勤、四如意足、五根、五力、七覺分、八聖道分、空解脫門、無相、無作解脫門、八背捨、九次第定、佛十力、四無所畏、四無礙智、十八不共法、安隱衆生、令住聖無漏法、無色、無形、無對法中。有可得須陀洹果者、安隱教化、令住須陀洹果、可得斯陀含果、阿那含果、阿羅漢果、辟支佛道者、令住斯陀含果、阿那含果、阿羅漢果、辟支佛道、可得阿耨多羅三藐三菩提者、安隱教化、令住阿耨多羅三藐三菩提中。須菩提白佛言：「世尊！諸菩薩摩訶薩甚希有難及能行是深般若波羅蜜、諸法無所有性、畢竟空、無始空、而分別諸法是善、是不善、是有漏、是無漏、乃至是有爲、是無爲。」佛告須菩提：「如是如是！諸菩薩摩訶薩甚希有難及能行是深般若波羅蜜、諸法無所有性、畢竟空、無始空、而分別

諸法須菩提！汝等若知是菩薩摩訶薩，希有難及法，則知一切聲聞、辟支佛不能報，何況餘人！」

須菩提白佛言：「世尊！何等是菩薩摩訶薩，希有難及法，諸聲聞、辟支佛所無有？」佛告須菩提：「一心諦聽，有菩薩摩訶薩行，般若波羅蜜，住報得六波羅蜜中，及住報得五神通、三十七助道法，住諸陀羅尼，諸無礙智，到十方世界，可以布施度者，以布施攝之；可以持戒度者，以持戒攝之；可以忍辱精進、禪定、智慧度者，隨其所應而攝取之；可以初禪度者，以初禪攝取之；可以二禪、三禪、四禪、無邊空處、無邊識處、無所有處、非有想、非無想處度者，隨其所應而攝取之；可以慈、悲、喜、捨心度者，以慈、悲、喜、捨心攝取之；可以四念處、四正勤、四如意足、五根、五力、七覺分、八聖道分、空、三昧、無

相、無作三昧度者，隨而攝之。「世尊！菩薩摩訶薩，云何以布施饒益衆生？」須菩提！菩薩行般若波羅蜜時，布施隨其所須，飲食、衣服、車馬、香華、瓔珞種種所須，盡給與之。若供養佛、辟支佛、阿羅漢、阿那含、斯陀含、須陀洹等無異。若施八正道中人及凡人，下至禽獸，皆無分別，等一布施。何以故？一切法不異，不分別故。是菩薩無異，無分別布施已，當得無分別報。所謂一切種智。須菩提！若菩薩摩訶薩見乞丐者，若生是心：佛是福田，我應供養；禽獸非福田，不應供養。是非菩薩法，何以故？菩薩摩訶薩發阿耨多羅三藐三菩提心，不作是念：是衆生應以布施饒益，是不應布施。是衆生布施因緣故，生刹利大姓、婆羅門大姓、居士大家，乃至以是布施因緣，以三乘法度之，令入無餘涅槃。若衆生來從菩薩乞，亦不生異心。

分別應與是，不應與是。何以故？是菩薩爲是衆生故，發阿耨多羅三藐三菩提心。若分別簡擇，便墮諸佛、菩薩、辟支佛、學、無學人一切世間天及人訶責處。誰請汝救一切衆生？汝爲一切衆生舍一切衆生護，一切衆生依，而分別簡擇應與不應與？復次，若菩薩摩訶薩行般若波羅蜜時，若人若非人來欲求乞菩薩身體肢節，是時不應生二心，若與若不與。何以故？是菩薩摩訶薩爲衆生故，受身衆生來取，何可不與？我以饒益衆生故，受是身衆生不乞，自應與之。何況乞而不與？菩薩摩訶薩行般若波羅蜜，應如是學。復次，須菩提！菩薩摩訶薩見有乞者，應生是念：是中誰與誰受？所施何物？是一切法，自性皆不可得，以畢竟空故。空相法無與無奪。何以故？畢竟空故，內空故，外空，內外空，大空，第一義空，自相空故。住是

諸空布施，是時具足檀波羅蜜。具足檀波羅蜜故，若斷內外法時，作是念：截我者誰？割我者誰？復次，須菩提！我以佛眼見東方如恆河沙等諸菩薩摩訶薩，入大地獄，令火滅湯冷，以三事教化：一者、神通；二者、知他心；三者、說法。是菩薩以神通力，令大地獄火滅湯冷，知他心，以慈悲喜捨，隨意說法。是衆生於菩薩生清淨心，從地獄得脫，漸以三乘法得盡苦際。南西北方，四維上下亦如是。復次，須菩提！我以佛眼觀十方世界，見如恆河沙等國土中諸菩薩，爲諸佛給使，供給諸佛，隨意愛樂恭敬；若諸佛所說，盡能受持，乃至阿耨多羅三藐三菩提，終不忘失。復次，須菩提！我以佛眼觀十方如恆河沙等國土中諸菩薩摩訶薩，爲畜生故，捨其壽命，割截身體，分散諸方；諸有衆生食是諸菩薩摩訶薩肉，皆愛敬菩薩，以愛

敬故，即得離畜生道，值遇諸佛，聞佛說法，如說修行，漸以三乘聲聞、辟支佛、佛法，於無餘涅槃而般涅槃。如是，須菩提！諸菩薩摩訶薩所益甚多，教化衆生，令發阿耨多羅三藐三菩提心，如說修行，乃至於無餘涅槃而般涅槃。復次，須菩提！我以佛眼見十方如恆河沙等國土中諸菩薩摩訶薩，除諸餓鬼、飢渴苦，是諸餓鬼皆愛敬菩薩，以愛敬故，得離餓鬼道，值遇諸佛，聞諸佛說法，如說修行，漸以三乘聲聞、辟支佛、佛法而般涅槃，乃至無餘涅槃。如是，須菩提！菩薩摩訶薩爲度衆生故，行大悲心。復次，須菩提！我以佛眼見諸菩薩摩訶薩，在四天王天、天上說法，在三十三天、夜摩天、兜率陀天、化樂天、他化自在天上說法，諸天聞菩薩說法，漸以三乘而得滅度。須菩提！是諸天衆中，有貪著五欲者，是菩薩示現火起，燒其

宮殿而爲說法。作是言：諸天！一切有爲法，悉皆無常，誰得安者？復次，須菩提！我以佛眼觀十方世界，見如恆河沙等國土中，諸梵天著於邪見，諸菩薩摩訶薩，教令遠離邪見，作是言：汝等云何於空相虛妄諸法中，而生邪見？如是，須菩提！菩薩摩訶薩住大慈心，爲衆生說法，須菩提！是爲諸菩薩希有難及法。」

「復次，須菩提！我以佛眼觀十方世界，如恆河沙等國土中，諸菩薩摩訶薩，以四事攝取衆生。何等四？布施、愛語、利益、同事。云何菩薩以布施攝取衆生？須菩提！菩薩以二種施攝取衆生：財施、法施。何等財施？攝取衆生，須菩提！菩薩摩訶薩，以金、銀、瑠璃、玻瓈、真珠、珂貝、珊瑚等諸寶物，或以飲食、衣服、臥具、房舍、燈燭、華香、瓔珞，若男、若女、若牛、羊、象、馬、車乘，若以己身給施衆生。語衆生言：汝等若有

所須，各來取之。如取己物，莫得疑難。是菩薩施已，教三歸依。歸依佛、歸依法、歸依僧。或教受五戒，或教一日戒，或教初禪，乃至教非有想、非無想定，或教慈悲、喜捨，或教念佛、念法、念僧、念戒、念捨、念天，或教不淨觀，或教安那般那觀，或相、或觸，或教四念處、四正勤、四如意足、五根、五力、七覺分、八聖道分、空三昧、無相、無作三昧，八背捨、九次第定、佛十力、四無所畏、四無礙智、十八不共法、大慈、大悲、三十二相、八十隨形好，或教須陀洹果、斯陀含果、阿那含果、阿羅漢果，或教辟支佛道，或教阿耨多羅三藐三菩提。如是，須菩提！菩薩摩訶薩行般若波羅蜜，以方便力教衆生財施已，復教令得無上安隱涅槃。須菩提！是名菩薩摩訶薩希有難及法。須菩提！菩薩云何以法施攝取衆生？須菩提！法施有二種：一者世間，二者出

世間。何等爲世間法施。數演顯示世間法。所謂不淨觀、安那般那念、四禪、四無量心、四無色定。如是等世間法。諸餘共凡夫所行法。是名世間法施。是菩薩如是世間法施已。種種因緣教化。令遠離世間法。遠離世間法已。以方便力。令得聖無漏法及聖無漏法果。何等是聖無漏法。何等是聖無漏法果。聖無漏法者。三十七助道法。三解脫門。聖無漏法果者。須陀洹果。乃至阿羅漢果。辟支佛道。阿耨多羅三藐三菩提。復次。須菩提。菩薩摩訶薩。聖無漏法。須陀洹果中智慧。乃至阿羅漢果中智慧。辟支佛道中智慧。三十七助道法中智慧。六波羅蜜中智慧。乃至大慈大悲中智慧。如是等一切法。若世間。若出世間智慧。若有漏。若無漏。若有爲。若無爲。是法中一切種智。是名菩薩摩訶薩聖無漏法。何等爲聖無漏法果。斷

一切煩惱習，是名聖無漏法果。須菩提白佛言：「世尊！菩薩摩訶薩得一切種智不？」佛言：「如是如是！須菩提！菩薩摩訶薩得一切種智。」須菩提言：「菩薩與佛有何等異？」佛言：「有異。菩薩摩訶薩得一切種智，是名爲佛。所以者何？菩薩心與佛心無有異。菩薩住是一切種智中，於一切法無不照明，是名菩薩摩訶薩。世間法施，須菩提！菩薩摩訶薩因世間法施，得出世間法施。如是，須菩提！菩薩摩訶薩教衆生，令得世間法，以方便力教令得出世間法。」須菩提！何等是菩薩出世間法？不共凡夫法同，所謂四念處、四正勤、四如意足、五根、五力、七覺分、八聖道分、三解脫門、八背捨、九次第定、佛十力、四無所畏、四無礙智、十八不共法、三十二相、八十隨形好、五百陀羅尼門，是名出世間法。須菩提！云何爲四念

處。菩薩摩訶薩觀內身循身，觀外身循身，觀內外身循身，觀勤精進，以一心智慧觀身，觀身集因緣，觀身滅，觀身集生滅，行是道無所依，於世間無所愛受。心法念處亦如是。須菩提！云何爲四正勤？未生惡不善法爲不生故勤，生欲精進，已生惡不善法爲斷故勤，生欲精進，未生善法爲生故勤，生欲精進，已生諸善法爲增長修具足故勤，生欲精進是名四正勤。須菩提！云何爲四如意足？欲三昧斷行成就，初如意足，精進三昧，心三昧，思惟三昧，斷行成就如意足。云何爲五根？信根、精進根、念根、定根、慧根。云何爲五力？信力、精進力、念力、定力、慧力。云何爲七覺分？念覺分、擇法覺分、精進覺分、喜覺分、除覺分、定覺分、捨覺分。云何爲八聖道分？正見、正思惟、正語、正業、正命、正精進、正念、正定。云何爲三三昧？空三昧、門、無相、

無作三昧門。云何爲空三昧？以空行、無我行攝心，是名空三昧。云何爲無相三昧？以寂滅行、離行攝心，是爲無相三昧。云何爲無作三昧？無常行、苦行攝心，是爲無作三昧。云何爲八背捨？內有色相、外觀色，是初背捨；內無色相、外觀色，是二背捨；淨背捨，是三背捨；過一切色相，滅有對相，不念一切異相故，觀無邊虛空，入無邊空處，乃至過一切非有想、非無想處，入滅受想背捨，是名八背捨。云何九次第定？行者離欲、惡不善法，有覺有觀，離生喜樂，入初禪；第二、第三、第四，乃至過非有想、非無想處，入滅受想定，是名九次第定。云何爲佛十力？是處不是處，如實知；衆生過去、未來、現在諸業，諸受法，知造業處，知因緣，知報；諸禪定、解脫、三昧、定、垢淨分別相，如實知；知他衆生諸根上下相；知他衆生種種欲解；知世間種種

無數性；知一切到道相；知種種宿命，一世乃至無量劫；如實知天眼見衆生，乃至生善惡道；漏盡故，無漏心解脫，如實知是爲佛十力。云何爲四無所畏？佛作誠言：我是一切正智人。若有沙門、婆羅門、若天、若魔、若梵、若復餘衆，如實言：是法不知，乃至不見是微畏相。以是故我得安隱，得無所畏，安住聖主處，在大衆中師子吼，能轉梵輪；諸沙門、婆羅門、若天、若魔、若梵、若復餘衆，實不能轉，一無畏也。佛作誠言：我一切漏盡。若沙門、婆羅門、若天、若魔、若梵、若復餘衆，如實言：是漏不盡，乃至不見是微畏相。以是故我得安隱，得無所畏，安住聖主處，在大衆中作師子吼，能轉梵輪；諸沙門、婆羅門、若天、若魔、若梵、若復餘衆，實不能轉，二無畏也。佛作誠言：我說障法。若有沙門、婆羅門、若天、若魔、若梵、若復餘衆，如實言：受是法

不障道，乃至不見是微畏相。以是故我得安隱，得無所畏，安住聖主處，在大衆中師子吼，能轉梵輪。諸沙門、婆羅門，若天、若魔、若梵，若復餘衆實不能轉，三無畏也。佛作誠言：我所說聖道，能出世間，隨是行能盡苦。若有沙門、婆羅門，若天、若魔、若梵，若復餘衆，如實言行是道，不能出世間，不能盡苦，乃至不見是微畏相。以是故我得安隱，得無所畏，安住聖主處，在大衆中師子吼，能轉梵輪。諸沙門、婆羅門，若天、若魔、若梵，若復餘衆實不能轉，四無畏也。云何爲四無礙智？一者、義無礙智；二者、法無礙智；三者、辭無礙智；四者、樂說無礙智。云何義無礙智？緣義智慧，是爲義無礙智。云何法無礙智？緣法智慧，是爲法無礙智。云何爲辭無礙智？緣辭智慧，是爲辭無礙智。云何爲樂說無礙智？緣樂說智慧，是爲樂說無礙智。云何

爲十八不共法。一者、諸佛身無失，二者、口無失，三、念無失，四、無異想，五、無不定心，六、無不知捨心，七、欲無減，八、精進無減，九、念無減，十、慧無減，十一、解脫無減，十二、解脫知見無減，十三、一切身業隨智慧行，十四、一切口業隨智慧行，十五、一切意業隨智慧行，十六、智慧知過去世無礙，十七、智慧知未來世無礙，十八、智慧知現在世無礙。云何三十二相？一者、足下安平立，平如匳底；二者、足下千輻輳輪，輪相具足；三者、手足指長，勝於餘人；四者、手足柔輒，勝餘身分；五者、足跟廣，具足滿好；六者、手足指合，縵網，勝於餘人；七者、足趺高平好，與跟相稱；八者、伊泥延鹿膺，膺纖好，如伊泥延鹿王；九者、平住，兩手摩膝；十者、陰藏相，如馬王、象王；十一者、身縱廣等，如尼俱盧樹；十二者、一一孔一毛生，色青柔輒，右旋；十三者、毛上

向青色柔輭而右旋；十四者金色相，其色微妙，勝閻浮檀金；十五者身光面一丈；十六者皮薄細滑，不受塵垢，不停蚊蚋；十七者七處滿；兩足下，兩手中，兩肩上，項中皆滿，字相分明；十八者兩腋下滿；十九者上身如師子；二十者身廣端直；二十一者肩圓好；二十二者四十齒；二十三齒白齊密而根深；二十四者四牙最白而大；二十五者方頰車，如師子；二十六者味中得上味，咽中二處津液流出；二十七者舌大輭薄，能覆面至耳髮際；二十八者梵音深遠，如迦蘭頻伽聲；二十九者眼色如金精；三十者眼睫如牛王；三十一者眉間白毫相，輭白如兜羅綿；三十二者頂髻肉骨成。是三十二相，佛身成就，光明徧照三千大千世界。若欲廣照徧滿十方無量阿僧祇世界，爲衆生故受丈光，若放無量光，則無日月時節。

歲數。佛音聲徧滿三千大世界，若欲大聲，則徧滿十方無量阿僧祇世界，隨衆生多少，音聲徧至。」

論問曰：從上已來，處處說諸法性空，云何分別有善、不善，須菩提何以從後已來，品品中義無異，而作種種名問？答曰：是事上已答。復次，衆生從無始生死已來，著心深難解故，須菩提復作是重問。復次，是般若波羅蜜欲說是空義要故，數問。復次，佛在世時，衆生利根易悟。佛滅度五百年後，像法中衆生愛著佛法，墮著法中，言若諸法皆空，如夢、如幻，何以故有善、不善？以是故，須菩提憐愍未來衆生，鈍根不解，故重問。世尊若諸法皆空，云何分別有善、不善？此中佛自說因緣。凡夫顛倒心故，於法皆作顛倒異見，乃至不見一法是實。凡夫於夢法著夢，得夢見夢者，亦著夢中所見事。是

人若不信罪福，起三種不善業；若信罪福，起三種善業。善、不善、不動、善名欲界中善法，喜樂果報；不善名憂愁苦惱果報；不動名生色、無色界因緣業。菩薩知是三種業，皆是虛誑不實，住二空中，爲衆生說法，畢竟空破諸法，無始空破衆生相。住中道爲衆生說法，所謂五衆十二入、十八界，皆是空，如夢、如幻，乃至如化，是法中無夢亦無見夢者。菩薩語衆生：汝等於空法，顛倒心故生諸著，如經中廣說。是菩薩方便力故，於顛倒中拔出衆生，著破顛倒法中。譬如慳貪是顛倒，以布施破慳法，而衆生著是布施故，爲說布施果報無常實空，從布施拔出衆生，令持戒。持戒及持戒果報中拔出衆生，語衆生言：天福盡時，無常苦惱，拔出衆生，令離欲，行禪定，而爲說禪定及果報虛誑不實，能令人墮顛倒中。種種因緣，爲說布

施、持戒、禪定無常過失，令住涅槃，得涅槃方便，所謂四念處乃至十八不共法，令衆生住是法中。若布施、持戒、禪定是定實法，則不應令遠離。如布施、持戒等破凡夫法，此則因顛倒而生，雖少時益衆生，久則變異，能生苦惱故，亦教令捨離。菩薩方便力故，先教衆生捨罪，稱讚持戒、布施福德。次復爲說持戒、布施亦未免無常苦惱，然後爲說諸法空，但稱讚實法，所謂無餘涅槃。是時，須菩提歡喜甚希有，菩薩能如是知是諸法實相，所謂畢竟空，而爲衆生說法，令至無餘涅槃。佛言：是一種希有。問欲更知菩薩希有法，一切聲聞、辟支佛，不能報是菩薩，何況餘人！

須菩提問：何等是更有希有法？佛答：如經中說。問曰：經中教令布施、持戒、禪定，今復更說，有何等異？答曰：先說生身菩薩，今說變化

身；先說一國土，今說無量世界；如是等差別。問曰：若菩薩知佛是福田，衆生非福田，是非菩薩法；菩薩以何力故，能令佛與畜生等？答曰：菩薩以般若波羅蜜力故，一切法中修畢竟空心，是故於一切法無分別。如畜生、五衆、十二入、十八界和合生，名爲畜生；佛亦如是，從諸善法和合，假名爲佛。若人憐愍衆生，得無量福德；於佛著心，起諸惡因緣，得無量罪。是故知一切法畢竟空故，不輕畜生，不著心貴佛。復次，諸法實相，是一切法無相，是無相中不分別是佛，是畜生，若分別即是取相，是故等觀。復次，菩薩有二法門：一者，畢竟空法門；二者，分別好惡法門。入空法門，則得等觀；入分別法門，諸阿羅漢、辟支佛尚不及佛，何況畜生！爲其輕衆生，不憐愍布施故，教不分別。問曰：菩薩身非木石，云何衆生來割截而不生異

心答曰：有人言：菩薩久修羸提波羅蜜故，能不愁惱，如羸提仙人被截手足，血皆爲乳。有人言：菩薩無量世來，深修大慈悲心故，雖有割截，亦不愁憂，譬如草木無有瞋心。有人言：菩薩深修般若波羅蜜，轉身得般若波羅蜜果報空心故，了了知空，割截身時心亦不動。如外物不動，內亦如是，得般若果報故，於諸法中無所分別。有人言：是菩薩非生死身，是出三界法性生身，住無漏聖心果報中故，身如木石，而能慈念割截者，是菩薩能生如是心故，割截劫奪內外法時，其心不動，是爲菩薩希有法。復次，希有法者，如經中說：我以佛眼見十方如恆河沙等世界中菩薩，入地獄中，令火滅湯冷，以三事教化衆生，如經中說。問曰：若爾者，不應有三惡道。答曰：三惡道衆生無邊無量，菩薩雖無邊無量，衆生倍多無量。菩薩

隨衆生可度因緣，若於三惡道中有餘功德者，菩薩則度，重罪者則不見菩薩。菩薩一相無分別心故，不一一求覓衆生，譬如大赦，及者得脫，不及者則不蒙。問曰：若衆生割截菩薩，或食其肉，應當有罪，云何得度？答曰：此菩薩本願，若有衆生噉我肉者，當令得度。如經中說：衆生食菩薩肉者，則生慈心。譬如有色、聲、香、觸，人聞見則喜，復有聞見則瞋，味亦如是，有瞋者，有起慈心者。如毗摩羅結經：服食香飯，七日得道者，有不得者，非以噉肉故得度，以起發慈心故，得免畜生，生善處，值佛得度。有菩薩於無量阿僧祇劫深行慈心，外物給施衆生，意猶不滿，并自以身布施，爾乃足滿。如法華經中藥王菩薩，外物珍寶供養佛，意猶不滿，以身爲燈供養於佛，爾乃足滿。復次，人得外物，雖多不以爲恩，所以者何？非所愛重故。

得其身時，乃能驚感，是故以身布施。菩薩又爲天上諸天說法，如經中廣說。

人以四事攝之，布施、愛語、利益、同事。布施有二事，如經中廣說。問曰：何以略說餘四道，而廣說人道中法？答曰：三惡道中苦多故，衆生少疑，若見菩薩大神通希有事，則直信愛著得度；諸天有天眼故，自見罪福因緣果報，菩薩少現神足，則解人以肉眼不見罪福因緣果報，又多著外道邪師，及邪見經書。諸煩惱有二分：一者，屬見；二者，屬愛。若但有一事，則不能成大罪。三毒人得邪見力，能盡作重惡；邪見人得貪欲、瞋恚，能大作罪事。如須陀洹，雖有三毒，無邪見故，不作墮三惡道重罪。是故人中多有三毒邪見，及眼不見罪福因緣故，難度，難度故多說。問曰：若爾者，於四事中何以多說

布施，餘三略說。答曰：布施中攝三事故，以財施、法施、教化衆生，則無所不攝。復次，四事中初廣開布施，則知餘三亦如是。問曰：若爾者，何以略說財施，而廣說法施？答曰：財施少，法施廣故。所以者何？財施有量果報，法施無量果報；財施欲界繫，欲界報，法施亦三界繫果報，亦是出三界果報；財施能與三界富樂，法施能與涅槃常樂。又財施從法施生，聞法則施故。復次，財施果報，但富樂，無種種；法施亦有富樂，亦有餘事，乃至佛道涅槃果報。以是等因緣故，廣說法施。二施義，如經中佛自廣說。問曰：經中須菩提何以故言菩薩得一切種智？不答曰：須菩提意，若菩薩時得一切種智，則不名菩薩，云何未得佛而能得一切種智？得一切種智故名爲佛，若先作佛，何用一切種智爲？佛答：今得一切種智，名爲菩薩，已得一切

種智名爲佛。菩薩時具足佛因緣，生心欲得一切種智，得已名爲佛。真實之言，菩薩不得，佛亦不得，所以者何？菩薩未得，佛得已竟，更不復得。世俗法故，說菩薩今得，佛得已竟。第一義中，則無一切法，何況佛及菩薩！又經中言：佛心不異菩薩，菩薩不異佛心，次第相續不斷故。又二心如，無異無分別故。

問曰：九次第定，三十二相，八十隨形好，此是世間共有法，何以故名爲出世間不共法？答曰：四禪、四無色定，滅受想，名九次第。滅受定，但聖人能得，四禪、四無色定，從初禪起，更不雜餘心而入二禪，從二禪乃至滅受定，念念中受，不雜餘心，名爲次第。凡夫是罪人，鈍根，云何能得三十二相？如轉輪聖王、提婆達、難陀所得相，名字雖同，而威德具足，淨潔得處，則不同於佛。如先分別轉輪聖王、佛

相不同中說。又是相，聖無漏法果報，果自在隨意，無量無邊；轉輪聖王等相，是福德業因緣，不能自在，有量有限。復次，提婆達、難陀有三十相，無三十二；轉輪聖王，雖有三十二，無威德，不具足，不得處，與愛等煩惱俱。八十隨形好具足，唯佛菩薩有之，餘人正可少許，或指纖長，或失腹，有如是等無威德之好，不足言。是故說言，出世間不共凡夫法，無咎。問曰：從初來，處處說諸法五衆乃至一切種智，不說是三十二相、八十隨形好，今經欲竟，何以品品中說？答曰：佛有二種身：法身、生身。於二身中，法身為大，法身大，所益多故，上來廣說；今經欲訖，故生身義應當說，是故今說。復次，是生身相好莊嚴，是聖無漏法果報；今次第說，上雜諸波羅蜜說。四念處等諸法義，如先說。十力等是佛法甚深義，今當更略說。問曰：佛十

力者，若總相說則一力，所謂一切種智力；若別相說，千萬億種力，隨法爲名，今何以但說十力？答曰：佛實有無量智力，但以衆生不能得，不能行故不說。是十力，可度衆生事辦，所以者何？佛用是處非處力，定知一切法中因果，所謂行惡業、墮惡道有是處，行惡業、生天上無是處，善亦如是不離五蓋，不修七覺得道者，無有是處；離五蓋，修七覺得道，有是處。餘九力盡入此力中，佛以此力，籌量十方六道中衆生，可度者，不可度者。可度者，以種種因緣神通變化而度脫之；不可度者，於此人中修捨心，譬如良醫，觀其病相，審定知其可活則治之，不可活者則捨之。度衆生方便者，所謂二力：業力、定力。求其業因緣生處，人以業因緣故受身，縛著世間，禪定因緣故得解脫。行者必應求苦從何生，由何而滅，是故用二力。業

力有二分：一者淨業，能斷惡業；二者垢業。淨業名禪，定、解脫諸三昧；不淨業者，能於三界中受身。人有二種：鈍根爲受身故作業，利根爲滅身故作業。問曰：若爾者，何以不皆令作淨業？答曰：以衆生根有利鈍故。問曰：衆生何因緣故有利鈍？答曰：以有種種欲力故。惡欲衆生，常入惡故鈍。欲名嗜好，嗜好罪事，生惡業故鈍。善欲者樂道，修助道法故利。問曰：衆生何以不皆作善欲？答曰：是故佛說世間種種性，惡性、善性、惡性者惡欲，惡欲故根鈍。如火熱性，水溼性，不應責其所以。問曰：惡欲即是惡性，有何差別而作二力？答曰：性先有，欲得因緣而生。譬如先有瘡，得觸因緣則血出。性在內，欲在外，性重欲輕，性難除，欲易捨，性深欲淺，用性作業必當受報，用欲作業不必受報。有如是等差別。復有人言：欲常習增長，遂成爲

性，性亦能生欲。是人若今世若後世常習是欲，則成爲性；住是性中作惡、作善，若住善性則可度，若住惡性則不可度。佛既知衆生二種性已，知其果報，善道、惡道種種差別。惡性者墮三惡道，善性者有四種道：人、天、阿修羅、涅槃道。問曰：一切到處道力，與天眼力有何差別？答曰：天眼但見生死時，此中未死時知，見因知果，天眼見現前罪福果，是名一切到處道力。問曰：聲聞、辟支佛亦得涅槃，亦能化衆生，何以無是力？答曰：是故說後三力，三世中衆生事，盡能通達徧知，以宿命力，一切衆生過去事本末悉知，以天眼生死智力故，一切衆生未來世中無量事盡能徧知。作是知已，知現世中衆生可度者爲說漏盡法。以是故，但佛有此力，二乘所無。如有一人，即日應得阿羅漢，舍利弗日中時語言：無得道因緣，捨而不

度。晡時，佛以宿命神通，見過八萬劫前得道因緣，今應成就。晡時說法，即得阿羅漢道。復次，佛以初力知衆生可度，不可度相；以第二力知衆生爲三障所覆，無覆者；以第三力知衆生禪定、解脫、淨不淨者；以第四力知衆生根有利、有鈍，能通法性、不通者；以第五力知衆生根利鈍因緣善惡欲；以第六力知二欲因緣種種性；以第七力知衆生利鈍根善惡果報處七種道；以第八力知衆生宿世善惡業障不障；以第九力知衆生今世未可度，未來世生處可度；以第十力知是人以空解脫門入涅槃，無相、無作門入涅槃，知是人於見諦道、思惟道中，念念中斷若干結使。以是十力籌量衆生所應度緣而爲說法，是故說法，初無空言。問曰：佛智慧無量，身相亦應無量！又佛身勝諸天王，何以正與轉輪聖王同有三十二

相？答曰：三十二相，不多不少，義如先說。復次，有人言：佛、菩薩相不定，如此中說。隨衆生所好，可以引導其心者，爲現相。又衆生不貴金而貴餘色，瑠璃、玻瓈、金剛等；如是世界人，佛則不現金色，觀其所好則爲現色。又衆生不貴纖長指及網縵，以長指利爪爲羅刹相，以網縵爲水鳥相，造事不便，如著手衣，何用是爲？如罽賓國彌帝隸力^{「力」乃「尸」字之誤。}利菩薩，手網縵，其父惡以爲怪，以刀割之，言我子何緣如鳥？有人不好肩圓大，以爲似腫，有以腹不現，無腹如餓相；亦有人以青眼爲不好，但好白黑分明。是故佛隨衆生所好而爲現相，如是等無有常定。有人言：此三十二相實定，以神通力變化身，隨衆生所好而爲現相。有人言：佛有時神通變化，有時隨世界處生，當生處不得言神通變化。又於三千大千世界中，隨可度衆

生處生，則爲現相，如密迹經中說：或現金色，或現銀色，或日月星宿色，或長或短，隨可引導衆生，則爲現相。隨此間閻浮提中天竺國人所好，則爲現三十二相。天竺國人，于今故治肩膊，令厚大，頭上皆以有結爲好。如人相中，說五處長爲好：眼、鼻、舌、臂、指、髀、手足相，若輪若蓮華，若貝若日月，是故佛手足有千輻輪，纖長指，鼻高好，舌廣長而薄。如是等皆勝於先所貴者故，起恭敬心。有國土佛爲現千萬相，或無量阿僧祇相，或五、六、三、四，隨天竺所好故，現三十二相，八十種隨形好。

大智度論卷第八十八

音釋

匱

力鹽切
匱也

跟

古痕切
足腫也

臄

市克切
臄臄也

纖

息廉切
細也

蚊

無分切

蚋

而稅切

睫

即業切
目旁毛也

晡

奔謨切
日加申時也

𪔐

居例切

𪔐

補各切

大智度論卷八十八 釋四攝品第七十八之下

轉傍禮切
也骨股也

大智度論卷第八十九

龍 樹 菩 薩 造

姚秦三藏法師鳩摩羅什譯

釋四攝品第七十八之下

經云何八十隨形好。一者、無見頂；二者、鼻直高好，孔不現；三者、眉如初生月，紺瑠璃色；四者、耳輪埵成；五者、身堅實，如那羅延；六者、骨際如鈎鎖；七者、身一時迴如象王；八者、行時足去地四寸，而印文現；九者、爪如赤銅色，薄而潤澤；十者、膝骨堅著圓好；十一者、身淨潔；十二者、身柔軟；十三者、身不曲；十四者、指長纖圓；十五者、指文莊嚴；十六者、脈深；十七者、踝不現；十八者、身潤澤；十九者、身自持，不透迤；二十者、身滿足；二十一者、識滿足；二十二者、容儀備

足；二十三者、住處安無能動者；二十四者、威震一切；二十五者、一切樂觀；二十六者、面不大長；二十七者、正容貌、不撓色；二十八者、面具足滿；二十九者、脣赤如頻婆果色；三十者、音響深；三十一者、臍深圓好；三十二者、毛右旋；三十三者、手足滿；三十四者、手足如意；三十五者、手文明直；三十六者、手文長；三十七者、手文不斷；三十八者、一切惡心衆生見者和悅；三十九者、面廣姝好；四十者、面滿淨如月；四十一者、隨衆生意、和悅與語；四十二者、毛孔出香氣；四十三者、口出無上香；四十四者、儀容如師子；四十五者、進止如象王；四十六者、行法如鵝王；四十七者、頭如摩陀羅果；四十八者、一切聲分具足；四十九者、牙利；五十者、舌色赤；五十一者、舌薄；五十二者、毛紅色；五十三者、毛潔淨；五十四者、廣長眼；五十五者、孔

門相具足；五十六者、手足赤白如蓮華色；五十七者、臍不出；五十八者、腹不現；五十九者、細腹；六十者、身不傾動；六十一者、身持重；六十二者、其身分大；六十三者、身長；六十四者、手足淨潔、軟澤；六十五者、邊光各一丈；六十六者、光照身而行；六十七者、等視衆生；六十八者、不輕衆生；六十九者、隨衆生音聲、不過不減；七十者、說法不差；七十一者、隨衆生語言而爲說法；七十二者、一發音、報衆生；七十三者、次第有因緣說法；七十四者、一切衆生不能盡觀相；七十五者、觀者無厭足；七十六者、髮長好；七十七者、髮不亂；七十八者、髮旋好；七十九者、髮色如青珠；八十者、手足有德相。須菩提！是爲八十隨形好，佛身成就。如是，須菩提！菩薩摩訶薩以二施攝取衆生，所謂財施、法施，是爲菩薩希有難及事。云何爲菩薩摩訶

薩愛語攝取衆生。菩薩摩訶薩以六波羅蜜爲衆生說法，作是言：汝行六波羅蜜，攝一切善法。云何爲菩薩摩訶薩利行攝取衆生？菩薩摩訶薩長夜教衆生，令行六波羅蜜。云何爲菩薩摩訶薩同事攝取衆生？菩薩摩訶薩以五神通力故，種種變化，入五道中，與衆生同事。以此四事而攝取之。復次，須菩提！菩薩摩訶薩行般若波羅蜜時，教化衆生，善男子，當善學分別諸字，亦當善知一字，乃至四十二字。一切語言，皆入初字門，一切語言，亦入第二字門，乃至第四十二字門，一切語言，皆入其中，一字皆入四十二字，四十二字亦入一字，是衆生應如是善學四十二字。善學四十二字已，能善說字法，善說字法已，善說無字法。須菩提！如佛善知字法，善知字，善知無字，爲無字法，故說字法。何以故？須菩提！過一切名字

故，名爲佛法。」

須菩提白佛言：「世尊！若衆生畢竟不可得，法亦不可得，法性亦不可得，畢竟空，無始空故。世尊！菩薩摩訶薩行般若波羅蜜，行禪波羅蜜，毗梨耶波羅蜜，羼提波羅蜜，尸羅波羅蜜，檀波羅蜜時，行四禪，四無量心，四無色定，三十七助道法，十八空，行空，無相，無作，三昧，八背捨，九次第定，佛十力，四無所畏，四無礙智，十八不共法，三十二相，八十隨形好，云何住報得五神通爲衆生說法？衆生實不可得，衆生不可得故，色不可得，乃至識亦不可得，五衆不可得，故，六波羅蜜，乃至八十隨形好，皆不可得。是不可得中，無衆生，無色，乃至無八十隨形好。世尊！云何菩薩摩訶薩行般若波羅蜜，爲衆生說法？世尊！菩薩行般若波羅蜜時，菩薩尚不可得，何況當有

菩薩法！佛告須菩提：「如是！如是！如汝所言。衆生不可得故，當知是內空、外空、內外空、空空、大空、第一義空、有爲空、無爲空、畢竟空、無始空、散空、諸法空、自相空、性空、不可得空、無法空、有法空、無法有法空。衆生不可得故，當知五陰空、十二入空、十八界空、十二因緣空、四諦空、我空、壽者、命者、生者、養者、育者、衆數者、人者、作者、使作者、起者、使起者、受者、使受者、知者、見者、皆空。衆生不可得故，當知四禪空、四無量心空、四無色定空，當知四念處空，乃至八聖道分空、空空、無相空、無作空、八背捨空、九次第定空。衆生不可得故，當知佛十力、四無所畏空、四無礙智、十八不共法空，當知須陀洹果空、斯陀含果空、阿那含果空、阿羅漢果空、辟支佛道空，當知菩薩地空、阿耨多羅三藐三菩提空。須菩提！菩薩摩訶薩如是見一

切法空，爲衆生說法，不失諸空相。是菩薩如是觀時，知一切法無礙；知一切法無礙已，不壞諸法相，不二不分別，但爲衆生如實說法。譬如佛所化人，化人復化作無量千萬億人；有教令布施者，有教持戒，有教忍辱，有教精進，有教禪定，有教智慧，有教四禪，四無量心，四無色定者，於汝意云何？佛所化人，有分別破壞諸法不？須菩提言：「不也！世尊！是化人無心，無心數法，云何分別破壞諸法？」以是故，須菩提！當知菩薩摩訶薩，行般若波羅蜜，爲衆生如應說法，拔出衆生於顛倒地，令衆生各得如所應住地，以不縛不脫法故。何以故？須菩提！色不縛不脫，受、想、行、識不縛不脫；色無縛無脫，不是色，受、想、行、識無縛無脫，不是識。何以故？色畢竟清淨故，受、想、行、識乃至一切法，若有爲，若無爲，亦畢竟清淨故。如是，須菩

提！菩薩摩訶薩爲衆生說法，亦不得衆生及一切法。一切法不可得故，菩薩以不住法故，住諸法相中，所謂色空，乃至有爲、無爲法空。何以故？色乃至有爲、無爲法，自性不可得故，無有住處。無所有法不住，無所有法，自性法不住，自性法，他性法不住，他性法。何以故？是一切法皆不可得故，不可得法當住何處？如是，須菩提！菩薩摩訶薩行般若波羅蜜，以是諸空，能如是說法，如是行般若波羅蜜，於諸佛及聲聞、辟支佛無有過。何以故？諸佛、菩薩、辟支佛、阿羅漢，得是法已，爲衆生說法，亦不轉諸法相。何以故？如法性、實際，不可轉故。所以者何？諸法性無故。」須菩提白佛言：「世尊！若法性如實際不轉，色與法性異不？色與如實際異不？受、想、行、識，乃至有爲、無爲法，世間、出世間，有漏、無漏異不？」佛言：「不也！色不異法

性不異，如不異，實際不異，受、想、行、識，乃至有漏、無漏亦不異。須菩提白佛言：「世尊，若色不異，法性不異，如不異，實際不異，受、想、行、識，乃至有漏、無漏不異者，云何分別黑法有黑報，所謂地獄、餓鬼、畜生？白法有白報，所謂諸天及人？黑白法有黑白報，不黑不白法有不黑不白報，所謂須陀洹果、斯陀含果、阿羅漢果、阿耨多羅三藐三菩提？」佛告須菩提：「世諦故，分別說有果報，非第一義，第一義中不可說因緣果報。何以故？是第一義，實無有相，無有分別，亦無言說，所謂色乃至有漏、無漏法，不生不滅相，不垢不淨，畢竟空，無始空故。」須菩提白佛言：「世尊，若以世諦故，分別說有果報，非第一義者，一切凡夫人應有須陀洹果、斯陀含果、阿那含果、阿羅漢果、辟支佛道、阿耨多羅三藐三

菩提！佛告須菩提：「於汝意云何？凡夫人爲知是世諦，是第一義諦不？若知，是凡夫人應是須陀洹果，乃至阿耨多羅三藐三菩提。須菩提！以凡夫人實不知世諦，不知第一義諦，不知道，不知分別道果，云何當有諸果？須菩提！聖人知世諦，知第一義諦，有道，有修道，以是故聖人差別有諸果。」須菩提白佛言：「世尊！修道得果不？」佛言：「不也！須菩提！修道不得果，不修道亦不得果，亦不離道得果，亦不住道中得果。如是，須菩提！菩薩摩訶薩行般若波羅蜜時，爲衆生故分別果，亦不分別是有爲性、無爲性。」世尊！若不分別有爲性、無爲性得諸果者，云何世尊自說三結盡，名須陀洹；淫、怒、癡、薄故，名斯陀含果；五此間結盡，名阿那含；五彼間結盡，名阿羅漢；所有集法皆滅散相，名辟支佛道；一切煩惱習斷故，名阿

耨多羅三藐三菩提。世尊！我當云何知不分別有爲性、無爲性得諸果？」佛告須菩提：「汝以須陀洹果、斯陀含果、阿那含果、阿羅漢果、辟支佛道、阿耨多羅三藐三菩提，是諸果是有爲、是無爲？」須菩提言：「世尊！皆是無爲。」須菩提！無爲法中有分別不？」「不也！世尊！」須菩提！若善男子、善女人，通達一切法，若有爲、若無爲，一相，所謂無相，是時，有分別若有爲、若無爲不？」「不也！世尊！」如是，須菩提！菩薩摩訶薩爲衆生說法，不分別諸法，所謂內空故，乃至無法有法空故。是菩薩自得無所著法，亦教人令得無所著法。若檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，初禪乃至第四禪，慈、悲、喜、捨，無邊虛空處，乃至非有想、非無想處，若四念處，乃至一切種智，是菩薩自不著故，亦教他

令得無所著，無所著故無所礙。譬如佛所化人布施，亦不受布施報，但爲度衆生故，乃至行一切種智，不受一切種智報。菩薩摩訶薩亦如是，行六波羅蜜，乃至一切法，有漏、無漏，有爲、無爲，不住，亦不受報，但爲度衆生故。何以故？是菩薩摩訶薩，善達一切諸法相故。

論問曰：八十隨形好是莊嚴身法，識滿足何以在隨形好中？答曰：此識是果報生識，世間好醜自然而知。凡人識不具足故，學人法乃知。佛一歲具足滿乃生故，身識皆具足。餘人若八月、若九月處胎，總言十月；菩薩處胎十月，總得一歲，身根具足故，果報得識亦具足。問曰：足安立住處，與安住處何異？答曰：住處安者，如白衣勇士，牢持器仗，安據住處，則不可動；又出家時，魔民、惡鬼無能動轉。

令退敗者。四十二字義，如摩訶衍中說。一字盡入諸字者，譬如兩一合故爲二，三一故爲三，四一爲四，如是乃至千萬。又如阿字爲定，阿變爲羅，亦變爲波，如是盡入四十二字。四十二字入一字者，四十二字盡有阿分，阿分還入阿中。善知字故，善知諸法名；善知諸法名故，善知諸法義。無字即是諸法實相義，所以者何？諸法義中，諸法無名字。

須菩提問：若諸法畢竟空無名字，云何菩薩住果報六神通，爲衆生說諸法？若畢竟無衆生，則無有法！佛可須菩提言：如是以十八空故，一切法不可得，我、衆生乃至知者、見者，乃至當知佛、菩薩皆空。如是知己，而爲衆生說是空法。若衆生是有而爲說空，是則不可以衆生空，但從顛倒有，是故菩薩不失於空而爲說法。不失者，

不作諸法皆空、所說不空，若以所說不空，則爲失空相；若口說空，而心是有，是亦爲失。此中佛自說不二不壞法相故。欲明了是事，說譬喻：如佛所化作化人，而爲說法、持戒、布施諸功德，若以如是方便說法，是則無咎，則能拔出衆生於顛倒，無縛無解故。第一義中無縛無解，世諦故有縛解。此中佛自說因緣：色不縛不解，何以故？是不縛不解中，無色相故，乃至識亦如是。菩薩如是用不住法故，住空法中爲衆生說法。衆生不可得，衆生及一切法不可得故。此中佛自說因緣：所謂無所有法，不住無所有，譬如虛空不住虛空；自性法不住自性法，譬如火不住火中；他性法不住他性法，譬如水性中無火性，又他性不定故。若能如是清淨說法，是菩薩於諸佛賢聖則無有過。何以故？諸佛賢聖不著一切法，施法者亦不

著一切法；諸佛賢聖以畢竟空、皆寂滅相爲心所行，說法者亦如是；諸佛賢聖入三解脫門，得一切法實性，所謂無餘涅槃；說法者隨是法故，無咎。此中佛自說因緣：諸佛賢聖得是法已，爲衆生說法，不轉法性，法性空無相故。須菩提問：若不轉法性，色等諸法與法性異不？佛答：不也！何以故？色等諸法實相，即是法性故。佛意以菩薩說法時，亦不壞法性。

須菩提問：色等諸法亦與法性不異，何以故？但貴法性，以佛答色不異法性故，須菩提難：若不異者，云何分別有善惡、白黑、須陀洹等諸果？佛答：色等法雖不離法性，以世諦故有分別；於第一義中無分別。何以故？得第一義聖人無所分別，聞有所得不喜，聞無所有不憂；得法無相證故，乃至微細法尚不取相，何況分別有善惡。

未得實相者，欲得第一義故，有所分別。佛此中自說因緣：是法無言說，亦無生滅、垢淨法者，所謂畢竟空、無始空。問曰：此中何以但說二空名爲法？答曰：一切有若法，若衆生，若言畢竟空，則破諸法；若言無始空，則破衆生。破此二法已，則一切法盡破。此中菩薩爲衆生說法，是故以二空破二事，雖有餘空，不如畢竟空甚深畢盡。餘空如火燒木，猶有灰燼，畢竟空無灰無燼。有人言：若說十八空無咎，略說故說二空。須菩提言：若以世諦故分別有善惡、白黑及諸聖果者，第一義中，凡夫人應有須陀洹等聖果，何以故？若以世諦虛妄中分別有諸賢聖者，第一義中，凡夫應作賢聖。須菩提分別實相，凡夫爲異，佛言第一義一相，是故須菩提言，凡夫應是聖人。爾時，佛答：若凡夫知分別是第一義，是世諦者，凡夫人應有須

陀洹等諸聖果，以凡夫實不知道，不知分別道，不知行道，修道，何況得道果！佛言：聖人能作是分別故，說是聖果。爾時，須菩提自知有失，故言無量、無相、無動性中，我云何取相、欲量無量法？云何強以凡夫法爲聖果？爾時受佛語，知行道者得果，不行道者不得果，是故白佛：修道得果，不佛言不。問曰：佛上說分別修道得道果，今云何言不？答曰：佛先說非著心，今須菩提以著心問，欲從道中出果，如麻中出油。若爾者，道之與果，同爲虛誑，是故言不。聽者生念：若修不得，不修應當得，是故佛言：修尚不得，何況不修！譬如二人欲有所到，一者住不行，二者失道，二俱不到。若不修道，尚無少許攝心樂，何況道果！若心取相修道，雖有攝心禪定樂，無有道果；若不取相著心修道，則有道果。是故佛說：菩薩行般若波羅蜜，不

別有爲、無爲性故，有道果差別。爾時，須菩提問：若爾者，佛何以說斷三結得須陀洹，有如是等分別？佛以反問答於汝意云：何？汝以須陀洹果等是有爲，是無爲？須菩提言：是無爲。佛言：若爾者，無爲中有差別不？須菩提言：不也！世尊！若無分別，汝云何作難？又復問：須菩提，若善男子、善女人，通達一切法一相，所謂無相，住三解脫門中，證涅槃時，是時有法分別，若有爲，若無爲，不答言：不。佛意唯是心爲真實，餘時皆虛誑。汝云何作難？菩薩行般若波羅蜜，不分別一切法，住內空等諸空中，是大清淨，自不著，亦教衆生令無所著，所謂檀波羅蜜，乃至一切種智，菩薩道中，皆教令不著。譬如佛所化人行布施等，亦不分別布施等，亦不受布施等法果報，但爲利益度衆生故。菩薩心亦如是，何以故？善通達諸法性故。善通達

者，不取法性相，亦不住法性中；於法性中不疑不悶而說法，無罣無礙無遮，是則通達法性。

釋善達品第七十九

【經】須菩提白佛言：「世尊！云何菩薩善達諸法相？」佛告須菩提：「譬如化人不行淫、怒、癡，不行色乃至識，不行內、外法，不行諸煩惱結使，不行有漏法、無漏法，世間法、出世間法，有爲法、無爲法，亦無聖果；菩薩亦如是，無有是事，亦不分別是法，是名善達諸法相。」須菩提言：「世尊！化人云何有修道？」佛言：「化人修道，不垢不淨，亦不在五道生死。須菩提！於汝意云何？佛所化人，有根本實事，有垢有淨不？」須菩提言：「不也！佛所化人，無有根本實事，亦無垢亦無淨，亦不在五道生死。」如是，須菩提！菩薩摩訶薩善達諸

法性亦如是。」須菩提言：「世尊！一切色如化，一切受、想、行、識如化不？」佛言：「一切色如化，一切受、想、行、識如化。」世尊若一切色如化，一切受、想、行、識如化，一切法如化，化人無色，無受、想、行、識，無垢無淨，無五道生死，亦無解脫處，菩薩有何等功用？」佛告須菩提：「於汝意云何？菩薩摩訶薩本行菩薩道時，頗見有衆生從地獄、餓鬼、畜生、人、天中得解脫不？」須菩提言：「不也，世尊！」佛言：「如是！如是！須菩提！菩薩摩訶薩不見衆生從三界得解脫。何以故？菩薩摩訶薩見知一切法如幻、如化。」世尊若菩薩摩訶薩見知一切法如幻、如化，爲何事故行六波羅蜜、四禪、四無量心、四無色定、三十七助道法，乃至行大慈大悲、淨佛國土、成就衆生？」佛告須菩提：「若衆生自知諸法如幻、如化，菩薩摩訶薩終不於

阿僧祇劫爲衆生行菩薩道。須菩提！以衆生自不知諸法如幻，如化，以是故，菩薩摩訶薩於無量阿僧祇劫行六波羅蜜，成就衆生，淨佛國土，得阿耨多羅三藐三菩提。」

須菩提白佛言：「世尊！若一切法如夢、如響、如影、如燄、如幻、如化，衆生在何處住，菩薩行六波羅蜜而拔出之？」須菩提衆生但住名相虛妄憶想分別中，是故菩薩行般若波羅蜜，於名相虛妄中拔出衆生。」須菩提白佛言：「世尊！何等是名？何等是相？」佛言：「以此名強作假施設，所謂此色、此受、想、行、識，此男、此女、此大、此小、此地獄、此畜生、此餓鬼、此人、此天，此有爲、此無爲，此須陀洹果、斯陀含果、阿那含果、阿羅漢果、辟支佛道、此佛道。須菩提！一切和合法，皆是假名，以名取諸法，是故爲名。一切有爲法，但有名相，凡

夫愚人於中生著，菩薩摩訶薩行般若波羅蜜，以方便力故，於名字中教令遠離。作是言：諸衆生是名，但有空名，虛妄憶想分別中生，汝等莫著虛妄憶想。此事本末皆無，自性空故，智者所不著。如是，須菩提！菩薩摩訶薩行般若波羅蜜，以方便力故，爲衆生說法。須菩提！是爲名。何等爲相？須菩提！有二種相。凡夫人所著處，何等爲二？一者色相，二者無色相。須菩提！何等名色相？諸所有色，若粗若細，若好若醜，皆是空。是空法中憶想分別著心，是名爲色相。何等是無色相？諸無色法，憶想分別著心，取相故生煩惱，是名無色相。是菩薩摩訶薩行般若波羅蜜，以方便力故，教衆生遠離是相，著無相法中，令不墮二法，所謂是相、是無相。如是，須菩提！菩薩摩訶薩行般若波羅蜜，教衆生遠離相，令住無相性中。」須菩提白。

佛言：「世尊！若一切法但有名相，云何菩薩行般若波羅蜜能自饒益？亦教他人令得善利？云何菩薩具足諸地，從一地至一地，教化衆生令得三乘？」佛告須菩提：「若諸法根本定有，非但名相者，菩薩行般若波羅蜜時，不能自益，亦不能利益他人。須菩提！諸法無有根本實事，但有名相。是故菩薩行般若波羅蜜時，能具足禪波羅蜜，無相故；毗梨耶波羅蜜，屢提波羅蜜，尸羅波羅蜜，檀波羅蜜，無相故；具足四禪波羅蜜，四無量心波羅蜜，四無色定波羅蜜，無相故；具足四念處波羅蜜，無相故；乃至具足八聖道分波羅蜜，無相故；具足內空波羅蜜，無相故；乃至具足無法有法空波羅蜜，無相故；具足八背捨波羅蜜，無相故；具足九次第定波羅蜜，無相故；具足佛十力波羅蜜，乃至具足十八不共法波羅蜜，無相故。

是菩薩無相故，自具足是諸善法，亦教他人令具足善法，無相故。須菩提！若諸法相，當實有如毫釐許者，菩薩摩訶薩行般若波羅蜜時，不能知諸法無相、無憶念，得阿耨多羅三藐三菩提，亦教衆生令得無漏法。何以故？一切無漏法，無相、無憶念故。如是，須菩提！菩薩摩訶薩行般若波羅蜜，以無漏法利益衆生。須菩提白佛言：「世尊！若一切法無相、無憶念，云何數是聲聞法，是辟支佛法，是菩薩法，是佛法？」佛告須菩提：「於汝意云何？無相法與聲聞法異不？」「不也！世尊！」「無相法與辟支佛法、菩薩法、佛法異不？」「不也！世尊！」佛告須菩提：「無相法即是須陀洹果、斯陀含果、阿那含果、阿羅漢果、辟支佛法、菩薩法、佛法。」須菩提言：「如是！世尊！」須菩提！以是因緣故，當知一切法皆是無相。須菩提！菩薩

摩訶薩學是一切法無相，得增益善法，所謂六波羅蜜，四禪，四無量心，四無色定，四念處，乃至十八不共法。何以故？菩薩不以餘法爲要，如三解脫門，所謂空、無相、無作。所以者何？一切善法皆入三解脫門。何以故？一切法自相空，是名空解脫門；一切法無相，是名無相解脫門；一切法無作無起相，是名無作解脫門。若菩薩摩訶薩學三解脫門，是時能學五陰相，能學十二入相，能學十八界相，能學四聖諦，十二分因緣法，能學內空、外空，乃至無法有法空，能學六波羅蜜，四念處，乃至八聖道分，能學佛十力，四無所畏，四無礙智，十八不共法。」須菩提白佛言：「世尊！云何菩薩摩訶薩行般若波羅蜜，能學五受陰相？」佛告須菩提：「菩薩行般若波羅蜜，知色相，知色生滅，知色如。云何知色相？知色畢竟空，內分分異，

虛無實；譬如水沫無堅固，是爲知色相。云何知色生滅？色生時無所從來，去無所至，若不來不去，是爲知色生滅相。云何知色如是？色如不生不滅，不來不去，不增不減，不垢不淨，是爲知色如。須菩提，如名如實不虛，如前後中亦爾，常不異，是爲知色如。云何知受相？云何知受生滅？云何知受如？菩薩知諸受如水中泡，一起一滅，是爲知受相。知受生滅者，是受無所從來，去無所至，是爲知受生滅。知受如者，是不生不滅，不來不去，不增不減，不垢不淨，是爲知受如。云何知想相？云何知想生滅？云何知想如？知想相者，是想如燄，水不可得，而妄生水相，是爲知想相。知想生滅者，是想無所從來，去無所至，是爲知想生滅。知想如者，諸想如不生不滅，不來不去，不增不減，不垢不淨，不轉於實相，是爲知想如。云何知行相？

云何知行生滅？云何知行如？知行相者，行如芭蕉，葉葉除卻，不得堅實，是爲知行相。知行生滅者，諸行生無所從來，去無所至，是爲知行生滅。知行如者，諸行不生不滅，不來不去，不增不減，不垢不淨，是爲知行如。云何知識相？云何知識生滅？云何知識如？知識相者，如幻師幻作四種兵，無有實識，亦如是。知識生滅者，是識生時，無所從來，滅時無所去，是爲知識生滅。知識如者，知識不生不滅，不來不去，不垢不淨，不增不減，是爲知識如。云何知諸入眼、眼性空，乃至意識性空、色、色性空，乃至法、法性空。云何知眼界、眼界空，色、色界空，眼識、眼識界空，乃至意識界亦如是。云何知四聖諦？知苦聖諦時，遠離二法，知苦諦不二不別，是名苦聖諦；集、盡、道亦如是。云何知苦如？苦聖諦即是如，如即是苦聖諦；集、盡、道亦如是。云

何知十二因緣？知十二因緣不生相，是名知十二因緣。」

須菩提白佛言：「世尊！若菩薩摩訶薩行般若波羅蜜時，各各分別知諸法，將無以色性壞法性，乃至一切種智性壞法性耶？」佛告須菩提：「若法性外更有法者，應壞法性，法性外法不可得，是故不壞。何以故？須菩提！佛及佛弟子，知法性外法不可得，不說法性外有法。如是，須菩提！菩薩摩訶薩行般若波羅蜜，應學法性。」須菩提白佛言：「世尊！菩薩摩訶薩若學法性，爲無所學？」佛告須菩提：「菩薩摩訶薩學法性，則學一切法。何以故？一切法即是法性。」須菩提白佛言：「何因緣故一切法即是法性？」佛言：「一切法皆入無相無爲性中，以是因緣故，學法性則學一切法。」須菩提白佛言：「世尊！若一切法即是法性，菩薩摩訶薩何以學般

若波羅蜜、禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜、菩薩摩訶薩何以學初禪、第二、第三、第四禪、菩薩摩訶薩何以學慈、悲、喜、捨、何以學無邊虛空處、無邊識處、無所有處、非有想非無想處、何以學四念處、四正勤、四如意足、五根、五力、七覺分、八聖道分、何以學空、無相、無作、解脫門、何以學八背捨、九次第定、佛十力、四無所畏、四無礙智、十八不共法、何以學六神通、何以學三十二相、八十隨形好、何以學舍利利大姓、婆羅門大姓、居士大家、何以學生四天王天處、三十三天、夜摩天、兜率陀天、化樂天、他化自在天、何以學生梵天王住處、光音天、徧淨天、廣果天、無想定、淨居天、何以學生無邊空處、生無邊識處、生無所有處、生非有想非無想處、何以學初發意地、第二、第三、第四、第五、第六、第七、第八

第九、第十地？何以故？學聲聞地、辟支佛地、菩薩法位？何以學成就衆生、淨佛國土？何以學諸陀羅尼？何以學樂說法？何以學阿耨多羅三藐三菩提？學已得一切種智，知一切法？世尊！諸法法性中無分別是分別。世尊！將無菩薩墮非道中？何以故？世尊！法性中無如是分別。法性中無色、無受、想、行、識，諸法性亦不遠離色、受、想、行、識。色即是法性，法性即是色，受、想、行、識亦爾。一切法亦如是。」佛告須菩提：「如是！如是！如汝所言：色即是法性，受、想、行、識即是法性。須菩提！菩薩摩訶薩行般若波羅蜜時，若法性外見有法者，爲不求阿耨多羅三藐三菩提。菩薩摩訶薩行般若波羅蜜時，知一切法性即是阿耨多羅三藐三菩提。以是故，菩薩摩訶薩行般若波羅蜜時，知一切法即是法性已，以無名相之法，以名相說，所謂是色，是

受、想、行、識，乃至是阿耨多羅三藐三菩提。須菩提！譬如工幻師若
幻弟子，多人處立，幻作種種形色，男女象馬，端嚴園林，及諸廬館，
流泉浴池，衣服臥具，香華瓔珞，餽饌飲食，作衆伎樂，以樂衆人。又
復幻作人，令布施持戒忍辱精進禪定修智慧。是幻師復幻作刹
利大姓，婆羅門大姓，居士大家，四天王天處，須彌山三十三天，夜
摩天，兜率陀天，化樂天，他化自在天，以示衆人。復幻作梵衆天，乃
至非有想非無想天。復幻作須陀洹，斯陀含，阿那含，阿羅漢，辟支
佛。菩薩摩訶薩，從初發意行檀波羅蜜，尸羅波羅蜜，羼提波羅蜜，
毗梨耶波羅蜜，禪波羅蜜，般若波羅蜜，行初地，乃至行十地，入菩
薩位，遊戲神通，成就衆生，淨佛國土，遊戲諸禪，解脫三昧，行佛十
力，四無所畏，四無礙智，十八不共法，大慈大悲，具足佛身三十二

相、八十隨形好，以示衆人。是中無智之人，歎未曾有！是人多能，巧爲衆事，娛樂衆人，種種形色，乃至三十二相、八十隨形好莊嚴佛身。其中有智之士，思惟言：未曾有也！是中無有實事，而以無所有法娛樂衆人，令有形相，無事事相，無有有相。如是，須菩提！菩薩摩訶薩不見離法性有法，行般若波羅蜜，以方便力故，雖不得衆生，而自布施，亦教人施，讚歎布施法，歡喜讚歎行布施者。自持戒，亦教人持戒。自忍辱，亦教人忍辱。自精進，亦教人精進。自行禪，亦教人行禪。自修智慧，亦教人修智慧，讚歎修智慧法，歡喜讚歎修智慧者。自行十善，亦教人行十善，讚歎行十善法，歡喜讚歎行十善者。自受行五戒，亦教他人受行五戒，讚歎五戒法，歡喜讚歎受行五戒者。自受八戒齋，亦教他人受八戒齋，讚歎八戒齋法，歡喜讚

歎行八戒齋者。自行初禪，乃至自行第四禪，自行慈悲喜捨，自行無邊空處，乃至非有想非無想處，亦教他人行。自行四念處，乃至八聖道分，自行三解脫門，佛十力，乃至自行十八不共法，亦教他人行。十八不共法，讚歎十八不共法，歡喜讚歎行十八不共法者。須菩提！若法性前後中有異者，是菩薩摩訶薩不能以方便力示法性，成就衆生。須菩提！以法性前後中無異，是故菩薩行般若波羅蜜，爲利益衆生，行菩薩道。」

論問曰：佛品中說通達諸法相，今須菩提何以更問？答曰：是般若波羅蜜無一定相，無言說故，雖數問猶未足，是故更問。譬如犢子雖大，善母美乳，飲猶不止；佛大慈悲，猶如善母，般若波羅蜜如美乳，須菩提如犢子，雖數聞諸法相，猶未厭足。復次，唯佛一切智

能通達諸法實相，餘人雖達不能究盡，是故問。餘菩薩未作佛，云何能通達？佛以譬喻答：如幻化人，無三毒，諸煩惱結使，無心、心數法，內外有漏無漏法中所不攝，不墮凡夫法，亦不墮聖果中，不得言是須陀洹等，亦能發他心善惡，所爲變化事，必能令成就。此變化，其實不垢不淨，六道所不攝。菩薩身亦如是，無三毒等煩惱，知是心、心數法，皆是先世虛誑顛倒法，因緣生故，不信、不隨逐。能如是行，是爲善通達諸法相。是時，須菩提雖善知空，以貴敬尊重佛法，不能限量佛法，故問佛：世尊！一切色等法皆空如化耶？佛答：一切色等法皆如化。汝貴重佛故，不敢言空，我以一切智故，能說諸法空；如餘人貴師子力，師子自不貴其力。爾時，須菩提言：若一切法畢竟空，皆如化，佛何以種種讚菩薩功德？因菩薩故斷三惡道，

能拔出衆生令得涅槃。佛反問須菩提：於汝意云何？菩薩本行菩薩道時，見定有衆生從五道中拔出不？須菩提言：無也！佛可其意：如是！如是何以故？菩薩得無生法忍時，知見一切法如幻、如化。須菩提言：若爾者，菩薩以何事故行六波羅蜜等？佛答：若衆生自知諸法空，如夢、如幻，菩薩則無功夫。復次，若諸法決定空相，則菩薩無功夫。令「令」疑是「今」諸法非實非空，過諸語言道，畢竟寂滅相。衆生不知是事故，生吾我心，起惡罪業，受無量苦，是故菩薩知諸法實相，生大悲心。如長者有子，盲而飲毒，長者知其必死，起種種方便，遮令不飲，菩薩亦如是，見衆生顛倒無明盲故，飲三毒，則生大悲心，於無量阿僧祇劫，修六波羅蜜，淨佛國土，教化衆生。

須菩提聞已，更白佛言：世尊！若一切法空，無根本，如夢、如幻等，衆

生。在何處住而菩薩拔出。須菩提意謂：如人沒深泥而得拔出。佛答：衆生但住名相虛誑憶想分別中。佛意：一切法中無決定實者。但凡夫虛誑故著。如人闇中見似人物，謂是實人而生畏怖。又如惡狗臨井，自吠其影，水中無狗，但有其相而生惡心，投井而死。衆生亦如是，四大和合故名爲身，因緣生識，和合故動作言語。凡夫人於中起人相，生愛、生恚，起罪業，墮三惡道。菩薩行般若波羅蜜時，憐愍衆生，種種因緣教化，令知空法而拔出之。作是言：是法皆畢竟空，無所有。衆生顛倒虛妄故，見似如有，如化、如幻、如乾闥婆城，無有實事，但誑惑人眼。復次，一切法但從名字和合，更有餘名，如頭、足、腹、脊和合故，假名爲身。如髮、眼、耳、鼻、口、皮、骨和合故，假名爲頭。諸毛和合故，名爲髮；分分和合故，假名爲毛；諸微塵和合故，

名爲毛分，亦和合諸分故，名微塵。問曰：微塵第一微細故，不得作分故，無和合，此則定法，是故不得言一切空，無有定法。答曰：若微塵是色，則應有分，何以故？一切色皆在虛空中，皆有十方。若微塵是色，則有十分，若有十分，云何是極微？若如汝說微塵無分者，則非色，何以故？出色相故。又復色名五情可得，若微塵非五情所得者，云何得知是色？是故微塵但有虛名，眼見粗色，尚可破令空，何況不可見不可觸？問曰：微塵細故，五情所不能得，聖人得天眼則見。答曰：天眼見雖細，是色相故，應當有分；若無分則非色，非色則天眼不見。以是故，天眼亦虛誑妄見，是故聖人以慧眼觀世間，則得道。微塵如先說，但有名無實。微塵無故，一切法名字和合故，更有假名，無有實定，而衆生妄生貪著，貪欲、瞋恚、因緣故，起惡業，無

量阿僧祇劫，在三惡道受苦。若諸法實定，尚不應作貪欲、瞋恚、罪因緣，何況虛誑無實！若能捨虛誑名相，不著空法者，則受涅槃常樂。問曰：名相有何差別？答曰：名者，是衆物字，如熱物字爲火。相者，如見烟，知是火相；熱是火體。復次，如五衆和合中男女，是爲名；身貌可別男女，是爲相；見是相故，作名字，名爲男女。問曰：若爾者，名相無異，所以者何？見相故得名，知名故得相。答曰：汝不解我所說耶？先見男女貌，然後名爲男女，相爲本，名爲末。又復如人眼見色，徧取所好相而生著，於餘人則不然，以其能生染著心，是名爲相。復次，此中佛自說名相分別，名者假名，以名取諸法，如經中廣說。須菩提問：若一切法但有名相，菩薩云何自利利人？佛答：若諸法根本定有，菩薩行般若時，不能自利利人。何以故？若諸法性定實

有，即是無生。何以故？以性先定有故。若是法從因緣和合生，即是無定性；若性定有，則不須因緣和合。若爾者，則無生，無生故無滅，無滅故無罪福；以知無常故，則捨罪修福。若常，則無縛、無解、無世間、無涅槃等。是故佛告須菩提：若法定有，非但名相者，菩薩不行般若自利利人，不行禪波羅蜜等自利利人，無相故，是菩薩自具足是善法，亦以善法利益衆生，以無相故。佛告須菩提：若諸法當實有如毫釐許，菩薩坐道場時，不能觀一切法空、無相、無所有，得成阿耨多羅三藐三菩提，亦不能以此法利益衆生。何以故？是菩薩坐道場時，觀一切法第一真實，若小錯不應得阿耨多羅三藐三菩提，亦不能爲衆生說是空無相法。所以者何？法若定有，佛云何誑衆生，一切法無漏、無相、無憶念？問曰：四諦中三諦皆有相，苦

諦則有苦相，集諦則有集相，道諦則有道相，唯滅諦無相，亦有憶念是無相涅槃。汝何以言一切無漏法無相，無憶念？答曰：摩訶衍法，與聲聞法異。摩訶衍法中，說一切無漏法，無相，無憶念。復次，有相，有憶念，皆是虛誑不實；若虛誑不實，即是諸煩惱漏。云何是無漏？復次，是三諦皆隨滅諦，見苦即捨，見集即斷，不言實定；見道爲趣滅故，亦不住是道中。滅盡是住，是滅盡法無相，無緣。云何有憶念？憶念皆是緣相著法；是故無漏法皆無相，無憶念。須菩提意：若無漏法是第一實，無相，無憶念，一切法性亦應無相，無憶念。但凡夫顛倒故，有相，有憶念。是故問佛：若一切法無相，無憶念，云何數是聲聞法？是辟支佛法？是菩薩法？是佛法？佛反問：須菩提，三乘法與無相法異不？須菩提答：諸煩惱滅即是斷，斷即是無爲法，亦知

滅諦道即是無漏無相，是故言三乘不異無相法。佛復問：須陀洹乃至佛法，即是無相法耶？答言：是以是因緣故，當知一切法皆是無相；若無相，汝云何難言有諸道？正以無相故，有三乘諸道。佛言：若菩薩能如是學無相法，則能增益諸善法，所謂六波羅蜜，乃至十八不共法。此中佛自說因緣：菩薩唯住三解脫門，不以餘法爲要。所以者何？三解脫門是實法，餘四念處等法雖實，皆方便說。三解脫門近涅槃，亦能攝一切實善法，是故說菩薩應學。問曰：若菩薩學是三解脫門，即學五衆、十二入、十八界等，是三解脫門皆空、無相、無分別，是五衆諸法皆是有相、有分別法，云何學三解脫門故，學是餘法？答曰：菩薩學是三解脫門，則出三界，盡三漏故，於諸法中得實智慧，無所不通。先來五衆中，皆虛妄邪行，今得此三解

脫門故，得正通達。此中佛自說因緣。菩薩行是三解脫門。無相法時，知色生，知色滅，知色如，乃至識亦爾。如經中廣說。須菩提復問：如佛所言，菩薩知色等相，知色等生，知色等滅，知色等如；若如是分別，將無色性壞法性耶？佛答：若有法出法性者，色性應壞法性。一切法實相，名爲法性，是故一切法皆入法性中；色性實相即是法性，同一性，云何色性能壞法性？佛更說因緣：諸佛賢聖，不見出法性更有法者，不得故不說。諸佛賢聖最可信者，菩薩應如是學法性。須菩提白佛：若菩薩學法性，是爲無所學。所以者何？法性無性故。佛答：法性無性者，若菩薩學法性，爲學一切法；若法性當別有性，若無性是性，應但學法性，不學一切法；今法性實無別性，亦無無性，故徧學一切法。但諸法實相是法性，是故得實相，則正徧

學一切法。

爾時，須菩提白佛言：世尊！若一切法即是法性，菩薩摩訶薩以何等故學六波羅蜜，乃至陀羅尼門？何以故？諸法實相即是法性，若一切法即是法性，菩薩更何所求？復次，法性中無分別是六波羅蜜，乃至陀羅尼，今菩薩分別行是法，將無墮顛倒中耶？佛可須菩提意而答：若菩薩出法性見有法者，不求阿耨多羅三藐三菩提，何以故？出法性有法者，是常顛倒，無明不可轉，令實云何斷一切法中無明得作佛？菩薩知一切法即是畢竟空，常寂滅相，無戲論，無名字，憐愍衆生，以方便力故，名相說，所謂是色，是受，想，行，識，乃至阿耨多羅三藐三菩提。如經中所說幻喻：幻師即是菩薩，幻法即是六波羅蜜等諸法。雖行是諸法，無著心，如幻師雖幻作種種

物，知其無實而不著。智者是佛及大菩薩，無智者凡夫人及新發意，而大歡喜，歎未曾有。菩薩行菩薩道，雖出法性更不見有法，亦不見有一定衆生，而大利益自身及衆生。如經中說：是菩薩自行布施等，亦教他人讚歎布施法，歡喜讚歎行布施者。乃至十八不共法亦如是。此中佛自說因緣：若法性先無，後有菩薩不能得阿耨多羅三藐三菩提，亦不能以方便力說。所以者何？若法性先無，後有，從因緣生者，則與凡夫法無異。若法性先有，後無，衆生及諸法則墮斷滅。以法性先空中，後亦爾，非智慧力故令空。衆生及諸法，非以入無餘涅槃時乃空，從本已來常空。菩薩教衆生，何以不觀其實性而著顛倒？若觀諸法畢竟空性者，則知從本已來常空，今無所失。如是行般若波羅蜜菩薩，則能祐利衆生。

大智度論卷第八十九

校譌

第四十面

第六行是住之
住宋南藏作主

音釋

踝

胡瓦切 躡兩
旁曰內外踝

透迤

透於爲切 迤余支
切 透迤邪去貌

撓

女巧切
撓亂也

齋

徂奚切
與臍同

「齋」今版改作「臍」

釐

鄰知切 十
毫曰釐

大智度論卷八十九

釋善達品第七十九

四六

大智度論卷第九十

龍樹菩薩造

姚秦三藏法師鳩摩羅什譯

釋實際品第八十

【經】須菩提白佛言：「世尊！若衆生畢竟不可得，菩薩爲誰故，行般若波羅蜜？」佛告須菩提：「菩薩爲實際故，行般若波羅蜜。須菩提！實際衆生際異者，菩薩不行般若波羅蜜。須菩提！實際衆生際不異，以是故，菩薩摩訶薩爲利益衆生故，行般若波羅蜜。復次，須菩提！菩薩摩訶薩行般若波羅蜜時，以不壞實際法，立衆生於實際中。」須菩提白佛言：「世尊！若實際即是衆生際，菩薩則爲建立實際於實際。世尊！若建立實際於實際，則爲建立自性於自性。」

世尊！不得建立自性於自性。世尊！云何菩薩摩訶薩行般若波羅蜜時，建立衆生於實際？佛告須菩提：「實際不可建立於實際，自性不可建立於自性。須菩提！今菩薩摩訶薩行般若波羅蜜時，以方便力故，建立衆生於實際，實際亦不異衆生際，實際衆生際無二無別。」

須菩提白佛言：「世尊！何等是諸菩薩摩訶薩方便力，用是方便力，菩薩摩訶薩行般若波羅蜜時，建立衆生於實際，亦不壞實際相？」佛告須菩提：「若菩薩摩訶薩行般若波羅蜜時，以方便力故，建立衆生於布施，建立已，說布施先，後際空，作是言：如是布施前際空，後際空，中際亦空，施者亦空，施報亦空，受者亦空。諸善男子！是一切法實際中不可得，汝等莫念布施異，施者異，施報異，受

者異！若汝等不念布施異，施者異，施報異，受者異；是時布施能取甘露味，得甘露味果。汝善男子！以是布施故，莫著色，莫著受，想行識，何以故？是布施，布施相空，施者空，施報空，受者空，受者空中，布施不可得，施者不可得，施報不可得，受者不可得。何以故？是諸法畢竟自性空故。復次，須菩提！菩薩摩訶薩行般若波羅蜜時，以方便力故，教衆生持戒。語衆生言：汝善男子！除捨殺生法，乃至除捨邪見法。何以故？善男子！如汝所分別法，是諸法無如是性。汝善男子！當諦思惟：何等是衆生而欲奪命？用何等物奪命？乃至邪見亦如是。須菩提！菩薩摩訶薩，如是方便力成就衆生。是菩薩摩訶薩即爲衆生說布施持戒果報，是布施持戒果報自性空；知布施持戒果報自性空已，是中不著，不著故心不散，能生智慧。

以是智慧斷一切結使煩惱，入無餘涅槃。是世俗法，非第一實義。何以故？空中無有滅，亦無使滅者；諸法畢竟空，即是涅槃。復次，須菩提！菩薩摩訶薩見衆生瞋恚惱心，教言：汝善男子來！修行忍辱，作忍辱人，當樂忍辱。汝所瞋者，自性空。汝來善男子，如是思惟：我於何所法中瞋？誰爲瞋者？所瞋者誰？是法皆空，自性空法，無不空時。是空非諸佛作，非辟支佛作，非聲聞作，非菩薩摩訶薩作，非諸天、鬼神、龍王、阿修羅、緊那羅、摩睺羅伽，非四天王天，乃至非他化自在天，非梵衆天，乃至非淨居天，非無邊空處，乃至非有想非無想處。諸天所作，汝當如是思惟：瞋誰？誰是瞋者？何等是瞋事？是一切法性空，性空法無有所瞋。如是，須菩提！菩薩摩訶薩行般若波羅蜜時，以是因緣，建立衆生於性空，次第漸漸示教利喜，令得阿

耨多羅三藐三菩提。是世俗法，非第一實義。何以故？是性空中無有得者，無有得法，無有得處。須菩提！是名實際性空法。菩薩摩訶薩爲衆生故行是法，衆生亦不可得。何以故？一切法離衆生相。復次，須菩提！菩薩摩訶薩行般若波羅蜜時，方便力故，見衆生懈怠，教令身精進，心精進。作是言：諸善男子！諸法性空中無懈怠法，無懈怠者，無懈怠事。是一切法性皆空，無過性空者。汝等生身精進，心精進，爲生善法故，莫懈怠。善法者，若布施，若持戒，若忍辱，若精進，若禪定，若智慧，若諸禪定，解脫，三昧，若四念處，乃至八聖道分，若空解脫門，無相，無作解脫門，乃至十八不共法，莫懈怠。諸善男子！是一切法性空中，當知無礙相，無礙法中無懈怠者，無懈怠法。如是，須菩提！菩薩摩訶薩行般若波羅蜜時，教衆生令住性空，不

墮二法。何以故？是性空無二無別故，是無二法，則無可著處。復次，須菩提！菩薩摩訶薩行性空般若波羅蜜時，教衆生令精進，作是言：諸善男子，勤精進，若布施，若持戒，若忍辱，若精進，若禪定，若智慧，若禪定，解脫，三昧，若四念處，乃至八聖道分，若空解脫門，無相，無作解脫門，若佛十力，若四無所畏，若四無礙智，若十八不共法，若大慈大悲，是諸法，汝等莫念二相，莫念不二相，何以故？是法性皆空，是性空不應用二相念，不應用不二相念。如是，須菩提！菩薩摩訶薩行般若波羅蜜，以方便力故，成就衆生，成就衆生已，次第教令得須陀洹果，斯陀含果，阿那含果，阿羅漢果，辟支佛道，入菩薩位，令得阿耨多羅三藐三菩提。復次，須菩提！菩薩摩訶薩行般若波羅蜜時，見衆生亂心，以方便力，爲利益衆生故，作是言：諸善

男子當修禪定，汝莫生亂想，當生一心。何以故？是法性皆空，性空中無有法可得，若亂若一心。汝等住是三昧，所有作業，若身若口，若意，若布施，若持戒，若行忍辱，若勤精進，若行禪定，若修智慧，若行四念處，乃至若行八聖道分，若諸解脫，次第定，若行佛十力，四無所畏，四無礙智，十八不共法，大慈大悲，三十二相，八十隨形好，若聲聞道，若辟支佛道，若菩薩道，若佛道，若須陀洹果，斯陀含果，阿那含果，阿羅漢果，辟支佛道，若一切種智，若成就衆生，若淨佛國土，汝等皆當應隨所願得，行性空故。如是，須菩提，若菩薩摩訶薩行般若波羅蜜，方便力，爲利益衆生故，從初發意終不懈廢，常求善法，利益衆生，從一佛國至一佛國，供養諸佛，從諸佛聞法，捨身受身，乃至阿耨多羅三藐三菩提，終不忘失。是菩薩常得諸陀

羅尼諸根具足，所謂身根、語根、意根。何以故？是菩薩摩訶薩，常修一切種智，修一切種智故，一切諸道皆修。若聲聞道，若辟支佛道，若菩薩神通道。行神通道菩薩，常利益衆生，終不忘失。是菩薩住報得神通，利益衆生，入生死五道，終不耗減。如是，須菩提！菩薩摩訶薩行般若波羅蜜，住性空，以禪定利益衆生。復次，須菩提！菩薩摩訶薩行般若波羅蜜，住性空，以方便力故，利益衆生。作是言：汝等諸善男子，觀一切法性空。善男子，汝等當作諸業，若身業，若口業，若意業，取甘露味，得甘露果。性空中無有法退，何以故？性空不退，亦無退者。以性空非法，亦非非法，於無所有法中，云何當有退？須菩提！菩薩摩訶薩行般若波羅蜜時，如是教衆生，常不懈廢。是菩薩自行十善，亦教他人行十善，五戒、八戒，亦如是。自行初禪，亦

教他人令行初禪，乃至第四禪，亦如是。常自行慈心，亦教他人令行慈心；乃至捨心，亦如是。自行無邊空處，亦教他人令行無邊空處；乃至非有想非無想處，亦如是。自行四念處，亦教他人令行四念處；乃至八聖道分，佛十力，乃至八十隨形好，亦如是。自於須陀洹果中生智慧，亦不住是中，亦教他人令得須陀洹果；乃至阿羅漢亦如是。自於辟支佛道中生智慧，亦不住是中，亦教他人令得辟支佛道。自生阿耨多羅三藐三菩提道，亦教他人令得阿耨多羅三藐三菩提道。如是，須菩提！菩薩摩訶薩行般若波羅蜜方便力故，終不懈怠。」

須菩提白佛言：「世尊！若諸法性常空，常空中衆生不可得，法非法亦不可得，菩薩摩訶薩云何求一切種智？」佛告須菩提：「如

是如是如汝所言，諸法性皆空，空中衆生不可得，法非法亦不可得。須菩提！若一切法性不空，菩薩摩訶薩不依性空成阿耨多羅三藐三菩提，爲衆生說性空法。須菩提！色性空，受、想、行、識性空，菩薩摩訶薩行般若波羅蜜時，說五陰性空法，說十二入、十八界性空法，說四禪、四無量心、四無色定、四念處，乃至八聖道分性空法，說三解脫門、八背捨、九次第定、佛十力、四無所畏、四無礙智、十八不共法、大慈大悲、三十二相、八十隨形好性空法，說須陀洹果、斯陀含果、阿那含果、阿羅漢果、辟支佛道，一切種智、斷煩惱習性空法。須菩提！若內空性不空，外空乃至無法有法，空性不空者，則壞空性。是性空不常不斷，何以故？是性空無住處，亦無所從來，亦無所從去。須菩提！是名法住相，是中無法，無聚無散，無增無減，無生

無滅，無垢無淨，是爲諸法相。菩薩摩訶薩住是中，發阿耨多羅三藐三菩提心，不見法有所發，無發無住，是名法住相。是菩薩摩訶薩行般若波羅蜜時，見一切法性空，不轉阿耨多羅三藐三菩提。何以故？是菩薩不見有法能障礙，當何處生疑？是名阿耨多羅三藐三菩提性空。不得衆生，不得我，不得人，不得壽，不得命，乃至不得知者，見者，性空中色不可得，受、想、行、識不可得，乃至八十隨形好不可得。須菩提譬如佛化作四衆比丘，比丘尼、優婆塞、優婆夷，常爲是諸衆說法，千萬億劫不斷。」佛告須菩提：「是諸化衆，當得須陀洹果、斯陀含果、阿那含果、阿羅漢果，得阿耨多羅三藐三菩提記不？」須菩提言：「不也！世尊！何以故？是諸化衆無有根本實事故。一切諸法性空，亦無根本實事，何等是衆生得須陀洹果

乃至阿羅漢果，得阿耨多羅三藐三菩提記。」「須菩提！菩薩摩訶薩亦如是，爲衆生說性空法，是衆生實不可得，以衆生墮顛倒故，拔衆生令住不顛倒。顛倒即是無顛倒，顛倒、不顛倒雖一相，而多顛倒，少不顛倒。無顛倒處中，則無我、無衆生，乃至無知者、見者、無顛倒處中，亦無色、無受、想、行、識，無十二入，乃至無阿耨多羅三藐三菩提，是爲諸法性空。菩薩摩訶薩住是中，行般若波羅蜜時，於衆生相顛倒中拔出衆生，所謂無衆生，有衆生相中拔出，乃至知者、見者相中拔出。於無色、色相中，無受、想、行、識，受、想、行、識相中拔出衆生。十二入、十八界，乃至一切有漏法，亦如是。須菩提！亦有諸無漏法，所謂四念處、四正勤、四如意足、五根、五力、七覺分、八聖道分。如是等法，雖無漏，亦不如第一義相。第一義相者，無作、無爲、無

生、無相、無說，是名第一義；亦名性空，亦名諸佛道是中不得衆生，乃至不得知者、見者，不得色、受、想、行、識，乃至不得八十隨形好。何以故？菩薩摩訶薩非爲道法故，求阿耨多羅三藐三菩提，爲諸法實相性空故，求阿耨多羅三藐三菩提。是性空前際亦是性空，後際亦是性空，中際亦是性空，常性空，無不性空時。菩薩摩訶薩行是性空般若波羅蜜，爲衆生著衆生相，欲拔出故，求道種智。求道種智時，徧行一切道；若聲聞道，若辟支佛道，若菩薩道，是菩薩具足一切道，拔出衆生於邪想著，淨佛國土已，隨其壽命，得阿耨多羅三藐三菩提。須菩提！過去十方諸佛道性空，未來、現在十方諸佛道亦性空，離性空，世間無道，無道果。要從親近諸佛，聞是諸法性空，行是法，不失薩婆若。」

須菩提白佛言：「世尊！甚深希有！諸菩薩摩訶薩，有行是性空法，亦不壞性空相，所謂色與性空異，受、想、行、識與性空異，乃至阿耨多羅三藐三菩提與性空異。世尊！但色即是性空，性空即是色，乃至阿耨多羅三藐三菩提，阿耨多羅三藐三菩提即是性空，性空即是阿耨多羅三藐三菩提。」佛告須菩提：「如是！如是！若色與性空異，若受、想、行、識與性空異，乃至阿耨多羅三藐三菩提與性空異，菩薩摩訶薩不能得一切種智。須菩提！今色不異性空，乃至阿耨多羅三藐三菩提不異性空，以是故，菩薩摩訶薩知一切法性空，發意求阿耨多羅三藐三菩提。何以故？是中無有法若實若常，但凡夫著色、受、想、行、識。凡夫取色相，取受、相、行、識相，有我心著內外物故，受後身、色、受、想、行、識，是故不得脫生、老、病、死、愁、憂、苦惱。

往來五道。以是事故，菩薩摩訶薩行性空波羅蜜，不壞色等諸法相，若空，若不空。何以故？是色性空，相不壞色，所謂是色是空。譬如虛空不壞虛空，內虛空不壞外虛空，外虛空不壞內虛空。如是，須菩提！色不壞色，空相，色空相不壞色。何以故？是二法無有性能有所壞，所謂是空，是非空，乃至阿耨多羅三藐三菩提，亦如是。」須菩提白佛言：「世尊！若一切法空無分別，云何菩薩摩訶薩從初發意已來，作是願：我當得阿耨多羅三藐三菩提？世尊！若一切法無分別，云何菩薩發心言：我當得阿耨多羅三藐三菩提？世尊！若分別諸法，不能得阿耨多羅三藐三菩提。」佛告須菩提：「如是！如是！若菩薩摩訶薩行二相者，無阿耨多羅三藐三菩提。若分別作二分者，無阿耨多羅三藐三菩提；若不二不分別諸法，則是阿耨

多羅三藐三菩提，菩提是不二相，不壞相。須菩提！是菩提不色中行，不受、想、行、識中行，乃至菩提亦不善提中行。何以故？色即是菩提，菩提即是色，不二不分別；乃至十八不共法，亦如是。是菩提非取故行，非捨故行。須菩提白佛言：「世尊！若菩薩摩訶薩菩提，非取故行，非捨故行，菩薩摩訶薩菩提何處行？」佛告須菩提：「於汝意云何？如佛所化人，在何處行？若取中行？若捨中行？」須菩提言：「世尊！非取中行，非捨中行。」佛言：「菩薩摩訶薩菩提亦如是，非取中行，非捨中行。須菩提！於汝意云何？阿羅漢夢中菩提何處行？若取中行？若捨中行？」不也！世尊！非取中行，非捨中行。世尊！阿羅漢畢竟不眠，云何夢中菩提？若取中行？若捨中行？」須菩提！菩薩摩訶薩阿耨多羅三藐三菩提，亦如是，非取中行，非捨中行。

所謂色中行，乃至一切種智中行。「世尊！將無菩薩摩訶薩不行十地，不行六波羅蜜，不行三十七助道法，不行十四空，不行諸禪定、解脫、三昧，不行佛十力，乃至八十隨形好，住五神通，淨佛國土，成就衆生，得阿耨多羅三藐三菩提？」佛告須菩提：「如是！如是！如汝所言，今菩薩雖菩提無處行，若不具足十地、六波羅蜜、四禪、四無量心、四無色定、四念處，乃至八聖道分、空、無相、無作、解脫，佛十力，乃至八十隨形好，常捨法，不錯謬法，不具足是諸法，終不得阿耨多羅三藐三菩提。是菩薩摩訶薩住色相中，住受、想、行、識相中，乃至住阿耨多羅三藐三菩提相中，能具足十地，乃至得阿耨多羅三藐三菩提。是相常寂滅，無有法能增能減，能生能滅，能垢能淨，能得道，能得果。世諦法故，菩薩摩訶薩得阿耨多羅三藐三

菩提，非第一實義。何以故？第一實義中，無有色，乃至無阿耨多羅三藐三菩提，亦無行阿耨多羅三藐三菩提者。是一切法，皆以世諦故說，非第一義。須菩提！菩薩摩訶薩從初發意已來，行阿耨多羅三藐三菩提，菩提亦不增，衆生亦不減，菩薩亦無增減，須菩提！於汝意云何？若人初得道時，住無間三昧，得無漏根，成就須陀洹果，若斯陀含果、阿那含果、阿羅漢果，汝爾時，有所得，若夢、若心、若道、若道果不？須菩提言：「世尊！不得也！」佛告須菩提：「云何當知得阿羅漢道者？」世尊！世諦法故，分別名阿羅漢道。」佛語須菩提：「如是！如是！世諦法故，說名菩薩，說名色、受、想、行、識，乃至一切種智。是菩提中無法可得，若增若減，以諸法性空故。諸法性空尚不可得，何況得初地心，乃至十地心，六波羅蜜、三十七助道

法、空三昧、無相、無作三昧、乃至一切佛法當有所得、無有是處、如是、須菩提、菩薩摩訶薩、行阿耨多羅三藐三菩提、得阿耨多羅三藐三菩提、利益衆生。」

論釋曰：上品中須菩提種種因緣難，若諸法空，云何有五道生死、善不善法、今難衆生，作是言：世尊！若衆生畢竟不可得，菩薩爲誰故行般若？先難法爲衆生，今難衆生爲法故，佛答：爲實際故，菩薩行般若波羅蜜。須菩提意謂：菩薩爲度衆生故，行般若波羅蜜。佛意：衆生假名虛誑，畢竟不可得，菩薩爲一切實法故，行般若波羅蜜。實法即是實際。問曰：一切菩薩見衆生苦惱，爲度衆生故發大悲心，今何以言爲實際？答曰：初發意菩薩，但爲滅衆生苦故，發大悲心。苦者，所謂老、病、死等，及身心衰惱。云何滅是苦？尋苦因緣，由

生故，如佛十二因緣中說：何因緣故有老、病、死？以有生故。問曰：一切衆生皆知生因緣是苦，菩薩有何奇特？答曰：衆生不知由生有苦。若遭苦時，但怨恨人，自不將適，初不怨生，以是故增長結使，重增生法，不知真實苦因。有人無鞭杖、刀兵諸愁惱苦，而有死苦，此死從何所來？從生而有。復次，鞭杖、刀兵、愁惱，皆由生故有；餘法或有苦，或無苦，是生法必定有苦。正使大智及諸天，有生必有死，有死必有苦，是故知生定是苦本。如草木有生故，必可焚燒，若當不生，雖有猛火、大風，無所燒害。菩薩既得苦因緣，復推生因緣，生因緣者有，有三種：欲有色，有無色，有著。是三有，起善惡業，是生因。有因者，四種取，取因緣者，愛等諸煩惱。小者未能起業故，名爲愛；增長能起業故，名爲取。欲取、見取、戒取、我語取，取著是四事故，能

起種種業。愛因緣，三種受，受因緣者，眼等六種觸。觸名受等諸心數法，情塵識，三事和合故，心中生受等心數法。根本雖三事和合，故生觸，爲六情依止住處故，但說六入。六入因緣名色，六入雖即是名色分，成就名六入，未成就名名色；色成就名五入，名成就名一入。是胎中時因緣次第，名名色。名色因緣是識，若識不入胎初，胎初則爛壞。識名中陰中五衆，是五衆細故，但名爲識。若識不入而胎成者，如一切和合時，皆應成胎。問曰：識何因緣故入胎？答曰：行因緣。行即是過去三種業，業將識入胎，如風吹絕燄空中而去，燄則依止於風。先世作人身時，然六識故，命終時業將識入胎。問曰：上業何以名有？今業何以名行？答曰：上是今世業，爲未來有故名爲有；今業過去世已滅盡，但有名，名爲行。天竺語刪迦羅，秦言

行。是行因緣名無明，一切煩惱雖是過去業因緣，無明是根本故，但名無明。今世現在著愛，取多故，愛取受名；過去世中，是疑、邪見處故，但名無明。今得一切苦惱根本，是無明。問曰：無始生死展轉甚多，何以正齊無明？答曰：是事先已答，菩薩思惟爲人從苦得脫故，求苦因緣。衆生過去、現在老死等苦，不可得除，爲除未來世老死苦，斷相續不令復生。如良醫，過去病不可治，現在病亦不可治，服藥但能治應起病，破其冷熱，不復令起。又如失火燒舍，不爲已過火故勤滅，亦不爲現在火故勤滅，但爲未來火，不令更燒故勤滅。良醫滅火人，勤方便亦不虛。菩薩滅衆生苦惱亦如是：過去苦已滅，無所復能；現在苦惱，先世因緣成就故不可卻；但破未來世老死等苦因緣故，破是生法，老死等苦自然永滅。是故菩薩欲滅

未來世老死等苦因緣生，得現在有等八因緣：一名有漏業，二名現在世諸煩惱，所謂四取、一愛。是二種煩惱，從二心數法生，所謂受及觸。觸能生一切心數法，受前生故，得名觸。是受因緣。受雖能生三毒，一切衆生，愛是舊煩惱。觸因緣是內六入，如先說。雖有外六入，內六入無故，觸等心數法不生，是故內六入得名。名色是六入因緣，如此中說。初入胎識，是名色因緣。名色在胎中，此中雖有六入，未成就未可用故，未得名字。既生嬰孩，未能有所作，但有六入。轉大有六觸，如小兒蹈火履冰，但有觸，未知苦樂。轉大受苦樂，未深愛著，如小兒雖瞋，未能起殺等惡業，雖喜未能起施等善業。年及成人，得苦生恚，得樂生愛。求樂具故，取欲等四取，取時能起善惡業。若知先一世無明業因緣，則億萬世可知。譬如現在火

熱過去、未來火亦如是。若無明因緣更求其本，則無窮，即墮邊見，失涅槃道，是故不應求。若更求，則墮戲論，非是佛法。菩薩欲斷無明故，求無明體相，求時即入畢竟空。何以故？佛經說無明相：內法不知，外法不知，內外法不知。菩薩以內空觀內法，內法即空；以外空觀外法，外法即空；以內外空觀內外法，內外法即空。如是等一切是無明相；如先品，德女經中破無明廣說。復次，菩薩求無明體，即時是明，所謂諸法實相名爲實際。觀諸法如幻如化，衆生顛倒因緣故，起諸煩惱，作惡罪業，輪轉五道，受生死苦。譬如蠶出絲自裹縛，入沸湯火炙；凡夫衆生亦如是，初生時未有諸煩惱，後自生貪欲、瞋恚等諸煩惱，是煩惱因緣故，覆眞智慧，轉身受地獄火燒湯煮。菩薩知是法本末皆空，但衆生顛倒錯故，受如是苦。菩薩於

此衆生起大悲心，欲破是顛倒故，求於實法，行般若波羅蜜，通達實際；種種因緣教化衆生，令住實際，是故住實際無咎。復次，經中說：若衆生與實際異，菩薩不應行般若波羅蜜。異者，實際是畢竟空，衆生際是決定有。若爾者，應難。若諸法實際相空，菩薩云何爲衆生故修是實際？若衆生畢竟空，實際定有，無衆生則無所利益，爲誰故行實際？今衆生際，實不異實際，故行般若；欲覺悟狂惑顛倒凡夫故，行般若波羅蜜，令衆生住實際中，而不壞實際。是時，須菩提更問：若衆生際、實際不異，云何以實際著實際？自性不應自性中住，如指端不能自觸指端！佛可其意，菩薩以方便故，建立衆生於實際，而衆生、實際不異；一亦不可得。若是一，則壞實際相。所以者何？得是一性故。菩薩知是二法，不一不二，亦不不一，亦不不

二、畢竟寂滅無戲論相。菩薩生大悲心，但欲拔出衆生離於顛倒故，教化衆生。

又問：云何名方便？佛言：菩薩行般若時，以方便力故，建立衆生於檀中，說是檀先際、後際空，中際亦爾，如經中廣說。菩薩知實際者，到衆生邊，如先檀品中說。衆生聞已發心，折薄煩惱，深著布施。菩薩憐愍衆生，我從慳中拔出，今復著布施。衆生若受布施，福盡受諸苦惱；又受福德富貴因緣，得作大罪，則墮地獄。是故愍此衆生，得少許時樂，而受苦長久，是故菩薩爲說布施實相，所謂畢竟空。作是言：是布施過去已滅，不可見，不可得，不可用，但可憶念，如夢所見無異，未來未生故，亦無所有，畢竟空。是布施先、後際無故，中際亦無。如破六塵中，破色法中說：現在布施雖眼見，分分破析，乃

至微塵不可得。布施三世空，施者、受者、果報亦如是。菩薩語施者言：布施等法，是初入佛法門，實際中、實際相亦無，何況布施！汝莫念，莫著布施等法，若不念、不著，如布施體相，如是布施者，則得甘露味、甘露果。甘露味者，是八聖道分；甘露果者，是涅槃。菩薩雖住實際中，以方便力，布施門度衆生。餘波羅蜜亦如是，如經中廣說。須菩提白佛言：世尊！若一切法性空，性空中無法及非法，亦無衆生，菩薩云何住是空中，求一切種智？佛答：菩薩安立性空中，故能行是布施等諸法。又問：性空破一切法，悉盡無餘，云何菩薩住性空中，能行布施等諸善法？佛可須菩提意而說：因緣。菩薩知諸法實相，住是中，能得阿耨多羅三藐三菩提。諸法實相者，即是性空。若一切法性不空，菩薩不應住是諸法性空中，得阿耨多羅三藐

三菩提已，爲衆生說性空法。所謂色性空，受、想、行、識性空，乃至爲衆生說一切種智、斷煩惱習性空法。復次，須菩提！十八空，若性不空，是爲壞空體。何以故？十八空能令一切法空，若自不空，則爲虛誑。又若不空者，則墮常邊著處，能生煩惱；性空無實住處，無所從來，去無所至，是名常住法相。常住法相是性空之異名，亦名諸法實相。是相中無生無滅，無增無減，無垢無淨。菩薩住是中，見一切法性空，於阿耨多羅三藐三菩提不退不疑不悔。何以故？不見諸法能障礙者，以方便力故度衆生。方便力者，畢竟無法，亦無衆生，而度衆生。問曰：若衆生及法，從本以來無，爲誰作方便？爲度脫誰？答曰：性空名空性，亦無，汝何以取是空性相作難？若有性空相，應當作難。復次，得諸法實相者，知是性空，是人則知諸法性空，無法。

無衆生。凡人未得實相故，種種憶想分別，譬如狂人妄有所見，以爲實有。爲度凡夫狂人故，言爲衆生說狂法中，有是諸法分別，實法中則無。菩薩欲滿本願故，又不著性空，故有度衆生，此中則不應難。復次，此經中佛自說因緣：性空中衆生不可得，知者見者亦不可得，乃至八十隨形好亦如是。而菩薩立是法爲衆生說，是世諦故，非是實。此中佛說譬喻：如佛作化人，又化作四部衆而爲說法，可有得道者不須菩提言不也。所以者何？無定根本實事，何有得須陀洹乃至得佛者？菩薩說法度衆生，亦如是。衆生無有定實，但欲於顛倒中拔出衆生，著無顛倒中。無顛倒法亦無處所，是中無衆生，乃至無知者見者。雖空性一相，而顛倒多，不顛倒少，是故貴是性空不顛倒法。菩薩住此中，但破衆生妄想，不破衆生。又無

漏法，乃至八聖道分，雖是無漏，以生滅故，不如第一義。須菩提！是性空，一切諸佛唯有是道，更無異道。何以故？諸佛皆求實智，不壞不異法，雖有十力、四無所畏、諸異法，不名爲一道。所以者何？此皆是有爲法，轉變無常故。是性空中無衆生，亦無色等諸法，菩薩不爲菩薩道，故求阿耨多羅三藐三菩提，但爲性空故。問曰：何等是性空？何等是菩薩道？答曰：第一義中無分別，世諦中有分別。諸法實相名性空，餘布施等乃至八十隨形好，是菩薩道。雖行是法，不爲此法，爲求性空故，是故說：不爲菩薩道。故行是性空。先亦性空中，亦性空，後亦性空，從本已來常空，無有作者。非是福德力，故使空，亦非智慧力，故使空，但性自爾故。諸佛賢聖，以大福德、智慧方便力故，破衆生心中顛倒，令知性空。譬如虛空，性常清淨，不著垢

闇。或時風雲闇翳，世人便言虛空不淨；更有猛風吹除風雲，便言虛空清淨；而虛空實無垢無淨。諸佛亦如是，以說法猛風吹卻顛倒雲翳，令得清淨，而諸法性常自無垢無淨。是菩薩知一切法性空故，能行一切種種道度衆生。具足一切道，淨佛國土，教化衆生，得阿耨多羅三藐三菩提時，隨意壽命。隨意壽命者，菩薩得無生忍法，入如幻菩薩道，能一時變化作千億萬身，周徧十方，具足行一切菩薩道；處處國土中，隨衆生壽命長短而受其形。如釋迦文尼佛，於此國土壽命百年，於莊嚴佛國壽七百阿僧祇劫。佛法於五不可思議中，是第一不可思議。佛告須菩提：一切法性空，是諸佛眞法，若得是法，則名爲佛；若說此法，名爲度衆生。三世佛皆亦如是。離是性空，則無道無果。道者，八聖道分；果者，七種果。所以者

何？若離性空別有定法，則取相生著，著故亦無離欲，無離欲故則無道果。若離性空，雖行布施、持戒、行慈、悲等善法力故，雖不墮惡道，生天福盡，還墮惡道，如本不異。行性空法，亦不著性空，即是涅槃。行餘法，生著心，有退失；若行此法，則無退失。

須菩提歡喜白佛言：甚希有！菩薩行是性空法，亦不壞性空相。佛答：若色等法與性空異，菩薩則不得阿耨多羅三藐三菩提。何以故？有定法則不可得離。須菩提！今色等諸法性實空，菩薩知是法已，得阿耨多羅三藐三菩提。所以者何？此中無有一法定是常，但凡夫生我心故，著內外法，不得脫生、老、病、死，是故菩薩行是性空，和合六波羅蜜，不壞色等諸法相，所謂若空、若不空。若空、若不空，若非空、非不空，不作如是示諸法相，是名不壞。所以者何？色實相即

是性空。性空云何自壞性空？乃至菩提亦如是。此中佛說譬喻：如內虛空不壞外虛空，以同體故。須菩提問：世尊！若諸法性空無別異，菩薩於何處得阿耨多羅三藐三菩提？佛可其意言：如是！若分別有二相，則不得阿耨多羅三藐三菩提。阿耨多羅三藐三菩提名實智慧，於色法中不行，所謂不著不染。所以者何？是智慧不爲取色故行，是故不行色中。須菩提復問：若菩提不取中行，不捨中行，當於何處行？取名實法，捨名空法；取名著行，捨名不著行；取名二行，捨名不二行；如是等分別。佛反問須菩提：於汝意云何？佛所化人爲何處行？須菩提言：是化人無處行，化人無心無心數法故。菩提亦如是。復問：於汝意云何？阿羅漢夢中菩提爲在何處行？須菩提言：阿羅漢尚不眠，何況夢中菩提有行處？問曰：菩提有三種：

阿羅漢菩提，辟支佛菩提，佛菩提。阿羅漢菩提，不在有漏心中，無記心中行，但在無漏心中行，佛何以故問阿羅漢夢中菩提何處行？答曰：阿羅漢是一切漏盡聖人，則無夢，佛以必無處故問，欲明必無行法。問曰：乃至佛猶尚有眠，何以知之？佛常命阿難：汝四鬘優多羅僧敷，我欲小眠，汝爲諸比丘說法。又薩遮尼乾問佛：佛自念晝日有眠不？佛言：春末夏初，以時熱故小眠息，除食患故。薩遮尼乾白佛：餘人有言：晝日眠是癡相。佛言：汝置！汝不別癡相。諸漏能生後身相續不斷者，是名癡相，雖常不眠亦是癡；若是諸漏永滅無餘，雖眠不名癡。如是等經中處處說，須菩提何以言阿羅漢尚不眠？答曰：眠有二種：一者眠而夢，二者眠而不夢。阿羅漢非爲安隱著樂故眠，但受四大身法，應有食息眠覺，是故少許時息名

爲眠，不爲夢眠故。須菩提言：阿羅漢尚不眠。有人言：離欲者得禪定，色界繫四大入身中，身心歡樂則無有眠。慧解脫阿羅漢，色界四大不入身中，故有眠。是故須菩提言：阿羅漢尚不眠。是故阿羅漢有眠，有不眠。佛以方便力，爲度衆生，受人法故現眠。須菩提復問：若不行者，云何菩薩從一地至十地，乃至得阿耨多羅三藐三菩提？佛可其意：菩提雖無處行，未具足六波羅蜜諸法，終不得阿耨多羅三藐三菩提。是菩薩住色相，乃至菩提相中住，得阿耨多羅三藐三菩提。不捨色等法，亦不著菩提相，知色等法即是菩提，常寂滅無法，若增若減，若垢若淨，若得道，若得果。但世諦故說，菩薩得阿耨多羅三藐三菩提，第一義中無有色，乃至菩提。佛欲明是事故，反問須菩提：於汝意云何？汝斷煩惱得道時，有所得不所

謂如夢等五衆，若道若道果，決定一法不須菩提言，不得也。所以者何？須菩提意住無相門中入道，云何取相？佛言：汝若乃至不得微細少法，云何說汝爲阿羅漢？須菩提言：世諦法故說言阿羅漢。凡夫顛倒法中有得有失，有衆生有法。佛言：菩提亦如是，世諦法故說有菩薩，說有色等乃至菩提；菩提中無有定法，亦無衆生，亦無菩提。菩薩觀是菩提法，無有增，無有減。所以者何？諸法性如是。菩薩亦不得是諸法性，何況有初發心，乃至十地及六波羅蜜，三十七品，乃至十八不共法，當有所得，無有是處。所以者何？諸法性是一切法根本，尚不可得，何況六波羅蜜等是作法，尚有定實，如是菩薩行是諸法性，得佛時能大利益衆生。

大智度論卷第九十

音釋

耗

呼到切
虛耗也

闇

烏紺切
不明也

殺

於計切
刃部也

褻

必益切
重衣也

大智度論卷九十 釋實際品第八十

三八

大智度論卷第九十一

龍 樹 菩 薩 造

姚秦三藏法師鳩摩羅什譯

釋具足品第八十一

【經】須菩提白佛言：「世尊！若菩薩摩訶薩行六波羅蜜，十八空，三十七助道法，佛十力，四無所畏，四無礙智，十八不共法，不具足菩薩道，不能得阿耨多羅三藐三菩提。世尊！菩薩摩訶薩當云何具足菩薩道，能得阿耨多羅三藐三菩提？」佛告須菩提：「若菩薩摩訶薩行般若波羅蜜時，以方便力故，行檀波羅蜜，不得施，不得施者，不得受者，亦不遠離，是法行檀波羅蜜，是則照明菩薩道。如是，須菩提！菩薩以方便力故，具足菩薩道，具足已，能得阿耨多羅

三藐三菩提。持戒、忍辱、精進、禪定、智慧，乃至十八不共法，亦如是。舍利弗白佛言：「世尊！云何菩薩摩訶薩習般若波羅蜜？」佛告舍利弗：「若菩薩摩訶薩行般若波羅蜜，以方便力故，不壞色，不隨色，何以故？是色性無故，不壞、不隨，乃至識亦如是。舍利弗！菩薩摩訶薩行般若波羅蜜，以方便力故，檀波羅蜜不壞、不隨，何以故？檀波羅蜜性無故，乃至十八不共法，亦如是。」舍利弗白佛言：「世尊！若諸法無自性，可壞、可隨者，云何菩薩摩訶薩能習般若波羅蜜？諸菩薩摩訶薩所學處，何以故？菩薩摩訶薩不學般若波羅蜜，不能得阿耨多羅三藐三菩提。」佛告舍利弗：「如汝所言，菩薩不學般若波羅蜜，不能得阿耨多羅三藐三菩提，不離方便力，故可得。舍利弗！若菩薩摩訶薩行般若波羅蜜，若有一法可得，應當

取，若不可得何所取？所謂此是般若波羅蜜，是禪波羅蜜，是毗梨耶波羅蜜，是羼提波羅蜜，是尸羅波羅蜜，是檀波羅蜜，是色、受、想、行、識，乃至是阿耨多羅三藐三菩提。舍利弗！是般若波羅蜜不可取相，乃至一切諸佛法不可取相。舍利弗！是名不取般若波羅蜜，乃至佛法是菩薩摩訶薩所應學。菩薩摩訶薩於是中學時，學相亦不可得，何況般若波羅蜜。佛法、菩薩法、辟支佛法、聲聞法，凡人法何以故？舍利弗！諸法無一法有性，如是無性諸法，何等是凡夫人？須陀洹、斯陀含、阿那含、阿羅漢、辟支佛、菩薩佛。若無是諸賢聖，云何有法？知是法故，分別說是凡夫人。須陀洹、斯陀含、阿那含、阿羅漢、辟支佛、菩薩佛。」舍利弗白佛言：「世尊！若諸法無性，無實，無根本，云何知是凡夫人？乃至是佛？」佛告舍利弗：「凡夫人

所著處色，有性有實不？「不也！世尊！但以顛倒心故。受、想、行、識，乃至十八不共法，亦如是。」舍利弗！菩薩摩訶薩行般若波羅蜜時，以方便力故，見諸法無性、無根本故，能發阿耨多羅三藐三菩提心。舍利弗白佛言：「云何菩薩摩訶薩行般若波羅蜜時，以方便力故，見諸法無性、無根本故，發阿耨多羅三藐三菩提心？」佛告舍利弗：「菩薩摩訶薩行般若波羅蜜時，不見諸法根本，住中退沒生懈怠心。舍利弗！諸法根本實無我，無所有，性常空，但顛倒愚癡故，衆生著陰、入界。是菩薩摩訶薩，見諸法無所有，性常空，自性空時，行般若波羅蜜，自立如幻師爲衆生說法。慳者爲說布施法，破戒者爲說持戒法，瞋者爲說忍辱法，懈怠者爲說精進法，亂想者爲說禪定法，愚癡者爲說智慧法。令衆生住布施乃至智慧，

然後爲說聖法能出苦，用是法故，得須陀洹果，乃至得阿羅漢果，辟支佛道，乃至阿耨多羅三藐三菩提。」舍利弗白佛言：「世尊！菩薩摩訶薩得是衆生無所有，教令布施、持戒，乃至智慧，然後爲說聖法能出苦，以是法故，得須陀洹果，乃至阿耨多羅三藐三菩提！」佛告舍利弗：「菩薩摩訶薩行般若波羅蜜時，無有所得過罪。何以故？舍利弗！是菩薩摩訶薩行般若波羅蜜時，不得衆生，但空法相續故，名爲衆生。舍利弗！菩薩摩訶薩住二諦中爲衆生說法，世諦第一義諦。舍利弗！二諦中衆生雖不可得，菩薩摩訶薩行般若波羅蜜，以方便力故，爲衆生說法。衆生聞是法，今世吾我尚不可得，何況當得阿耨多羅三藐三菩提及所用法？如是，舍利弗！菩薩摩訶薩行般若波羅蜜時，以方便力故，爲衆生說法。」舍

利弗白佛言：「世尊！是菩薩摩訶薩心曠大，無有法可得，若一相，若異相，若別相，而能如是大莊嚴，用是莊嚴故，不生欲界，不生色界，不生無色界，不見有爲法，不見無爲法，而於三界中度脫衆生，亦不得衆生。何以故？衆生不縛不解，衆生不縛不解故，無垢無淨，無垢無淨故，無分別六道，無分別六道故，無業無煩惱，無業無煩惱故，亦不應有果報，以是果報故，生三界中。」佛告舍利弗：「如是！如是！如汝所言。若衆生先有後無，諸佛、菩薩則有過罪。諸法六道生死亦如是。若先有後無，諸佛、菩薩則有過罪。舍利弗！今有佛無佛，諸法相常住不異，是法相中尚無我，無衆生，無壽命，乃至無知者，無見者，何況當有色、受、想、行、識？若無是法，云何當有六道往來，拔出衆生處？舍利弗！是諸法性常空，以是故，諸菩薩摩訶薩從

過去佛，聞是法相，發阿耨多羅三藐三菩提意。是中無有法我當得，亦無有衆生定著處，法不可出，但以衆生顛倒故著。以是故，菩薩摩訶薩發大莊嚴，常不退阿耨多羅三藐三菩提。是菩薩不疑，我當不得阿耨多羅三藐三菩提，我必當得阿耨多羅三藐三菩提。提得阿耨多羅三藐三菩提已，用實法利益衆生，令出顛倒。舍利弗！譬如幻師，幻作百千萬億人，與種種飲食，令飽滿。歡喜唱言：「我得大福！我得大福！於汝意云何？是中有人，食飲飽滿不？」「不也，世尊！」佛言：「如是！舍利弗！菩薩摩訶薩從初發意已來，行六波羅蜜，四禪，四無量心，四無色定，四念處，乃至八聖道分，十八空，三解脱門，八解脫，九次第定，佛十力，乃至十八不共法，具足菩薩道，成就衆生，淨佛國土，無衆生法可度。」

須菩提白佛言：「世尊！何等是菩薩摩訶薩道？菩薩行是道，能成就衆生，淨佛國土？」佛告須菩提：「菩薩摩訶薩從初發意已來，行檀波羅蜜，行尸羅、羼提、毗梨耶、禪、般若波羅蜜，乃至行十八不共法，成就衆生，淨佛國土。」須菩提白佛言：「世尊！云何菩薩摩訶薩行檀波羅蜜成就衆生？」佛告須菩提：「有菩薩摩訶薩行檀波羅蜜時，自布施，亦教衆生布施，作是言：諸善男子！汝等莫著布施！汝著布施，故當更受身，更受身故多受衆苦。諸善男子！諸法相中無所施，無施者，無受者，是三法性皆空；是性空法不可取，不可取相是性空。如是，須菩提！菩薩摩訶薩行檀波羅蜜時，布施衆生，是中不得布施，不得施者，不得受者，何以故？無所得檀波羅蜜，是名爲檀波羅蜜。是菩薩不得是三法故，能教衆生，令得須陀洹。」

果，乃至令得阿羅漢果，辟支佛道，阿耨多羅三藐三菩提。如是，須菩提！菩薩摩訶薩行檀波羅蜜時，成就衆生；是菩薩自行布施，亦教他人行布施，讚歎布施法，歡喜讚歎行布施者。是菩薩如是布施已，生刹利大姓、婆羅門大姓、居士大家，若作小王，若轉輪聖王，是時，以四事攝取衆生。何等四？布施、愛語、利行、同事。是四事攝衆生已，衆生漸漸住於戒，四禪、四無量心、四無色定，四念處乃至八聖道分，空、無相、無作三昧，得入正位中，得須陀洹果，乃至得阿羅漢果。若得辟支佛道，若教令得阿耨多羅三藐三菩提。作是言：諸善男子！汝等當發阿耨多羅三藐三菩提心，阿耨多羅三藐三菩提易得耳！何以故？無有定法，衆生所著處，但顛倒故，衆生著。是故汝等自離生死，亦當教他離生死；汝等當發心能自利益，亦當得

利益他人！須菩提！菩薩摩訶薩應如是行檀波羅蜜！是行檀波羅蜜！是因緣故，從初發意已來，終不墮惡道，常作轉輪聖王。何以故？隨其所種，得大果報。是菩薩作轉輪聖王時，見有乞者，作是念：我不爲餘事故，受轉輪聖王果，但爲利益一切衆生故。是時，作是言：此是汝物，汝自取之，莫有所難，我無所惜！我爲衆生故，受生死，憐愍汝等，故具足大悲。行是大悲，饒益衆生，亦不得實定，衆生相空，但有假名故，可說是衆生；是名字亦空，如響聲，實不可說相。須菩提！菩薩摩訶薩應如是行檀波羅蜜，於衆生中無所惜，乃至不惜自身肌肉，何況外物！以是法故，能出衆生生死。何等是法？所謂檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，乃至十八不共法，令衆生從生死中得脫。復次，須菩提！菩薩

摩訶薩住檀波羅蜜中布施已，作是言：諸善男子！汝等來持戒，我當供給汝等，令無乏短，衣食、臥具乃至資生所須，盡當給汝。汝等乏少，故破戒，我當給汝所須，令無所乏。若飲食乃至七寶，汝等住是戒律儀中，漸漸當得盡苦，乘於三乘而得度脫。若聲聞乘、辟支佛乘、佛乘，復次，須菩提！菩薩摩訶薩住檀波羅蜜中，若見衆生瞋惱，作是言：諸善男子！汝等以何因緣故瞋惱？我當與汝所須，汝等所欲，從我取之，悉當給汝，令無所乏。若飲食、衣服，乃至資生所須，是菩薩住檀波羅蜜中，教衆生忍辱，作是言：一切法中無有堅實，汝等所瞋，是因緣空無堅實，皆從虛妄憶想生，無有根本。汝瞋恚、壞心、惡口、罵詈、刀杖相加，以至害命，汝等莫以是虛妄法起瞋故，墮地獄、畜生、餓鬼中，及餘惡道，受無量苦。汝等莫以是虛妄無實。

諸法故而作罪業，以是罪業故，尚不得人身，何況得生佛世！諸人佛世難值，人身難得，汝等莫失好時！若失好時，則不可救。是菩薩摩訶薩如是教化衆生，自行忍辱，亦教他人令行忍辱，讚歎忍辱法，歡喜讚歎行忍辱者。是菩薩令衆生住忍辱中，漸以三乘得盡衆苦。如是，須菩提！菩薩摩訶薩住檀波羅蜜，令衆生住忍辱。須菩提！云何菩薩摩訶薩住檀波羅蜜，令衆生精進？須菩提！菩薩見衆生懈怠，作是言：汝等何以懈怠？衆生言：因緣少故。是菩薩行檀波羅蜜時，語諸人言：我當令汝因緣具足，若布施，若持戒，若忍辱。如是等因緣，令汝具足。是衆生得菩薩利益，因緣故，身精進，口精進，心精進，身精進，口精進，心精進，故一切善法具足，修聖無漏法，修聖無漏法故，當得須陀洹果，乃至阿羅漢果，辟支佛道，若得阿耨

多羅三藐三菩提。如是，須菩提！菩薩摩訶薩行檀波羅蜜時，住精進波羅蜜，攝取衆生。須菩提！云何菩薩摩訶薩行檀波羅蜜時，教化衆生令修禪波羅蜜？佛告須菩提：「菩薩見衆生亂心，作是言：汝等可修禪定！衆生言：我等因緣不具足故。菩薩言：我當與汝等作因緣。以是因緣故，令汝心不隨覺觀，心不馳散。衆生以是因緣故，斷覺觀，入初禪、二禪、三禪、四禪，行慈悲、喜、捨心。衆生以是禪、無量心、因緣故，能修四念處，乃至八聖道分。修三十七助道法時，漸入三乘而得涅槃，終不失道。如是，須菩提！菩薩摩訶薩行檀波羅蜜時，以禪波羅蜜攝取衆生，令行禪波羅蜜。須菩提！云何菩薩摩訶薩行檀波羅蜜，以般若波羅蜜攝取衆生？須菩提！菩薩見衆生愚癡，無有智慧，作是言：汝等何以故不修智慧？衆生言：因緣未

具足故。菩薩住檀波羅蜜中，作是言：汝等所須得智慧具，從我取之。所謂布施、持戒、忍辱、精進、入禪定。是因緣具足已，汝等如是思惟。思惟般若波羅蜜時，有法可得，不若我若衆生。若壽命乃至知者，見者可得，不若色、受、想、行、識。若欲界、色界、無色界。若六波羅蜜。若三十七助道法。若須陀洹果。若斯陀含、阿那含、阿羅漢果。辟支佛道。若阿耨多羅三藐三菩提。可得，不是衆生。如是思惟時，於般若波羅蜜中，無有法可得。可著處。若不著諸法，是時不見法。有生有滅，有垢有淨。不分別是地獄、是畜生、是餓鬼、是阿修羅衆。是天。是人。是持戒。是破戒。是須陀洹。是斯陀含。是阿那含。是阿羅漢。是辟支佛。是佛。如是須菩提。菩薩摩訶薩行檀波羅蜜時，以般若波羅蜜攝取衆生。須菩提。云何菩薩摩訶薩住檀波羅蜜中，以尸羅

波羅蜜、羼提波羅蜜、毗梨耶波羅蜜、禪波羅蜜、般若波羅蜜、乃至以三十七助道法、攝取衆生。須菩提！菩薩摩訶薩住檀波羅蜜中，以供養具利益衆生。以是利益因緣故，衆生能修四念處、四正勤、四如意足、五根、五力、七覺分、八聖道分。衆生行是三十七助道法，於生死中得解脫。如是，須菩提！菩薩摩訶薩以無漏聖法攝取衆生。復次，須菩提！菩薩摩訶薩教化衆生時，如是言：諸善男子！汝等從我取所須物，若飲食、衣服、臥具、香華，乃至七寶等種種資生所須，汝當以是攝取衆生。汝等長夜利益安樂，莫作是念：是物非我所有。我長夜爲衆生故，集此諸物，汝等當取是物，如己物無異。教化衆生，令行布施、持戒、忍辱、精進、禪定、智慧，乃至令得三十七助道法，佛十力乃至十八不共法，亦令得無漏法。所謂須陀洹，乃至

阿羅漢果、辟支佛道、阿耨多羅三藐三菩提。如是，須菩提！菩薩摩訶薩行檀波羅蜜時，應如是教化衆生，令得離三惡道，乃至一切生死往來苦。復次，須菩提！菩薩摩訶薩住尸羅波羅蜜教化衆生，作是言：衆生，汝等少何因緣故破戒？當與汝作具足因緣。若布施，乃至智慧，及種種資生所須，是菩薩住尸羅波羅蜜，利益衆生，令行十善道，遠離十不善道。是諸衆生持諸戒，不破戒，不缺戒，不濁戒，不雜戒，不取戒，漸以三乘而得盡苦。尸羅波羅蜜爲首，如檀波羅蜜，說餘四波羅蜜亦如是。

【論問曰：先說菩薩行六波羅蜜等諸助道法，不具足菩薩道，則不能得阿耨多羅三藐三菩提；今須菩提應自知行六波羅蜜等，具足菩薩道，應得阿耨多羅三藐三菩提，何以更問？答曰：須菩提不

疑云何得阿耨多羅三藐三菩提，今但問云何具足菩薩道，得阿耨多羅三藐三菩提。佛答：若菩薩六波羅蜜等諸法，以方便力和合故能行，是時具足菩薩道。方便力者，不決定得是布施等三事，亦不離是三事，行檀波羅蜜，是時照明菩薩道。照明具足是一義。若菩薩決定得布施等三事，直墮常顛倒，取相著法等過罪；若不得是三事，則墮斷滅邊，著空還起邪見等諸煩惱，便離菩薩道。若菩薩離是二邊，因空捨是施等假名字虛誑法，因諸法實相，離是著空，無施者、無受者。如阿耨多羅三藐三菩提相，觀是布施亦爾無異，如是布施名爲具足。乃至十八不共法，亦如是。

舍利弗在會中，聞佛與須菩提說般若甚深果報，大有利益，雖有利益，無決定性，云何可習？佛答：菩薩行般若波羅蜜時，不壞色，不

隨色，如是名習般若波羅蜜。菩薩初發心，爲知實法故，常行般若波羅蜜；次第隨其所宜，行布施等諸法。是故常說：菩薩行般若波羅蜜時，行布施等諸法。色不壞者，不言是色無常，不言是色空無所有，是名不壞色。不隨色者，不如眼見色取相生著。復次，不說是色若常、若無常、若苦、若樂等，是名不隨色；見常、無常等，皆非色實相。復次，不說是色根本從世性中來，若從微塵中來，從大自在天中來，亦不說從時來，亦不說自然生，亦不說無因無緣而強生，如是等名爲不隨、不壞。此中佛自說因緣：是色性無故，不隨、不壞。性無者，是色從一切四大和合，假名名爲色，是中無定一法名爲色，如先破色中說。是色從因緣和合生故，即是無性，若無性即是性空。若得是色相性空，即是習般若波羅蜜；乃至十八不共法亦如

是復問：世尊！若諸法無自性，可壞、可隨者，云何菩薩習般若波羅蜜？不學般若波羅蜜，不得阿耨多羅三藐三菩提。佛可舍利弗意，自說因緣：若菩薩用方便力，行六波羅蜜，是人雖知諸法空，而能起般若波羅蜜。舍利弗！若菩薩求一切法，若得少許定性，則可取可著。今菩薩實求覓一切法，不得定實，所謂是般若波羅蜜，是禪波羅蜜，乃至是十八不共法，是諸法皆不可得，不可得故，何所取？舍利弗！是名菩薩無取般若波羅蜜。菩薩應學無取般若，無取尚不可得，何況般若等諸法！一切法無性故。舍利弗復問：若一切法無性，云何知是凡人乃至佛？佛答：一切法雖無根本定相，但凡人顛倒故著。菩薩行般若波羅蜜時，以方便力故，見一切法無根本，而發阿耨多羅三藐三菩提心。是菩薩深行諸法性空故，不見一

切法有根本，不見故不懈不退，了了知一切法無我，無所有性，性常空；但衆生愚癡顛倒故，著是陰界入。是時，菩薩思惟籌量諸法甚深寂滅相，而衆生深著虛誑顛倒，菩薩自立如幻師，種種神通變化，說法度人，如幻所作，無憎無愛，等心說法。所謂慳者教施等六法，復爲說轉勝法，令出生死，得須陀洹果，乃至阿耨多羅三藐三菩提。問曰：六波羅蜜外，更有何法爲勝？何以言更爲說勝法？答曰：此中不說波羅蜜，但爲慳者說施，乃至癡者爲說智慧。諸佛菩薩法，有初、有後。初法所謂布施、持戒、受戒、施果報，得天上福樂。爲說五欲味利少失多，受世間身，但有衰苦，讚歎遠離世間斷愛法，然後爲說四諦，令得須陀洹果。此中菩薩但說欲令衆生得佛道故，先教令行六法。此中善智慧，不名爲三解脫門所攝，是善智慧。

能生布施等善法，能滅慳貪、瞋恚等惡法，能令衆生得生天上。何以知之？更有勝法故。勝法者，所謂四諦聖法，出法。一切聖人所行法，名爲聖法；出三界生死，名爲出法。以是四諦說法故，隨衆生根因緣，令得須陀洹果，乃至得一切種智。此中雖不說初六法，說布施等，當知已攝。復次，菩薩爲佛道故，說是六法，但衆生意劣故，自取小乘，是故不說布施、持戒、生天受報等初六法。舍利弗白佛言：世尊！先說菩薩是畢竟不可得法，今爲無所有衆生說法，令得無所有法，所謂須陀洹果，乃至一切種智。世尊！菩薩今得無所有法故，能令衆生得無所有法，無所得是有所得。佛答：菩薩行般若波羅蜜時，無有有所得過。何以故？菩薩行般若波羅蜜時，不見衆生及法，但諸因緣和合，假名衆生。菩薩住二諦中，爲衆生說法，不但

說空，不但說有；爲愛著衆生故說空，爲取相著空衆生故說有，有無中二處不染，如是方便力爲衆生說法。衆生現在我身及我尚不可得，何況當得阿耨多羅三藐三菩提！舍利弗歡喜白佛言：世尊！曠大心是菩薩，曠大心者，此中自說因緣：所謂無有法可得，若一相，若異相。如人市買，必須交易；大心人則不然，無所依止而能發大莊嚴，大莊嚴故不生三界，亦拔衆生令出三界，而衆生不可得，不縛不解故，一切法空。從久遠已來，煩惱顛倒，皆是虛誑不實，是故名無縛；無縛故亦無解。縛即是垢，解即是淨。無淨無垢故，無六道分別；不分別六道故，無罪福業；罪福業無故，無煩惱能起罪福業者；不起罪福業，亦不應有果報。如是諸法畢竟空中而作大莊嚴，是爲希有！譬如人虛空中種樹，樹葉華果，多所利益。佛可舍

利弗意。舍利弗難是空故。佛亦答亦可。以其說空故可。以其難空故答。所謂舍利弗。若衆生及諸法。先有今無。諸佛賢聖有過罪。過罪者。所謂令衆生入無餘涅槃。永滅色等一切法。入空中皆無所有。以斷滅衆生及一切法。故有罪過。舍利弗。衆生及一切法。先來無。若有佛無佛。常住不異。是諸法實相。是故無六道生死。亦無衆生可拔出。舍利弗。一切法先空。是故菩薩於諸佛所。聞諸法如是相。故發阿耨多羅三藐三菩提心。作是念。菩提中亦無有法可得。亦無實定法。令衆生著而不可度。但衆生癡狂顛倒。故著是虛誑法。是故菩薩發大莊嚴。不轉於阿耨多羅三藐三菩提。作是念。我必當得阿耨多羅三藐三菩提。非不得已。用實法利益衆生。利益衆生故。衆生從顛倒得出。欲明了是事故。經中說幻師譬喻。幻

師即是菩薩，幻師所作園林、廬觀，即是六波羅蜜等度衆生法；幻師所作象馬、男女，即是菩薩所度衆生。如幻師一身，以幻力故，幻作衆生、園林、廬觀等娛樂衆人；若幻師以所幻作事爲實，於所幻人求其恩惠，即是狂人。菩薩亦如是，從諸佛聞一切法性空如幻，而以布施等利益衆生，欲求恩惠福報，即是顛倒。問曰：幻法呪術實有，幻所作物可虛。如衆生空，菩薩亦空，菩薩不化作衆生，何得爲喻？答曰：諸法實相中，法尚無，何況衆生！衆生異名，名爲幻師，幻師實無，何以言幻師有而所幻者無？如汝以幻師實有，所幻者無，聖人觀幻師及所幻物不異。以明了事故說譬喻，取其少許相似處爲喻，何以盡取爲難？如師子喻王，師子於獸中無畏，王於羣下自在無難，故以爲喻。復何可責四腳負毛爲異耶？佛說性空法，諸

法皆空，猶有衆生，是故說幻爲喻。我今說喻以破衆生，汝云何復以衆生爲難？

爾時，須菩提白佛言：世尊！何等是成就衆生、淨佛國土道？須菩提雖知菩薩道，以中說甚深性空故，聽者生疑，是故發問。佛答：菩薩從初發心，行六波羅蜜，乃至十八不共法，是菩薩道；行是道，成就衆生、淨佛國土。須菩提復問：云何行是法成就衆生？須菩提意：若是法性空，衆生亦性空，云何可得成就？佛答：菩薩以方便力故，以布施法教化衆生，不教令著布施以爲真實。方便者，菩薩語衆生：汝曹善男子，來布施，莫著是布施，如經中說：衆生以布施生貴樂處，貴樂因緣故，生我憍慢，我憍慢增長，故破善法，破善法故，墮三惡道。是故菩薩先教言：莫著布施，但因是布施修持戒等善法，皆

迴是法向涅槃。所以者何？是性空諸法實相，不可取相。如是菩薩方便力教化衆生，令得須陀洹果，乃至佛道。是菩薩自行布施，亦教衆生布施。若不自施，或有人言，若施是好法，何不自行？是故菩薩先自布施。復次，菩薩深愛善法，布施是初門，是故行是布施。又菩薩深慈悲衆生，以慈悲心雖大，而不能充滿衆生，是故先行布施，令其心軟，可以引導。布施因緣生於四姓及作轉輪王，以四攝法攝取衆生，漸漸以三乘法令得涅槃。教他布施，讚歎布施法，歡喜讚歎行布施者，是深愛布施，見同行故，歡喜讚歎。復次，憐愍心於衆生，若見修福，則爲之歡喜，如慈父見子行善，心則歡喜。是人四種行布施，生刹利等貴姓中。以布施攝已，漸漸教令持戒、禪定等，乃至令得辟支佛道。或見衆生有大心者，有少許慈悲心，是人

怖畏生死長遠故，其心懈退。菩薩方便力故，語是衆生。咄！衆生！阿耨多羅三藐三菩提，易得。汝等何以爲難？衆生所著處，此中無有定實法，能遮者，難解者。汝等當發阿耨多羅三藐三菩提心，既自得度，復能度脫衆生。度脫衆生者，菩薩自乘大乘得度，以三乘隨衆生所應度而度之。既自利益，復利益他人。利益他人者，既自得佛，而以三乘度脫衆生。若菩薩能如是行般若波羅蜜者，從初發心，終不墮三惡道。常作轉輪聖王者，菩薩多生欲界，何以故？以無色界中無形故，不可教化；色界中多味著禪定樂，無厭惡心，故難化。亦不生欲天，所以者何？著妙五欲多，故難化。在人中，世世以四事攝衆生故，作轉輪聖王。此中佛自說因緣，隨其所種，得大果報等，如經中說布施相。復有菩薩行檀波羅蜜時，見衆生破戒，作是

言：汝曹以因緣不具足故破戒，我當給汝所須，令無乏少。破戒人有二種：一者持戒因緣不具足故，如貧窮人，飢寒急故作賊；二者持戒因緣雖具足，以習惡心故，好行惡事。貧窮破戒者，菩薩語之言：汝但持戒，我當給汝所須。汝等住持戒中，漸漸以三乘而得度脫。是名因緣布施戒。衆生以不如意事故瞋，若以求物不如意故瞋，人不稱意故瞋，菩薩住檀中，隨其意而給足之。問曰：若貧乏者給施，令不瞋可爾，人不得稱意，惱之令瞋，復云何？答曰：以如意珠施之，則使人皆稱意。珠之威德故，人無瞋者。如行者入慈三昧故，人無瞋者。是故說少何因緣故瞋，我當令汝所少具足。復次，一切法性皆空無所有，汝所瞋因緣，亦皆虛誑無定。汝云何以虛誑事故瞋罵加害，乃至奪命，起此重罪業故，墮三惡道，受無量苦。汝

莫以虛誑無實事故，而受大罪。如山中有一佛圖，彼中有一別房，中有鬼來恐惱道人故，諸道人皆捨房而去。有一客僧來，維那處分，令住此房，而語之言：此房中有鬼神喜惱人，能住中者住。客僧自以持戒力多聞故，言小鬼何所能，我當伏之！即入房住。暮更有一僧來求住處，維那亦令在此房住，亦語有鬼惱人，其人亦言小鬼何所能，我當伏之！先入者閉戶端坐待鬼，後來者夜闌，打門求入。先入者謂爲是鬼，不爲開戶，後來者極力打門，在內道人以力拒之；外者得勝，排戶得入。內者打之，外者亦極力熟打。至明旦相見，乃是故舊同學，各相愧謝。衆人雲集，笑而怪之。衆生亦如是，五衆無我，無人，空取相致鬪諍；若支解在地，但有骨肉，無人，無我。是故菩薩語衆生言：汝莫於根本空中鬪諍作罪，諍鬪故，人身尙不

可得，何況值佛！當知人身難得，佛世難值，好時易過，一墮諸難，永不可治！若墮地獄，燒炙屠割，何可教化？若墮畜生，共相殘害，亦不可化。若墮餓鬼，飢渴熱惱，亦不可化。若生長壽天，千萬佛過，著禪定味，故皆不覺知。如安息國諸邊地生者，皆是人身，愚不可教化。雖生中國，或六情不具，或四肢不完，或盲聾瘖瘂，或不識義理，或時六情具足，諸根通利，而深著邪見，言無罪福，不可教化。是故爲說好時易過，墮諸難中不可得度。餘波羅蜜，如經中廣說，故不復解之。問曰：住檀波羅蜜行五波羅蜜，訖何以復更說六波羅蜜？答曰：上一度中次第具足五，今則一時總說。復次，先但說六波羅蜜，今通說三十七品及諸道果。問曰：三十七品自從心出，云何是因緣可與？答曰：菩薩供給坐禪者衣服、飲食、醫藥、法杖、禪毬、禪鎖，令

得好師教詔，令得好弟子受化；與骨人令觀，與禪經令人爲說禪法，如是等三十七助道法因緣。又令人爲說摩訶衍法，汝等所須衣服、飲食，盡來取之，便如自物，莫自疑難！汝等得是物已，自行六波羅蜜，亦教化他人，令行六波羅蜜；是布施性皆空，汝等莫著是施，及以果報。衆生得是性空，漸漸得阿耨多羅三藐三菩提，入無餘涅槃。如布施爲首生五波羅蜜，餘波羅蜜亦如是。

大智度論卷第九十一

校譌

第三十面

第四行愚
宋藏作牛

大智度論卷第九十二

龍 樹 菩 薩 造

姚秦三藏法師鳩摩羅什譯

釋淨佛國土品第八十二之上

經作淨
佛國品

爾時，須菩提作是念：「何等是菩薩摩訶薩道，菩薩住是道，能作如是大誓莊嚴？」佛知須菩提心所念，告須菩提：「六波羅蜜是菩薩摩訶薩道，三十七助道法是菩薩摩訶薩道，十八空是菩薩摩訶薩道，八背捨、九次第定是菩薩摩訶薩道，佛十力乃至十八不共法是菩薩摩訶薩道，一切法亦是菩薩摩訶薩道。須菩提！於汝意云何？頗有法菩薩所不學，能得阿耨多羅三藐三菩提不？須菩提！無有法菩薩所不應學者。何以故？菩薩不學一切法，不能

得一切種智。須菩提白佛言：「世尊！若一切法空，云何言菩薩學一切法，將無世尊無戲論中作戲論耶？所謂是此，是彼，是世間法，是出世間法，是有漏法，是無漏法，是有爲法，是無爲法，是凡夫人法，是阿羅漢法，是辟支佛法，是佛法。」佛告須菩提：「如是！如是！一切法實空。須菩提！若一切法不空者，菩薩摩訶薩不得阿耨多羅三藐三菩提。須菩提！今一切法實空故，菩薩摩訶薩能得阿耨多羅三藐三菩提。須菩提！如汝所言，若一切法空，將無佛於無戲論中作戲論，分別此彼，是世間法，是出世間法，乃至是佛法。須菩提！若世間衆生知一切法空，菩薩摩訶薩不學一切法，得一切種智。須菩提！今衆生實不知一切法空，以是故，菩薩摩訶薩得阿耨多羅三藐三菩提已，分別諸法爲衆生說。須菩提！於是菩薩道，從

初已來，應如是思惟：一切諸法中，定性不可得，但從和合因緣起法故，有名字諸法。我當思惟：諸法實性無所著，若六波羅蜜性，若三十七助道法，若須陀洹果，乃至阿羅漢果，若辟支佛道，若阿耨多羅三藐三菩提。何以故？一切法，一切法性空，空不著空，空亦不可得，何況空中有著？須菩提！菩薩摩訶薩如是思惟，不著一切法而學一切法。住是學中，觀衆生心行，是衆生心在何處行？知衆生虛妄不實中行。是時，菩薩作是念：是衆生著不實虛妄法，易度耳！是時，菩薩摩訶薩住般若波羅蜜中，以方便力故，如是教化言：汝諸衆生，當行布施，可得饒財，亦莫恃布施果報而自高。何以故？是中無堅實法。持戒、禪定、智慧，亦如是。諸衆生行是法，可得須陀洹果，乃至阿羅漢果、辟支佛道、佛道。莫念有是法！如是教化，行菩薩

道而無所著，是中無有堅實故。若如是教化，是名行菩薩道，於諸法無所著故。何以故？一切法無著相，以性無故，性空故。須菩提！是菩薩摩訶薩，如是行菩薩道時，無所住。是菩薩用不住法故，行檀波羅蜜，亦不住是中；行尸羅波羅蜜，亦不住是中；行羼提波羅蜜，亦不住是中；行毗梨耶波羅蜜，亦不住是中；行禪波羅蜜，亦不住是中；行般若波羅蜜，亦不住是中。何以故？是初禪、初禪相空，行禪者亦空，所用法亦空。第二、第三、第四禪，亦是慈、悲、喜、捨、四無色定、八背捨、九次第定，亦如是。得須陀洹果，亦不住是中；得斯陀含果，阿那含果，阿羅漢果，亦不住是中；得辟支佛道，亦不住是中。」須菩提白佛言：「世尊！何因緣故不住是中？」佛言：「二因緣故，不住是中。何等二？一者，諸道果性空，無住處，亦

無所用法，亦無住者；二者不以少事爲足。作是念：我不應不得須陀洹果，我必應當得須陀洹果，我但不應是中住；乃至辟支佛道，我不應不得，我必應當得，我但不應是中住；乃至得阿耨多羅三藐三菩提不應住。何以故？我從初發意已來，更無餘心，一心向阿耨多羅三藐三菩提。須菩提！菩薩一心向阿耨多羅三藐三菩提，中，遠離餘心所作身、口、意業，皆應阿耨多羅三藐三菩提。須菩提！是菩薩摩訶薩住是一心，能生菩提道。」須菩提白佛言：「世尊！若一切諸法不生，云何菩薩摩訶薩能生菩提道？」佛告須菩提：「如是！如是！一切法無生。云何無生？無所作，無所起者，一切法不生故。」須菩提白佛言：「世尊！有佛無佛，諸法法相不常住耶？」佛言：「如是！如是有佛無佛，是諸法法相常住，以衆生不知是法住。」

法相爲是故，菩薩摩訶薩爲衆生故，生菩提道，用是道拔出衆生生死。須菩提白佛言：「世尊！用生道得菩提？」佛言：「不也！」
「世尊！用不生道得菩提？」佛言：「不也！」
「世尊！用不生非不生道得菩提？」佛言：「不也！」
須菩提言：「世尊！云何當得菩提？」
佛言：「非用道得菩提，亦不用非道得菩提。須菩提！菩提即是道，道即是菩提。」
須菩提白佛言：「世尊！若菩提即是道，道即是菩提，提者，今菩薩未作佛時，應當得阿耨多羅三藐三菩提。云何說諸佛多陀阿伽度、阿羅訶、三藐三佛陀，有三十二相、八十隨形好、十力、四無所畏、四無礙智、十八不共法、大慈大悲？」
佛告須菩提：「於汝意云何？佛得菩提不？」
「不也！」
世尊！佛不得菩提，何以故？佛即是菩提，菩提即是佛。」
如須菩提所問，菩薩時亦應得菩提。須菩提！

是菩薩摩訶薩，具足六波羅蜜、三十七助道法，具足佛十力、四無所畏、四無礙智、十八不共法，具足住如金剛三昧，用一念相應慧，得阿耨多羅三藐三菩提，是時名爲佛，一切法中得自在。」

須菩提白佛言：「世尊！云何菩薩摩訶薩淨佛國土？」佛言：「有菩薩從初發意已來，自除身粗業，除口粗業，除意粗業，亦淨他人身、口、意粗業。」世尊！何等是菩薩摩訶薩身粗業、口粗業、意粗業？」佛告須菩提：「不善業，若殺生乃至邪見，是名菩薩摩訶薩身、口、意粗業。復次，須菩提！慳貪心，破戒心，瞋心，懈怠心，亂心，愚癡心，是名菩薩意粗業。復次，戒不淨，是名菩薩身、口粗業。復次，須菩提！若菩薩遠離四念處行，是名菩薩粗業；遠離四正勤、四如意足、五根、五力、七覺分、八聖道分、空三昧、無相、無作三昧，亦名菩薩粗業。復

次，須菩提！菩薩摩訶薩，貪須陀洹果證，乃至貪阿羅漢果證，辟支佛道，是名菩薩摩訶薩粗業。」

【論釋】曰：上來須菩提常種種問空法，以時會疑其已體寂滅無戲論法，猶復多問，是以不問而心念。復次，有菩薩及諸天，深入禪定，不好語言而欲得法利，是故須菩提不發言而心念。問曰：須菩提，雖無言，而世尊以言答。答曰：佛身色視無厭足，如色無厭，聲亦如是，雖語而不妨細禪定行，是故佛以言答。復次，佛安立寂滅相，於阿耨多羅三藐三菩提中住，不分別一切法若善、若不善等，衆生有疑而問，佛隨所問，所念而答，是故不與須菩提同。須菩提聞是六波羅蜜等諸法甚深義，不能得其邊，是故問何等是菩薩道？行是道，如清淨無所著，六波羅蜜等諸善法莊嚴。佛知其意，於須菩

提所益雖少，爲增益諸菩薩故。答六波羅蜜等是菩薩道。六波羅蜜是菩薩初發心道；次行四禪、八背捨、九次第定及三十七品道，但求涅槃；十八空、佛十力等微細，但爲求佛道。六波羅蜜道，多爲衆生故；三十七品等，但求涅槃；十八空等於涅槃中出，過聲聞、辟支佛地，入菩薩位道；是三種，皆是生身菩薩所行。所以者何？分別諸法故。今又一切法皆是菩薩道，是法性生身菩薩所行，不見諸法有好惡，安立諸法平等相故。此中佛自說因緣：菩薩應學一切法，若一法不學，則不能得一切種智。學一切法者，用一切種門，思惟、籌量，修觀通達。須菩提白佛：若一切法一相，所謂空。云何菩薩學一切法，將無於無戲論相法中作戲論耶？所謂此彼諸法，略說是戲論相。此東、彼西，是上、是下，是常、是無常，是實、是空，是世間、是

出世間，乃至是二乘法，是佛法。佛可其說；一切法空相，若法實定，有不空者，即是無生無滅，無生無滅故無四諦，無四諦故無佛法、僧寶，如是三寶等諸法皆壞。今諸法實空，乃至空相亦空，衆生愚癡顛倒故著，是故於衆生中起悲心，欲拔出故，求佛身力，欲令衆生信受其語，捨顛倒入諸法實相。是故菩薩雖知諸法空，而爲利益衆生分別說；若衆生自知諸法空，菩薩但自住空相中，不須學分別一切法。菩薩行菩薩道時，從初發意已來，如是思惟一切法無定實性，但從因緣和合起，是衆因緣，亦各各從和合起，乃至到畢竟空。畢竟空唯是一法實，餘者無性，故皆虛誑。我從無始世來，著是虛誑法，於六道中厭受苦惱。我今是三世十方佛子，般若是我母，今不應復隨逐虛誑法，是故菩薩乃至畢竟空中亦不著，何

況餘法，所謂檀波羅蜜等！爾時，菩薩照明菩薩道，其心安隱。自念：我但斷著心，道自然至。知是事已，念衆生染著世間，而畢竟空亦空，無性，無有住處，衆生難可信受。爲令衆生信受是法故，學一切法，修行生起是度衆生方便法，觀衆生心行所趣，知好何法，念何事，何所志願。觀時悉知衆生所著處，皆是虛誑顛倒，憶想分別故，著，無有根本實事。爾時，菩薩大歡喜，作是念：衆生易度耳！所以者何？衆生所著，皆是虛誑無實。譬如人有一子，喜在不淨中戲，聚土爲穀，以草木爲鳥獸，而生愛著；人有奪者，瞋恚啼哭。其父知已，此子今雖愛著，此事易離耳，小大自休。何以故？此物非眞故。菩薩亦如是，觀衆生愛著不淨臭身，及五欲是無常，種種苦因；知是衆生得信等五善根成就時，即能捨離。若小兒所著實是眞物，雖復年

至百歲，著之轉深，不可得捨；若衆生所著物定實有者，雖得信等五根，著之轉深，亦不能離。以諸法皆空，虛誑不實故，得無漏清淨智慧眼時，即能遠離所著，大白慚愧，譬如狂病，所作非法，醒悟之後，羞慚無顏。菩薩知衆生易度已，安住般若中，以方便力教化衆生，汝等當行布施，可得饒財，莫恃是布施果報而自憍高！此中無有堅實，皆當破壞，與未布施時無異。持戒等乃至十八不共法，亦如是。是諸法雖清淨，大有所益，皆是有爲法，從因緣生，無有自性，汝等若著是法，能生苦惱。譬如熱金丸，雖是寶物，捉則燒手。如是菩薩教化衆生行菩薩道，自無所著，亦爲衆生說無所著，以無著心行檀波羅蜜故，於檀中不住。不住者，所謂布施時不取三種相，亦不著果報而自高生罪業，布施果報滅壞時亦不生惱。尸羅波

羅蜜，乃至阿耨多羅三藐三菩提，亦如是。此中佛自說不住因緣有二種：一者、菩薩深入空，不見諸法性故不住；二者、不以小事爲足故不住。是菩薩無有異心，但一向能生菩提道。須菩提白佛：若一切法無生，云何菩薩能生菩提道？佛可須菩提意：一切法無生，我實處處說諸法無生，非爲凡夫說，但爲得無作解脫，不起三業者說。復問世尊：佛自說有佛無佛，諸法法相常住，如聖人法相空，凡人亦如是。佛可其所說：諸法實相常住，以衆生不知不解故，起菩提道，但爲除凡夫顛倒法故，名爲道；若決定有道可著者，卽復是顛倒道，非道平等，卽是道，是故不應難！須菩提復問：云何可得菩提？用生道故得耶？佛言：不也！何以故？生道者，菩薩觀是有爲法生滅相，謂是實，是故言不。如先說熱金丸喻，不生法卽是無爲。

無作法故，亦不可以得菩提。生、不生，二俱有過故。非生非不生得菩提耶？答言：不也！問曰：若生不生二俱有過，非生非不生復不應有過，何以言不得答？曰：若分別非生非不生，是好是醜，取相生著故，故言有過；若能不著，則是菩提道。須菩提問：若不以四句得者，云何得道？佛答：不以道，不以非道，則得菩提。何以故？菩提即是道，道即是菩提。菩提名諸法實相，是諸佛所得究竟實相，無有變異。一切法入菩提中，皆寂滅相，如一切水入大海，同爲一味；是故佛說菩提性即是道性。若菩提性、道性異者，不名菩提，爲無戲論寂滅相，是故說菩提即是道，道即是菩提。復次，是二法異者，行道不應到菩提，諸法因果，不一不異故。須菩提復問：若爾者，菩薩行道應便是佛，所以者何？道即是菩提故。又佛應是菩薩，何以故？菩提

即是道故。今何以說有差別。佛有十力等三十二相、八十隨形好。須菩提爲新學菩薩故，分別難佛，菩薩應即是佛。佛以反問答佛得菩提不？答言：不也！何以故？菩提不離佛，佛不離菩提，二法和合故，是佛是菩提，是故不應難言菩薩即是佛。此總相答。問曰：佛是衆生，菩提是法，云何言佛即是菩提？答曰：先有三十二相莊嚴身，六波羅蜜等功德莊嚴心，而不名爲佛，得菩提故，名之爲佛；是故言佛與菩提不異。微妙清淨五衆和合，假名爲佛，法即是五衆，五衆不離假名，菩提即是五衆實相，一切法皆入菩提故；是故佛即是菩提，菩提即是佛，但凡夫心中分別有異。問曰：汝先論議中說，言菩提與道不一不異，經中何以說道即是菩提，菩提即是道？佛即是菩提，菩提即是佛？答曰：一異雖俱不實，而多用一故，此中說

菩提即是道，道即是菩提，無咎如常，無常是二邊，常多生煩惱，故不用，無常能破顛倒，故多用。事既成辦，亦捨無常。此中亦如是，若以觀種種別異法，故多生著心，若觀諸法一相，若無常、苦、空等，是時煩惱不生，著心少故，是故多用。一於實義中，一亦不用，若著一，即復是患，復次，別異無故，一亦不可得，相待法故，但以不著心，不取一相，故說無咎。一不實故，菩薩不得即是佛，復次，今佛更答須菩提，自說因緣：菩提雖寂滅相，而菩薩能具足六波羅蜜等諸功德，住金剛三昧，以一念相應慧，得阿耨多羅三藐三菩提。爾時，於一切法中自在，得名爲佛。菩薩雖知道及菩提不異，未具足諸功德，故不名爲佛。又佛諸事畢竟，願行滿足，故不名爲菩薩。得者是佛，法是菩提，求菩提者是菩薩。

須菩提從佛聞菩提相、道相、成就衆生已，今問淨佛國土事。諸阿羅漢、辟支佛無有力知淨佛國事，是故問。問曰：何等是淨佛土？答曰：佛土者，百億日月，百億須彌山，百億四天王等諸天，是名三千大千世界。如是等無量無邊三千大千世界，名爲一佛土。佛於此中施作佛事，佛常晝三時、夜三時，以佛眼遍觀衆生，誰可種善根？誰善根成熟應增長？誰善根成就應得度？見是已，以神通力隨所見教化。衆生心隨逐外緣，得隨意事，則不生瞋惱；得不淨、無常等因緣，則不生貪欲等煩惱；若得無所有空因緣，則不生癡等諸煩惱；是故諸菩薩莊嚴佛土，爲令衆生易度故。國土中無所乏少，無我心故，則不生慳貪、瞋恚等煩惱。有佛國土，一切樹木常出諸法實相音聲，所謂無生無滅，無起無作等；衆生但聞是妙音，不聞異

聲，衆生利根故，便得諸法實相。如是等佛土莊嚴，名爲淨佛土，如阿彌陀等諸經中說。佛答：菩薩從初發意來，自淨粗身、口、意業，亦教他人淨粗身、口、意業。問曰：若菩薩淨佛土，是菩薩得無生法，忍住神通波羅蜜，然後能淨佛土，今何以言從初發意來，淨粗身、口、意業？答曰：三業清淨，非但爲淨佛土，一切菩薩道皆淨。此三業初淨身、口、意業，後爲淨佛土，自身淨亦淨他人。何以故？非但一人生國土中者，皆共作因緣。內法與外法作因緣，若善若不善，多惡口業故，地生荆棘；諂誑曲心故，地則高下不平；慳貪多故，則水旱不調，地生沙磧。不作上諸惡故，地則平正，多出珍寶；如彌勒佛出時，人皆行十善故，地多珍寶。問曰：若布施等諸善法，得淨佛土果報，何以但說淨三業？答曰：雖知善惡諸法，是苦樂因緣，如一切心、

數法中，得道時智慧爲大；攝心中定爲大；作業時思爲大；得是思業已，起身、口業、布施、禪定等，以思爲首，譬如縫衣，以針爲導。受後世果報時，業力爲大。是故說三業，則攝一切業法；意業中盡攝一切心數法，身、口則攝一切色法入。身行三種，福德具足，則國土清淨，內法淨故，外法亦淨；譬如面淨故，鏡中像亦淨。如毗摩羅詰經中說：不殺生故人皆長壽，如是等。問曰：身、口、意粗業，是事易知，須菩提何以故問？答曰：粗細不定故，如求道人中，布施是粗善，於白衣爲細；如小乘中不善業爲粗，善業爲細；摩訶衍中取善法相，乃至涅槃皆名爲粗。以粗細不定故問。佛次第爲說粗業相，所謂奪命，乃至邪見。是三種身業、四種口業、三種意業，皆名爲粗。復次，破菩薩六波羅蜜法，慳貪等皆名爲粗。問曰：先說十不善道，已攝慳

貪等，何以復別說？答曰：是六法不入十不善道，十不善道皆是惱衆生法，是六法不但爲惱衆生。如慳心，但自惜財，不惱衆生。貪心有二種：一、但貪他財，未惱衆生；二者、貪心轉盛，求而不得，則欲毀害，是名業道，以能起業故。瞋亦如是，小者不名業道，以其能趣惡處故爲道，是故別說六法無咎。問曰：六波羅蜜中已說戒，今何以復說戒不淨？答曰：破戒法，是殺生等粗罪，戒不淨是微細罪，不惱衆生。如飲酒等，不入十不善道。復次，破五衆戒，名爲破戒，不破所受戒，常爲三毒覆心，不憶念戒，迴向天福，邪見持戒，如是等名爲戒不淨。復次，若菩薩心遠離四念處等三十七品，三解脫門，是名粗業。所以者何？此中心皆觀實法，隨涅槃，不隨世間，若出四念處等法，心則散亂。譬如蛇行本性好曲，若入竹筍則直，出筍還曲。復

次，若菩薩貪須陀洹果證，是爲粗業。如人聞佛說須陀洹果，不墮三惡道，盡無量苦，如五十由旬池水，餘在者如一滴二滴，則生貪心。以其心不牢固，本求作佛，爲衆生，今爲自身而欲取證，是爲欺佛，亦負衆生，是故名粗。譬如人請客，欲設飲食而竟不與，是則妄語負客；菩薩亦如是，初發心時作願，我當作佛，度一切衆生，而貪須陀洹，是則負一切衆生。如貪須陀洹果，乃至貪辟支佛道，亦如是。

大智度論卷第九十二

大智度論卷第九十三

龍樹菩薩造

姚秦三藏法師鳩摩羅什譯

釋淨佛國土品第八十二之下

圖「復次，須菩提！菩薩取色相、受相、行、識相、眼相、耳、鼻、舌、身、意相、色、聲、香、味、觸、法相、男相、女相、欲界相、色界相、無色界相、善法相、不善法相、有爲法相、無爲法相、是名菩薩粗業。菩薩摩訶薩，皆遠離如是粗業相。自布施，亦教他人布施，須食與食，須衣與衣，乃至種種資生所須，盡給與之，亦教他人種種布施。持是福德與一切衆生共之，迴向淨佛國土故。持戒、忍辱、精進、禪定、智慧亦如是。是菩薩摩訶薩，或以三千大千國土滿中珍寶，施與三尊，作是願言：我

以善根因緣故，令我國土皆以七寶成。復次，須菩提！菩薩摩訶薩以天伎樂、樂佛及塔，作是願言：以是善根因緣，令我國土中常聞天樂。復次，須菩提！菩薩摩訶薩以三千大千國土滿中天香，供養諸佛及佛塔，作是言：以是善根因緣，令我國土中常有天香。復次，須菩提！菩薩摩訶薩以百味食施佛及僧，作是願言：以是善根因緣故，令我國土中衆生，皆得百味食。復次，須菩提！菩薩摩訶薩以天香、細滑施佛及僧，作是願言：以是善根因緣故，令我國土中一切衆生，受天香、細滑。復次，須菩提！菩薩摩訶薩以隨意五欲，施佛及僧，并一切衆生，作是願言：以是善根因緣故，令我國土中弟子及一切衆生，皆得隨意五欲。是菩薩以隨意五欲，共一切衆生，迴向淨佛國土，作是願言：我得佛時，是國土中如天五欲，應心而至！

復次，須菩提！菩薩摩訶薩行般若波羅蜜時，作是願言：我當自入初禪，亦教一切衆生入初禪，第二、第三、第四禪，慈悲、喜、捨心，乃至三十七助道法亦如是；我得阿耨多羅三藐三菩提時，令一切衆生不遠離四禪，乃至不遠離三十七品助道法！如是，須菩提！菩薩摩訶薩能淨佛國土，是菩薩隨爾所時行菩薩道，滿足是諸願，是菩薩自成就一切善法，亦成就一切衆生善法，是菩薩受身端正，所化衆生亦得端正。所以者何？福德因緣厚故。須菩提！菩薩摩訶薩，應如是淨佛國土。是國土中，乃至無三惡道之名，亦無邪見、三毒、二乘聲聞、辟支佛之名。耳不聞有無常、苦、空之聲，亦無我所有，乃至無諸結使煩惱之名，亦無分別諸果之名。風吹七寶之樹，隨所應度而出音聲，所謂空、無相、無作，如諸法實相之音；有佛無佛，

一切法、一切法相空，空中無有相，無相中則無作。出如是法音，若晝若夜，若坐若臥，若立若行，常聞此法。是菩薩得阿耨多羅三藐三菩提時，十方國土中諸佛讚歎，衆生聞是佛名，必至阿耨多羅三藐三菩提。是菩薩得阿耨多羅三藐三菩提時說法，衆生聞者，無有不信而生疑，言是法，是非法。何以故？諸法實相中，皆是法，無有非法。諸有薄福之人，於諸佛及弟子中不種善根，不隨善知識，沒在我見中，乃至沒在一切種種見中，墮在邊見。若斷、若常。如是人以邪見故，非佛言佛，佛言非佛；非法言法，法言非法。如是人破法故，身壞命終，墮惡道地獄中。諸佛得阿耨多羅三藐三菩提時，見此衆生往來五道，令離邪聚，立正定聚中，更不墮惡道。如是，須菩提！菩薩摩訶薩淨佛國土中衆生，無雜穢心。若世間法，若出世

間法，若有漏，若無漏，若有爲，若無爲，乃至是國土中衆生，畢竟阿耨多羅三藐三菩提。須菩提！是爲菩薩摩訶薩淨佛國土。」

論釋曰：復有粗業，於諸法畢竟空中取相生著心，所謂取色相，受想行識相，眼相乃至意相，色相乃至法相，男相，女相，三界善，不善，有爲，無爲相等。問曰：男女相可是虛妄不實，餘色等善，不善法，若不取相，云何能厭色等成就善法？答曰：佛法中有二種空：一者衆生空；二者法空。以衆生空破衆生相，所謂男女等相；以法空破色等法中虛妄相，如破一切法空中說。能觀色等善法，如幻，如化，不取定實相，得厭心，則捨戲論常，無常等，是不名爲取相。又色等及善法，皆和合性空行故，不生諸煩惱。問曰：一切有爲法，假名和合，故不應取，無爲法是眞實法，所謂如法相，實際，何以不取？答曰：以

不取相是無爲法，無相名爲無爲法門。若取相便是有爲；如是等一切虛誑取相不實。遠離粗身、口、意業，菩薩欲行淨佛土，遠離如是等粗身、口、意業，自行六波羅蜜，亦教他人令行；共清淨因緣故，則佛土清淨。上總相說，下別相說。是菩薩滿三千大千世界七寶施佛及僧，作是願：我以是布施因緣，令我國土皆七寶莊嚴。問曰：若滿三千大千世界珍寶，從何處得？又諸佛賢聖，少欲知足，誰受是者？若凡人無厭足，何能受三千世界物？答曰：是菩薩是法性生身，住具足神通波羅蜜中，爲供養十方佛故，以如三千世界珍寶供養。又此寶物，神通力所作，輕細無妨；如第三禪遍淨天，六十人坐一針頭而聽法，不相妨礙，何況大菩薩深入神通所作寶物，或有菩薩變身如須彌山，遍十方佛前以爲燈炷，供養於佛，若佛塔

廟，而作願言：令我國土常有光明，不須日月燈燭。或有菩薩雨諸華香、旛蓋、瓔珞以爲供養，復作是願：令我國土衆生端正如華，身相嚴淨，無有醜陋。如是等種種好色因緣。復有菩薩以天伎樂娛樂於佛，若佛塔廟。是菩薩或時以神通力故，作天伎樂，或作天王、轉輪聖王、伎樂，或作阿修羅神、龍王等天伎樂供養，願我國土常聞好音。問曰：諸佛賢聖是離欲人，則不須音樂歌舞，何以伎樂供養？答曰：諸佛雖於一切法中心無所著，於世間法盡無所須；諸佛憐愍衆生故出世，應隨供養者，令隨願得福故受。如以華香供養，亦非佛所須，佛身常有妙香，諸天所不及，爲利益衆生故受。是菩薩欲淨佛土故，求好音聲，欲使國土中衆生聞好音聲，其心柔軟，心柔軟故，易可受化，是故以音聲因緣而供養佛。或有菩薩滿三

千大千世界香供養諸佛、若塔、根香、莖香、葉香、末香、若天香、若變化香、若菩薩果報生香，作是願：令我國土中常有好香，無有作者。或有菩薩以百味供養諸佛及僧。有人言：能以百種羹供養，是名百味。有人言：餅種數五百，其味有百，是名百味。有人言：百種藥草、藥果作歡喜丸，是名百味。有人言：飯食羹餅，總有百味。有人言：飲食種種備足故，稱爲百味。人飲食故百味，天食則百千種味。菩薩福德生果報食，及神通力變化食，則有無量味，能轉人心令離欲清淨。是四種食，菩薩隨因緣供養佛及僧，是故國土中自然有百味飲食。或有菩薩以天塗香，天竺國熱，又以身臭故，以香塗身，供養諸佛及僧。以此因緣故，令我國土衆生，受天香細滑。問曰：沙彌戒乃至受一日戒，尚不以香塗身，云何以香供養佛及僧？答曰：是

菩薩以身所貴物，隨所須時，用以供養，或以塗地、塗壁及行坐處，又以隨意五欲，供養諸佛及僧及餘衆生。是菩薩以好車馬、妻妾、伎樂、旛蓋、金銀、衣服、珍寶，出家人所不受，則施諸衆生，作願言：令我國土衆生，常得隨意五欲。問曰：此五欲，佛說如火、如坑、如瘡、如獄、如怨、如賊，能奪人善根，菩薩何以願使衆生得五欲？又佛說弟子應衲衣、乞食，坐林樹下，菩薩何以爲衆生求得五欲？答曰：天人中五欲是福德果報。若今世若後世，貧窮薄福者不能自活，則行劫盜，或爲物主所害，或爲財殺他，或被詰問，妄言不作。如是，次第作十不善，皆由貧窮故作。若人五欲具足，則所欲隨意，則不行十不善。菩薩國土衆生，豐樂自恣，無所乏少，則無衆惡，但有愛、慢等，輒結使。若聞佛所說，或聞弟子所說，以心柔軟故，聞法易可得道。

雖著心多，利根故，聞無常、苦、空等，即便得道。譬如垢膩之衣，則以灰泥淹之，經宿以水洗之，一時都去。菩薩不欲令衆生著故，以五欲施，但欲令一時捨故與之。如汝先說，佛教弟子衲衣乞食，宿罪因緣生在惡世，染著心多，若得好衣美食，著心則深；又爲求好衣食故，妨廢行道。是菩薩淨佛國土衆生，無量福德成就，五欲一等故，不復貪著，亦不更求故，無所妨。又復，若行者離五欲修苦行，則增長瞋恚；又復，憶念五欲，則生煩惱，爾時則無所向；是故佛言，捨苦樂，用智慧，處中道；是故淨佛國土，五欲施無妨。問曰：若爾者，毗尼中何以一比丘言：我知佛法義，受五欲不妨道？是比丘應訶，乃至三不止，擯出。答曰：佛法有二種：小乘、大乘；小乘中，薄福之人，三毒偏多。如婆蹉經中佛說：我白衣弟子，非一非二，乃至出五百人，

受赤旃檀塗身，及受好香華，妻子共臥，使令奴婢，而斷三結得須陀洹，盡三世苦，薄三毒，得斯陀含。是阿黎咤比丘聞是事，即言雖受五欲而不妨道！不知是事佛爲誰說。佛爲白衣故說，此比丘持著出家法中說。是家在須陀洹、斯陀含等，不作是言：我盡形壽不犯欲，以有餘三毒故，時時忘道而發淫心。出家人於僧中口自誓言：我盡形壽不犯淫欲！佛言：若出家人犯欲，則棄。是比丘自誓而犯，是一罪；知佛所制而故違犯，是二罪。是比丘見白衣得道故，而以自身同彼，是故墮罪。淨佛國土有二種衆生：若出家，若在家。在家者雖受五欲無罪，亦無所妨；如兜率陀諸天，及鬱單越人，雖受五欲不起重罪。出家衆生，隨佛所聽，出家受五欲，亦無過咎。此處是說淨佛國土

衆生並非惡世出家受五欲亦無過咎也。

小乘法中，爲阿黎咤比丘說，薄福重罪之人，心多悔故。

淨佛國土者，世世習行六波羅蜜、三解脫門，雖得五欲，亦不染著。如經中說：所謂菩薩摩訶薩，行般若波羅蜜，作是念：我當自入初禪，亦當教化衆生入初禪；四禪、四無量心，乃至三十七品亦如是。是菩薩作是願：我作佛時，盡行四禪乃至三十七品。如是福德故，衆生雖受五欲，不能爲妨。是菩薩作無量阿僧祇願，隨爾所時行道，盡具足是願。是菩薩一切善法皆成就，及所成就衆生。一切善法成就故，得身端正，見者無厭，亦成就衆生，令得端正。須菩提！菩薩應如是淨佛國土。復次，淨佛土者，乃至無三惡之名，何況有三惡道！問曰：諸佛以大慈悲心，爲苦惱衆生故出世，若無三惡道，何所憐愍？答曰：佛出爲度衆生故，而三惡道衆生不可度，但可令種善根而已，是故佛名天人師。若無天人，但有三惡道，可應有難，應

作是問。問曰：佛憐愍衆生，淨佛國土中，何以無三惡道衆生？答曰：憐愍一切衆生，平等無異，此中說清淨業因緣，是國土中無三惡道。又佛非但一國土，乃有十方恆河沙國土。佛有清淨國土，有雜國土；雜國土中則具有五道；淨佛國土，或有人、天別異，或無有人、天別異。如過去天王佛國土中，唯佛世尊以爲法王，是故名爲天王佛。復有國土無三毒邪見。問曰：諸佛但爲除衆生煩惱故，出世邪見三毒即是煩惱，若無煩惱，出何所爲？答曰：有人言：是大福德因緣故，邪見三毒不發，故言無。復次，有人言：是中諸菩薩，皆得無生法忍，常修六波羅蜜等諸功德，常遊十方度脫衆生，於諸佛所修習諸佛三昧，勝教化無數聲聞，辟支佛，亦勝教化阿鞞跋致菩薩，成就衆生。菩薩淨佛土，菩薩爲近佛道故，利益轉大。是國土

無二乘之名者。問曰：餘佛有三乘教化，豈獨劣耶？答曰：佛出五濁惡世，於一道分爲三乘。問曰：若爾，阿彌陀佛、阿閼佛等，不於五濁世生，何以復有三乘？答曰：諸佛初發心時，見諸佛以三乘度衆生，自發願言：我亦當以三乘度衆生。亦無無常、苦、空、無我之名者，以衆生深著常、樂等顛倒故，爲說無常、苦法；是中無常、樂等倒故，不須無常、苦，若無病則不須藥。亦無我所有，乃至無諸煩惱結使，亦如是。無二乘故，亦無須陀洹等諸果，但一向著諸法實相。先得無生法忍者，得諸三昧、陀羅尼門，轉復增益諸地等功德。風吹七寶之樹，隨所應度而出聲者，是菩薩欲使衆生易聞法故。七寶之樹出法音聲。寶樹徧滿國土故，衆生生便聞法，餘心不生，但生法心。問曰：諸佛有無量不可思議神通力，何以不變化作無量說法度

衆生。何須樹木音聲。答曰：衆生甚多，若佛處處現身衆生不信，謂爲幻化，心不敬重。有衆生從人聞法，心不開悟，若從畜生聞法，則便信受。如本生經說：菩薩受畜生身，爲人說法，人以希有故，無不信受。又謂畜生心直不誑。故有人謂畜生是有情之物，皆有欺誑；以樹木無心而有音聲，則皆信受。所謂空、無相、無作；有佛、無佛，一切法常空，空故無相，無相故無作，無起。如是等法，晝夜常出。餘國土以神通力、口力，種種變化，此中常自然音聲。淨佛國土，佛常爲諸佛所讚，大作功德故，能得如是淨國。若聞淨國佛名，則畢定作佛。問曰：餘佛種種勤苦說法，衆生尙不得道，何以但聞佛名便得道。答曰：餘處佛種種說法，衆生或得善根，終不空說；若聞是佛名，畢至阿鞞跋致，不言今得。問曰：一切佛若人好心聞名，皆當至佛。

如法華經中說：福德若大若小，皆當作佛，何以獨說淨國佛？答曰：人聞餘佛名字，謂受生與人無異，但有一切智得道爲異，心不敬重故，雖種善根亦不能深。是中是法性身，佛身無量無邊，光明說法音聲徧滿十方國土，國中衆生皆是近佛道者，無量阿僧祇由旬衆中說法勝。無量億阿僧祇日月光明常從身出；佛令衆生見則得見，若不聽則不見。是佛一一毛孔邊，常出無量無邊阿僧祇佛，一一諸佛等無異，於化佛邊展轉復出。隨應度衆生見佛優劣，根本眞佛，無有分別大小之異。如是等若見若聞名，若聞如是功德，深信敬重故，所種善根云何不畢定作佛？復次，是佛說法時，無有疑者，乃至無一人言，是法爲非佛口所說，悉皆是法。問曰：人從釋迦文尼佛聞法生疑者多？答曰：佛此中自說因緣，有人薄福不

種善根，不得善知識，故生疑。著我見、邊見、邪見等諸煩惱覆故，非佛言是佛，是佛言非佛。不深種善根，不順善師，三毒邪見一時發起，無所依隨，任意自恣。若見邪見順其意，故言是一切智見；諸佛說畢竟空，不順其意，便言非佛；非法言法，法言非法。如是人於諸佛所多生疑，多生疑，故心悔，是淨佛國中無如是罪人，故不生疑。佛言如是罪人，破諸法實相，故死墮地獄惡道中。諸菩薩得阿耨多羅三藐三菩提，見諸罪人往來生死中，以佛神通力，拔出衆生，令住正定聚中，不墮三惡趣，是名淨佛土。是佛土中無如是諸過，無不具足，於世間、出世間，有漏、無漏，有爲、無爲等中，無有障礙。所謂國土七寶，衆生身端正，相好莊嚴，無量光明，常聞法音，常不遠離六波羅蜜，乃至十八不共法，是中衆生皆畢定，至阿耨多羅三

貌三菩提。問曰：上聞佛名畢定至佛，此於諸法無障礙必得作佛，有何差別？答曰：此中衆生常見佛，常聞法，深種善根，多集佛法故，疾得作佛。聞名者，雖俱畢定而小不如。如是等，名爲淨佛國土相，如十地中莊嚴菩提樹說。

釋必定品第八十三之上

有本作畢定品

經須菩提白佛言：「世尊！是菩薩摩訶薩爲必定爲不決定？」佛告須菩提：「菩薩摩訶薩必定，非不決定。」世尊！何處必定？爲聲聞道中？爲辟支佛道中？爲佛道中？」佛言：「菩薩摩訶薩，非聲聞、辟支佛道中必定，是佛道中必定。」須菩提白佛言：「世尊！爲初發意菩薩必定耶？爲最後身菩薩必定耶？」佛言：「初發意菩薩亦必定，阿鞞跋致菩薩亦必定，後身菩薩亦必定。」世尊！必定菩

薩墮惡道中生不？「不也！須菩提！於汝意云何？若八人，若須陀洹、斯陀含、阿那含、阿羅漢、辟支佛，生惡道中不？」「不也！世尊！」如是，須菩提！菩薩摩訶薩，從初發意已來，布施、持戒、忍辱、精進、行禪定、修智慧，斷一切不善業，若墮惡道，若生長壽夭，若不得修善法處，若生邊國，若生惡邪見家，無作見家，是中無佛名，無法名，無僧名，無有是處，須菩提！初發意菩薩，於阿耨多羅三藐三菩提，以深心行十不善道，無有是處！「世尊！若菩薩摩訶薩有如是善根功德成就，如佛自說本生受不善果報，是時善根爲何所在？」佛告須菩提：「菩薩摩訶薩，爲利益衆生故，隨而受身，以是身利益衆生。須菩提！菩薩摩訶薩作畜生時，有大方便利，若怨賊欲來殺害，以無上忍辱，無上慈悲心捨身，不惱怨賊，汝諸聲聞、辟支佛，無有是

力。以是故，須菩提！當知菩薩摩訶薩，欲具足大慈悲心，爲憐愍利益衆生故，受畜生身。」須菩提白佛言：「世尊！菩薩摩訶薩住何等善根中，受如是諸身？」佛告須菩提：「菩薩摩訶薩從初發意，乃至道場，於其中間，無有善根不具足者；具足已，當得阿耨多羅三藐三菩提。以是故，菩薩摩訶薩從初發意，應當學具足一切善根。學善根已，當得一切種智，當斷一切煩惱習。」須菩提白佛言：「世尊！云何菩薩摩訶薩，成就如是白淨無漏法，而生惡道畜生中？」佛告須菩提：「於汝意云何？佛成就白淨法無漏法不？」須菩提言：「佛一切白淨無漏法成就。」須菩提！若佛自化作畜生身，作佛事度衆生，實是畜生不？」須菩提言：「不也！」佛言：「菩薩摩訶薩亦如是，成就白淨無漏法，爲度衆生故，受畜生身，用是

身教化衆生。」佛告須菩提：「如阿羅漢作變化身，能使衆生歡喜不？」須菩提言：「能！」佛言：「如是如是！須菩提！菩薩摩訶薩用是白淨無漏法，隨應度衆生而受身，以是身利益衆生，亦不受苦痛。須菩提！於汝意云何？幻師幻作種種形，若象馬、牛羊、男女等，以示衆人。須菩提！是象馬、牛羊、男女等有實不？」須菩提言：「不實也！世尊！」佛言：「如是，須菩提！菩薩摩訶薩白淨無漏法成就，現在種種身，以示衆生故，以是身饒益一切，亦不受衆苦。」須菩提白佛言：「世尊！菩薩摩訶薩大方便力，得聖無漏智慧，而隨所應度衆生身，而作種種形，以度衆生！」

【論問曰：上阿鞞跋致品中說：如是相是阿鞞跋致，如是相非阿鞞跋致。阿鞞跋致即是必定，須菩提今何以更問？答曰：是般若波羅

蜜有種種門，有種種道。阿鞞跋致是一門中說，今問必定，更問異門。復次，佛心中一切衆生一切法皆必定，人以智不及故，名爲不必定。佛知雖無量阿僧祇劫積大功德，必退作小乘者，亦知微細蜚蟲雖未有善心，過爾所劫發心，後當作佛。定知一切法皆如是，從是因，得是果，是故名佛一切法中無礙，以必定知故。復次，須菩提聞法華經中說：於佛所作少功德，乃至戲笑一稱南無佛，漸漸必當作佛。又聞阿鞞跋致品中有退不退，又復聞聲聞人皆當作佛，若爾者不應有退。如法華經中說必定，餘經說有退，有不退，是故今問爲必定，爲不必定。如是等種種因緣故，問定不定。佛答：菩薩是必定。須菩提心以入涅槃爲必定，是故問爲何道中必定。佛答：非必定二乘，但於大乘中必定。求佛道者，有上、中、下，是故問爲

初發意爲阿鞞跋致，爲最後身必定，須菩提意謂爲阿鞞跋致已上，必定安立佛道中故。佛答：三種菩薩皆必定，必定者必當作佛。問曰：如上品中說，佛以佛眼見十方菩薩，求佛如恆河沙，得阿鞞跋致者，若一若二，今何以言三種菩薩盡皆必定？答曰：我先已說，般若甚深有無量門，有說諸菩薩退而不必定，有處說菩薩必定不退。如阿鞞跋致品中，須菩提問佛：菩薩退者，於何處退？爲從色，爲從受、想、行、識，乃至十八不共法，畢竟空故，諸法皆不退；此中佛更說不退。問曰：是二義何者是實？答曰：二事皆實，佛口所說無不實者。如佛或說諸法空無所有，或說布施、持戒等是有爲。初發心者說諸法有爲，久學人著善法者，說諸法空無所有。懈怠於阿耨多羅三藐三菩提不牢固者，如是人應從聲聞道得度而不求聲

聞，久於生死中受苦，是故說發心如恆河沙，得阿鞞跋致者若一若二。衆生聞是已，能堪受衆苦者，必定阿耨多羅三藐三菩提；若不能者，取聲聞、辟支佛道。有人堪任得佛而大悲心薄，自愛身重，此人聞佛難得，多有退者。作是念：我或不能得佛，不如早取涅槃，何用世世受勤苦爲！爲是人故，說一切菩薩乃至初發心皆必定。如法華經中說。問曰：若菩薩皆定，佛何以故種種訶二乘人，不聽菩薩取二乘證？答曰：求佛道者應徧知法性，是人畏老、病、死故，於法性少分取證，便自止息，捨佛道不度衆生，諸佛菩薩之所訶責。汝欲捨去，會不得離，得阿羅漢證時，不求諸菩薩深三昧，又不廣化衆生，是則迂迴，於佛道稽留。問曰：阿羅漢先世因緣所受身，必應當滅，住在何處而具足佛道？答曰：得阿羅漢時，三界諸漏因緣

盡，更不復生三界。有淨佛土，出於三界，乃無煩惱之名，於是國土佛所，聞法華經，具足佛道。如法華經說：有阿羅漢，若不聞法華經，自謂得滅度，我於餘國爲說是事，汝皆當作佛。問曰：若阿羅漢往淨佛國土，受法性身，如是應疾得作佛，何以言迂迴稽留？答曰：是人著小乘因緣，捨衆生，捨佛道，又復虛言得道。以是因緣故，雖不受生死苦惱，於菩薩根鈍，不能疾成佛道，不如直往菩薩。復次，佛法於五不可思議中最第一，今言漏盡阿羅漢還作佛，唯佛能知。論議者正可論其事，不能測知，是故不應戲論。若求得佛時，乃能了知，餘人可信而未可知。必定菩薩墮三惡道中不者，須菩提聞佛說無量本生因緣，或象、鹿、龜、鵠、孔雀、鸚鵡等受種種苦，是故問佛：世尊！若菩薩受如是等畜生身，云何言一切菩薩必定？必定者，

即是阿鞞跋致，阿鞞跋致者不墮三惡趣。佛反問答於汝意云何？
八人等聖人爲墮三惡道不須菩提思惟。是諸聖人入聖道故，無
墮三惡道因緣。思惟已，答言：不也！佛言：菩薩亦如是，墮三惡道因
緣盡故，云何墮三惡道？墮三惡道因緣者，所謂諸不善法。是菩薩
從初發心已來，修習布施、持戒等諸善法，斷諸殺生等十不善道，
若是人墮三惡道，無有是處！何以故？滅諸惡法，增益善法故。不善
道有上、中、下，上者墮地獄，中者墮畜生，下者墮餓鬼。是菩薩三種
已盡，深心悲念衆生，是故不墮。問曰：若爾者，三惡道可不於中生，
是菩薩福德多，何以不於長壽天中生？答曰：是菩薩憐愍衆生，行
六波羅蜜，雖能入禪波羅蜜，和合慈悲行，不著禪味，命欲終盡，念
欲界法故退禪道；以彼中無苦惱，深著禪味，難可得度，故不生長

壽夭。以邊國遮礙，不得修善法故不生。所以者何？是菩薩拔出各法根本，各法因緣故，生邊國不知法處。復次，是菩薩常好中道，捨離二邊故，不生邊國。邊國無三寶之名，不識七衆，但貴今世現事，不貴福德道法，故名邊地。不但生邊國故，名爲邊地；若識三寶，知罪福相續因緣，解諸法實相，是人雖生閻浮提外，不名爲邊，何況生閻浮提中？是菩薩常樂爲他說法，亦深愛善法故，得隨意善衆生共生，所謂爲中國。又於中國不生邪見家。何以故？是菩薩世世常自行正見，亦教他正見，讚正見法，歡喜讚歎行正見者；是故不生惡邪見家。問曰：是菩薩大福德智慧力，應生邊地，邪見家而教化之，何以畏而不生？答曰：菩薩有二種：一者，成就大力菩薩；二者，屬因緣新發心菩薩。大菩薩爲衆生隨所應度受身，不避邊地，邪

見新發意菩薩若生是處，既不能度人，又自敗壞，是故不生。譬如真金在泥，終不敗壞，銅鐵則壞。邪見者，所謂無作見。雖六十二種皆是邪見，無作最重，所以者何？無作言不應作功德，求涅槃。若言天作，若言世界始來，雖是邪見而不遮作福德，以無作大惡，故不生。又初發心菩薩，染惡心行十不善道，無有是處，何以故？是菩薩一心迴向，貴重阿耨多羅三藐三菩提，不貴世間法。是人未離欲因緣故，雖起諸煩惱，終不染心作惡，雖加杖楚，終不奪命，不取他財，令其失命。是菩薩斷一切不善法，修集一切善法故，不生八難處，常得八好處。須菩提問：若菩薩有如是善根成就，云何本生因緣作鹿、馬等？佛答：菩薩實有福德善根成就，爲利衆生故，受畜生形，亦無畜生罪。此中佛自說因緣：所謂菩薩在畜生中，慈愍怨賊，

阿羅漢、辟支佛所無有。羅漢、辟支佛，怨賊來害，雖不加報，不能愛念供養供給。如菩薩本身作六牙白象，獵師以毒箭射胸，爾時菩薩象以鼻擁抱獵者，不令餘象得害。語雌象言：汝爲菩薩婦，何緣生惡心？獵師是煩惱罪，非人過也！我得阿耨多羅三藐三菩提，當滅除其煩惱罪。譬如鬼著人，祝師來但治鬼而不瞋人，是故莫求其罪！徐問獵者：汝何以射我？答言：我須汝牙。象即就石罅，拔牙與之，血肉俱出，不以爲痛，供給糧食，示語道徑。如是等慈悲，阿羅漢、辟支佛所無有。如是好心，云何受畜生身？當知是變化度於衆生。問曰：何以不作人身而爲說法，而作此獸身？答曰：有時衆生見人身則不信受，見畜生身說法，則生信樂，受其教化。又菩薩欲具足大慈悲心，欲行其實事，衆生見之驚喜，皆得入道。

大智度論卷第九十三

校譌

第二十四面

三行任字
宋藏作住

第二十五面

八行第二「論」
字，詳見校勘記。

音釋

滑

戶刮切美也
滑利也

娛

語俱切
樂也

膩

女利切
肥膩也

婆蹉

梵語也此云
積蹉倉何切

阿梨咤

梵語也比丘
名咤陟嫁切

祝師

祝職
教切

願也祝師謂
持呪之師也

罽

呼訝切
孔隙也

大智度論卷第九十四

龍 樹 菩 薩 造

姚秦三藏法師鳩摩羅什譯

釋必定品第八十三之下

【經】「世尊！菩薩摩訶薩住何等白淨法，能作如是方便而不受染汗？」佛言：「菩薩用般若波羅蜜，作如是方便力，於十方如恆河沙等國土中，饒益衆生，亦不貪著是身。何以故？著者著法，著處是三法皆不可得，自性空故。空不著空，空中無著者，亦無著處。何以故？空中空相不可得。須菩提！是名不可得空。菩薩住是中，能得阿耨多羅三藐三菩提。」世尊！菩薩但住般若波羅蜜中，得阿耨多羅三藐三菩提，不住餘法中耶？」須菩提！頗有法不入般若波羅

蜜者不。」「世尊若般若波羅蜜自性空，云何一切法皆入般若波羅蜜中？世尊空中無有法若入，若不入。」「須菩提！一切法，一切法相空不。」「世尊空。」「須菩提！若一切法，一切法相空，云何言一切法不入空中。」「須菩提！佛言：「世尊！云何菩薩摩訶薩行般若波羅蜜時，住一切法空中，能起神通波羅蜜？住是神通波羅蜜中，到十方如恆河沙等國土，供養現在諸佛，聞諸佛說法，於諸佛所種善根。」「佛告須菩提：「菩薩摩訶薩行般若波羅蜜時，觀是十方如恆河沙等國土，皆空，是國土中諸佛亦性空，但假名字故，諸佛現身所假名字亦空。若十方國土及諸佛性不空者，空爲有偏，以空不偏故，一切法，一切法相空。以是故，一切法，一切法相空。是故菩薩摩訶薩行般若波羅蜜，用方便力，生神通波羅蜜，住是神

通波羅蜜中，起天眼、天耳、如意足、知他心、宿命智、知衆生生死。若菩薩遠離神通波羅蜜，不能得饒益衆生，亦不能得阿耨多羅三藐三菩提。是菩薩摩訶薩神通波羅蜜，是阿耨多羅三藐三菩提利益道。何以故？用是天眼自見諸善法，亦教他人令得諸善法，於善法亦不著，諸善法自性空故。空無所著，若著則受味，是空中無有味。是菩薩摩訶薩行般若波羅蜜時，能生如是天眼；用是天眼觀一切法空，見是法空不取相，不作業，亦爲人說是法，亦不得衆生相，不得衆生名。如是菩薩摩訶薩，用無所得法故，起神通波羅蜜，用是神通波羅蜜，神通所應作者能作。是菩薩用天眼通過於人眼，見十方國土，見已，飛到十方，饒益衆生。或以布施，或以持戒，或以忍辱，或以精進，或以禪定，或以智慧，饒益衆生；或以三十七

助道法，或以諸禪、解脫、三昧，或以聲聞法，或以辟支佛法，或以菩薩法，或以佛法，饒益衆生。爲慳者說如是法。諸衆生！當行布施，貧窮是若惱法，貧窮之人自不能益，何能益他？以是故，汝等當勤布施，自身得樂，亦能令他得樂，莫以貧窮故，共相食噉，不得離三惡道。爲破戒者說法。諸衆生！破戒法大苦惱，破戒之人自不能益，何能益他？破戒法受苦果報。若在地獄，若在餓鬼，若在畜生。汝等墮三惡道中，自不能救，何能救人？以是故，汝不應隨破戒心，死時有悔。若有共相瞋諍者，說如是法。諸衆生！莫共相瞋，瞋亂心人，不順善法。汝等今共相瞋亂心，或墮地獄，若餓鬼、畜生中。以是故，汝等不應生一念瞋恚心，何況多！爲懈怠衆生說法，令得精進；散亂衆生，令得禪定；愚癡衆生，令得智慧，亦如是。行淫欲者，令觀不淨；瞋

恚者，令觀慈心；愚癡衆生，令觀十二因緣；行非道衆生，令入正道，所謂聲聞道、辟支佛道、佛道。爲是衆生如是說法。汝等所著，是法性空，性空法中不可得著，不著相是空相。如是，須菩提！菩薩摩訶薩行般若波羅蜜時，住神通波羅蜜中，爲衆生作利益。須菩提！菩薩若遠離神通，不能隨衆生意說善法。以是故，須菩提！菩薩摩訶薩行般若波羅蜜時，應起神通。須菩提！譬如鳥無翅不能高翔，菩薩無神通，不能隨意教化衆生。以是故，須菩提！菩薩摩訶薩行般若波羅蜜，應起諸神通。起諸神通已，若欲饒益衆生，隨意能益。是菩薩用天眼見如恆河沙等諸國土，及見是國土中衆生，見已，用神通力往到其所，知衆生心，隨其所應而爲說法；或說布施，或說持戒，或說禪定，乃至或說涅槃法。是菩薩用天耳聞二種音聲。若

人若非人。用天耳聞十方諸佛所說法，皆能受持，如所聞法爲衆生說。或說布施，乃至或說涅槃。是菩薩淨他心智，用他心智知衆生心，隨其所應而爲說法。或說布施，乃至或說涅槃。是菩薩宿命智，憶念種種本生處，亦自憶，亦憶他人。用是宿命智，念過去在在處處，諸佛名字及弟子衆，有衆生信樂宿命者，爲現宿命事而爲說法。或說布施，乃至或說涅槃。用如意神通力，到種種無量諸佛國土，供養諸佛，從諸佛種善根，還來本國。是菩薩漏盡神通智證，用是漏盡神通智證故，爲衆生隨應說法。或說布施，乃至或說涅槃。如是，須菩提！菩薩摩訶薩行般若波羅蜜時，應如是起神通。菩薩用修是神通故，隨意受身，苦樂不染，譬如佛所化人，作一切事，苦樂不染。菩薩摩訶薩行般若波羅蜜時，應如是遊戲神通，能淨

佛國土成就衆生。復次，須菩提！菩薩摩訶薩不淨佛國土，不成就衆生，不能得阿耨多羅三藐三菩提。何以故？因緣不具足故，不能得阿耨多羅三藐三菩提。」須菩提白佛言：「世尊！何等是菩薩摩訶薩因緣具足已，得阿耨多羅三藐三菩提？」佛告須菩提：「一切善法，是菩薩阿耨多羅三藐三菩提因緣。」須菩提白佛言：「世尊！何等是善法，以是善法故，得阿耨多羅三藐三菩提？」佛告須菩提：「菩薩從初發意已來，檀波羅蜜是善法因緣，是中無分別。是施者，是受者，性空故。用是檀波羅蜜，能自利益，亦能利益衆生，從生死拔出，令得涅槃。是諸善法，皆是菩薩摩訶薩阿耨多羅三藐三菩提因緣。行是道，過去、未來、現在，諸菩薩摩訶薩得度生死，已度、今度、當度。尸羅波羅蜜、羼提波羅蜜、毗梨耶波羅蜜、禪波羅

蜜、般若波羅蜜、四禪、四無量心、四無色定、四念處乃至八聖道分、十八空、八背捨、九次第定、陀羅尼門、佛十力、四無所畏、四無礙智、十八不共法。如是等功德，皆是阿耨多羅三藐三菩提道。須菩提！是名善法。菩薩摩訶薩具足是善法已，當得一切種智；得一切種智已，當轉法輪；轉法輪已，當度衆生。」

論釋曰：爾時，須菩提問住何等善根故能受此身？佛答：菩薩摩訶薩一切善法具足，乃至須菩提大歡喜白佛言：菩薩摩訶薩大方便成就力，住何等聖無漏法，能受此身而不爲畜身所染？譬如幻師，亦如變化，住何等白淨法，能作如是方便？佛答：菩薩以般若波羅蜜力故，能成就如是方便，作種種身，能利益十方國土中衆生，亦不貪是身。佛此中說因緣：是菩薩三法不可得：一者是菩薩身；

二者所作鹿、馬；三者所用法。何以故？是法皆性空，空亦不著空，空中亦無貪者；法無故衆生無，衆生無故法亦無。此中佛說因緣：空中空不可得，不可得故，菩薩云何貪是智慧？是名無所得空。般若波羅蜜菩薩住是中，能得阿耨多羅三藐三菩提，以無障礙故易得。須菩提問：菩薩住六波羅蜜，乃至十八不共法，今何以但說住無所得般若波羅蜜中得？佛答：須菩提！何法不入般若中？一切法皆入般若波羅蜜中，若住般若波羅蜜，則住一切法。復問：若般若波羅蜜性空，云何一切法皆入中？此中須菩提自說因緣：一切法性空中，無有法出，無有法入。佛告須菩提：一切法，一切法相空耶？世尊！須菩提！若一切法，一切法相空，一切法應入空中，汝云何言空中無有法出入？爾時，須菩提心伏受解，聞是菩薩化身度衆

生。今問：世尊！菩薩云何住一切法空中，能起神通波羅蜜，到十方如恆河沙國土供養佛、聽法、種甚深善根、善根者、諸陀羅尼、三昧門、無礙解脫之根本。須菩提意：般若波羅蜜性空，云何菩薩安住性空波羅蜜中，能行是神通有法？佛言：空故能行。所以者何？須菩提！菩薩行般若時，觀十方如恆河沙國土皆空，是國土諸佛亦空。問曰：若國土空，佛亦應空，何以別說？答曰：佛以無量阿僧祇劫實功德得是身，能以一足指動十方如恆河沙國土；又菩薩世世來深愛重佛，不能疾觀使空，是故不共國土合說。此中佛自說因緣：若十方國土及諸佛不空者，空爲有偏，有偏名有空不空處；今實不偏故，一切法、一切法相空。菩薩行般若波羅蜜，一切法無礙；以肉眼觀色不通，見上不見下，見前不見後，通見障不見，晝見夜不

見。知肉眼力少故，以方便更求天眼。方便力者，令他界四大來在身中。用天眼義，如先說。生天耳、如意足、他心智、宿命智，知衆生生死所趣等。菩薩若無神通，不能得饒益衆生。何以故？若無神通，云何能令多衆生發心？菩薩有神通，猶尚不能盡令衆生發心，何況無是故！神通波羅蜜，是菩薩所行道。菩薩自見善法，亦令他人得見善法，亦不著是善法。何以故？是法性皆空故。問曰：天眼可見色，云何見善法？又言見一切法性空。答曰：因中說果，以天眼見，自見己身及見十方衆生，然後用他心智、宿命智，求其今世、後世善根，是善根及果報，久皆磨滅，磨滅故見空。是善根皆是有爲法，無自性，無自性故空，空故不可著，亦不可受味，不可受味故不著。譬如蠅無處不著，唯不著火燄；衆生愛著亦如是，善不善法中皆著，乃

至非有想非無想著故，不能入涅槃，唯不能著般若波羅蜜性空火。所以者何？般若波羅蜜般若波羅蜜相空。若般若波羅蜜不空，即是味，是可著處。菩薩住是智慧中，不起有漏業，爲衆生說法，亦知衆生假名不可得；安住是無所得般若波羅蜜中，而能具足神通事。若菩薩不得是無障礙般若，則不能得無礙神通；菩薩得是無障礙空神通，飛到十方國土，利益衆生。如經中廣說：或以布施，或以持戒等；慳者爲說布施等；六波羅蜜義，如此中佛自廣說。如此中說譬喻：如鳥無翅不能飛翔，菩薩亦如是，無神通波羅蜜，不能教化衆生。菩薩以天眼見十方國土諸佛及一切衆生，以天耳力，從諸佛聞法；以如意神通力，放大光明，或現水火作種種變化，現奇特事，令衆生發希有尊重心；以他心智力故，知他心心數法。

所著、所厭、可度、不可度、是利、是鈍、是善根成就、是未成就、如是等知他衆生心、攝取善根成就者。有可度者、以宿命智、生死智、觀其本末、何所從來、種何善根、所好何行、從此終當生何所、何時當得解脫、如是籌量思惟、知可度者過去業因緣、未來世界報、復以神通力、是人應以恐怖度者、以地獄示之、汝當生此中、應以歡喜度者、示以天堂、眼見是事、心懷驚怖、歡喜、厭患世間。爾時、以漏盡神通說漏盡法、衆生聞是法、破其著心、以三乘而得涅槃。譬如白鶴欲取魚時、籌量進止、不失期會、知其可得、即便取之、終不空也。菩薩亦如是、以神通力故、觀衆生本末、應度因緣、國土、時節、知其信等諸根猛利、諸因緣具足、而爲說法、則不空也。是故說菩薩離神通、不能饒益衆生、如鳥無翅。餘神力、如佛自說、以天眼見十方衆

生生死，亦知衆生心，隨意說法；乃至善修神通力，而爲衆生受身，不爲苦樂所汙。是菩薩於衆生中，或爲父，或爲子，或爲師，或爲弟子，或爲主，或爲奴，或爲象馬，或爲乘象馬者，或時富貴力勢，或時貧賤，於此諸事，亦不爲染汙；譬如佛所化人，作一切事，不染苦樂。一切事者，如先作種種阿僧祇身度衆生。苦樂不染者，樂中不生愛心，苦中不生瞋心；不如生死衆生隨處起煩惱。菩薩應如是遊戲神通，成就衆生，淨佛國土。問曰：菩薩神通力有所作，何以名遊戲？答曰：戲名如幻師種種現變，菩薩神通種種現化，名之爲戲。復次，佛法中三三昧，空名爲上行，何以故？似如涅槃無所著，無所得故。諸餘行法，皆名爲下下，如小兒。是故說神通力，名爲遊戲，於成就衆生，淨佛土中，最爲要用。成就衆生，如是中說淨佛土共修善

根。問曰：何必要用成就衆生淨佛國土？答曰：佛自說因緣：不成就衆生淨佛國土，不能得無上道。何以故？因緣不具足，則不能得阿耨多羅三藐三菩提。因緣者，所謂一切善法，從初發意行檀波羅蜜，乃至十八不共法。於是行法中，無憶想分別；是施者，是財物，是受者，乃至十八不共法亦如是。若菩薩不著心，無所分別，行六波羅蜜，乃至十八不共法，是爲阿耨多羅三藐三菩提因緣。以是道，得阿耨多羅三藐三菩提，亦能自度，又能度衆生。問曰：菩薩若著心布施，有何等過而不名具足？著心布施，受者恩重。答曰：雖有小利而有大過，如美食雜毒，雖有美利而自喪命。問曰：何者是過？答曰：若著心布施，有不稱意事，則生恚怒；若受者不感其恩，即成怨嫌。若著心供養善人，有少凶衰，則嫌布施不應，悔惜所施；若布施

心悔，所受果報則不清淨。復次，著心布施者，深心貪著財物，若有侵奪，即便加害；自念我爲福德好事集財，汝何故侵奪？先貪財物，爲今世事，而能布施，爲後世事。愛惜轉深，以深著故，若有侵奪，能爲重罪，重罪因緣故，受三惡道苦。復次，貪著因緣故，生瞋恚，瞋恚因緣故，加刀杖，刀杖殺害，受諸苦惱。復次，人起愚癡業，大不安隱，行此虛誑不實事故，後必致大患。十方諸佛皆說無相解脫門，諸法無相相，是爲實。若人取是財物虛誑不實相，然後心著，心著故，期大果報而能施與，譬如人欲求多收故，大用穀子。如是著心布施，果報少而不淨，終歸於盡，受諸憂惱，不可稱說，皆由取相故，有如是過。若以如實相行布施，無有如是過，無量阿僧祇生死中，受諸福樂而亦不盡，乃至得阿耨多羅三藐三菩提。復次，若人以著

心行善法，是人若聞諸法畢竟空，即時捨所行法，著是空法取相，以此爲實，先者爲虛誑；是人則失二種法：失先善法，而墮邪見。著心者，有如是過；譬如重病之人，雖有衆藥，療之無損，藥復作病。著心行諸功德，有如是等過罪；菩薩捨於著心，不取空相。如如法性實際，於布施等法亦如是見，爲一切衆生迴向阿耨多羅三藐三菩提。復次，菩薩布施時，作是念：如十方三世諸佛畢竟清淨智慧，知諸法實相，亦知是布施相，我亦以是性迴向。復次，是菩薩一切五情心心數法中，不用不行，不能知諸法相故。是法皆是因緣邊生，虛誑無有自性故；我今欲知諸法實相迴向，是諸虛誑入實相中，皆無有異。我今未能得清淨實智慧故，所有分別是虛是實，以清淨智慧知之，則皆作第一義諦；入第一義諦中，皆爲清淨，無有

別異。如是布施等迴向，直至佛道。是故說：無所分別心，能行布施等，是名眞菩薩道。

釋四諦品第八十四

有本作差別品

經須菩提白佛言：「世尊，若是諸法是菩薩法，何等是佛法？佛告須菩提：『如汝所問，是諸法是菩薩法，何等是佛法者，須菩提！菩薩法亦是佛法。若知一切種，是得一切種智，斷一切煩惱習，菩薩當得是法。佛以一念相應慧，知一切法已，得阿耨多羅三藐三菩提。須菩提！是爲菩薩、佛之差別。譬如向道，得果異，是二人俱爲聖人，而有得、向之異。如是，須菩提！菩薩摩訶薩無礙道中行，是名菩薩摩訶薩。解脫道中無一切闇蔽，是爲佛。』須菩提白佛言：『世尊！若一切法自相空，自相空法中，云何有差別之異？是地獄、是餓

鬼、是畜生、是天、是人、是性地人、是八地人、是須陀洹人、是斯陀含、阿那含、阿羅漢人、是辟支佛、是菩薩、是多陀阿伽度、阿羅訶、三藐三佛陀。世尊如諸人不可得、業因緣亦不可得、果報亦不可得。佛言：「如是如是如汝所言，自相空法中，無衆生、無業因緣、無果報。須菩提衆生不知是諸法自相空，是衆生作業因緣，若善、若惡、若無動。罪業因緣故，墮三惡道中；福業因緣故，在人、天、中生；無動業因緣故，色、無色界中生。是菩薩摩訶薩行檀波羅蜜，乃至十八不共法時，盡受行是助道法，如金剛三昧得阿耨多羅三藐三菩提，得已，饒益衆生，是利常不失故，不墮六道生死中。」須菩提白佛言：「世尊！佛得阿耨多羅三藐三菩提已，得六道生死不？」佛言：「不得也！須菩提！」「世尊！得業若黑、若白、若黑白、若不黑、不白。」

不？」佛言：「不也！」世尊！若不得，云何說地獄、餓鬼、畜生、人、天、須陀洹，乃至阿羅漢、辟支佛、菩薩、諸佛？」須菩提！若衆生知諸法自相空，菩薩摩訶薩不求阿耨多羅三藐三菩提，亦不拔衆生於三惡趣，乃至往來六道生死中，須菩提！以衆生實不知諸法自性空故，不得脫六道生死。是菩薩從諸佛所，聞諸法自相空，發意求阿耨多羅三藐三菩提，須菩提！諸法不爾，如凡人所著，是衆生於無所有法中，顛倒妄想，分別得法，無衆生有衆生想，無色有色想，無受想行識，有受想行識想。乃至一切有爲法無所有，用顛倒妄想心，作身口意業因緣，往來六道生死中，不得脫。是菩薩摩訶薩行般若波羅蜜時，一切善法，內般若波羅蜜中，行菩薩道，得阿耨多羅三藐三菩提，得阿耨多羅三藐三菩提已，爲衆生說四聖諦，苦

苦集、苦滅、苦滅道。開示分別一切助道善法，皆入四聖諦中；用是助道善法，分別有三寶。何等三？佛寶、法寶、僧寶。不信拒逆是三寶故，不得離六道生死。」須菩提白佛言：「世尊！用苦聖諦得度？用苦智得度？用集聖諦得度？用集智得度？用滅聖諦得度？用滅智得度？用道聖諦得度？用道智得度？」佛告須菩提：「非苦聖諦得度，亦非苦智得度，乃至非道聖諦得度，亦非道智得度。須菩提！是四聖諦平等故，我說即是涅槃；不以苦聖諦，不以集滅道聖諦，亦不以苦智，不以集滅道智得涅槃。」須菩提白佛言：「世尊！何等是四聖諦平等相？」須菩提！若無苦、無苦智、無集、無集智、無滅、無滅智、無道、無道智，是名四聖諦平等。復次，須菩提！是四聖諦如、不異、法相、法性、法住、法位、實際，有佛無佛，法相常住，爲不誑不失故。是

菩薩摩訶薩，行般若波羅蜜時，爲通達實諦故，行般若波羅蜜。須菩提白佛言：「世尊！云何菩薩摩訶薩爲通達實諦故，行般若波羅蜜時，如通達實諦，不墮聲聞、辟支佛地，直入菩薩位中？」佛告須菩提：「若菩薩摩訶薩如實見諸法，見已得無所有法，得無所有法已，見一切法空，四聖諦所攝，四聖諦所不攝法皆空。若如是觀，是時便入菩薩位中，是爲菩薩住性地中，不從頂墮。用是頂墮故，墮聲聞、辟支佛地。是菩薩住性地中，能生四禪、四無量心、四無色定。是菩薩住是初定地中，分別一切諸法，通達四聖諦，知苦不生緣苦心，乃至知道不生緣道心，但順阿耨多羅三藐三菩提心，觀諸法如實相。」佛言：「世尊！云何觀諸法如實相？」佛言：「觀諸法空。」佛言：「世尊！何等空？」佛言：「自相空。是菩薩用如是智慧，觀一切

法空，無法性可見，住是性中得阿耨多羅三藐三菩提。何以故？無性相是阿耨多羅三藐三菩提，非諸佛所作，非辟支佛所作，亦非阿羅漢所作，亦非向道人所作，亦非得果人所作，亦非菩薩所作。但衆生不知不見諸法如實相，以是事故，菩薩摩訶薩行般若波羅蜜，以方便力故，爲是衆生說法。」

【論問曰：佛法、菩薩法，大有差別。佛是一切智，菩薩未是一切智。須菩提何故生疑而問佛，何等是諸菩薩法？何等是佛法？答曰：此中佛教菩薩如佛所行，應如是行。六波羅蜜等，乃至一切種智，是故須菩提問。若如佛行，與佛何異？佛可其意，應如是問。色等諸法行處是同，但智慧利鈍有異。此中佛自說因緣，菩薩雖如實行六波羅蜜而未能周遍，未能入一切門，是故不名爲佛。若菩薩已入一

切種智門，入諸法實相中，以一念相應智慧，得阿耨多羅三藐三菩提，斷一切煩惱習，得諸法中自在力，爾時名爲佛。如月十四日、十五日，雖同爲月，十四日不能令大海水潮，菩薩亦如是，雖有實智慧清淨，未能具足諸佛法故，不能動一切十方衆生。月十五日光明盛滿時，能令大海水潮，菩薩成佛亦如是，放大光明，能動十方國土衆生。此中佛自說譬喻：如向道得果，同爲聖人而有差別。菩薩亦如是，行者名爲菩薩，從初發心乃至金剛三昧，佛已得果，斷一切法中疑，無所不了，故名爲佛。須菩提復問：自相空法中差別不可得，所謂是地獄，乃至天，是性人，八人，是須陀洹乃至佛，世尊！如地獄等衆生不可得，業因緣亦應不可得。何以故？作業者不可得，業不可得故，果報亦不可得。佛云何說佛與菩薩有差別？佛

可須菩提意，還以所問答須菩提。衆生不知自性空法故，能起善惡業，如經中廣說。衆生者，凡夫未入正位人，是人我心顛倒，煩惱因緣故起諸業。業者有三種：身、口、意。是三種業有二種：若善、若惡，若有漏、若無漏。惡業故墮三惡趣，善業故生天人中。善業復有二種：一者、欲界繫；二者、色、無色界繫。色、無色界繫生業名不動，不動業故生色、無色界。若衆生自知諸法性空，即時不生著心，著心不生故不起業，乃至不生色、無色界。以實不知故生，以是事故，菩薩摩訶薩盡受行布施等法，乃至十八不共法，無所失，無所少，乃至用如金剛三昧，得阿耨多羅三藐三菩提，大饒益衆生。衆生得是利益故，不復往來五道生死。須菩提復問：佛得阿耨多羅三藐三菩提時，實得是六道不佛言：不得問曰：佛先說大利益故，不墮六

道，今云何言不得？答曰：決定取相邪見，墮邪見，六道生死不得；但凡夫人以顛倒因緣起業，假名有生死六道，其實如幻、如夢。復問：得黑白等四種業，不得黑業者，是不善業，果報地獄等受苦惱處；是中衆生，以大苦惱悶極，故名爲黑。受善業果報處，所謂諸天，以其受樂隨意自在明了，故名爲白業；是業是三界天。善不善業受果報處，所謂人、阿修羅等八部。此處亦受樂，亦受苦，故名白黑業。無漏業能破不善有漏業，能拔衆生令離善惡果報中。問曰：無漏業應是白，何以言非白非黑？答曰：無漏法雖清淨無垢，以空、無相、無作故，無所分別，不得言白；黑、白是相待法，此中無相待故，不得言白。復次，無漏業能滅一切諸觀，觀中分別故，有黑、白，此中無觀故，無黑、白。須菩提復問：若不得是四種業，云何分別是地

獄乃至阿羅漢。若無黑業，云何說是地獄、畜生、餓鬼？若無白業，云何說是天人？若無黑白業，云何說是阿修羅道？若無不白不黑業，云何說是須陀洹乃至阿羅漢？佛答：若一切衆生自知諸法自性空者，菩薩不發阿耨多羅三藐三菩提意，亦不於六道中拔出衆生。何以故？衆生自知諸法性空，則無所度。譬如無病則不須藥，無闇則不須燈明。須菩提！今衆生實不知自相空法故，隨心取相生著，以著故染，染故隨於五欲，隨五欲故爲貪所覆，貪因緣故慳、虛誑、嫉妬、瞋恚、鬪諍，以瞋恚故起諸罪業，無所識知。是故壽終隨業因緣生於彼處，續作生死業，常往來六道中，無復窮已。是故菩薩於諸佛及弟子所，聞說諸法空，而慈愍衆生，衆生以狂愚顛倒故生著，我當作佛，破衆生顛倒，令解諸法空相。所以者何？諸法不爾。

如凡人所著。衆生法無有定實，但自於無所有中，憶想分別，妄有所得；無衆生中起衆生想，無色中起色想，無受、想、行、識中起識想。以狂顛倒故，是能起身、口、意業，於六道生死不能得脫。若但生衆生法想，結縛猶輕，易可得度。生貪欲、瞋恚，於是中起諸重業，是爲重縛，受此業果報，則難可得度。譬如積微塵成山，難可得移動。菩薩爲是衆生故，欲破其生死因緣果報故，於般若中攝一切善法，行菩薩道，得阿耨多羅三藐三菩提，爲衆生說四聖諦，所謂苦、苦集、苦滅、苦滅道，種種因緣開示敷演。問曰：佛無量阿僧祇劫來，習微妙法，所謂十八不共法，乃至無礙解脫，諸甚深業，何以但說苦、苦集、苦滅道？答曰：衆生所畏急者，無過於苦；爲除苦已，然後示以佛道。如人重病，先以除病爲急；然後以寶物、衣服莊嚴其身。苦者受五

受衆身，是一切苦本，性即是苦；是苦略而言之，是生、老、病等，如經中處處廣說。苦集者，愛等諸煩惱；愛是心中舊法，以是故，佛說愛能生後身故是苦因，苦因即是集。若人欲捨苦，先當斷愛，愛斷苦則滅，斷愛即是苦滅。苦滅即是道，觀是五衆種種因緣，苦及苦集過罪，所謂無常、苦、空、無我，如病、如瘡、如怨、如賊等，於八聖道分中爲正見，餘七事助成發起，能斷一切法中愛，如以酒發藥。此人於一切世間無所復貪，得離苦火，然後示以妙法。復次，此中佛自說因緣：所謂於四聖諦中攝一切善法。有人言：佛何以但說苦等四法以是故？佛說一切助道善法，皆攝在四諦中。助道善法因緣故，分別有三寶。衆生不信三寶故，不得離六道生死。問曰：須菩提何以作是粗問，言爲以苦滅、以苦智滅、以集滅、集智滅？答曰：此非粗

問，今問見苦等四諦體故滅，爲用智故滅，愛等諸煩惱滅故，名有餘涅槃。若以苦諦得道，一切衆生牛羊等亦應得道。若用苦智得道，離苦則無智，離苦智不名爲苦諦，但名爲苦。苦諦、苦智和合故生，不得言但以苦滅，但以智滅，乃至道諦亦如是。佛答：不以苦諦滅，亦不以苦智滅，乃至道諦、道智亦如是。我說是四諦平等即是滅，不用苦諦滅，乃至道諦滅。何以故？是苦等四法，皆從因緣生，虛誑不實，無有自性故，不名爲實，不實故云何能滅？問曰：二諦有漏，凡夫所行法故，可是虛誑不實；道諦是無漏法，無所著，雖從因緣和合生而不虛誑，又滅諦無爲法，不從因緣有，云何言四法皆是虛誑？答曰：初得道，知二諦是虛誑，將入無餘涅槃，亦知道諦虛誑，以空空三昧等捨離道諦，如說椳喻。滅諦亦無定法，如經中說：離

有爲無無爲，因有爲故說無爲；苦滅如燈滅，不應戲論求其處所。是故佛說不以用苦，乃至用道得滅。須菩提問佛：何者是四諦平等？佛答：若無八法處，所謂四諦、四諦智，是則平等。復次，須菩提：四諦如實，不誑、不異，如法性、法相、法位、實際，若有佛無佛法相常住，不用心、心數法及諸觀，但爲不誑衆生故住。一切餘法皆顛倒，妄著顛倒果報生故，雖能與人大喜樂，久久皆虛誑變異；但有一法，所謂諸法實相，以不誑故，常住不滅。如是菩薩行般若波羅蜜，通達諸法實諦，須菩提復問：云何菩薩通達得實諦，過聲聞、辟支佛，入菩薩位？佛答：若菩薩思惟籌量求諸法，無有一法可得定相，見一切法皆空，若在四諦，若不在四諦，非四諦者，虛空、非數緣盡；餘在四諦。若觀如是法空，爾時，入菩薩位。問曰：何以不說空亦空觀。

入菩薩位。答曰：不須是說。何以故？若說諸法空即是空，空亦空；若是空不空，不名爲一切空。是故行是空，得入菩薩位。菩薩住是性地中不墮頂。性地者，所謂菩薩法位；如聲聞法中，煖法、頂法、忍法、世間第一法，名爲性地。是法隨順無漏道故，名爲性。是中住必望得道。菩薩亦如是，安住是性地中，必望作佛。能生四禪、四無量心、四無色定，是菩薩住在禪定中攝心，分別思惟籌量諸法，通達四諦，所謂知見苦，亦非緣苦生心。知苦是凡夫受身，著苦因緣故，受諸憂惱；是人身皆如賊、如怨、無常、空等。得是已，即時捨不取苦相，亦不緣苦諦。菩薩法位力故，乃至道諦亦如是；但一心迴向阿耨多羅三藐三菩提。知是四諦藥病相對，亦不著是四諦，但觀諸法如實相，不作四種分別觀。須菩提問：云何如實觀諸法？佛言：觀空。

須菩提！若菩薩能觀一切法若大若小皆空，是名如實觀。復問：用何等空？佛答：用自相空。問曰：十八空中佛何以但說自相空？答曰：是中道空。內外空等是小空，畢竟空、無所得空等是甚深空。自相空是中空。自相有理破故而心不沒，而能入甚深空中。是菩薩得如是法，觀一切法皆空，乃至不見一法有性可住，得阿耨多羅三藐三菩提。觀諸法如阿耨多羅三藐三菩提，阿耨多羅三藐三菩提亦自性空，非佛所作，非大菩薩所作，非阿羅漢、辟支佛所作，常寂滅相，無戲論語言。衆生不能知見如實相，是故菩薩行般若，以方便力，爲衆生說法。方便力者，菩薩得無生法忍，入菩薩位，通達菩薩第一義諦。觀是道相甚深微妙，無得無捨，用妙智慧不可得，何況可得口說！大悲心深念衆生，以空事故，墮三惡道，受大劇苦。

若我直說是法，則不信不受，則破壞法，墮於地獄！我今當成就一切善法，莊嚴身三十二相，引導衆生，起無量無邊諸佛神通力，得成佛道，一切衆中主，於諸法得自在。若讚惡法，衆生猶尙當受，何況實法！是菩薩如所願思，惟行爲衆生說，使皆度脫。

大智度論卷九十四

校譌

第三十二面

六行定宋
南藏作地

大智度論卷第九十五

龍 樹 菩 薩 造

姚秦三藏法師鳩摩羅什譯

釋七譬品第八十五

經作七
喻品

經須菩提白佛言：「世尊！若諸法性無所有，非佛所作，非辟支佛所作，非阿羅漢所作，非阿那含、斯陀含、須陀洹所作，非向道人、非得果人、非諸菩薩所作，云何分別有諸法異？是地獄、是畜生、是餓鬼、是人、是天，乃至是非有想、非無想天，用是業因緣故，知有生地獄者；是業因緣故，知有生畜生、餓鬼者；是業因緣故，知有生人中、生四天王天，乃至非有想、非無想天者；是業因緣故，知有得須陀洹、斯陀含、阿那含、阿羅漢、辟支佛者；是業因緣故，知是諸菩薩摩

訶薩；是業因緣故。知是多陀阿伽度、阿羅訶、三藐三佛陀、世尊！無性法中，無有業用；作業因緣故。若墮地獄、餓鬼、畜生、若生人、天，乃至生非有想非無想天，以是業因緣故，得須陀洹、斯陀含、阿那含、阿羅漢、辟支佛、菩薩摩訶薩行菩薩道，當得一切種智。得一切種智故，能拔出衆生於生死中。佛告須菩提：「如是！如是！無性法無業無果報。須菩提！凡夫人不入聖法，不知諸法無性相，顛倒愚癡故，起種種業因緣。是諸衆生隨業得身：若地獄身，若畜生身，若餓鬼身，若人身，若天身，四天王天身，乃至非有想非無想天身。是無性法，無業無果報，無性常是無性。如須菩提所言：若一切法無性，云何是須陀洹，乃至諸佛得一切種智？須菩提！於汝意云何？道是無性不？須陀洹果乃至諸佛一切種智，是無性不？」須菩提言：

「世尊！道無性，須陀洹果亦無性，乃至諸佛一切種智亦無性。」
「須菩提！無性法能得無性法不？」「不也！世尊！」佛告須菩提：「有性法能得有性法不？」「不也！世尊！」須菩提！無性法及道，是一切法，皆不合不散，無色，無形，無對，一相，所謂無相。須菩提！是菩薩摩訶薩行般若波羅蜜時，以方便力，見衆生以顛倒故，著五衆，無常中常相，苦中樂相，不淨中淨相，無我中我相，著無所有處。是菩薩以方便力故，於無所有中，拔出衆生。」須菩提白佛言：「世尊！凡夫人所著，頗有實不異不著故起業，業因緣故，五道生死中不得脫？」佛告須菩提：「凡夫人所著起業處，無如毛髮許實事，但顛倒故。須菩提！今爲汝說譬喻，智者以譬喻得解。須菩提！於汝意云何？如夢中所見人受五欲樂，有實住處不？」須菩提白佛言：「世

尊！夢尚虛妄不可得，何況住夢中受五欲樂！於汝意云何？諸法若有漏、無漏，若有爲、無爲，頗有不如夢者不？世尊！諸法若有漏、若無漏，若有爲、若無爲，無不如夢者。佛告須菩提：於汝意云何？夢中有五道生死往來不？世尊！無也。於汝意云何？夢中有修道，用是修道，若著垢，若得淨不？不也！世尊！何以故？是夢法無有實事，不可說垢、淨。於汝意云何？鏡中像有實事，能起業因緣，用是業因緣墮地獄、餓鬼、畜生中，若人、若天、四天王、天處，乃至非有想、非無想、天處不？須菩提言：不也！世尊！是像無有實事，但誑小兒，是事云何？當有業因緣，用是業因緣當墮地獄，乃至非有想、非無想處。於汝意云何？是鏡中像有修道，用是修道，若著垢，若得淨不？須菩提言：不也！世尊！何以故？是像空無實事，不可

說垢淨。「於汝意云何？如深澗中有響，是響有業因緣，用是業因緣若墮地獄，乃至若生非有想非無想處不？」須菩提言：「不也！世尊！是事空，無有實音聲，云何當有業因緣，用是業因緣墮地獄，乃至生非有想非無想處？」於汝意云何？是響頗有修道，用是修道，若著垢，若得淨不？」不也！世尊！是事無實，不可說是垢，是淨。」

「於汝意云何？如燄非水，水相，非河河相，是燄頗有業因緣，用是業因緣墮地獄，乃至生非有想非無想處不？」不也！世尊！燄中水，畢竟不可得，但誑無智人眼，云何當有業因緣，用是業墮地獄，乃至生非有想非無想處？」於汝意云何？是燄有修道，用是修道，若著垢，若得淨不？」不也！世尊！是燄無有實事，不可說垢淨。」於汝意云何？捷闍婆城，如日出時見捷闍婆城，無智人無城有城想，無

廬觀有廬觀想，無園有園想，是犍闍婆城，頗有業因緣，用是業因緣墮地獄，乃至生非有想非無想處不？「不也！世尊！是犍闍婆城，畢竟不可得，但誑愚夫眼，云何當有業因緣，用是業因緣墮地獄，乃至生非有想非無想處？」於汝意云何？是犍闍婆城有修道，用是修道，若著垢，若得淨不？「不也！世尊！是犍闍婆城，無有實事，不可說垢淨。」須菩提！於汝意云何？幻師幻作種種物，若象，若馬，若牛，若羊，若男，若女，於汝意云何？是幻有業因緣，用是業因緣墮地獄，乃至生非有想非無想處不？「不也！世尊！是幻法空，無實事，云何當有業因緣，用是業因緣墮地獄，乃至生非有想非無想處？」於汝意云何？用是幻有修道，用是修道，若著垢，若得淨不？「不也！世尊！是法無有實事，不可說垢淨。」須菩提！於汝意云何？如佛

所化人，是化人有業因緣，用是業因緣墮地獄，乃至生非有想非無想處不。「不也！世尊！是化人無有實事，云何當有業因緣，用是業因緣墮地獄，乃至生非有想非無想處？」於汝意云何？是化人有修道，用是修道，若著垢，若得淨不。「不也！世尊！是事無有實，不可說垢淨。」佛告須菩提：「於汝意云何？於是空相中，有垢者，有淨者不？」不也！世尊！是中無所有，無有著垢者，無有得淨者。「須菩提！如無有著垢者，無有得淨者，以是因緣故，亦無垢淨。何以故？住我，我所衆生有垢，有淨，實見者不垢，不淨；如實見者不垢，不淨，如是亦無有垢淨。」

論問曰：佛已處處答是事，今須菩提何以復問？答曰：義雖一，所因事異，所謂一切法，若有佛，若無佛，諸法性常住，空無所有，非賢聖

所作。般若波羅蜜甚深微妙，難解難量，不可以有量能知。諸佛賢聖憐愍衆生故，以種種語言名字譬喻爲說。利根者解聖人意，鈍根者處處生著，著於語言名字。若聞說空則著空，聞說空亦空亦復生著，若聞一切法寂滅相，語言道斷而亦復著。自心不清淨故，聞聖人法爲不清淨，如人目翳，視清淨珠，見其目影，便謂珠不淨。佛種種因緣說，見有過罪而生於疑，作是言若一切法空，空亦空，云何有分別有六道？常生如是等疑難故，須菩提以經將訖，爲衆生處處問是事，是故重問。佛可須菩提意。問曰：須菩提以有難空，佛云何可其意？答曰：佛可其說，諸法空常住，有佛無佛不異，不可其難。云何分別有六道等？何以故？以其難欲破空故。是中佛解其難，所謂凡夫人不入聖法，未得聖道，不知無所有性，不善修習。

空三昧故。顛倒者，四顛倒；愚癡者，三界繫無明。雖不說餘煩惱，而此二法虛誑不實，顛倒即是妄語虛誑；若從顛倒所生業及果報，以根本不實故，衆生雖染著，亦無定實。以是故，五道皆空，但有假名。又汝難諸賢聖，是諸賢聖以斷顛倒差別故，有異名，以顛倒不實故無所斷。又復滅失無所有，故名爲斷，若實有法可斷，尙無斷法，何況顛倒！是故一切賢聖果，皆是無所有，斷顛倒即是聖人果，果即是斷。爲果所修道，亦同無所有，是故修道時，必當用空、無相、無作、道、果分別故，賢、聖有差別；今實無所有法，不能得，無所有云何有差別？是故不應難。須菩提意：若但顛倒故有世間，若有顛倒亦應有實，虛實相待故，是故問世尊：凡夫所著，頗有實生著起業，業因緣故，六道生死不得解脫？佛答言：不！何以故？此中佛自說因

緣。但顛倒故生著，若無顛倒，云何有相待實法？乃至無毫釐許實事，畢竟無故。問曰：此是諸佛所行實義，所謂畢竟空，此非實耶？答曰：是第一義空，亦因分別凡夫顛倒故說；若無顛倒，亦無第一義。若凡夫顛倒少多有實，第一義亦應有實。問曰：若二俱不實，云何得解脫？如人手垢，還以垢洗，云何得淨？答曰：諸法實相畢竟空，第一實清淨；以有凡夫顛倒不清淨法故，有此清淨法，不可破壞，不變異故。以人於諸法實相起著，欲生煩惱，是故說是法性空，無所有，無所有故無實。雖二法皆不實，而不實中有差別。如十善、十不善二事，皆有爲法故，虛誑不實，而善、不善有差別，殺生法故墮惡道，不殺故生天上。如布施、偷盜二事，雖取相著心，是虛誑不實，而亦有差別。如衆生乃至知者、見者無所有，而惱衆生有大罪，慈悲

衆生有大福。如慈能破瞋，施能破慳，雖二事俱是不實，而能相破。是故佛說諸法，無有根本定實，如毫釐許所有。欲證明是事故，說夢中受五欲譬喻。須菩提意：若一切法畢竟空，無所有性，今何以故現有眼見、耳聞法？以是故，佛說夢譬喻。如人夢力故，雖無實事而有種種聞見、瞋處、喜處，覺人在傍，則無所見。如是，凡夫人無明顛倒力故，妄有所見，聖人覺悟，則無所見。一切法若有漏、若無漏，若有爲、若無爲，皆不實，虛妄故有見聞。又如夢中見六道生死往來，見須陀洹乃至阿羅漢，夢中無是法而夢見，夢中實無淨、無垢，業果報、六道亦如是。顛倒因緣故起業，業果報亦應空，除卻顛倒故名爲道，顛倒無實故，道亦不應實。鏡中像，響、燄乃至如化，亦是佛反問須菩提：於是法中有垢者、有淨者，不須菩提意：一切法

中無我，云何當說有垢、有淨者？是故言無。佛言：若無受垢、受淨者，垢、淨亦無。問曰：若分別諸法，阿毗曇等經中有垢、有淨，但受垢、淨者無。三毒等諸煩惱是垢，三解脫門諸助道法等是淨。答曰：雖有是說，是事不然。若無衆生，法無所屬，亦無作者；若無作者，亦無作法，無縛無解。如人爲火所燒，畏而捨離，非火離火；衆生亦如是，畏五衆苦故捨離，非苦離苦。若無垢淨者，無有解脫。復次，佛此中自說因緣：所謂我、我所法中住，衆生受垢受淨；我畢竟無故，垢淨無住處，住處無故，無垢無淨。問曰：我雖無，我見實有，凡人住此中起諸煩惱。答曰：若無我，我見無所緣，無所緣，云何得生？問曰：雖無我，於五衆中邪行謂有我，生我見，五衆是我我所。答曰：若以五衆中定生我見因緣，於他五衆中何以故不生？若於他五衆生者，則爲

大錯亂！是故我見無有定處，但顛倒故生。問曰：若顛倒生，何以故但自於己身生見？答曰：是顛倒狂錯，不應求其實事。又復於無始生死中來，自於相續五衆中生著；是故佛說住我心衆生受垢受淨。又實見者無垢無淨，若我定有實見者，應有垢淨，如實見者不垢不淨；以是因緣故，無垢無淨。無垢無淨者，見諸法實相。又於諸法實相亦不著，是故無垢；諸法實相無相可取，是故無淨。復次，八聖道中不著，是名無淨；除諸煩惱，不著顛倒，是名無垢。

釋平等品第八十六

有本作見實品

○須菩提白佛言：「世尊！見實者不垢不淨，見不實者亦不垢不淨，何以故？一切法性無所有故。世尊！無所有中無垢無淨，所有中亦無垢無淨。世尊！無所有中有所有中亦無垢無淨。世尊！云何如

實語者不垢不淨，不實語者亦不垢不淨。佛告須菩提：「是諸法平等相，我說是淨。須菩提！何等是諸法平等？所謂如、不異、不誑、法相、法性、法住、法位、實際，有佛無佛法性常住，是名淨。世諦故說，非最第一義，最第一義，過一切語言論議音聲。」須菩提白佛言：「世尊！若一切法空，不可說，如夢、如響、如燄、如影、如幻、如化，云何菩薩摩訶薩，用是如夢、如響、如燄、如影、如幻、如化法？無有根本定實，云何能發阿耨多羅三藐三菩提心？作是願：我當具足檀波羅蜜，乃至具足般若波羅蜜；我當具足神通波羅蜜，具足智波羅蜜，具足四禪、四無量心、四無色定、四念處，乃至具足八聖道分；我當具足三解脫門、八背捨、九次第定；我當具足佛十力，乃至具足十八不共法；我當具足三十二相、八十隨形好，具足諸陀鄰尼門，諸

三昧門。我當放大光明徧照十方。知諸衆生心。如應說法。」佛告須菩提：「於汝意云何？汝所說諸法，如夢、如響、如燄、如影、如幻、如化不？」須菩提言：「爾世尊！世尊！若一切法如夢、乃至如化，菩薩摩訶薩云何行般若波羅蜜？世尊！是夢、乃至如化，虛妄不實。世尊！不應用不實虛妄法，能具足檀波羅蜜，乃至十八不共法。」佛告須菩提：「如是！如是！不實虛妄法，不能具足檀波羅蜜，乃至十八不共法。行是不實虛妄法，不能得阿耨多羅三藐三菩提。須菩提！是一切法皆是憶想思惟作法，用是思惟憶想作法，不能得一切種智。須菩提！是一切法能助道法，不能益其果。所謂是諸法無生、無出、無相。菩薩從初發意已來，所作善業，若檀波羅蜜，乃至一切種智。何以故？知諸法皆如夢、乃至如化，如是等法不具足檀波羅蜜。

乃至一切種智，不能得成就衆生，淨佛國土，得阿耨多羅三藐三菩提。是菩薩摩訶薩所作善業，檀波羅蜜乃至一切種智，知如夢乃至如化，亦知一切衆生如夢中行，乃至知如化中行。是菩薩摩訶薩不取般若波羅蜜是有法，用是不取，故得一切種智，知是諸法如夢無所取，乃至諸法如化無所取。何以故？般若波羅蜜是不可取相，禪波羅蜜乃至十八不共法，是不可取相。是菩薩摩訶薩知一切法是不可取相已，發心求阿耨多羅三藐三菩提。何以故？一切法不可取相，無根本定實，如夢乃至如化，用不可取相法，不可得不可取相法。但以衆生不知不見如是諸法相，是菩薩摩訶薩爲是衆生故，求阿耨多羅三藐三菩提。是菩薩從初發意已來，所有布施，爲一切衆生故，乃至有所修習智慧，皆爲一切衆生，不

爲己身。菩薩摩訶薩不爲餘事故，求阿耨多羅三藐三菩提，但爲一切衆生故。是菩薩行般若波羅蜜時，見衆生無衆生，但衆生相中住；乃至無知者，無見者，知見相中住。令衆生遠離顛倒，遠離已，置甘露性中住；住是中者，無有妄相，所謂衆生相乃至知者、見者相。是時，菩薩動心、念心、戲論心皆捨，常行不動心、不念心、不戲論心。須菩提！以是方便力故，菩薩摩訶薩行般若波羅蜜時，自無所著，亦教一切衆生令得無所著。世諦故，非第一義。」須菩提白佛言：「世尊！世尊得阿耨多羅三藐三菩提時，得諸佛法，以世諦故，得以第一義中得？」佛言：「以世諦故說佛得是法，是法中無有法可得，是人得是法。何以故？是人得是法，是爲大有所得，用二法，無道無果。」須菩提白佛言：「世尊！若行二法，無道無果，行不二

法有道有果不？」佛言：「行二法無道無果，行不二法亦無道無果。若無二法，無不二法，即是道，即是果。何以故？用如是法得道，得果，用是法不得道，不得果，是爲戲論。諸平等法中，無有戲論，無戲論相，是諸法平等。」須菩提白佛言：「世尊！諸法無所有性，是中等是平等？」佛言：「若無有法，無有無法，亦不說諸法平等相，除平等，更無餘法離一切法平等相。平等者，若凡夫，若聖人，不能行，不能到。」須菩提白佛言：「世尊！乃至佛亦不能行，亦不能到？」佛言：「是諸法平等，一切聖人皆不能行，亦不能到。所謂諸須陀洹、斯陀含、阿那含、阿羅漢、辟支佛、諸菩薩、摩訶薩及諸佛。」須菩提白佛言：「世尊！佛者一切諸法中行力自在，云何說佛亦不能行，不能到？」佛告須菩提：「若諸法平等與佛有異，應當如是問。」

須菩提！今諸凡夫人平等，諸須陀洹、斯陀含、阿那含、阿羅漢、辟支佛、諸菩薩摩訶薩、諸佛及聖法皆平等；是一平等無二，所謂是凡夫人，是須陀洹乃至佛，是一切法平等中皆不可得。」須菩提白佛言：「世尊！若諸法平等中皆不可得，是凡夫人乃至是佛。世尊！凡夫人須陀洹乃至佛，爲無有分別？」佛告須菩提：「如是！如是！諸法平等中，無有分別，是凡夫人，是須陀洹乃至是佛。」世尊！若無分別，諸凡夫人須陀洹乃至佛，云何分別有三寶現於世，佛寶、法寶、僧寶？」佛言：「於意云何？佛寶、法寶、僧寶，與諸法等異不？」須菩提白佛言：「如我從佛所聞義，佛寶、法寶、僧寶，與諸法等無有異。世尊！是佛寶、法寶、僧寶，即是平等，是法皆不合不散，無色、無形、無對，一相，所謂無相。佛有是力，能分別無相諸法處所，是凡夫

人，是須陀洹，是斯陀含，是阿那含，是阿羅漢，是辟支佛，是菩薩摩訶薩，是諸佛。」佛告須菩提：「如是如是！諸佛得阿耨多羅三藐三菩提，不分別諸法，當知是地獄，是餓鬼，是畜生，是人，是天，是四天王天，乃至是他化自在天，是梵天，乃至是非有想非無想處，天是四念處，乃至八聖道分，是內空，乃至是無法有法空，是佛十力，乃至是十八不共法不。」須菩提言：「不知也，世尊。」以是故，須菩提當知佛有大恩力，於諸法平等中，不動而分別諸法。」須菩提白佛言：「世尊，如佛於諸法平等中不動，凡夫人亦於諸法平等中不動，須陀洹乃至辟支佛，亦於諸法平等中不動。世尊，若諸法等相，即是凡夫人相，即是須陀洹相，乃至諸佛即是平等相。世尊，今諸法各各相，所謂色相異，受、想、行、識相異，眼相異，耳、鼻、舌、身、

意相異；地相異；水、火、風、空、識相異；欲相異；瞋、癡相異；邪見相異；禪相異；無量心相異；無色定相異；四念處相異；乃至八聖道分相異；檀波羅蜜相異；乃至般若波羅蜜相異；三解脫門相異；十八空相異；佛十力相異；四無所畏相異；四無礙智相異；十八不共法相異；有爲法性異；無爲法性異；是凡夫人相異；乃至佛相異；諸法各各相；云何菩薩摩訶薩行般若波羅蜜時；諸法異相中不作分別；若不作分別；不能行般若波羅蜜；若不行般若波羅蜜；不能從一地至一地；若不從一地至一地；不能入菩薩位；不能入菩薩位故；不能過聲聞、辟支佛地；不能過聲聞、辟支佛地故；不能具足神通波羅蜜；不具足神通波羅蜜；不能具足檀波羅蜜；乃至不能具足般若波羅蜜；從一佛國至一佛國；供養諸佛；於諸佛所種善根；用是

善根能成就衆生，淨佛國土。」佛告須菩提：「如汝所問，是諸法相亦是凡夫人，亦是須陀洹乃至佛。」世尊是諸法各各相，所謂色相異，乃至有爲、無爲法相異，云何菩薩摩訶薩觀一相不作分別？」須菩提於汝意云何？是色相空不？乃至諸佛相空不？」世尊實空。」須菩提：空中各各相法可得不？所謂色相乃至諸佛相。」須菩提言：「不可得。」佛言：「以是因緣故，當知諸法平等中，非凡夫人，亦不離凡夫人，乃至非佛，亦不離佛。」須菩提白佛言：「世尊！是平等，爲是有爲法？爲是無爲法？」佛言：「非有爲法，非無爲法。何以故？離有爲法，無爲法不可得；離無爲法，有爲法不可得。須菩提！是有爲性，無爲性，是二法不合不散，無色、無形、無對，一相，所謂無相。佛亦以世諦故說，非以第一義。何以故？第一義中無身行，

無口行，無意行，亦不離身，口、意行得第一義。是諸有爲法，無爲法平等相，即是第一義。菩薩摩訶薩行般若波羅蜜時，第一義中不動，而行菩薩事，饒益衆生。」

論釋曰：須菩提思惟：佛答實見者，妄見者無異，垢淨見無故。思惟已，問佛：見實者無垢無淨，見不實者亦不垢不淨，一切法性無所有故；無所有中無垢無淨，所有中亦無垢無淨，無所有斷滅見故，不應有垢淨；所有中常見故，不應有垢淨。所有若決定是有，則不從因緣生，不從因緣生故，常故無垢無淨。須菩提白佛：實見者，不實見者，是義云何？佛答：垢淨雖無別相可說，諸法平等故，是名爲淨。若分別說垢淨相，是事不然！一切法平等故，我說名淨。佛告須菩提：諸法實相，如法性、法住、法位、實際是平等，菩薩入是等中，

心無憎愛。是法有佛無佛常住，作法皆是虛誑，是故說無作法，有佛無佛常住。聽者心即取相，著是諸法平等；如人以指指月，不知者但視其指而不視月。是故佛說：諸法平等相亦如是，皆是世諦，世諦非實，但爲成辦事故說。譬如以金買草，不知者言：何以以貴易賤？答曰：我事須用故。是平等義不可說，一切名字語言音聲悉斷，何以故？諸法平等，是無戲論寂滅相，但覺觀散心中，有語言故有所說。須菩提從佛聞諸法平等相，解其旨趣，爲諸新發意菩薩故問：世尊！若一切法空不可說，如夢乃至如化，云何菩薩於無根本法中而生心作是願？我當具足檀波羅蜜，乃至爲衆生如應說法。佛以反問答須菩提：布施等乃至陀羅尼門說法等，此諸法非如幻、如夢等耶？須菩提言：實爾！是諸法雖有利益，不出於如夢法。

須菩提復問：世尊！夢等法皆虛妄不實，菩薩爲求實法故，行般若波羅蜜得佛道，云何行不實法？不實法不能行檀波羅蜜等！佛可須菩提言：如是！如是！布施等法，皆是思惟憶想分別，作起生法，不得住如是法中成一切種智。即時衆中聽者，心生懈怠，是故佛說：是一切法，皆是助道因緣。若於是法中邪行謬錯，是名不實；若直行不謬，即是助道法。是法爲助道故，不爲果。是布施等是有爲法，道亦有爲，同相故相益；道果者，所謂諸法實，無出、無生、一相、無相、寂滅涅槃，是故於涅槃不能有益。如時雨能益草木，不益虛空；是故菩薩知是助道法及道果，從初發心來所作善法布施等，知皆是畢竟空，如夢乃至如化。問曰：若菩薩知諸法實相，何用行布施等爲？答曰：佛此中說：布施等不具足，不能成就衆生。菩薩莊嚴身，

及音聲語言，得佛神通力，以種種方便力，能引導衆生。是故菩薩爲成就衆生故，行檀波羅蜜，亦不取檀波羅蜜。若有若無相，亦不戲論如夢等諸法，直行乃至得阿耨多羅三藐三菩提。何以故？般若波羅蜜不可取相，乃至十八不共法亦不可取相；知一切不可取相已，發心求阿耨多羅三藐三菩提。作是念：一切無根本，不可取相，如夢乃至如化，以不可取法不能得，不可取相法，但以衆生不知是法故，我爲是衆生求阿耨多羅三藐三菩提。是菩薩從初發心來，所有布施，爲一切衆生，所謂布施等諸善法，爲一切衆生故修，不自爲身。此中佛自說因緣：不爲餘事故，求阿耨多羅三藐三菩提，但爲一切衆生故。所以者何？是菩薩遠離憐愍衆生心，但行般若波羅蜜，求諸法實相，或墮邪見中，是人未得一切智，所求

一切智事，心未調柔，故墮諸邊，諸法實相難得故。是故佛說：菩薩從初發心，憐愍衆生故，著心漸薄，不戲論畢竟空。若空有此過，若不空有彼過等。問曰：如餘處菩薩自利益，亦利益衆生，此中何以但說利益衆生，不說自利？自利，利人有何咎？答曰：菩薩行善道，爲一切衆生，此是實義。餘處說自利，亦利益衆生，是爲凡夫人作是說，然後能行菩薩道。入道人有下、中、上。下者，但爲自度故行善法，中者，自爲亦爲他，上者，但爲他人故行善法。問曰：是事不然！下者，但自爲身，中者，但爲衆生，上者，自利亦利他人。若但利他，不能自利，云何言上？答曰：不然！世間法爾，自供養者不得其福，自害其身而不得罪，以是故，爲自身行道，名爲下人。一切世人但自利身，不能爲他；若自爲身行道，是則折減，自爲愛著故；若能自捨己樂，但

爲一切衆生故行善法，是名上人，與一切衆生異故。若但爲衆生故行善法，衆生未成就，自利則爲具足；若自利益，又爲衆生，是爲雜行。求佛道者有三種：一者、但愛念佛故，自爲己身成佛；二者、爲己身亦爲衆生；三者、但爲衆生，是人清淨行道，破我顛倒故。是菩薩行般若波羅蜜時，無衆生乃至無知者、見者、安住是中，拔出衆生於甘露性中。甘露性者，所謂一切助道法。何以故？行是法得至涅槃，涅槃名甘露性；是甘露性中，我等妄想不復生。是菩薩自得無所著，亦令衆生得無所著，是名第一利益衆生。問曰：上說但利益衆生故行道，今何以故自得無所著，令衆生得無所著？答曰：不得已故，若自無智慧，何能利人？以是故，先自得無所著，然後教人。若是功德可得與他，如財物者，諸佛、大菩薩所有功德皆應與他。

乃至調達、怨賊皆可與之，然後更自修集功德；但是事不然，不可我作而他得。是亦世俗說，非第一義。何以故？第一義中無衆生，無一無異等分別諸法相，此中說亦無所著處。復次，如先說，不可說相是第一義，此中可說故是世俗。爾時，須菩提問：佛於道場所得法，爲用世諦故得？爲用第一義諦？須菩提意：若以世諦故得，即是虛妄不實；若以第一義故得，第一義中無得、無得者，不可說、不可受。佛答：以世俗語言故，說佛得阿耨多羅三藐三菩提，是中無得者，無有得法。何以故？若是人得是法，即是二法，二法中無道無果。二法者，是菩薩，是得阿耨多羅三藐三菩提。如是二法，皆是世諦故有。若二者，佛法何得不虛妄？若有人不得第一義，但以二法分別諸法，是則虛妄。諸佛、大菩薩得第一義故，爲度衆生，令得第一

義雖分別諸法，非是虛妄。須菩提復問：世尊！若用二法無道、無果，今以不二法故，有道、有果耶？佛答：二法無道、無果，不二法亦無道、無果。問曰：餘處說二法是凡夫法，不二法是賢聖法，如毗摩羅詰經不二入法門中說。答曰：不二是真實聖法，或有新發意菩薩，未得諸法實相，聞是不二法，取相生著，是故或稱讚不二法，或時毀訾。又佛遮二邊說中道，所謂非二、非不二。二法名各各別相，不二名一空相。以是一空相，破各各別異相，破已事訖，還捨不二相，即是道、是果。何以故？諸賢聖雖讚歎無二法，爲不著故；用是法得道、得果，用是法無道、無果，即是戲論，無戲論是平等法。須菩提白佛言：若諸法無所有性，何等是平等？佛答：若離有性、無性，假名爲平等。若菩薩不說一切法有，不說一切法性，不說一切法相等，顯

示亦不說無法，無法性，無法相等；顯示亦不說離是二邊，更有平等相。一切處不取平等相，亦不憂言無是平等，不妨行諸善法，是名諸法平等。復次，諸法平等者，所謂出過一切法。問曰：先處處說諸法即是平等相，平等即是諸法實，名異而義同。色如，非色非離色，今何以說平等出過一切法？答曰：一切法有二種：一者、色等諸法體；二者、色等法中行。凡夫邪行，賢聖正行；此中說平等於凡夫行中出，不言色等中出。復次，平等無能行，無能到。於是須菩提驚問：佛亦不能行，不能到，須菩提謂：是法雖甚深微妙難行，是事佛應當得！佛答：從須陀洹乃至佛，皆無能行，無能到。佛意：三世十方佛，不能行，不能到，何況一佛！平等性自爾故。須菩提復問：佛於一切法中行力自在，佛無礙智慧，無處不到，云何言不能行，不能到？

佛答：若佛與平等異，應有是難，何以不能行、不能到？今凡夫平等，須陀洹平等，佛平等，皆一平等，無二無分別。是凡夫乃至佛，自性不能自性中行，不能自性中到；自性應他性中行。是故佛說：若佛與平等異，佛應行平等。但佛即是平等故，不行、不到，非以智慧少故。須菩提白佛言：若平等，凡夫乃至佛，不可得異，今凡夫、聖人，不應有差別。佛可須菩提問：平等中無差別，世諦故。凡夫法中有差別。復問：若凡夫乃至佛無有差別，云何三寶現於世間，大利益衆生？佛答：平等即是法寶，法寶即是佛寶、僧寶。何以故？未得法時，不名爲佛，得平等法故，名爲佛；得是平等法故，分別有須陀洹等差別。須菩提受佛教，是法皆無合、無散、無色、無形、無對，一相，所謂無相。唯佛有是力，於空、無相中，分別是凡夫、是聖人。佛告須菩提：如

是！如是！若諸佛不分別是法，云何當知有地獄乃至十八不共法？問曰：諸佛如日出，不能令高者下，下者高，但能照明萬物，令有眼者別識；諸佛亦如是，亦不轉諸法相，但以一切智照，爲人演說令知。汝何以故言若不分別諸法，云何知有地獄乃至十八不共法？如今畜生等現目所見，人皆識知，何須佛說？答曰：佛雖不作好醜諸事，而演說示人。知有二種：一者、凡夫虛妄知；二者、如實知。畜生等相，是凡夫虛妄知；佛爲知實相故，言佛不分別諸法，云何知有地獄等。復次，諸佛法寂滅相，無戲論，此中若分別有地獄等相，不名爲寂滅，不二、無戲論法。佛雖知寂滅，不二相，亦能於寂滅相中分別諸法，而不墮戲論。離諸法實相者，雖眼見畜生等，亦不能如實知其相。如牛、角、足、尾等諸分邊和合，更有牛法生，是爲一。諸分

多牛法一，一不作多，多不作一。有人言：此說非也！除此諸分，應更有牛法力用可見；牛法衆分和合生，而牛法不異衆分。何以故？見此衆分合故，名爲見牛，更不見餘物爲牛。異者破一；一者破異；不一不異，破一異；若無一異，云何有不一不異？若入是諸法平等中，爾時始如實得牛相。是故言：若佛不分別諸法相，不說二諦，云何善說畜生等？所謂於平等不動而分別諸法。不動者，分別諸法時，不著一異相。須菩提白佛：如佛於諸法等中不動，辟支佛乃至凡夫，於諸法等中亦不動。何以故？諸佛平等相，乃至凡夫亦平等相。世尊！若爾者，佛云何分別諸法？是色異，色性異，受性異，乃至有爲無爲性異。若不分別諸法，菩薩行般若波羅蜜時，不得從一地至一地，乃至淨佛國土。佛答：於汝意云何？推尋色等相，爲是空不？世

尊！實空！空中有異法不？答言：不！何以故？是畢竟空，以無相智慧可解，是中云何有異相？佛語須菩提：若空中無異相，空便是實，是故汝云何於空中分別諸法作是難？畢竟空中，空亦不可得，各各相亦不可得，汝云何以空各各相爲難？是因緣故，當知諸法平等中，無分別故，無凡夫人。但凡夫人，非實相不離實相，凡夫實相即是聖人相，是故言不但凡夫，不離凡夫，乃至佛亦如是。須菩提以平等相大利益，欲知平等定相，是故問：爲是有爲？爲是無爲？佛答：非有爲，非無爲。何以故？若有爲，皆是虛誑作法；若無爲，無爲法無生住滅故無法，無法故不得名無爲，因有爲故有無爲。如經中說：離有爲無爲不可得；如離長無短，是相待義。問曰：有爲法は無常，無爲法是常，云何言離有爲無爲不可得？答曰：無爲法無分別故。

無相。若說常相，不得言無相。破有爲法故名無爲，更無異法。如人閉在牢獄，穿牆得出，破壁是空，更無異空，空亦不從因緣生。無爲法亦如是，有爲法中先有無爲性，破有爲即是無爲，是故說離有爲，無爲不可得。是有爲、無爲性，皆不合不散，一相。所謂無相。佛以世諦故說是事，非第一義。何以故？佛自說因緣：第一義中無身口、意行，有爲、無爲法平等，即是第一義。觀是有爲、無爲法平等，亦不著一相。菩薩於第一義中不動而利益衆生，方便力故，種種因緣爲衆生說法也。

大智度論卷第九十五

校譌

第二十六面

八行末宋南藏作來

第三十四面

四行若諸之若宋藏作是

*

若請「今版改作」是請「」

音釋

安刃於計切蔽也障也

毫釐 毫胡刀切十絲曰毫釐呂又切十毫曰釐

貿 音茂易財也

懈怠 懈音戒懶也怠音代倦也

謬錯 謬靡幼切誤謬也錯七各切差錯也

毗摩

羅詰 梵語也此云無垢稱亦云淨名毗類脂切詰梨吉切

大智度論卷第九十六

龍 樹 菩 薩 造

姚秦三藏法師鳩摩羅什譯

釋如化品第八十七

經須菩提白佛言：「世尊！若諸法平等，無所爲作，云何菩薩摩訶薩行般若波羅蜜，於平等中不動而行菩薩事，以布施、愛語、利益、同事？」佛告須菩提：「如是！如是！如汝所說，是諸法平等無所作，若是衆生自知諸法平等，佛不用神力，於諸法平等中不動而拔出衆生，吾我相，以空度五道生死，乃至知者、見者相，度色相乃至識相，眼相乃至意相，地種相乃至識種相，遠離有爲性相，令得無爲性相，無爲性相即是空。」須菩提言：「世尊！用何等空故，一切

法空。」佛言：「菩薩遠離一切法相，用是空故，一切法空。須菩提！於汝意云何？若有化人作化人，是化頗有實事不空者不？」須菩提言：「不也！世尊！是化人無有實事而不空，是空及化人二事不合不散。以空空故空，不應分別是空，是化。何以故？是二事等空中不可得，所謂是空，是化。」所以者何？須菩提！色即是化，受、想、行、識即是化，乃至一切種智即是化。」須菩提白佛言：「世尊！若世間法是化，出世間法，所謂四念處、四正勤、四如意足、五根、五力、七覺分、八聖道分、三解脫門、佛十力、四無所畏、四無礙智、十八不共法，并諸法果，及賢聖人，所謂須陀洹、斯陀含、阿那含、阿羅漢、辟支佛、菩薩摩訶薩、諸佛世尊，是法亦是化不？」佛告須菩提：「一切法皆是化。於是法中，有聲聞法變化，有辟支佛法變化，有菩薩摩訶薩

法變化，有諸佛法變化，有煩惱法變化，有業因緣法變化。以是因緣故，須菩提！一切法皆是化。」須菩提白佛言：「世尊！是諸煩惱斷，所謂須陀洹果、斯陀含果、阿那含果、阿羅漢果、辟支佛、佛道，斷諸煩惱習，皆是變化不？」佛告須菩提：「若有法生滅相者，皆是變化。」須菩提言：「世尊！何等法非變化？」佛言：「若法無生無滅，是非變化。」須菩提言：「何等是不生不滅非變化？」佛言：「無誑相涅槃，是法非變化。」世尊！如佛自說：諸法平等，非聲聞作，非辟支佛作，非諸菩薩摩訶薩作，非諸佛作，有佛無佛，諸法性常空；性空即是涅槃，云何言涅槃一法非如化？」佛告須菩提：「如是！如是！諸法平等，非聲聞所作，乃至性空即是涅槃。若新發意菩薩，聞是一切法皆畢竟性空，乃至涅槃亦皆如化，心則驚怖，爲是新

發意菩薩故，分別生滅者如化，不生滅者不如化。」須菩提白佛言：「世尊！云何教新發意菩薩，令知是性空？」佛告須菩提：「諸法本有今無耶？」

論問曰：是事佛先已答，須菩提今何以更問？所謂世尊若諸法平等，無所作爲，云何菩薩於諸法平等中不動而大利益衆生？答曰：以是事難解故，雖先說而更問；又經將訖，佛說深空，凡夫聖人不能行，所不能到。是故須菩提知一切法平等相定空，云何菩薩住是法中而能利益衆生？平等法無作相，利益是有作相。佛可須菩提意，以須菩提問而答，可其平等，答其利益衆生。所謂若衆生自知諸法平等畢竟空，佛無恩力；若病人自知將適，則藥師無功。須菩提復問：若諸法實相畢竟空，無所能作，菩薩何以住是中，而

利益衆生。若菩薩用是平等利益衆生，則壞實相。佛答：菩薩不以諸法實相利益衆生，但衆生不知畢竟空故。菩薩教詔令知。菩薩教化衆生，是爲對治悉檀。須菩提以第一義悉檀無利益爲難。佛答：衆生顛倒不知，佛但破其顛倒，不言是實。是故菩薩住是平等相中，遠離我相乃至知者、見者相，是名衆生空。以是一切無吾我法，教化衆生。衆生有二種：一者、愛多；二者、見多。愛多者，得是無我法，則生厭心離欲，作是念：若無我，何用餘物。見多者，雖知無我法，於色等法中戲論，若常、若無常等，是故次說色相。五衆、十二入、十八界，乃至遠離有爲性相，令得無爲性相。無爲性相即是空，是名法空。問曰：須菩提何以作是問，用何等空故一切法空。答曰：空有種種，如火中無水，水中無火，亦是空；五衆中無我，亦如是。或有衆

生空，或有法空。法空中，或有人言：諸法雖空，亦不盡空，如色空中有微塵根本在。是故須菩提問：以何等空故一切法空？佛答：以無所得畢竟空故，遠離一切相。是故此中說衆生空、法空，是二空故一切法無不空。問曰：若爾者，此中何以說離一切法相？答曰：一切法不可盡壞，但離其邪憶想，一切法自離；如神通人壞色相故，則石壁無礙。如佛說：汝等當於五衆中修正憶念，斷貪欲，得正解脫；是故說離相。須菩提聞是已，心驚云：何一切法若大，若小都無本實？凡夫人虛妄，可無實事，聖人應有少許實。須菩提雖是阿羅漢，深貴佛法，亦爲新發意菩薩故問。佛知須菩提意，欲明了是事，故說譬喻。反問須菩提：於汝意云何？如化人復作化，是化有本實，不空不答言：不也。是化無有實事而不空者。空及化人二事，不合不

散，皆空故。用空空故空。問曰：何以名爲空空故空？答曰：爲破十八事實故，有十八空；破衆生心中變化空法故，用空空。世間人皆知幻化，法不久住，無所能作，故名空；是故言空空故空，不應分別是空，是化。凡夫人知變化是空不實，謂餘法爲實，是故以化爲喻，當知餘法與化無異，如聖人所解，不得以化爲喻，以無所分別故。一切法名爲五衆。佛言：色、受、想、行、識，無不是化，以空故。須菩提白佛言：世尊！凡夫法虛妄應如化，出世間法亦如變化耶？所謂四念處乃至十八不共法。若四念處法等，從因緣邊生故如化，是法果所謂涅槃，亦復如化耶？若能起是行者，所謂須陀洹乃至佛，亦復如化耶？佛答：若有爲，若無爲，及諸賢聖，皆是化，畢竟空故。是義從初品已來，處處廣說，是故言一切法空皆如化。問曰：若一切法皆空

如化，何以故有種種諸法別異？答曰：如佛所化及餘人所化，雖不實而有種種形像別異；夢中所見種種亦如是，人見夢中好惡事，有生喜者，有生怖者。如鏡中像，雖無實事，而隨本形，像有好醜；諸法亦如是，雖空而各各有因緣。如佛此中說：是化法中，有聲聞變化，有辟支佛變化，有菩薩變化，有佛變化，有煩惱變化，有業變化，是故一切法皆是變化。聲聞變化者，三十七品、四聖諦，乃至三解脱門。何以故？聲聞人住持戒中，禪定攝心求涅槃，觀內外身不淨，是名身念處。如是等法，爲涅槃故勤精進生起，是法本無而今有，已有還無，是爲聲聞變化。辟支佛變化者，所謂觀十二因緣等諸法。所以者何？辟支佛智慧深於聲聞人故。菩薩變化者，所謂六波羅蜜及二種神通報得及修得。佛法變化者，三十二相、八十隨形

好十力、一切種智等無量佛法。煩惱變化者，煩惱起種種業。善、不善、無記業，畢定業、不畢定業，善、不善、無動業等無量諸業。問曰：諸煩惱是惡法，云何能生善業？無動業。答曰：有二種因：一者、近因；二者、遠因。人有我心，爲後身富樂故修布施，是近因；爲離欲界衰惱不淨身故修禪定，是爲遠因。復有人言：一切凡夫皆以我心和合故起業。有人言：無有離我心起第六識，住我心故起第六識，我心即是諸煩惱根本。問曰：煩惱是垢心，善心是淨心，垢淨不得和合，何以言住我心中能起善業？答曰：不爾，一切心皆與慧俱生，無明心中亦應有慧，慧與無明相違法而一心中起。淨垢亦如是，凡夫未得聖道，云何能得離我心而行善？瞋等煩惱中，則不得行善；我心無記柔軟故，是故煩惱心中生善業，無動業，無咎。業變化者，生

一切果報法，所謂六道：惡業果報是三惡道，善業果報是三善道。惡業有上、中、下；上者地獄，中者畜生，下者餓鬼。善業亦有上、中、下；上者天，中者人，下者阿修羅等。上善業有種種輕重等分別，上惡業亦有輕重差別。次第輕重，如地獄中說；餘道亦如分別業品中說。問曰：若從業有，何以言變化？答曰：凡夫人見諸法不如化，聖人知畢竟空相故，以天眼觀衆生，皆無有始、終、中間。如化主遠處作變化，業亦如是在過去世中，作今身變化。如變化事，能種種令人生憂喜、怖畏，智者觀之皆無有實，而人橫生憂喜，是人可笑。業亦如是，是故說業變化。問曰：是諸變化，皆業所作，何以不但說業變化？答曰：業有二種：淨業、垢業。淨業者，聲聞變化乃至佛變化；垢業是煩惱變化。復次，有二種業：凡夫業、聖人業。凡夫業是煩惱變化，

聖人業須陀洹乃至佛。是故雖皆是業變化，而廣分別，無咎。是故，須菩提！當知一切法空皆如化。須菩提復問：世尊！是諸聖人煩惱斷，所謂須陀洹果，乃至阿羅漢果、辟支佛道，斷一切煩惱習，是諸斷皆如化不？須菩提意：有爲法虛誑故如變化，無爲法真實無作故，不應是化，是故問。佛答：一切法若生若滅皆如化。何以故？本無今有，今有後無，誑惑人心故。佛意：一切從因緣生法，皆無自性，無自性故畢竟空，畢竟空故皆如化。須菩提求諸法實相，意猶未息，故問佛：何等法不如化？須菩提意謂：有一決定實法不如化，可依是法而精進。佛答：有，若法無生無滅，即是非化。何者是？所謂無誑相涅槃。是法無生故無滅，無滅故不能令人生憂。佛分別一切有爲法，畢竟空皆如化，唯有涅槃一法非如化。爾時，須菩提白佛：如

佛說平等法，非佛所作，非聲聞、辟支佛所作，有佛無佛，諸法常住，性空相。性空相即是涅槃。須菩提意謂：深入般若波羅蜜中，涅槃亦空，上品中處處說。今佛何以說唯一涅槃不如化？是故引佛語爲難。諸法實相性空法常住，諸佛但爲人演說性空者，即是涅槃。今何以於生滅法中，別說無誑相涅槃不如化？佛答：諸法平等常住，非賢聖所作。若新學菩薩聞則恐怖，是故分別說生滅者如化，不生滅者不如化。問曰：唯佛一人是無誑人，一切人皆於佛所欲求實事，今佛何以說一切法都空，或說不都空？答曰：佛此中自說因緣爲新發意菩薩故，說涅槃不如化。問曰：可爲人故轉諸法相耶？答曰：此中佛說諸法相者性空，性空云何可轉？佛初得是諸法實相時，心但趣向涅槃寂滅。是時，十方諸佛、諸天請佛莫入涅槃。

一切衆生苦惱，當度脫之！佛即受請，佛但爲度衆生故住。以是故，知有可利益衆生，隨事爲說。觀諸有爲法虛誑故，涅槃爲實，不變不異。有新發意菩薩，著是涅槃，因是著起諸煩惱，爲斷是著故，說涅槃如化。若無著心，是時，則說涅槃非如化。復次，有二道：小乘道、大乘道。小乘論議，以涅槃爲實；大乘論議，以利智慧深入故，觀色等諸法皆如涅槃，是故二說無咎。須菩提復問：云何教化新發意菩薩，令知平等性空？須菩提意謂：性空法是凡夫人大怖畏處，聞性空無所有，如臨深坑。何以故？一切未得道者，我心深著故，怖畏空法。作是念：佛教人勤修善行，終歸入無所有中，以是故，須菩提問：以何方便，教誨是新發意者？佛答：諸法先有今無耶？佛意：以新發意者，怖畏後當無故，說諸法先有今無耶？須菩提自了了知諸

法先自無，今亦無，但以新學者我見心覆，故生驚怖，爲除顛倒，令得實見，竟無所失；知諸煩惱顛倒實相，所謂性空，是時則無恐怖。如是等法，應教新發意者。若謂法先有，以行道故無，應當恐怖；初自無故，不應恐怖，但爲除顛倒耳。

釋薩陀波崙品第八十八之上

釋佛告須菩提：「菩薩摩訶薩求般若波羅蜜，當如薩陀波崙菩薩摩訶薩。是菩薩今在大雷音佛所，行菩薩道。」須菩提白佛言：「世尊！薩陀波崙菩薩，云何求般若波羅蜜？」佛言：「薩陀波崙菩薩摩訶薩，求般若波羅蜜多時，不惜身命，不求名利。於空閑林中，聞空中聲言：『汝善男子！從是東行，莫念疲極，莫念睡眠，莫念飲食，莫念晝夜，莫念寒熱，莫念內外善男子！行時莫觀左右，汝行時』

莫壞身相，莫壞色相，莫壞受、想、行、識相！何以故？若壞是諸相，則於佛法有礙；若於佛法有礙，便往來五道生死中，亦不能得般若波羅蜜。爾時，薩陀波崙菩薩報空中聲言：我當從教，何以故？我欲爲一切衆生作大明，欲集一切諸佛法，欲得阿耨多羅三藐三菩提。故薩陀波崙菩薩復聞空中聲言：善哉！善哉！善男子！汝於空、無相、無作之法，汝應生信心，以離相心求般若波羅蜜；離我相乃至離知者、見者相，當遠離惡知識，當親近供養善知識。何等是善知識？能說空、無相、無作、無生、無滅法，及一切種智，令人心入歡喜信樂，是爲善知識。善男子！汝若如是行，不久當聞般若波羅蜜。若從經卷中聞，若從菩薩所說聞。善男子！汝所從聞是般若波羅蜜處，應生心如佛想。善男子！汝當知恩，應作是念：所從聞是般若波羅蜜。

者，即是我善知識。我用聞是法故，疾得不退轉於阿耨多羅三藐三菩提，親近諸佛，常生有佛國中，遠離衆難，得具足無難處。善男子！當思惟籌量是功德，於所從聞法處，生心如佛想。汝善男子！莫以世利心故，隨逐法師，但爲愛法恭敬法故，隨逐說法菩薩。爾時，當覺知魔事！若惡魔與說法菩薩作五欲因緣，假爲法故令受；若說法菩薩入實法門，以德力故受而無所染。又以三事故受是五欲：以方便力故，欲令衆生種善根故，欲與衆生同其事故。汝於是中莫生汙心，當起淨想！自念：我未知漚和拘舍羅，大師以方便法，爲度衆生令得福德故，受是諸欲，於智慧無著無礙，不爲欲染。善男子！即當觀諸法實相！諸法實相者，所謂一切法不垢不淨。何以故？一切法自性空，無衆生、無人、無我，一切法如幻、如夢、如響、如影。

如燄、如化。善男子！觀是諸法實相已，當隨法師，汝不久當成就。般若波羅蜜。復次，善男子！汝當復覺知魔事。若說法菩薩見欲受般若波羅蜜人，意不存念，汝不應起生怨恨，汝但當以法故恭敬，莫起厭懈意，常應隨逐法師。」

【論釋】曰：上品中說新發意菩薩云何教性空法，性空法畢竟無所有空，難解難得故。佛答法先有今無耶？佛意性空法非難得難知，何以故？本來常無，更無新異，汝何以心驚謂爲難得？是性空法雖甚深，菩薩但能一心勤精進，不惜身命，作如是一心求，便可得。此中說薩陀波崙本生爲證。佛法有十二部經，或因修妬路、偈經、本生經得度，今佛以本生經爲證。若有聞者，作是念：彼人能得，我亦應得，是故說薩陀波崙菩薩本生因緣。佛告須菩提：菩薩求般若

波羅蜜，應如薩陀波崙。問曰：若般若波羅蜜無相畢竟空，行禪定猶尚難得，何況憂愁啼哭散心求覓而當可得？答曰：爲新發意菩薩說薩陀波崙。問曰：若薩陀波崙是新發意，十方諸佛云何現在其前，得諸三昧？不惜身及見曇無竭，復得無量阿僧祇三昧，云何名新發意？答曰：新學菩薩有二種：一者、深心著世間樂，輒心發意；二者、深心發意，不著世間。輒心發意者，佛不以爲發心；深心發意者，乃名爲發心。如聲聞法中佛語二比丘：於我法中，乃至無如毛釐煖法。佛觀是煖法最爲微小，凡人觀之以爲大，譬如國王見一張氎，不以爲多，貧者見之以爲多。以一心不惜身故，說薩陀波崙爲證。問曰：若薩陀波崙菩薩，能作如是苦行，從曇無竭得諸三昧，應當作佛，今何以故在大雷音佛所修菩薩行？答曰：佛法無量無

邊，若千萬阿僧祇劫，修勤苦行，尚不可得。況薩陀波崙一世苦行，復有菩薩具足菩薩道，十力、四無所畏等，爲衆生故住世間，未取實際，如文殊師利等。薩陀波崙或能如此，故未作佛。菩薩三昧，如十方國土中塵數，薩陀波崙所得六萬三昧，何足爲多！大雷音佛者，應如大龍王將欲降雨，震大雷音，鳥雀小蟲，悉皆怖畏。是佛初轉法輪時，十方衆生皆發心，外道邪見皆恐怖懾伏。是故天人衆生，稱佛爲大雷音。是佛今現在。須菩提問：薩陀波崙菩薩摩訶薩，云何求般若波羅蜜？問：薩陀波崙未得阿鞞跋致，何以故名菩薩摩訶薩？答曰：以有大菩薩故，小者亦名大。以其雖未得實智慧，而能深念般若波羅蜜故；不惜身命，有大功德故，亦名菩薩摩訶薩。問曰：何以名薩陀波崙？？薩陀_？秦言常波崙名啼。爲是父母與作名。

字是因緣名字。答曰：有人言：以其小時喜啼，故名常啼。有人言：此菩薩行大悲柔軟故，見衆生生在惡世，貧窮、老病、憂苦，爲之悲泣。是故衆人號爲薩陀波崙。有人言：是菩薩求佛道故，遠離人衆，在空閑處，求心遠離，一心思惟籌量，勤求佛道。時世無佛，是菩薩世世行慈悲心，以小因緣故，生無佛世。是人悲心於衆生，欲精進不失，是故在空閑林中。是人以先世福德因緣，及今世一心大欲大精進，以是二因緣故，聞空中教聲，不久便滅。即復心念：我云何不問！以是因緣故，憂愁啼哭，七日七夜。因是故，天龍、鬼神號曰常啼。佛答須菩提：過去世有薩陀波崙菩薩，不惜身命，不貪財利，求般若波羅蜜時，在空閑林中，聞空中聲。到空林中，如上說。問曰：空中聲爲是何聲？答曰：若諸佛、菩薩、諸天、龍王憐愍衆生故，見是人

著世間法，一心求佛道；以時無佛法，欲示其得般若因緣故，空中發聲。有人言：是薩陀波崙先世善因緣人，在此林中作鬼神，見其愁苦；以其是先世因緣故，又是神亦求佛道，以是二因緣故發聲。如蜜膊婆羅門，爲須達多至王舍城，詣大長者家求兒婦時，蜜膊於王舍城大婆羅門衆中，飲食過度，腹脹而死，作鬼神，於王舍城安門上住。須達多聞是婆羅門已死，自往長者家宿；長者於後夜起，辦具飲食。須達多問言：汝有何事，爲欲娶婦嫁女？爲欲請大國王？爲是邑會？何其忽營事！乃爾！長者答言：我欲請佛及僧。須達多聞佛名，驚喜毛豎。長者先得道跡，爲其廣說佛德；須達多聞已，愛樂情至，甚欲見佛。乘念佛心而小睡，以念佛情至故，須臾便覺；夜見月光，謂爲日出，即起趣門，見安門已開。王舍城門初夜未閉。

爲客來故；後夜早開，爲客去故。既見門開，即直向佛。佛時在寒林中住。於其中路，月沒還闔，須達心悔躊躇，欲還入城。時蜜膊神放身光明，照諸林野，告言：居士！居士莫怖莫畏，但去莫還，去得大利！如彼經偈中廣說。須達多見佛，得須陀洹道，請佛及僧於舍衛，盡形供養。佛令舍利弗爲須達師，於舍衛作精舍。如須達知識神示導，薩陀波崙知識示導亦如是。是故見其愁苦而示導之。作是言：善男子！汝從此東行，行時莫念疲極等。問曰：疲極、飢渴、火來切身，云何不念？答曰：是欲精進力故，一心愛樂佛道，不惜身命。休息、飲食等，皆是助身法。是事雖來，不爲亂心，皆虛誑無常、無實，如賊、如怨，但爲身樂故，何足存念！莫爲飢渴、疲極等故，而捨佛道！莫念晝夜者，莫念晝是行法，夜應止息。實無晝夜，所以者何？日依須彌影

翳故名夜。莫念內外者，衆生多著內法，內法名身，外法名五欲；內
外法不定，性空故不應著。莫觀左右者，人散心行道故，左右顧看；
行者無緣觀後，當前則不得不視，故但言莫左右顧看。復次，魔常
惑亂行者，或作種種形，或作好色，或作畏獸，在道左右，故言莫觀。
是皆止其粗念。莫壞身相，色等相者，五衆和合故，假名爲身；若說
別更決定有身法，是則壞身相。若著無身法，是亦壞身相。離是一
異，有無等邊，行於中道，則疾得阿耨多羅三藐三菩提，是故說莫
壞身相等。此中佛自說因緣：若壞是諸相，則於佛法有礙；佛法有
礙者，則往來五道生死中，不能得般若波羅蜜。薩陀波崙報空中
聲言，而自說因緣：所謂薩陀波崙，見一切衆生墮在無明黑闇中，
我欲爲然智慧光明；一切衆生有一切煩惱，我欲設一切佛法藥；

一切衆生皆墮邪道，我爲衆生故求無上道。是三種願，得般若波羅蜜，則能具足，是故言受教。問曰：薩陀波崙不見其形，但聞其聲，何以便言受教？答曰：人所求事急故，聞聲則應，薩陀波崙亦如是。復次，聞其所說理好，則知其人亦好故，不須眼見，如黑闇中有種種衆生，眼雖不見，聞其聲則知其種類。爾時，空中聲復讚言：善哉！以其雖不見形而能信受善語故，又復以其欲度一切衆生故，求阿耨多羅三藐三菩提，心不懈息。如是等因緣故，讚言善哉。於三解脫門中，應生信心者，是門諸法實相所入門，離是三門，皆是虛誑，無有實者。汝雖未得，應生大信根力，信根力故，漸具諸根。以離相心求般若波羅蜜者，所謂觀諸法畢竟空，離衆生相，離法相。問曰：三解脫門攝在般若中，不若攝，何以別說？若不攝，云何經中說

一切助道法，皆攝在般若中。答曰：一切法皆入般若中，人皆畏苦，故求解脫，是故於般若分中，前說三解脫門。以何因緣得此解脫？離諸二邊，所謂衆生相、法相，行般若波羅蜜。問曰：初教精進，後教三解脫門，般若今復欲爲何事故？教親近善知識。答曰：雖有好法，若無教者，行時多錯；譬如雖有好藥，亦須良醫。又薩陀波崙是新發意菩薩，般若波羅蜜甚深，云何但聞空中略教而能自具足？故教語親近善知識。善知識義，如先說，今略說二相是善知識：一者，教一心向薩婆若；二者，教空、無相、無作、無生、無滅等般若波羅蜜法。若能如是，不久得般若波羅蜜；如藥師爲病者說服藥法，汝能如法服，病則得瘥。若從經卷聞，從菩薩說聞者，遣薩陀波崙至曇無竭菩薩所，彼中二處有般若：一、寶臺上金牒書；二、曇無竭所說。

若人福德多者，從曇無竭所說聞；福德少者，從經卷聞。於師生佛想，以能教佛道因緣故。世間小人，因緣事訖，則忘其恩義。作是念：如人乘船度水，既到彼岸，何用船爲？是故說：汝當知恩！應作是念：所從聞般若者，即是我善知識。一切諸利中，般若利最勝，行是般若，疾得阿耨多羅三藐三菩提不退轉。又復行般若因緣故，親近諸佛，常生有佛國中，離於八難，值佛在世。菩薩應作是念：我得如是等諸功德，皆從般若得；般若波羅蜜從師而得，是故視師如佛想。有人能說般若波羅蜜者，有大福德，多知識，多得供養；弟子初爲般若故隨逐，後漸漸爲供養利，是故說：莫以世利故逐法師。問曰：何以不但說親近善知識，而說是種種因緣？答曰：有人既得善知識，不得其意，反成讎郟而墮地獄，更相誘毀故。唯佛一人無有

過失，餘人誰能無者？弟子見師之過，若實若虛，其心自壞，不復能得法利。是故空中聲教，若見師過，莫起嫌恨，汝應作是念：我先世福德不具足故，不得值佛，今值是雜行師，我不應念其過失，而自妨失般若！師之過失，不著於我，我但從師受般若波羅蜜法。譬如狗皮囊盛好寶物，不應以囊故而棄其寶；如罪人執燭照道，不可以人罪故，不受其明，自墜溝壑；又如行遣^{「遣」疑是「遠」字之誤}，小人導道，不可以人小故，不隨其語。如是等因緣，不應遠離於師。師若實有罪，尚不應離，何況此中魔作因緣，令說法者有深妙五欲，令弟子不染著法，說法者以方便故現受方便者，所謂欲令衆生種福德因緣，亦爲同事攝衆生故。復有諸菩薩通達諸法實相故，無所障礙，無有過罪；雖有過罪，亦無所妨。如人壯年力盛，腹中火熱，雖食不適

飲食不能生病；又如有好藥，雖被惡毒，不能為害。如是等因緣故，汝於師所，莫起嫌恨而自失般若。如經中說：復有說法者持戒清淨，離於五欲，多知多識，有好名聞，威德尊重，弟子受法而不顧錄，汝於是中莫生怨恨。當作是念：我宿世罪故，今為小人，師不輕我，我自無福，不能得近；又我於師所，應破僞慢以求法利。有如是等種種諸師，菩薩為求般若波羅蜜故，但一心恭敬，不念其長短。若能如是忍辱，於師一心不起增減者，汝於師所盡得妙法；如完牢之器，所受不漏。薩陀波崙聞空聲已，從是東行，如經中廣說。

大智度論卷第九十六

音釋

輒

乳竟切 天乃管切 柔輒也 天溫也

懾

之涉切 失氣也 又服也

蜜膊

梵語也 婆羅門名 膊補各切

脹

知亮切 脹滿也

讎

讎除留切 仇讎也 郅綺戟切 怨隙也

大智度論卷第九十七

龍 樹 菩 薩 造

姚秦三藏法師鳩摩羅什譯

釋薩陀波崙品第八十八之中

爾時，薩陀波崙菩薩，受是空中教已，從是東行。不久，復作是念：我云何不問空中聲？我當何處去？去當遠近？當從誰聞般若波羅蜜？是時即住，啼哭憂愁，作是念：我住是中，過一日一夜，若二、三、四、五、六、七日七夜，於此中住，不念疲極，乃至不念飢渴、寒熱，不聞聽受般若波羅蜜因緣，終不起也！須菩提！譬如人有一子卒死，憂愁苦毒，唯懷懊惱，不生餘念。如是，須菩提！薩陀波崙菩薩，爾時，無有異心，但念我何時當得聞般若波羅蜜？我云何不問空中聲？我應

何處去？去當遠近？當從誰聞？般若波羅蜜？須菩提！薩陀波崙菩薩如是愁念時，空中有佛，語薩陀波崙菩薩言：善哉！善哉！善男子！過去諸佛行菩薩道時，求般若波羅蜜，亦如汝今日。善男子！汝以是勤精進愛樂法故，從是東行，去此五百由旬，有城名衆香。其城七重，七寶莊嚴，臺觀欄楯，皆以七寶校飾；七寶之壑，七寶行樹，周匝七重。其城縱廣十二由旬，豐樂安靜，人民熾盛。五百市里，街巷相當，端嚴如畫，橋津如地，寬博清淨。七重城上，皆有七寶樓櫓，寶樹行列，以黃金、白銀、硨磲、碼瑙、珊瑚、瑠璃、玻瓈、紅色真珠，以爲枝葉。寶繩連綿，金爲鈴網，以覆城上，風吹鈴聲，其音和雅，娛樂衆生；譬如巧作五樂，甚可悅喜，金網寶鈴，其音如是。其城四邊，流池清淨，冷暖調適，中有諸船，七寶嚴飾；是諸衆生宿業所致，乘此寶船，娛

樂遊戲。諸池水中種種蓮華，青、黃、赤、白，衆雜好華，遍覆水上；是三
千大千世界所有衆華，皆在其中。其城四邊，有五百園觀，七寶莊
嚴，甚可愛樂；一一園中，各有五百池，池各縱廣十里，皆以七寶校
成，雜色莊嚴。諸池水中，亦有青、黃、赤、白蓮華，彌覆水上；其諸蓮華
大如車輪，青色、青光、黃色、黃光、赤色、赤光、白色、白光。諸池水中，鳧
鴈、鴛鴦，異類衆鳥，音聲相和。是諸園觀，適無所屬，是諸衆生，宿業
所致。長夜信樂深法，行般若波羅蜜，因緣故，受是果報。善男子，是
衆香城中，有大高臺，曇無竭菩薩摩訶薩宮舍在上。其宮縱廣一
由旬，皆以七寶校成，雜色莊嚴，甚可喜樂。垣牆七重，皆亦七寶；七
重欄楯，七寶樓閣，寶塹七重，皆亦七寶；周圍深塹，七寶壘成。七重
行樹，七寶枝葉，七重圍繞。其宮舍中，有四種娛樂園：一名常喜，二

名離憂，三名華飾，四名香飾。一一園中各有八池：一名賢，二名賢上，三名歡喜，四名喜上，五名安隱，六名多安隱，七名遠離，八名阿鞞跋致。諸池四邊，面各一寶：黃金、白銀、瑠璃、玻瓈；玫瑰爲池底，其上布金沙。一一池側有八梯陞，種種妙寶以爲嚴飾。諸梯陞間，有閻浮檀金芭蕉行樹。一切池中種種蓮華，青、黃、赤、白，彌覆水上。諸池四邊，生好華樹，風吹諸華，墮池水中。其池成就八種功德：香、若梅、檀、色、味、具足、輕且柔軟。曇無竭菩薩與六萬八千綵女，五欲具足，共相娛樂。及城中男女，俱入常喜等園。賢等池中，五欲具足，共相娛樂。善男子！曇無竭菩薩與諸綵女，遊戲娛樂已，日三時說般若波羅蜜。衆香城內男女大小，於其城中多聚人處，敷大法座。其座四足，或以黃金，或以白銀，或以瑠璃，或以玻瓈，敷以宛筵，雜色。

茵褥，垂諸幃帶，以妙白氈而覆其上，散以種種雜妙華香，座高五里，張白珠帳。其地四邊，散五色華，燒衆名香，澤香塗地，供養恭敬。般若波羅蜜故。曇無竭菩薩於此座上說般若波羅蜜，彼諸人衆，如是恭敬供養，曇無竭爲聞般若波羅蜜故。於是大會百千萬衆，諸天、世人，一處和集中有聽者，中有受者，中有持者，中有誦者，中有書者，中有正觀者，中有如說行者。是時衆生以是因緣故，皆不墮惡道，不退轉於阿耨多羅三藐三菩提。汝善男子，往趣曇無竭菩薩，當聞般若波羅蜜。善男子，曇無竭菩薩，世世是汝善知識，能教汝阿耨多羅三藐三菩提，示教利喜。是曇無竭菩薩本求般若波羅蜜時，亦如汝今。汝去莫計晝夜，莫生障礙心，汝不久當得聞般若波羅蜜。爾時，薩陀波崙菩薩摩訶薩，歡喜心悅，作是念：我當

何時得見是善男子，得聞般若波羅蜜？須菩提！譬如有人爲毒箭所中，更無餘念，唯念何時當得良醫，拔出毒箭，除我此苦。如是，須菩提！薩陀波崙菩薩摩訶薩，更無餘念，但作是願：我何時當得見曇無竭菩薩，令我得聞般若波羅蜜。我聞是般若波羅蜜，斷諸有心。

是時，薩陀波崙菩薩於是處住，念曇無竭菩薩，一切法中得無礙知見，即得無量三昧門。現在前，所謂諸法性觀三昧，諸法性不可得三昧，破諸法無明三昧，諸法不異三昧，諸法不壞自在三昧，諸法能照明三昧，諸法離闇三昧，諸法無異相續三昧，諸法不可得三昧，散華三昧，諸法無我三昧，如幻威勢三昧，得如鏡像三昧，得一切衆生語言三昧，一切衆生歡喜三昧，入分別音聲三昧，得種

種語言字句莊嚴三昧，無畏三昧，性常默然三昧，得無礙解脫三昧，離塵垢三昧，名字語句莊嚴三昧，見諸法三昧，諸法無礙頂三昧，如虛空三昧，如金剛三昧，不畏著色三昧，得勝三昧，轉眼三昧，畢法性三昧，能與安隱三昧，師子吼三昧，勝一切衆生三昧，華莊嚴三昧，斷疑三昧，隨一切堅固三昧，出諸法得神通力無畏三昧，能達諸法三昧，諸法財印三昧，諸法無分別見三昧，離諸見三昧，離一切闇三昧，離一切相三昧，解脫一切著三昧，除一切懈怠三昧，得深法明三昧，不可奪三昧，破魔三昧，不著三界三昧，起光明三昧，見諸佛三昧。如是，薩陀波崙菩薩住是諸三昧中，即見十方無量阿僧祇諸佛爲諸菩薩摩訶薩說般若波羅蜜。

論問曰：薩陀波崙何以忘不問空中聲？答曰：薩陀波崙大歡喜覆

心故忘；如人大憂愁，大歡喜，以此二事故忘。問曰：空中聲已滅，何以住此七日，不更求問處？答曰：如本於空閑處，一心求般若故，空中有聲，今亦欲一心如本，冀更聞聲，斷其所疑。復次，薩陀波崙於世樂已捨，深入佛道，愛樂情至，空中聲告，少爲開示，竟未斷疑，其聲便滅。如小兒得少美味，著味故復啼泣而欲得之；薩陀波崙亦如是，得般若波羅蜜因緣味，不能通達，不知那去，是故住而啼泣。問曰：何以乃至七日，佛身乃現？答曰：譬如人大渴故，乃知水美；若二日、三日精進欲未深，若過七日，恐其憂愁妨心，不任求道，是故七日憂愁，如譬喻經中說。問曰：薩陀波崙何以愁憂乃爾，如喪愛子？答曰：般若波羅蜜，於諸法中第一實，是十方諸佛眞實法寶。薩陀波崙得少氣味，未具足故，憂愁如喪愛子，念其長大多所成辦，

冀得其力；菩薩亦如是，念增益般若波羅蜜力，得阿鞞跋致已，成佛事。如子於父，孝行終身，無有異心；般若波羅蜜於菩薩亦如是，若能得入，乃至成佛，終不遠離。如父見子，心即歡悅，菩薩雖得種種諸法，不如見般若波羅蜜之歡喜。如子假爲其名，般若波羅蜜亦如是，空無定實，但有假名。如是等，是總相因緣。父雖愛子，不能以頭目與之；菩薩爲般若波羅蜜故，無量世中，以頭目髓腦施與衆生。子之於父，或不能報恩，若能報恩，正可現世小利，衣食歡樂等；菩薩於般若波羅蜜中，無所不得，乃至一切智慧，何況菩薩力勢，世間富樂！子之報父，恩極一世；般若之益，至無量世，乃至成佛子之於父，或好或惡；般若波羅蜜無諸不可。子但是假名，虛誑不實之法；般若波羅蜜真實聖法，無有虛誑。子之報恩，雖得現世小

樂而有憂愁苦惱無量之苦。般若波羅蜜但得歡喜實樂，乃至佛樂。子但能以供養利益於父，不能免其生老病死。般若波羅蜜令菩薩畢竟清淨，無復老病死患。子但能令父得世樂自在，般若波羅蜜能令菩薩於一切世間爲天人主。如是等種種因緣譬喻差別相。世人知喪子憂愁故，以此爲喻。問曰：空中佛現，是何等佛？何以但有音聲而令現身？佛既現身，何以不即度，方遣至曇無竭所？答曰：有人言：非眞佛，但是像現耳。或諸佛遣化，或大菩薩現作。以先善根福德未成就故，但聞聲。今七日七夜一心念佛，功德成就故，得見佛身。佛所以不即度者，以其與曇無竭世世因緣，應當從彼度故。有人應從舍利弗度，假使諸佛現身，不能令悟。佛讚言：善哉者，以薩陀波崙至意求知去處，聞般若因緣故，佛現身而讚。

善哉。過去諸佛行菩薩道時，求此般若，亦如是種種勤苦，以初發心，先罪厚重，福德未集故。佛安慰其心：汝求般若波羅蜜，雖勤苦，莫懈怠，莫生退沒心！一切衆生行果，因時皆苦，受果時樂。當思惟諸佛無量功德果報，以自勤勉。如是安慰已，作是言：汝從是東行，去此五百由旬，有城名衆香，乃至不久當聞般若波羅蜜。問曰：衆香城在何處？答曰：過去佛滅度後，但有遺法，是法不周遍。閻浮提衆生有聞法因緣處則到。爾時衆香國土豐樂，多出七寶故，以七寶作城。時薩陀波崙雖同在閻浮提，而在無佛法，無七寶處生，但傳聞佛名，般若波羅蜜是佛道。是人先世廣積福德，煩惱輕微故，聞即信樂，厭惡世樂，捨其親屬，到空林中住，欲至有佛法國土。音聲示語者，恐其異去，不得到曇無竭菩薩所，是故語之。次後佛爲

現身示其去處。問曰：薩陀波崙因緣已具聞於上，今曇無竭因緣爲云何？答曰：鬱伽陀，秦言盛達磨，秦言法。此菩薩在衆香城中，爲衆生隨意說法，令衆生廣種善根，故號法盛。其國無王，此中人民皆無吾我，如鬱單越人，唯以曇無竭菩薩爲主。其國難到，薩陀波崙不惜身命，又得諸佛菩薩接助，能到大菩薩爲度衆生故，生如是國中，衆生無所乏短，其心調柔，易可得度。故問曰：曇無竭菩薩爲是生身？爲是爲度衆生故？以神通力化作此身？若化身者，何用六萬綵女，園觀浴池，種種莊嚴而自娛樂？若是生身，云何能令薩陀波崙供養具，皆在空中化成大臺，入諸三昧，乃經七歲？答曰：有人言：是生身，菩薩得諸法實相，及禪定神通力故，欲度是城中衆生。如餘菩薩利根故，能入禪定，亦能入欲界法，爲攝衆生故，受五

欲而不失禪定；如人避熱故，在泥中臥，起還洗則如故。凡人鈍根故，不能如是。是故以神通力化作華臺，七歲入定；又以方便力故，能受五欲，如先義說。菩薩不但行一道，爲衆生故，行種種道引導之。如龍起雲，能降大雨、雷電、霹靂；菩薩亦如是，雖是生身，未離煩惱，而能修行善法，爲衆生故不盡結使。有人言：是菩薩是法性生身，爲度衆香城人故，變化而度。若是生身，云何能令十方佛稱讚，而遣薩陀波崙令從受法，得六萬三昧？是故知是大菩薩變化身。譬如大海中龍死相出時，如果熟應墮，金翅鳥則來食之；衆生亦如是，行業因緣熟故，大菩薩來度之。爾時，薩陀波崙聞空中佛教，大歡喜，大欲心生；我何時當得見曇無竭菩薩，說般若波羅蜜者，能令心中愛見等諸煩惱箭出。欲明是事故，此中佛說毒箭譬喻。

如人毒箭在身，更無餘念；一者、苦痛急；二者、毒不疾出，則遍滿身中而失命。薩陀波崙亦如是，諸邪疑等箭入心，貪欲等毒塗箭。聞曇無竭菩薩能拔出此箭，見人以邪見箭毒傷心，又畏貪欲等毒遍入身中，奪智慧命，與凡人同死，是故急欲見曇無竭菩薩，無復餘念。此中說斷諸所有心，所有心者，取相著，乃至善法中亦有是病。薩陀波崙目覩佛身，前所未見，從佛聞教，得法喜故，離五欲喜，即得一切法中無礙知見。無礙知見者，如薩陀波崙力所得無礙，非佛無礙。

是時，得入諸三昧門。諸法性觀三昧者，能觀一切諸法實性。實性者，如先種種因緣說。諸法性不可得三昧者，初得三昧，所謂空、無生、無滅，今得是三昧，得不著是性，不謂得其決定相。破諸法無明

三昧者，諸法於凡夫人心中，以無明因緣故，邪曲不正，所謂常樂我淨，得是三昧故，常等顛倒相應無明破，但觀一切法無常空，無我。問曰：若是菩薩破一切法中無明，此人尚不須見佛，何用至曇無竭菩薩所？答曰：破無明不唯一種，有遮令不起，亦名爲破；有得諸法實相故破無明。又無明種數甚多，有菩薩所破分，有佛所破分，有小菩薩所破分，大菩薩所破分，如先說燈譬喻。又須陀洹亦名破無明，乃至阿羅漢方是實破，大乘法中亦如是。新發意菩薩得諸法實相故，亦名破無明，乃至佛無明盡破無餘。是故薩陀波崙於佛法中邪見無明，及我見皆盡故，得名破無明三昧，無咎。諸法不異三昧者，得是三昧，觀一切法一相，所謂無相。諸法不壞自在三昧者，得是三昧，觀一切法如法性實際，無爲相故名不壞。得

是法已得自在了了知諸法爲佛道故不證是法。諸法能照明三昧者以總相別相知一切法。諸法離闇三昧者無明有二種：一者厚；二者薄。薄者名無明，厚者名黑闇。破厚無明故名離闇；先破薄無明故名破諸法無明。諸法無異相續三昧者，五衆念念滅，相似相續生，死時相續生而不相似。得是三昧，知諸法念念相續法不異。諸法不可得三昧者，即是一切法空相應三昧。散華三昧者，得是三昧者，於十方佛前能以七寶華散佛。諸法無我三昧者，觀一切法無我。如幻威勢三昧者，得是三昧者，能種種變化身。如大幻師能引導衆生發希有心；如大幻師以幻力故能轉一國人心。得如鏡像三昧者，得是三昧者，觀三界所有如鏡中像，虛誑無實。得一切衆生語言三昧者，得如是三昧故能解一切衆生語言。一切

衆生歡喜三昧者，入是三昧，能轉衆生瞋心令歡喜。入分別音聲三昧者，入是三昧中，皆能分別一切天人音聲大小粗細等。得種種語言字句莊嚴三昧者，得是三昧者，義理雖淺，能莊嚴字句語言，令人歡喜，何況深義！無畏三昧者，得是三昧者，不畏一切魔民、外道論師及諸煩惱。性常默然三昧者，入是三昧者，常默然攝心爲度衆生故，隨所應聞而出音聲，如天伎樂，應意而出，得無礙解脫三昧者，得是三昧者，於一切法中得無礙智慧。離塵垢三昧者，得是三昧者，諸煩惱結使塵垢皆滅，即是無生法忍三昧。名字語句莊嚴三昧者，得是三昧者，能種種莊嚴偈句語言說法。見諸法三昧者，入是三昧者，以見世諦及第一義，知諸法。諸法無礙頂三昧者，如人在山頂，遍觀四方，菩薩住是三昧中，普見一切諸法無

礙。如虛空三昧者，入是三昧者，身及外法，皆如虛空，皆得自在。如金剛三昧者，如金剛能破諸山，是三昧亦如是，能破障礙六波羅蜜法，直至佛道。不畏著色三昧者，得是三昧，乃至天色尚不著，何況餘色！得勝三昧者，欲有所作，皆能得勝不負。轉眼三昧者，得是三昧者，魔及魔民欲見菩薩短者，轉之令作好見。畢法性三昧者，得是三昧者，見一切法畢入法性中，能與安隱三昧者，得是三昧，雖往來六道迴轉，自知必當作佛，安樂無憂。師子吼三昧者，入是三昧者，皆能降伏一切魔民、外道，無敢當者。勝一切衆生三昧者，得是三昧，於一切衆生最勝。一切有二種：一者、名字一切；二者、實一切。於三界著心凡夫，及聲聞、辟支佛，及初發意，未得是三昧者，中勝故，言一切。華莊嚴三昧者，得是三昧者，見十方佛，坐七寶蓮

華上，於虛空中，雨寶蓮華於諸佛上。斷疑三昧者，雖未得佛，能斷一切衆生所疑。隨一切堅固三昧者，諸法實相名堅固，得是三昧者，隨諸法實相，不隨餘法。出諸法得神通力，無畏三昧者，得是三昧者，過出一切凡夫法，得菩薩六神通、十力、四無所畏。能達諸法三昧者，得是三昧者，乃至諸法如法性、實際中，通達不住，乃至諸法平等。諸法財印三昧者，財名善法，印名相，如人得印綬，無敢凌易。菩薩得法財印，亦無能爲作留難者。諸法無分別見三昧者，若分別諸法，即生憎愛心，得是三昧者，見一切法不作分別。離諸見三昧者，六十二邪見及色等法中取相，乃至佛見、法見、僧見、涅槃見，皆名爲見。所以者何？取相能生著心故。離一切相三昧者，即是無相解脫門相應三昧。離一切著三昧者，離一切相故，於一切法

亦不著。除一切懈怠三昧者，得是三昧者，如此中說乃至七歲不坐不臥。菩薩得是三昧，常無懈怠心，乃至得佛，初不止息。得深法明三昧者，法明謂佛法一切智慧等，菩薩得是三昧故，能遙見佛法，思惟籌量，知深妙無比。不可奪三昧者，得是三昧者，行菩薩法，無能奪其志者。破魔三昧者，得是三昧力，魔雖是欲界主，菩薩以人身能破魔事。不著三界三昧者，得是三昧，身雖在三界中，心常在涅槃故不著。起光明三昧者，得是三昧者，能放無量光明，照於十方。見諸佛三昧者，得是三昧，雖未得天眼、天耳，而能見十方諸佛，聞十方諸佛所說法，諮問所疑。薩陀波崙住如是等三昧中，即見十方無量阿僧祇諸佛在大眾中爲諸菩薩說般若波羅蜜。

大智度論卷九十七

校譌

第十七面

第十行知
南藏作如

意釋

漚

七覽切邊
城水也

鳧

音扶野
鷺也

壘

力軌切
猶壘也

阿鞞跋致

梵語也此云不退轉
鞞蒲糜切跋蒲末切

玫瑰

玫瑰火齊珠也

梯陛

梯

奚切木階也陛部
禮切升堂之階也

統

於阮切

翅

齊誠切
鳥翼也

綬

承呪切佩
印之組也

大智度論卷九十七
釋薩陀波闍品第八十八之中

三二

大智度論卷第九十八

龍 樹 菩 薩 造

姚秦三藏法師鳩摩羅什譯

釋薩陀波崙品第八十八之下

釋是時，十方諸佛安慰薩陀波崙菩薩言：「善哉！善哉！善男子！我等本行菩薩道時，求般若波羅蜜，得是諸三昧，亦如汝今所得。我等得是諸三昧，善入般若波羅蜜，成就方便力，住阿鞞跋致地。我等觀是諸三昧性，不見有法出三昧入三昧者，亦不見行佛道者，亦不見得阿耨多羅三藐三菩提者。善男子！是名般若波羅蜜，所謂不念有是諸法。善男子！我等於無所念法中住，得是金色身，丈光明，三十二相，八十隨形好，不可思議智慧，無上戒，無上三昧，無

上智慧，一切功德皆悉具足。一切功德具足故，佛尚不能取相說盡，何況聲聞、辟支佛及諸餘人！以是故，善男子！於是佛法中，倍應恭敬愛念，生清淨心，於善知識中，應生如佛想，何以故？爲善知識守護故，菩薩疾得阿耨多羅三藐三菩提。是時，薩陀波崙菩薩白十方諸佛言：「何等是我善知識，所應親近供養者？」十方諸佛告薩陀波崙菩薩言：「汝善男子！曇無竭菩薩，世世教化成就，汝阿耨多羅三藐三菩提，曇無竭菩薩守護汝，教汝般若波羅蜜方便力，是汝善知識。汝供養曇無竭菩薩，若一劫，若二，若三，乃至過百劫，頂戴恭敬，以一切樂具，三千世界中所有妙色、聲、香、味、觸，盡以供養，未能報須臾之恩，何以故？曇無竭菩薩摩訶薩因緣故，令汝得如是等諸三昧，得般若波羅蜜方便力。」諸佛如是教化。

安慰薩陀波崙菩薩，令歡喜已，忽然不現。

是時，薩陀波崙菩薩從三昧起，不復見佛，作是念：「是諸佛從何所來？去至何所？」不見諸佛故，復惆悵不樂，誰斷我疑？復作是念：「曇無竭菩薩久遠已來，常行般若波羅蜜，得方便力，及得諸陀羅尼，於菩薩法中得自在。多供養過去諸佛，世世爲我師，常利益我，我當問曇無竭菩薩，諸佛從何所來？去至何處？」爾時，薩陀波崙菩薩於曇無竭菩薩生恭敬愛樂尊重心，作是念：「我當以何供養曇無竭菩薩？今我貧窮，華香、瓔珞、燒香、塗香、衣服、幡蓋、金銀、真珠、瑠璃、玻瓈、珊瑚、琥珀，無有如是等物，可以供養般若波羅蜜，及說法師曇無竭菩薩。我法不應空往曇無竭菩薩所，我若空往，喜悅心不生；我當賣身得財，爲般若波羅蜜故，供養法師曇無竭

菩薩何以故。我世世喪身無數，無始生死中，或死或賣，或爲欲因緣故，世世在地獄中受無量苦惱，未曾爲清淨法故，爲供養說法師故喪身。」是時，薩陀波崙菩薩，中道入一大城，至市肆上，高聲唱言：「誰欲須人？誰欲須人？誰欲買人？」爾時，惡魔作是念：「是薩陀波崙愛法故，欲自賣身，爲般若波羅蜜故，供養曇無竭菩薩，當得正問般若波羅蜜及方便力，云何菩薩摩訶薩行般若波羅蜜，疾得阿耨多羅三藐三菩提。當得多聞具足，如大海水，是時不可沮壞，得具足一切功德，饒益諸菩薩摩訶薩，爲阿耨多羅三藐三菩提故，過我境界，亦教餘人出我境界，得阿耨多羅三藐三菩提。我今當壞其事！」爾時，惡魔蔽諸婆羅門、居士，令不聞其自賣聲，除一長者女，魔不能蔽，以其宿因緣故。爾時，薩陀波崙賣身不

售，憂愁啼哭，在一面立。啼泣而言：「我爲大罪，賣身不售！我自賣身，爲般若波羅蜜故，供養曇無竭菩薩。」

爾時，釋提桓因作是念：「是薩陀波崙菩薩，愛法自賣其身，爲般若波羅蜜故，欲供養曇無竭菩薩。我當試之，知是善男子實以深心愛法故，捨是身不？」

是時，釋提桓因化作婆羅門身，在薩陀波崙菩薩邊行。問言：「汝善男子，何以憂愁啼哭，顏色憔悴，在一面立？」

答言：「婆羅門！我愛敬法，自賣身爲般若波羅蜜故，欲供養曇無竭菩薩。今我賣身無有買者，自念薄福，無財寶物，欲自賣身，供養般若波羅蜜及曇無竭菩薩，而無買者！」

爾時，婆羅門語薩陀波崙菩薩言：「善男子，我不須人，我今欲祠天，當須人心、人血、人髓，汝能賣與我不？」

爾時，薩陀波崙菩薩作是念：「我得大利，得

第一利！我今便爲具足般若波羅蜜方便力，得是買心血髓者。是時，心大歡喜，悅樂無憂，以柔和心，語婆羅門言：「汝所須者，我盡與汝。」婆羅門言：「善男子，汝須何價？」答言：「隨汝意與我。」即時，薩陀波崙右手執利刀，刺左臂出血，割右髀肉，復欲破骨出髓。時有一長者女，在閣上遙見薩陀波崙菩薩，自割身體，不惜壽命，作是念：「是善男子，何因緣故，困苦其身？我當往問。」長者女即下閣，到薩陀波崙所，問言：「善男子，何因緣困苦其身？用是心血髓，作何等？」薩陀波崙答言：「賣與婆羅門，爲般若波羅蜜故，供養曇無竭菩薩。」長者女言：「善男子，作是賣身，欲自出心血髓，欲供養曇無竭菩薩，得何等功德利？」薩陀波崙答言：「善女人，是人善學般若波羅蜜及方便力，是人當爲我說菩薩所應作。」

菩薩所行道。我學是法，學是道，得阿耨多羅三藐三菩提時，爲衆生作依止。當得金色身，三十二相，八十隨形好，丈光無量明，大慈大悲，大喜大捨，四無所畏，佛十力，四無礙智，十八不共法，六神通，不可思議清淨戒，禪定智慧，得阿耨多羅三藐三菩提，於諸法中得無礙一切知見，以無上法寶，分布與一切衆生。如是等諸功德，我當從彼得之。」是時，長者女聞是上妙佛法，大歡喜，心驚毛豎，讚薩陀波崙菩薩言：「善男子，甚希有！汝所說者，微妙難值。爲是一一法故，應捨如恆河沙等身。何以故？汝所說者，甚大微妙。汝善男子，汝今所須，盡當相與，金銀、眞珠、瑠璃、玻瓈、琥珀、珊瑚等諸珍寶物，及華香、瓔珞、塗香、燒香、幡蓋、衣服、伎樂等供養之具，供養般若波羅蜜及曇無竭菩薩。汝善男子，莫自困苦其身，我亦欲往。」

曇無竭菩薩所，共汝植諸善根，爲得如是微妙法，如汝所說故。」
爾時，釋提桓因即復本身，讚薩陀波崙菩薩言：「善哉！善哉！善男子！汝堅受是事，其心不動。諸過去佛行菩薩道時，亦如是求般若波羅蜜及方便力，得阿耨多羅三藐三菩提。善男子！我實不用人心、血、髓，但來相試，汝願何等，我當相與！」薩陀波崙言：「與我阿耨多羅三藐三菩提！」釋提桓因言：「此非我力所辦，是諸佛境界，必相供養，更索餘願。」薩陀波崙言：「汝若於此無力，汝必見供養，令我是身平復如故！」是時，薩陀波崙身即平復，無有瘡癥，如本不異。釋提桓因與其願已，忽然不現。
爾時，長者女語薩陀波崙菩薩言：「善男子！來到我舍，有所須者，從我父母索之，盡當相與。我亦當辭我父母，與諸侍從，共汝往供

養曇無竭菩薩，爲求法故。」即時，薩陀波崙菩薩與長者女俱到其舍，在門外住。長者女入白父母：「與我衆妙華香及諸瓔珞、塗香、燒香、幡蓋、衣服、金銀、瑠璃、玻瓈、真珠、珊瑚、琥珀，及諸伎樂供養之具，亦聽我身，及五百侍女先所給使，共薩陀波崙菩薩到曇無竭菩薩所，爲供養般若波羅蜜故。曇無竭菩薩當爲我等說法，我當如說行，當得諸佛法。」女父母語女言：「薩陀波崙菩薩，是何等人？」女言：「是人今在門外，是善男子以深心求阿耨多羅三藐三菩提，欲度一切衆生無量生死苦，是善男子爲法故，自賣其身，供養般若波羅蜜。般若波羅蜜，名菩薩所學道，爲供養般若波羅蜜，及供養曇無竭菩薩故，在市肆上高聲唱言：誰須人？誰須人？誰欲買人？賣身不售，在一面立，憂愁啼哭。是時，釋提桓因化作婆

羅門來欲試之。問言：善男子！何以憂愁啼哭，一面立？答言：婆羅門！我欲賣身爲供養般若波羅蜜，及曇無竭菩薩摩訶薩故，而我薄福，賣身不售。婆羅門語是善男子：我不須人，我欲祠天，當用人心、人血、人髓，汝能賣不是時，是善男子不復憂愁，其心和悅，語是婆羅門：汝之所須，我即相與。婆羅門言：汝須何價？答言：隨汝意與我。即時，是善男子右手執利刀，刺左臂出血，割右髀肉，復欲破骨出髓。我在閣上，遙見是事。我爾時作是念：是人何故困苦其身？我當往問。我即下閣往問：善男子！汝何因緣故自困苦其身？是善男子答我言：姊！我爲法故，欲供養般若波羅蜜，及曇無竭菩薩說法者。我貧窮無所有，無金銀、瑠璃、砗磲、碼瑙、珊瑚、琥珀、玻瓈、真珠、華香、伎樂、姊！我爲供養法故，自賣其身。今得買者，須人心、人血、人髓，我

用是價，供養般若波羅蜜，及曇無竭菩薩說法者。我問是男子：汝今自出身、血、髓，欲供養曇無竭菩薩，得何功德？是善男子言：曇無竭菩薩當爲我說般若波羅蜜及方便力，此是菩薩所應學，菩薩所應作，菩薩所行道。我當學是道，得阿耨多羅三藐三菩提，爲一切衆生作依止。我當得金色身，三十二相，八十隨形好，丈光無量明，大慈、大悲、大喜、大捨，四無所畏，四無礙智，佛十力，十八不共法，六神通，不可思議清淨戒、禪定、智慧，得阿耨多羅三藐三菩提。於諸法中得無礙一切知見，以無上法寶，分布與一切衆生。如是等微妙大法，我當從彼得之。我聞是微妙不可思議諸佛功德，聞其大願，我心歡喜，作是念：是清淨微妙大願，甚希有！乃至如是爲一一法故，應捨如恆河沙等身命。善男子爲法，能受苦行難事，

所謂不惜身命，我多有妙寶，云何不生願，勤求如是法，供養般若波羅蜜及曇無竭菩薩。我如是思惟已，語薩陀波崙菩薩：汝善男子，莫困苦其身，我當白我父母，多與汝金銀、瑠璃、砮磈、碼碯、珊瑚、琥珀、玻瓈、真珠、華香、瓔珞、塗香、末香、衣服、旛蓋及諸伎樂，供養般若波羅蜜及曇無竭菩薩說法者。我亦求父母，與諸侍女共汝俱去供養曇無竭菩薩說法者，共汝植諸善根，爲得如是等微妙清淨法，如汝所說。父母今聽我，并五百侍女先所給者，亦聽我持衆妙華香、瓔珞、塗香、末香、衣服、旛蓋、伎樂、金銀、瑠璃供養之具，與薩陀波崙菩薩共去供養般若波羅蜜及曇無竭菩薩說法者，爲得如是等清淨微妙諸佛法故。」爾時，父母報女言：「汝所讚者，希有難及，說是善男子爲法精進，大樂法相，及是諸佛法不可思議。」

一切世間最爲第一，一切衆生歡樂因緣。是善男子爲是法故大莊嚴，我等聽汝往見曇無竭菩薩，親近供養。汝發大心，爲諸佛法故如是精進，我等云何當不隨喜？」是女爲供養曇無竭菩薩故，得蒙聽許，報父母言：「我等亦隨是心歡喜，我終不斷人善法因緣。」

是時，長者女，莊嚴七寶車五百乘，身及侍女，種種寶物供養之具，持種種水陸生華，及金銀寶華，衆色寶衣，好香，搗香，澤香，瓔珞，及衆味飲食，共薩陀波崙菩薩，五百侍女各載一車，恭敬圍繞，漸漸東去。見衆香城七寶莊嚴，七重圍繞，七寶之塹，七寶行樹皆亦七重。其城縱廣十二由旬，豐樂安靜，甚可喜樂，人民熾盛。五百市里，街巷相當，端嚴如畫，橋津如地，寬博清淨。遙見衆香城，既入城中，

見曇無竭菩薩坐高臺法座上，無量百千萬億衆恭敬圍繞說法。薩陀波崙菩薩見曇無竭菩薩時，心即歡喜，譬如比丘入第三禪，攝心安隱。見已作是念：「我等義不應載車趣曇無竭菩薩。」作是念已，下車步進。長者女并五百侍女，皆亦下車。薩陀波崙菩薩與長者女及五百侍女，衆寶莊嚴，圍繞恭敬，俱到曇無竭菩薩所。爾時，曇無竭菩薩摩訶薩，有七寶臺，赤牛頭栴檀以爲莊嚴，眞珠羅網以覆臺上，四角皆懸摩尼珠寶以爲燈明，及四寶香鑪，常燒名香，爲供養般若波羅蜜故。其臺中有七寶大牀，四寶小牀，重敷其上，以黃金牒書般若波羅蜜，置小牀上，種種旛蓋莊嚴垂覆其上。薩陀波崙菩薩及諸女人見是妙臺衆寶嚴飾，及見釋提桓因與無量百千萬諸天，以天曼陀羅華、碎末栴檀、磨衆寶屑以散臺

上鼓天妙樂於虛空中娛樂此臺。爾時，薩陀波崙菩薩問釋提桓因：「憍尸迦！何因緣故，與無量百千萬諸天，以天曼陀羅華、碎末栴檀、磨衆寶屑以散臺上？鼓天伎樂於虛空中娛樂此臺？」釋提桓因答言：「汝善男子！不知耶？此是摩訶般若波羅蜜，是諸菩薩摩訶薩母，能生諸佛，攝持菩薩。菩薩學是般若波羅蜜，成就一切功德，得諸佛法一切種智。」是時，薩陀波崙即歡喜悅樂，問釋提桓因：「憍尸迦！般若波羅蜜，諸菩薩摩訶薩母，能生諸佛，攝持菩薩。菩薩學是般若波羅蜜，成就一切功德，得諸佛法一切種智，今在何處？」釋提桓因言：「善男子！是臺中有七寶大牀，四寶小牀，重敷其上，以黃金牒書般若波羅蜜置小牀上。曇無竭菩薩以七寶印印之，我等不能得開以示汝。」是時，薩陀波崙與長者女及

五百侍女取供養具，華香、瓔珞、旛蓋分作二分：一分供養般若波羅蜜，一分供養法座上曇無竭菩薩。爾時，薩陀波崙菩薩與五百女人持華香、瓔珞、旛蓋、伎樂及諸珍寶，供養般若波羅蜜已，然後到曇無竭菩薩所。到已，見曇無竭菩薩在法座上坐，以諸華香、瓔珞、搗香、澤香、金銀、寶華、旛蓋、寶衣，以散其上，爲法故供養。是時，華香、寶衣，於曇無竭菩薩上虛空中化成華臺，碎末栴檀、寶屑、金銀、寶華，化成寶帳，寶帳之上，所散種種寶衣化爲寶蓋，寶蓋四邊垂諸寶旛。薩陀波崙及諸女人，見曇無竭菩薩所作變化，大歡喜，作是念：「未曾有也！曇無竭大師神德，乃爾行菩薩道時，神通力尚能如是，何況得阿耨多羅三藐三菩提時！」是時，長者女及五百女人清淨信心，敬重曇無竭菩薩，皆發阿耨多羅三藐三菩提心。

作是願言：「如曇無竭菩薩得菩薩諸深法，如曇無竭菩薩供養般若波羅蜜，如曇無竭菩薩於大眾中演說顯示般若波羅蜜義，如曇無竭菩薩得般若波羅蜜方便力，成就神通，於菩薩事中得自在，我等亦當如是！」

是時，薩陀波崙菩薩及五百女人，華香寶物，供養般若波羅蜜及曇無竭菩薩已，頭面禮曇無竭菩薩，合掌恭敬，一面立，一面立已，白曇無竭菩薩言：「我本求般若波羅蜜時，於空閑林中，聞空中聲言：善男子！汝從是東行，當得聞般若波羅蜜。我受是語東行，東行不久，作是念：我何不問空中聲？我當何處去？去是遠近？當從誰聞？我是時大憂愁啼哭，於是處住七日七夜憂愁故，乃至不念飲食，但念我何時當得聞般若波羅蜜。我如是憂愁，一心念般若波

羅蜜見佛身在虛空中，語我言：善男子！汝大欲、大精進心，莫放捨！以是大欲、大精進心，從是東行，去是五百由旬，有城名衆香，是中有菩薩摩訶薩，名曇無竭，從是人所當得聞般若波羅蜜。是菩薩世世是汝善知識，常守護汝。我從佛受教誨已，便東行，更無餘念，但念我何時當見曇無竭菩薩，爲我說般若波羅蜜。我爾時中道，住於一切法中，得無礙智見，得觀諸法性，等諸三昧。現在前住是三昧已，見十方無量阿僧祇諸佛，說是般若波羅蜜。諸佛讚我言：善哉！善哉！善男子！我本求般若波羅蜜時，得諸三昧，亦如汝今日。得是諸三昧已，徧得諸佛法。諸佛爲我廣說法，安慰我已，忽然不現。我從三昧起，作是念：諸佛從何處來，去至何所？我不見諸佛故，大愁憂。復作是念：曇無竭菩薩供養先佛，植衆善根，久行般若波

羅蜜，善知方便力，於菩薩道中得自在，是我善知識，守護我。我當問曇無竭菩薩是事。諸佛從何所來，去至何所？我今問大師。是諸佛何處來，去至何處？大師願爲我說諸佛所從來，所至處，令我得知，知己亦常不離見諸佛！」

論釋曰：薩陀波崙渴仰欲聞般若故，見十方諸佛爲大眾說法，其心歡喜，其意得滿。諸佛以其信力堅固，精進難動故，安慰其心。讚言：善哉！我本初行菩薩道求般若時，亦如汝今日。汝莫憂愁，自謂福薄。爾時，薩陀波崙大得諸三昧力，其心深著，是故諸佛爲說求諸三昧性，不見實體，亦不見入三昧出三昧者，衆生空，法空故。諸佛爲略說般若波羅蜜相，不念有是法，所謂一切法無相故，不可念著。我等住是無所念法中，能具足六波羅蜜，具足六波羅蜜故。

得金色身，如經中說。諸佛教化利喜，安慰其心。問曰：上化佛已爲說曇無竭是汝世世善知識，今何以復問何等是我善知識？答曰：以佛敕於善知識中，倍應恭敬愛念故。又以欲於十方佛所聞曇無竭功德，欲自令信心堅固不疑故問。十方佛答，如經中說。薩陀波崙是曇無竭所度因緣人故，諸佛佐助示導；或有諸菩薩佐助佛所應度者，令至佛所。

問曰：上聞虛空聲不問故，七日啼哭，今不見十方佛，何以不大憂愁，更求見佛？但欲於曇無竭所問諸佛去來事。答曰：薩陀波崙先時但有肉眼，未得三昧，以深心信著善法故，大啼哭。今得諸三昧力，又見十方佛，諸煩惱微薄，著心已離故，但一心念：我當何時見曇無竭。問曰：若薩陀波崙得是三昧力，何以不還入三昧，問十方

諸佛從何所來，去至何所，而欲見問曇無竭？答曰：十方佛尚以種種因緣讚曇無竭，世世是汝師，是故欲問。是時，薩陀波崙念曇無竭菩薩是我先世因緣，是故生恭敬尊重心。以有大功德故尊重，是先世因緣故恭敬愛樂。問曰：先說薩陀波崙不大著世間事，深愛般若波羅蜜故，愁憂啼哭，今何以自鄙貧窮，無以供養？但以心隨師意，則是法供養，何用華香爲答？曰：法供養雖上，而世間衆生見遠來求法而空無所有，則不發喜心；以世法故，求供養具。復次，五波羅蜜爲助般若波羅蜜法，助法中檀波羅蜜爲首。薩陀波崙思惟：我得尊重福田曇無竭菩薩，當以助道法根本供養。亦欲爲起發衆人。薩陀波崙是智人，善人，貧窮而能供養，何況我等！復次，諸善法行時，思惟時，其味各異。薩陀波崙欲行布施味，是故求供

養具。問曰：薩陀波崙是大菩薩，能見十方佛，又得諸深三昧，何以貧窮？答曰：有人言：此人捨家求佛道，雖生富家，道里懸遠，一身獨去，不賚財物。有人言：雖是大人，宿世小罪因緣故，生貧窮家。有雖是小人，先世少行布施因緣故，生大富家。如蘇陀夷、尼他等，是諸天所供養人，而生小家。貧有二種：一者，財貧；二者，功德法貧。功德法貧，最大可恥。財貧，好人亦有，法貧，好人所無。無有華香者，無有上妙寶華，又以少故言無。我若空往，師雖不須，我心不得大喜，是故欲賣身。問曰：若賣身與他，誰賚此物往供養師？答曰：捨身即是。大供養，去住無在。有人言：是人賣身取財，因人供養，我爲供養故，賣身爲奴。又人言：爾時世好，人皆知法，雖自賣身，主必能聽供養而還。復次，是人發深心，欲行檀波羅蜜，爲供養法及法師，而無外

物，唯有己身，是故賣是內物。於外、內物中，內物爲重，惜之深故，是故欲不破布施願故，賣身供養。此中自說不悔因緣：我世世喪身無數，未曾爲清淨法故，今爲供養說法者故，喪是身，大得法利。薩陀波崙定心，斷貪惜身意，於道中入一大城，欲得賣買如意故，入此大城。一心欲賣身，除羞愧、破僞慢故，唱言：誰須人？問曰：魔何以欲破其意？答曰：魔常爲諸佛、菩薩怨家，故欲來破。復次，諸小菩薩未得諸法實相，魔及惡人能壞，若得無生法忍，住諸菩薩神通力，無能破者。如小樹栽，小兒能破，大不可破。復次，此中自說魔破因緣：所謂是薩陀波崙愛法故，自賣身供養般若波羅蜜及法盛菩薩，當得正問般若波羅蜜，如經中廣說。問曰：若魔欲壞薩陀波崙，先來聞空中聲，及見十方佛時，何以不壞？今方隱蔽諸婆羅門，居

士，令不聞其聲。答曰：薩陀波崙先心未定，惜身未盡，見十方佛已，得諸三昧，其心乃定。今定心相現，是故魔驚。若菩薩心未定，未能動魔；若大菩薩其心已定，魔亦不來。薩陀波崙，今欲定心出魔境界，是故魔來。譬如負債人，未欲遠去，債主不遮，欲出他界，則不聽去。問曰：魔有大力，何以不殺此菩薩，而但破壞？答曰：魔本不嫉其壽命，但憎其作佛心，是故欲壞。又復諸天神法，人無重罪，不得妄殺，但得壞亂恐怖。若神無此法，則人無活者，是故不殺。婆羅門性中生，受戒故，名婆羅門，除此通名居士；居士，真是居舍之主，非四姓中居士。除一長者女者，以其爲佛道世世集功德故，魔不能蔽。復有人言：是薩陀波崙不應死故，令一女人聞。有人言：是曇無竭菩薩神通力故，令長者女得聞。如是三唱無人買者，便大愁憂。問

曰：薩陀波崙既不惜身，雖無人買，亦不應愁。答曰：既發大心，不滿其願，是故大愁。

釋提桓因作是念：薩陀波崙欲賣其身，無有買者，如經中廣說。問曰：釋提桓因得報得知他心，應知薩陀波崙心已決定，今何以來試？答曰：諸天但知世間人心，作佛不作佛心，非其所知；除佛，無有能知其爲佛道故與受記。復次，釋提桓因欲多所引導，故來試之。人聞見者，皆發心求佛。又如金銀等諸寶，不以輕賤故燒鍛磨打；菩薩亦如是，若能割肉出血，破骨出髓，其心不動，是正定菩薩。是故天帝來試。問曰：帝釋是大天王，何以妄語，詐言我欲祠天，須人心、血、髓？答曰：若以慳貪瞋恚煩惱，欲求自利，故妄語，是故爲罪。帝釋若作實身、實語，菩薩則不信；是故如其國法，天祠所須，爲其信。

受故。是時，薩陀波崙信其語而大歡喜，我得大利。大利者阿鞞跋致地，第一利者是佛道；大利者五波羅蜜，第一利者般若波羅蜜；大利者般若波羅蜜，第一利者般若波羅蜜方便力；大利者菩薩初地，第一利者十地；大利者從初地乃至十地，第一利者第十地；大利者菩薩地，第一利者佛地。如是等分別，雖未具足，已住具足因緣，故言便爲具足。問曰：若釋提桓因化身來，何以言汝須何等價？答曰：知其欲供養曇無竭菩薩，滿其願故。又復釋提桓因苦困薩陀波崙，畏其所索者大，是故言須何等價。隨汝意與我者，言於汝不大貪惜，不致悔恨者與我。薩陀波崙無力勢故，不能得使旃陀羅故，自捉刀，婆羅門亦畏罪故，不能破，是以自執刀破身。問曰：若長者女聞聲，何以不來問，汝何以自賣身耶？答曰：但空言賣身。

事輕，破身出心髓事重故。長者女發心。長者女住在閣上，遙見是人自割刺，作是念：一切衆生皆求樂畏苦，貪愛其身，薩陀波崙而自割刺，是爲希有！又以先世福德因緣所牽故，即往到其所而問。薩陀波崙答：欲供養曇無竭菩薩。復問得何等利？答言：般若波羅蜜，名菩薩所學，當從彼聞。我學是道，當得作佛，與一切衆生作依止。譬如厚葉樹多所蔭覆，又如熱時曠野險道清涼大池。爲說佛功德現事可以發心者，所謂金色身，三十二相，丈光，無量光。丈光爲閻浮提惡世衆生，諸佛眞實光明無有限量。大慈乃至六神通義，如前說。不可思議清淨戒、禪定、智慧，如佛戒等五衆中說。於諸法中得一切無礙知見者，諸佛有無礙解脫，是解脫相應知見，一切法中無所礙。知見分別，如先說。薩陀波崙言：我得如是無量佛

功德，以無上法寶，分布與一切衆生。無上寶者，有人言：三寶中法寶。有人言：一切八萬四千法衆，是爲法寶，得是故除諸煩惱，滅諸戲論，得脫一切苦。有人言：無上法寶，即是阿耨多羅三藐三菩提，更無過上者故。有人言：涅槃是無上法寶，何以故？一切有爲法皆有上。如阿毗曇言：一切有爲法，及虛空，非數緣盡，名爲有上法；數緣盡是無上法。數緣盡即是涅槃之別名。有人言：涅槃道雖有爲，以其爲涅槃故，於有爲法中爲無上。如是等法寶，分布爲三乘與衆生。如是等無量佛法，當從師得，是故我捨是老病、死所住處，不淨臭穢之身，爲供養般若波羅蜜故，當得佛身。金色等，如先說。長者女世世供養諸佛種善根，智慧明利，聞是法其心深入，大得法喜，乃至心驚毛豎。語薩陀波崙言：甚爲希有！汝所讚法大微妙，爲

是一一法故，應捨如恆河沙等身，何況一身！長者女不知何因緣故，困苦其身，而憐愍之，心謂不可；今聞是無量無邊無比清淨佛法，以是因緣可得故大歡喜，是故說爲是法故，應捨如恆河沙身。女言：汝以貧故自苦困其身，於今可止；恣汝所須，當以相與，我亦隨汝而求是道。問曰：是菩薩既自割截身體，云何能與長者女多說佛法？答曰：是菩薩心力大，雖有身苦不能覆心。是菩薩始以刀割肉流血，方欲破骨出髓，而長者女來，未大悶故，能得說法。釋提桓因知其心定，試之而已，故無所言，即復本身，讚言：善哉！汝心堅受是事者。帝釋意：如汝今生死肉身，未得佛道，能如是不惜身，汝不久當於一切法中得無所著，住無生法忍中，疾得阿耨多羅三藐三菩提。以過去佛爲證，如是等種種因緣，安慰其心。我是天王，

愛樂佛道，故來相試，欲知汝心堅軟云何？欲令汝信故，言須人心
髓祠天，實不須也。汝願何等，當以相與？汝是好人，爲是佛種，當相
擁護。薩陀波崙直信，心善軟，深著佛道故，不分別衆生，聞帝釋語，
便言：與我阿耨多羅三藐三菩提願。帝釋言：此非我力所能辦，是
佛境界。復次，有人言：帝釋大苦困薩陀波崙，今以此語謝之。帝釋
意謂求金銀寶物，不知乃索阿耨多羅三藐三菩提，既不能與，愧
負而已。復更語言：必相供養，更索餘願。帝釋語意：我既大相苦困，
不得直爾而去，要相供養。薩陀波崙雖不惜身，欲以此身供養，曩
無竭，聞般若波羅蜜，是故語言：若汝無此力，令我身體平復如故。
帝釋言：如汝所言，瘡即平滿，與本無異。問曰：先已割肉，云何令得
平滿？答曰：佛說有五不可思議。龍事所作，尚不可思議，何況天？又

虛空中微塵充滿，帝釋福德生心，便能和合平滿。如諸天及地獄中身，非是胎生身，罪福因緣故，和合便有。是時，帝釋知其心堅，與願已，即時滅去。

爾時，薩陀波崙宿世微罪已畢，福德明盛，是故長者女將歸，有所須者，從我父母索之，如經中廣說。問曰：是女先言汝所須物，盡從我索之，今何以言從我父母索？答曰：今既將歸到舍，以薩陀波崙目見入舍從父母得之，愧不稱前言，是故先自說，從我父母索之。又女雖力能得寶，以子女法故，從父母索之。女既入舍，如先所許，從父母索與。其國無有佛法，是故問女：阿誰是薩陀波崙菩薩？女如所見，如所聞，盡向父母說薩陀波崙事。今父母當聽我與薩陀波崙菩薩俱，及五百侍女，并供養具，供養曇無竭菩薩。父母聞其

言，即聽如女意。問曰：長者貴而有力，云何先不識薩陀波崙？聞其功德故，便能令女及其眷屬寶物，與之俱去。答曰：長者亦植德本，以少因緣，故生無佛國，暫聞佛德，發其宿識，心即開悟，故能發遣，譬如蓮華生長具足，見日開敷。父母知女心純熟，無不淨行，持操不忘，不樂世樂，但求法利，知其心至，不可制止，若違其意，恐便自害。思惟籌量已，既全其意，自得功德，歡喜令去。世間因緣，深著難解，愛之至故，尚不能違，何況爲佛道故，其心清淨，無所染著，而不聽之女，以父母爲法見聽，不惜寶物，亦以隨喜心，爲之歡喜。爾時，衆心既定，莊嚴七寶之車，與大衆圍繞，稍稍東行。是時，五百女親屬，及城中衆人，見是希有難及之事，皆亦隨去。人衆既集，歡悅共行，渴仰衆香城，如渴者思飲。漸漸進路，遙見衆香城，乃至與

長者女及五百人，恭敬圍繞，欲往曇無竭所。問曰：曇無竭是大菩薩，得聞持等諸陀羅尼，般若波羅蜜義，已自誦利憶持，何用七寶臺書般若經卷，著中供養？答曰：雖有種種因緣，略說有二義：一者，衆生心行不同，或樂見經卷，或樂聞演說。二者，曇無竭身爲白衣，現有家屬，鈍根衆生，或作是念：此有居家，必有染著，何能以畢竟清淨無著般若波羅蜜利益衆生？自未無著，何能以無著法教化？是故書其經文，著七寶牒上，衆寶供養，諸天龍鬼神皆亦共來恭敬，供養華香、幡蓋，雨於七寶；衆生見者，增益信根，則以此法示傳佛語，案文演教勸發。一切寶臺莊嚴之具，及薩陀波崙問釋提桓因，如經中說。七印印者，是曇無竭真實印，常自手執以印於經。有人言：七印者，有求佛道七大神，是執金剛種，常給曇無竭菩薩使

守護經文，不令魔及魔民改更錯亂，爲貴敬般若故。有人但聞演說所發心者，有人見其莊嚴文字而歡喜發心者，是故莊嚴寶臺，用金牒書，七印印。問曰：臺上書寫般若，曇無竭菩薩口所演說般若，雖二處俱有，而書寫處不能益人，何以先至臺所？答曰：所書般若，入法寶中。佛寶次第有法寶故，應先供養；曇無竭一人故，僧寶所不攝，是故先供養法寶。又曇無竭菩薩所說者，雖是法，而衆生取人相故，多生著心；若見所書般若，不生人相，雖取餘相，著心少於著人生患，是故先供養經。經法諸佛尚供養，何況曇無竭及薩陀波崙！曇無竭因般若波羅蜜故得供養，所因之本，何得不先供養？是故分所供養具爲二分。問曰：曇無竭有六萬綵女，五欲宮殿，云何能以所散華物，化爲華臺？答曰：有人言：諸佛神力，因薩陀波

崙所供養物作變化。有人言：曇無竭是大菩薩法性生身，爲度衆生故受五欲。如曇無竭菩薩名字義中說。問曰：菩薩法，先於衆生中起悲心，欲度衆生苦故，求阿耨多羅三藐三菩提。今但見曇無竭神力威德，云何發心？答曰：發心有種種：有聞說法而發心者，有於衆生起慈悲而發心者，有見神通力、大威德而發心者，然後漸漸而生悲心。如智印經中說：依愛而斷愛，依慢而斷慢。如人聞道法，愛著是法故，捨五欲出家。又聞某甲得阿羅漢果，而生高心。此人無勝我事，彼尚能爾，我何不能？而生大精進，得阿羅漢道。佛道中亦如是，長者女等及五百女人，常深貪勢力自在樂，聞往古有人，神力變化，寶物具足，人中受天樂。後見曇無竭臺觀宮殿，在大法座上坐，天人供養，又見所供養物於虛空中化成大臺，心即大

喜發難遭想；知皆從福德因緣，可辦是事，是故皆發作佛心。所聞發心者，行皆次第行。如毗摩羅鞞經中說：愛慢等諸煩惱，皆是佛道根本。是故女人見是事已，生愛樂心，知以福德因緣可得是事故，皆發心。因是愛慢，後得清淨好心，故言佛道根本，譬如蓮華生汙泥。發心已作願：如曇無竭所爲，我等亦當得是！

爾時，薩陀波崙等，頭面禮曇無竭菩薩，華香供養，不貴故，先以供養；身貴重故，後禮拜。禮拜已，說本求般若因緣。如經中說：我本求般若時，聞空中聲，乃至我今問大師：諸佛從何所來，去至何處？問曰：薩陀波崙得諸大三昧，所謂破無明、觀諸法性等，云何不知空而取佛相深生著？答曰：新發意菩薩，雖能總相知諸法空，無相於諸佛所深愛著故，不能解佛相畢竟空，雖知空而不能與空合。何

以故。諸佛有無量無邊實功德，是菩薩利根故，深入深著。若佛不爲是菩薩說空者，是菩薩爲愛佛故，能自滅親族，何況餘人！但以解空故無是事。薩陀波崙深著諸佛，故不能知而問大師，今爲我說諸佛來去相。我見佛身無厭足故，常不離見諸佛。

大智度論卷第九十八

校譌

第三十三面

第六行無著
南藏作畢竟

音釋

售

承呪切賣物出
手也又償也

憔悴

憔悴謂容貌枯瘠也

臂

卑義切手
臂也腕也

髀

部禮切
股骨也

瘡癥

瘡初莊切癩也
癥言盤瘡痕也

擣

都皓切
舂也

屑

先結切謂
碎屑也

鍛

丁貫切
鍛鍊也

毗摩羅

梵語也亦云維摩詰
此云淨名結去吉切

鞋

大智度論卷九十八
釋薩陀波窰品第八十八之下

三八

大智度論卷第九十九

龍 樹 菩 薩 造

姚秦三藏法師鳩摩羅什譯

釋曇無竭品第八十九之上

經爾時，曇無竭菩薩摩訶薩，語薩陀波崙菩薩言：「善男子！諸佛無所從來，去亦無所至。何以故？諸法如不動相，諸法如即是佛。善男子！無生法無來無去，無生法即是佛；無滅法無來無去，無滅法即是佛；實際法無來無去，實際法即是佛；空無來無去，空即是佛。善男子！無染無來無去，無染即是佛；寂滅無來無去，寂滅即是佛；虛空性無來無去，虛空性即是佛。善男子！離是諸法更無佛，諸佛如，諸法如，一如無分別。善男子！是如常一，無二、無三，出諸數法，無

所有故。譬如春末月，日中熱時，有人見燄動，逐之求水望得。於汝意云何？是水從何池、何山、何泉來？今何所去？若入東海、西海、南海、北海？」薩陀波崙言：「大師！燄中尚無水，云何當有來處、去處？」曇無竭菩薩語薩陀波崙菩薩言：「善男子！愚夫無智，爲熱渴所逼，見燄動，無水生水想。善男子！有人分別諸佛有來有去，當知是人皆是愚夫。何以故？善男子！諸佛不可以色身見，諸佛法身無來無去，諸佛來處、去處亦如是。善男子！譬如幻師幻作種種，若象、若馬、若牛、若羊、若男、若女，如是等種種諸物，於汝意云何？是幻事從何處來？去至何所？」薩陀波崙菩薩言：「大師！幻事無實，云何當有來去處？」善男子！是人分別佛有來有去亦如是。善男子！譬如夢中見若象、若馬、若牛、若羊、若男、若女，於汝意云何？夢中所見有

來處有去處不？」薩陀波崙言：「大師！是夢中所見虛妄，云何當有來去？」善男子！是人分別佛有來有去亦如是。善男子！佛說諸法如夢，若有衆生不知是法義，以名字色身著佛，是人分別諸佛有來有去，不知諸法實際相故，皆是愚夫無智之數。是人數數往來五道，遠離般若波羅蜜，遠離諸佛法。善男子！佛說諸法如幻，如夢，若有衆生如實知，是人分別諸法，若來若去，若生若滅，若不分別諸法，若來若去，若生若滅，則能知佛所說諸法實相。是人行般若波羅蜜，近阿耨多羅三藐三菩提，名爲眞佛弟子，不虛妄食人信施，是人應受供養，爲世間福田。善男子！譬如大海水中諸寶，不從東方來，不從南方、西方、北方、四維、上下來，衆生善根因緣故，海生此寶，此寶亦不無因緣而生，是寶皆是從因緣和合生，是寶

若滅亦不去至十方，諸緣合故有，諸緣離故滅。善男子！諸佛身亦如是，從本業因緣果報生，生不從十方來，滅時亦不去至十方，但諸緣合故有，諸緣離故滅。善男子！譬如笙篴聲，出時無來處，滅時無去處，衆緣和合故生，有槽、有頸、有皮、有絃、有柱、有棍，有人以手鼓之，衆緣和合而有聲，是聲亦不從槽出，不從頸出，不從皮出，不從絃出，不從棍出，亦不從人手出，衆緣和合爾乃有聲，是因緣離時，亦無去處。善男子！諸佛身亦如是，從無量功德因緣生，不從一因一緣一功德生，亦不無因緣有，衆緣和合故有。諸佛身不獨從一事成，來無所來，去無所至。善男子！應當如是知諸佛來相去相！善男子！亦當知一切法無來去相，汝若知諸佛及諸法無來無去，無生無滅相，必得阿耨多羅三藐三菩提，亦能行般若波羅蜜及

方便力。」

爾時，釋提桓因，以天曼陀羅華與薩陀波崙菩薩摩訶薩，作是言：「善男子！以是華供養曇無竭菩薩摩訶薩，我應當守護供養汝。所以者何？汝因緣力故，今日饒益百千萬億衆生，使得阿耨多羅三藐三菩提。善男子！如是善人，甚爲難遇，爲饒益一切衆生故，無量阿僧祇劫受諸勤苦。」薩陀波崙菩薩摩訶薩，受釋提桓因曼陀羅華，散曇無竭菩薩上，白言：「大師！我從今日以身屬師，供給供養。」如是白已，合掌師前立。是時，長者女及五百侍女白薩陀波崙菩薩言：「我等從今日亦以身屬師。我等以是善根因緣故，當得如是法，亦如師所得；共師世世供養諸佛，世世常供養師。」是時，薩陀波崙菩薩，語長者女及五百女人：「若汝等以誠心屬

我者，我當受汝！」諸女言：「我等以誠心屬師，當隨師教。」是時，薩陀波崙菩薩及五百女人，并諸莊嚴寶物，上妙供具，及五百乘七寶車，奉上曇無竭菩薩。白言：「大師！我持是五百女人奉給大師，是五百乘車隨師所用。」爾時，釋提桓因讚薩陀波崙菩薩言：「善哉！善哉！善男子！菩薩摩訶薩捨一切所有，應如是；如是布施，疾得阿耨多羅三藐三菩提。作如是供養說法人，必得聞般若波羅蜜及方便力。過去諸佛本行菩薩道時，亦如是住布施中，得聞般若波羅蜜及方便力，得阿耨多羅三藐三菩提。」爾時，曇無竭菩薩欲令薩陀波崙菩薩善根具足故，受五百乘車，長者女及五百侍女。受已，還與薩陀波崙菩薩。

是時，曇無竭菩薩說法日沒，起入宮中。薩陀波崙菩薩摩訶薩作

是念：「我爲法故來，不應坐臥，當以二事，若行若立，以待法師從宮中出說法。」爾時，曇無竭菩薩，七歲一心入無量阿僧祇菩薩三昧，及行般若波羅蜜方便力。薩陀波崙菩薩，七歲經行住立，不坐不臥，無有睡眠，無欲恚惱，心不著味，但念曇無竭菩薩摩訶薩。何時當從三昧起，出而說法。薩陀波崙菩薩過七歲已，作是念：「我當爲曇無竭菩薩摩訶薩敷設法座，曇無竭菩薩摩訶薩當坐上說法。我當灑地清淨，散種種華，莊嚴是處，爲曇無竭菩薩摩訶薩，當說般若波羅蜜及方便力故。」是時，薩陀波崙與長者女及五百侍女，爲曇無竭菩薩摩訶薩敷七寶牀，五百女人各脫上衣，以敷座上。作是念：「曇無竭菩薩摩訶薩，當坐此座上，說般若波羅蜜及方便力！」薩陀波崙菩薩敷座已，求水灑地而不能得。

所以者何？惡魔隱蔽，令水不現。魔作是念：「薩陀波崙菩薩求水不得，於阿耨多羅三藐三菩提生一念劣心、異心，則善根不增，智慧不照，於一切智而有稽留。」爾時，薩陀波崙菩薩作是念：「我當自刺其身，以血灑地，令無塵土來至大師。我何用此身，此身必當破壞；我從無始生死已來，數數喪身，未曾爲法。」即以利刀自刺，出血灑地。薩陀波崙菩薩及長者女并五百侍女皆無異心，惡魔亦不能得便。是時，釋提桓因作是念：「未曾有也！薩陀波崙菩薩愛法乃爾，以刀自刺出血灑地。薩陀波崙及衆女人心不動轉，惡魔波旬不能壞其善根。其心堅固，發大莊嚴，不惜身命，以深心欲求阿耨多羅三藐三菩提，當度一切衆生無量生死苦。」釋提桓因讚薩陀波崙菩薩言：「善哉！善哉！善男子！汝精進力大，堅固難

動，不可思議！汝愛法求法，最爲無上！善男子！過去諸佛亦如是，以深心愛法，惜法，重法，集諸功德，得阿耨多羅三藐三菩提。」薩陀波崙菩薩作是念：「我爲曇無竭菩薩摩訶薩敷法座，掃灑清淨已訖，當於何處得好名華，莊嚴此地？若曇無竭菩薩摩訶薩，法座上坐說法時，亦當散華供養。」釋提桓因知薩陀波崙菩薩心所念，即以三千石天曼陀羅華，與薩陀波崙。薩陀波崙受華已，以半散地，留半待曇無竭菩薩摩訶薩，坐法座上說法時當供養。爾時，曇無竭菩薩摩訶薩過七歲已，從諸三昧起，爲說般若波羅蜜故，與無量百千萬衆恭敬圍繞，往法座上坐。薩陀波崙菩薩摩訶薩，見曇無竭菩薩摩訶薩時，心得悅樂，譬如比丘入第三禪。

論釋曰：薩陀波崙菩薩，雖知諸法空無來去相，未能深入，亦不能

解種種門。於諸佛身恭敬深重故。不能觀空。如大海水波。其力雖大。到須彌山邊則退而無用。薩陀波崙亦如是。雖有大空智力。到佛所則亦無用。是故曇無竭菩薩。今爲說諸佛無所從來。去亦無所至。此中曇無竭自說因緣。所謂諸法如不動相。諸法如即是佛。問曰。何等是諸法如。答曰。諸法實相。所謂性空。無所得。空等諸法門。問曰。摩訶波羅蜜。於佛法大乘六波羅蜜中第一法。若無佛。則無說般若者。三十二相。八十隨形好。十力。四無所畏等。色。無色法。等淨妙五衆和合。是故名爲佛。如五指和合名爲拳。不得言無拳。名字旣異。形亦異。力用亦異。不得言無拳。是故知有佛。答曰。不然。佛法中有二諦。世諦。第一義諦。世諦故。言佛說般若波羅蜜。第一義故。說諸佛空無來無去。如汝說清淨五衆和合故名爲佛。和合

故有，是即爲無。如經中佛自說因緣：五衆非佛，離五衆亦無佛，五衆不在佛中，佛不在五衆中，佛非五衆有。何以故？五衆是五，佛是一，一不作五，五不作一。又五衆無自性故，虛誑不實。佛自說一切無誑法中，我最第一，是故五衆不即是佛。復次，若五衆即是佛，諸有五衆者，皆應是佛。問曰：以是難故，我先說第一清淨五衆，三十二相等名爲佛。答曰：三十二相等，菩薩時亦有，何以不名爲佛？問曰：爾時，雖有相好莊嚴身，而無一切種智；若一切種智在第一妙色身中，是即名爲佛。答曰：一切種智，般若中說是寂滅相，無戲論，若得是法，則名無所得，無所得故名爲佛，佛即是空。如是等因緣故，五衆不得即是佛。離是五衆亦無佛，所以者何？離是五衆，更無餘法可說；如離五指更無拳法可說。問曰：何以故無拳法？形亦異，

力用亦異；若但是指者，不應異，因五指合故拳法生，是拳法雖無常生滅，不得言無。答曰：是拳法若定有，除五指應更有拳可見，亦不須因五指。如是等因緣，離五指更無有拳，佛亦如是，離五衆則無有佛。佛不在五衆中，五衆不在佛中，何以故？異不可得故。若五衆異佛者，佛應在五衆中，但是事不然。佛亦不有五衆，所以者何？離五衆無佛，離佛亦無五衆。譬如比丘有三衣鉢故，可得言有，但佛與五衆不得別異，是故不得言佛有五衆。如是五衆求佛不可得故，當知無佛，佛無故無來無去。問曰：若無佛即是邪見，云何菩薩發心求作佛？答曰：此中言無佛，破著佛想，不言取無佛想。若有佛尚不令取，何況取無佛邪見！又佛常寂滅，無戲論相，若人分別戲論常寂滅事，是人亦墮邪見。離是有無二邊處中道，即是諸法

實相，諸法實相即是佛。何以故？得是諸法實相，名爲得佛。復次，色等法如相即是佛，色等法性空是如相，諸佛如亦性空。以是故，不來不去，不生不滅。法性實際，空無染寂滅，虛空性，亦如是無來無去。如乃至虛空性如，佛如是如一，無二，無三等別異。此中自說因緣，何以故？出諸數法，無所有故。如等法是實，是中無有憶想分別。取相故有名字，名字中有數。此中自說因緣，空非實，無所有故。問曰：若是法無有，云何可見可聞，有苦有樂，有縛有脫等分別諸異？答曰：此中曇無竭自種種分別譬喻說，所謂如春末月見燄，乃至是人，不分別諸法若來若去，燄等中雖無實事，亦能誑人目，生苦樂事。諸法亦如是，雖空無所有，亦能令人得苦、樂、憂、喜事。夢等法，亦如是。復次，佛有二種身：一者，法身；二者，色身。法身是真佛，色身

爲世諦故有佛。法身相，上種種因緣說諸法實相，是諸法實相亦無來無去，是故說諸佛無所從來，去亦無所至。若人得諸佛法身相，是名近阿耨多羅三藐三菩提，未得一切智故名爲近，以相似故。般若波羅蜜名諸法實相，若能如是行，是爲行般若波羅蜜。眞佛弟子。眞佛弟子者，得諸法實相名爲佛，得諸法實相差別故，有須陀洹乃至辟支佛、大菩薩；須陀洹等乃至大菩薩，是名眞佛弟子。不虛妄食人信施者，布施畜生，雖得百倍果報，而此福有盡有量，不能度衆生生死故，名爲虛食。須陀洹等乃至佛，諸賢聖受人施，此福果報，乃至涅槃無盡無量，是故說不虛妄食人信施，是人應受一切衆生供養。若須陀洹應受一切凡夫人供養，斯陀含應受凡夫人乃至須陀洹供養，阿那含應受凡夫人及須陀洹、斯陀

含供養，阿羅漢應受凡夫人，須陀洹、斯陀含、阿那含供養，辟支佛應受凡夫人及聲聞，辟支佛供養。爲世間福田者，如植種良田，成收必多；持戒、禪定、智慧、福田，衆生植福，獲果無量。上說諸佛無來無去，薩陀波崙及諸聽者，意謂諸佛尚無，諸法亦應皆滅，則墮斷滅。是故今說因緣法譬喻。曇無竭示薩陀波崙如汝所著，意謂實有者無，爲度衆生故，從因緣和合則有像現。欲證明此事，故說譬喻。如大海中生寶，不從十方來，滅亦無所去，亦不無因緣而生，以四天下衆生福德因緣故，海生此寶，若劫盡滅時，亦無去處。譬如燈滅，燄無所至。佛身亦爾，從初發心所種善根功德，皆是佛身相好因緣。佛身亦不自在，皆屬本因緣業果報故生，是因緣雖久住，性是有。

爲法故，必歸無常，散壞則無身。譬如善射之人，仰射虛空，箭去雖遠，必當墮地；諸佛身亦如是，雖相好光明，福德成就，名稱無量，度人無限，亦歸磨滅。問曰：若衆生福德因緣，故海生珍寶，何以不近衆生處生，而乃在大海難得之處？答曰：海中亦有衆生，龍、阿修羅等用是寶。復次，若寶生人中濁世，貪者覆藏，不令人得；若好世時，珍寶自生人間，無有惜者；如彌勒佛時，珍寶如瓦礫，以懈怠懶惰人惜身，強作願求樂，是故寶在大海不能得。若大心不惜身命勤求者，乃得。大海水喻十方六道國土，諸珍寶即是諸佛。如珍寶爲一切衆生故生，而懈怠懶惰者所不得；諸佛亦如是，雖爲衆生故出世，懈怠、小心、貪身著我者不得度。所以者何？諸法皆從衆緣和合生，衆生有二因緣，故得度：一者，內有正見；二者，外有善說法者。

諸佛雖善說法，衆生內正見不具故，不能盡度。如寶物雖爲衆生出，而有貧窮衆生；諸佛亦如是，雖爲衆生出，而衆生內正見少故，亦不得度。復有箜篌譬喻：有槽、有頸、有皮、有絃、有棍，有人以手鼓之，衆緣和合而有聲；如聲亦不在衆緣中，離衆緣亦無聲，以因緣和合故有聲可聞。諸佛身亦如是，六波羅蜜及方便力，衆因緣和合邊生；佛身不在六波羅蜜等法中，亦不離六波羅蜜等法。如聲不以一因緣，亦非無因緣；佛身亦如是，不從無因緣，亦不從少因緣，諸善法因緣具足故，生諸佛身。如鏡中像，衆因緣和合故有，衆緣離故無；諸佛亦如是，有諸因緣故出現，諸因緣散故滅。善男子！應如是觀諸佛來去相，一切諸法相，亦應如是知！曇無竭語薩陀波崙：善男子！汝能知諸法相不來不去，必得阿耨多羅三藐三菩

提不退轉，亦必能行般若波羅蜜及方便力。何以故？一切法無障礙故。

問曰：釋提桓因，何以化作曼陀羅華與薩陀波崙？答曰：釋提桓因愛樂佛道故，常恭敬諸菩薩。復次，釋提桓因欲攝衆生，令入佛道故，現天王身，以華與薩陀波崙。薩陀波崙一心求佛道故，諸天來供養，衆生見者，皆亦發心；釋提桓因爲引導衆生故，供養薩陀波崙。有人言：釋提桓因深愛敬薩陀波崙，上品來試，試已令身體平復，今復以華與之。釋提桓因力，能與一切人華，以衆生無福力故，設當與者，華即變壞；薩陀波崙福德成就故，得必不變，是故與。若一切菩薩供養師時，不盡與，應守護供養者。先已說因緣，所謂割肉出血，試以成親舊故守護。復次，釋提桓因此中自說因緣，所謂

汝因緣力故，饒益百千等衆生。薩陀波崙取華，如其意供養，曇無竭。薩陀波崙初聞師名，後眼見聞法，斷疑故，以身供養。長者女等亦效薩陀波崙，以身施薩陀波崙。問曰：薩陀波崙以身供養，曇無竭，曇無竭福田大，何以不以身供養，而與薩陀波崙？答曰：女人智短著多故，不用捨本師，而供養他。又以女身罪穢，心雖清白，爲外有譏誘故。問曰：長者女初捨父母，已屬薩陀波崙，今何以復以身施？答曰：初捨父母，共薩陀波崙詣曇無竭，爲法故供養，亦不自以身施，父母亦不以施薩陀波崙。今見薩陀波崙問甚深義，曇無竭爲解說，釋提桓因歡喜供養，是故發歡喜心，以身供養，以自在心故。又一切女身無所繫屬，則受惡名；女人之體，幼則從父母，少則從夫，老則從子。是長者女等，雖道路共來，不得久無所屬，是故自

以身施，而作是願：如師所得，我等亦當得之。爾時，薩陀波崙欲以此女供養曇無竭，慮其嫌恨，故問：汝等實以誠心供養，我當受汝。誠心者，不自用心，隨所處分，如無心物。諸女人等言：實以誠心。即時，薩陀波崙以長者女并諸侍女，及五百乘車，奉上曇無竭。薩陀波崙欲除世人常疑，謂其欺誑長者，將諸女來，是故盡以布施，明己無著。復次，薩陀波崙如空中聲，所聞得解歡喜，如世人所貴，內外物盡以供養，欲深入檀波羅蜜門故。釋提桓因知薩陀波崙愛貪等煩惱未盡，而能盡捨內外布施，無復遺餘，故讚言善哉！以過去佛爲喻，行難事故，得難得果報，所謂阿耨多羅三藐三菩提。問曰：若曇無竭欲令薩陀波崙善根具足，故受善根者，所謂具足檀波羅蜜，何以故還與薩陀波崙？答曰：曇無竭大智方便，令薩陀波

崙大得福德而無所失，是謂上受。薩陀波崙至誠心施，斷諸貪著，不望還得，福德具足。曇無竭思惟薩陀波崙遠來，而於五欲心不染著，舊人供養爲善，是故還與。又聞諸女先以身上薩陀波崙，人非財物，欲遂其本意故。又是諸女世世爲薩陀波崙弟子，如是等因緣故，還與薩陀波崙。

問曰：諸大菩薩說法不應疲極，何以入宮？答曰：隨世人法故。又衆香城中衆生，不常求道，或時厭息，受五欲樂；諸天常受五欲故，妨廢求道。有菩薩所住國，常勤精進，不受五欲。是衆香城衆生本願雜受，曇無竭隨其志願，欲引導之，故生其國；是故以衆生聽法疲倦，起入宮中。又未得道者，法雖微妙，常聞故生疲厭心，是衆中有人故。又曇無竭在是中受富樂，人法故日沒應息。是時，薩陀波

崙作是念。我爲法來。不應坐臥。問曰。爲法故。何以不應坐臥。答曰。無是定法。此人大欲。大精進。恭敬法故。自作是念。我若坐臥。則是懶惰。我初求法時。身尚不惜。何況疲倦。是故不坐臥。大欲精進。與坐臥相違故。又坐臥則不勤力。行立則勤力精進。是故常住二威儀。以待師出。問曰。薩陀波崙。先知師七歲。出不。答曰。初來不知故。又復曇無竭。亦常七歲。不出。以因緣故。自誓七歲入定。薩陀波崙自誓。師未出。終不坐。又大人世間法。尚不自違。何況爲道法。又以初求法時。尚不惜身。今立七歲。何足爲難。問曰。人身軟弱。何能七歲不坐不臥。答曰。是時人壽命長。雖復七歲。如今七日。又好世人身福德力大。雖立七歲。不以爲難。如脅比丘。年六十始出家。而自結誓。我脅不著席。要盡得聲聞所應得事。乃至得六神通阿羅

漢。作四阿含優婆提舍，於今大行於世。此人於惡世尚爾，何況薩陀波崙生於好世！又身力雖弱，以心強故，能辦其事。復次，一心求佛道者，十方諸佛所念，諸大菩薩及求佛道諸天，益其氣力，圍繞守護，是故雖住立七歲而不疲極。問曰：曇無竭入三昧，何以乃至七歲？答曰：先已答，好世人壽長，雖七歲不以爲久。又曇無竭宮殿綵女微妙，五欲與天相似；薩陀波崙等新發意者，心未柔輒，疑曇無竭雖說空法，讚歎離欲，謂其心未能捨。是七歲三昧，欲以除衆疑故，生貴敬心。聞曇無竭七歲三昧，心口相應，能說能行，則信受其語，易可得度。譬如癰瘡未熟，醫則不破，但以藥塗令熟，則易破。復次，欲受心生實樂故，入無量三昧。復次，說法有二種：一者，口說法；二者，身現法。今欲以身現法故，入無量三昧，令衆生知攝心入

慧得如實智。菩薩三昧者，如菩薩義中說。行般若方便力者，如方便品中說。薩陀波崙於七歲中，三惡覺觀不生，不味於味。是人雖未破煩惱，而集諸善法故，制諸煩惱，不令得生。但生一念，曇無竭何時當出，我當從聞般若。過七歲已，作是念：我當爲曇無竭敷坐處，掃灑莊嚴。問曰：薩陀波崙云何得知過七歲已，曇無竭當出？答曰：有人言：先曾七歲，展轉聞知。有人言：曇無竭初入三昧，自說七歲爲限。如釋迦文尼佛告阿難：我欲一月、二月入禪定。阿難以告四衆。薩陀波崙深愛佛法，敬重曇無竭故，供養莊嚴說法處。出家菩薩，但莊嚴其心，詣師受法；在家菩薩，則莊嚴說法處，華香供養。復次，薩陀波崙作是莊嚴，欲令曇無竭知其愛法欲法相，深心信樂。故現是事，是故生心，共五百女等，展力掃灑，自以其金銀珍寶。

敷座。薩陀波崙等，雖自有妙好茵褥，爲愛法情至故，以身所著上衣敷座。求水灑地，魔隱蔽故，求不能得。此中自說因緣：魔作是念：若薩陀波崙求水不得，其心則劣，志願不滿故。又令自鄙其身，我薄福德故，爲供養法，求水不得，以自輕憂愁覆心故。福德不增，智慧不照不明者，諸憂愁煩惱覆心故，諸福德、智慧不能照明；譬如日障蔽故，其照不明。魔知其心大，不可沮壞，但小沮壞，令其稽留。爾時，薩陀波崙自刺其身，出血灑地，欲以淹塵。人血肉雖臭，以其至心求水不得，意不分別香臭好惡，爲欲淹塵，不惜身命。又薩陀波崙深心愛著般若波羅蜜故，無所愛惜。有人言：多有諸天龍鬼神等，常隨逐薩陀波崙，佐助守護，是故所出之血，變爲香水。如羸提仙人被割截時，血化爲乳。又以無量福德成就故，隨願即成。問

曰：若福德成就，隨願即得，魔不應隱蔽其水。答曰：是菩薩新發意，能成小願，未能卻魔。此中薩陀波崙自說出血因緣：我從無始生死已來，數數喪身，未曾爲法。問曰：若薩陀波崙愛法，刺身出血，若其身死，誰復聽法？答曰：是事如破骨出髓中答。又此中諸天、大菩薩守護故，令其不死。又復惡魔知其心不可沮壞，水則還出。薩陀波崙等皆無異心者，如人初習慈心，欲爲衆生及爲般若波羅蜜故，不惜身命，既得利刀割身，以痛自逼故，心生悔恨，是名異。是菩薩信力大故，欲得阿耨多羅三藐三菩提果報故，不計是苦。又以深悲心愛念衆生，雖受種種苦惱，不以爲難；譬如慈母愛子，雖爲子受勤苦不淨，不以爲惡。又復見諸法實相畢竟空故，知是身但是虛誑和合，破是虛誑故，割截身時，不妨阿耨多羅三藐三菩提。

魔不得其便者，如人有瘡則受毒，菩薩若有貪欲憂愁瘡者，魔得其便，以出血灑地，心不憂愁，故魔不得便。如薩陀波崙心，五百女人心亦如是，敬重薩陀波崙故，見其刺身，應有憂惱，以其願得滿故，不以爲愁。爾時釋提桓因見是事已，歎未曾有者，是人未得無生忍，諸煩惱未斷，爲供養法故，不惜身命，如諸離欲人無異，割截其身，如斷草木。初心旣爾，後心轉增。復次，未曾有者，此中釋提桓因自說因緣：薩陀波崙愛法，乃爾以刀自刺等。釋提桓因作是心歡喜已，讚言善哉！讚其愛法、樂法、勤心精進，以過去佛爲喻，非但汝今辛苦，過去諸佛求般若亦爾。薩陀波崙聞釋提桓因安慰其心已，如火得酥，轉更熾盛。作是念：我旣敷座灑地，當於何處得好名華莊嚴法處？問曰：不見水時，何以不作是念，當於何處得水灑

地。答曰：薩陀波崙以先有水處，即時皆無，知魔所作，是故自於四大分中，刺水分灑地。身中水種雖多，血是命之所在，故刺以灑地。華不自有，曇無竭出時欲至，不容遠求，又所須復多，當以徧覆其地，是故生念欲得。帝釋知其念，即以天華中妙者，名曼陀羅，三千石與之，足以周事。帝釋所以不以人華與者，欲令發希有心。故薩陀波崙受華已，分作二分：好者留以說法時散，餘者覆地。其國俗法，以華覆地，令行其上，以爲供養。

爾時，曇無竭如其先要，滿七歲已，從三昧起，與無量百千衆恭敬圍繞，直趣法座，爲說般若。問曰：若諸菩薩入微妙三昧中，誰能令起？答曰：行者初入時，自作限齊，然後入定。時至，其心自在，從三昧起，悲心故而生覺觀。有一比丘入滅受定時，自期聞撻椎時當

起。既入已，時僧坊失火，諸比丘惶遽，不打撻椎而去。爾時，過十二歲已，檀越更和合衆僧，欲起僧坊，方打撻椎，聞撻椎聲起，即身散而死。後諸得道者，說其如此。復次，有人言：法性生身大菩薩，如諸佛常入三昧，無散亂粗心，以神通力故，能說法、飛行、度脫衆生。世俗法故，有出入三昧相，是故雖入微妙三昧，而能還出，以大悲心牽故，譬如呪術出龍。大衆圍繞者，是內眷屬，恭敬散華、燒香，隨從而出，爲說般若波羅蜜故。說般若波羅蜜者，因世諦名字語言，欲示衆生第一義不動相故。薩陀波崙見曇無竭，即得清淨歡喜，樂徧其身，如比丘入於三禪。所以者何？多欲衆生，雖非淨妙，得猶喜樂，何況得見眞功德莊嚴身者！薩陀波崙從空中佛聞曇無竭，即生大欲，得諸三昧。見十方諸佛，復聞十方諸佛說先世因緣，唯有

曇無竭能度汝耳。聞是已，增益其心，渴仰欲見，是故中道欲賣身供養。今於衆香城七歲不坐不臥，欲見曇無竭，如是渴仰，欲樂來久，如人熱渴所逼，得濁煖潦水，猶尙歡喜，何況得清冷美水！旣以渴仰情久，又曇無竭功德大，是故悅樂。樂有四種，何以但說第三禪樂，而不說上地定樂及解脫樂？以欲界衆生，於三受中多貪樂受。聞涅槃樂無所有，則心不樂喜。以上四禪中斷苦樂故，心亦不樂。第三禪中樂，樂之極。復有人言：薩陀波崙新發意，未入細深妙定故，見曇無竭發歡喜，似如三禪。薩陀波崙自覺我大歡喜故，即時捨喜，得清淨法性，徧身安樂，是故以三禪樂爲喻。

大智度論卷第九十九

校譌

第十五面

五行隨宋
南藏作墮

※（今版改隨作墮）

音釋

筌篥

筌古紅切篥戶鉤切筌篥樂器也

槽

昨勞切

頸

居郢切

棍

胡本切開絃線之棍子也

空

蒲悶切塵塢也

磔

音歷小石也

癰

於容切疽也

據其據切權也

捷椎

梵語也此云鐘亦云磬律云隨有凡木銅鐵鳴者皆名捷椎捷巨言切椎音鎗

頸

居郢切

棍

胡本切開絃線之棍子也

空

蒲悶切塵塢也

磔

音歷小石也

癰

於容切疽也

惶懼

惶胡光切恐也

大智度論卷九十九
釋曇無竭品第八十九之上

三二

大智度論卷第一百

龍 樹 菩 薩 造

姚秦三藏法師鳩摩羅什譯

釋曇無竭品第八十九之下

爾時，薩陀波崙菩薩摩訶薩及長者女并五百侍女，到曇無竭菩薩摩訶薩所，散天曼陀羅華，頭面禮畢，退坐一面。曇無竭菩薩見其坐已，告薩陀波崙菩薩言：「善男子！諦聽！諦受！今當爲汝說般若波羅蜜相。善男子！諸法等故，當知般若波羅蜜亦等；諸法離故，當知般若波羅蜜亦離；諸法不動故，當知般若波羅蜜亦不動；諸法無念故，當知般若波羅蜜亦無念；諸法無畏故，當知般若波羅蜜亦無畏；諸法一味故，當知般若波羅蜜亦一味；諸法無邊故，

當知般若波羅蜜亦無邊。諸法無生故，當知般若波羅蜜亦無生；諸法無滅故，當知般若波羅蜜亦無滅。虛空無邊故，當知般若波羅蜜亦無邊；大海水無邊故，當知般若波羅蜜亦無邊；須彌山莊嚴故，當知般若波羅蜜亦莊嚴；虛空無分別故，當知般若波羅蜜亦無分別。色無邊故，當知般若波羅蜜亦無邊；受、想、行、識無邊故，當知般若波羅蜜亦無邊。地種無邊故，當知般若波羅蜜亦無邊；水種、火種、風種無邊故，當知般若波羅蜜亦無邊；空種無邊故，當知般若波羅蜜亦無邊。如金剛等故，當知般若波羅蜜亦等；諸法無分別故，當知般若波羅蜜亦無分別。諸法性不可得故，當知般若波羅蜜性亦不可得；諸法無所有等故，當知般若波羅蜜亦無所有等；諸法無作故，當知般若波羅蜜亦無作；諸法不可思議故，

當知般若波羅蜜亦不可思議。」是時，薩陀波崙菩薩摩訶薩，即於坐處得諸三昧。所謂諸法等三昧，諸法離三昧，諸法無畏三昧，諸法一味三昧，諸法無邊三昧，諸法無生三昧，諸法無滅三昧，虛空無邊三昧，大海水無邊三昧，須彌山莊嚴三昧，虛空無分別三昧，色無邊三昧，受、想、行、識無邊三昧，地種無邊三昧，水種、火種、風種、空種無邊三昧，如金剛等三昧，諸法無分別三昧，諸法不可思議三昧。如是等得六百萬諸三昧門。

爾時，佛告須菩提：「如我今於三千大千世界中與諸比丘僧圍繞，以是相、以是像貌，以是名字，說般若波羅蜜，薩陀波崙得六百萬三昧門，見東、南、西、北、方、四維、上下，如恆河沙等三千大千世界中諸佛與諸比丘恭敬圍繞，以如是相、以是像貌，以是名字，說是

摩訶般若波羅蜜，亦如是。薩陀波崙菩薩，從是已後，多聞智慧不可思議，如大海水，常不離諸佛，生於有佛土中，乃至夢中未曾不見佛時；一切衆難皆悉已斷，在所佛土隨願往生。須菩提，當知是般若波羅蜜因緣，能成就菩薩摩訶薩一切功德，得一切種智。以是故，須菩提，諸菩薩摩訶薩，若欲學六波羅蜜，深入諸佛智慧，欲得一切種智，應受持般若波羅蜜，讀誦、正憶念，廣爲人說，亦書寫經卷，供養尊重讚歎，香華乃至伎樂。何以故？般若波羅蜜，是過去、未來、現在十方諸佛母，十方諸佛所尊重故。」

論釋曰：曇無竭既出，至法座所，徧觀無勝已者，於是而坐。爾時，薩陀波崙菩薩知坐已定，到曇無竭所，頭面禮足，一面坐。禮有三種：一者、口禮；二者、屈膝，頭不至地；三者、頭至地，是爲上禮。人之一身，

頭爲最上，足爲最下，以頭禮足，恭敬之至。曇無竭見其坐已，知從遠來，不惜身命，種種勤苦，爲欲聞法。初相見時，日垂欲沒，少時聞法，曇無竭以日沒故，起入宮中。今爲法故，七歲渴仰，不生異心，垂欲出時，以血灑地，知其爲法，不惜身命，其心不退，決定無疑，堪受教化。是故告言：善男子！一心諦聽！上疑諸佛來去已斷，今但欲聞甚深般若波羅蜜，是故爲說般若波羅蜜相。般若波羅蜜相者，如先諸法平等義中說。或有人言：般若波羅蜜力故，觀諸法皆平等，非諸法性平等。是故曇無竭言：諸法平等故，般若波羅蜜平等。所以者何？因果相似故。初觀諸法平等是因，決定心得般若波羅蜜是爲果。問曰：觀諸法平等，即是般若，般若即是平等，何以分別爲因果？答曰：般若及諸法，雖一相無二無別，行者初觀時是因，觀竟

名爲果。如須陀洹道得向；又如有漏五衆，因時名集，果時名苦。色等一切法平等，即是般若波羅蜜平等。問曰：應說般若波羅蜜相，今何以說平等？因不平故有平，因平故有不平。於般若中亦不一相，亦不異相，汝何以故欲取一相？答曰：般若波羅蜜甚深微妙，不以方便說，則無解者；是故若分別不等，則生諸煩惱，三毒增長，所謂憎怨、愛親、愛善、憎不善。菩薩住是二等中，觀一切法皆平等；住衆生等中，怨親、憎愛皆悉平等，開福德門，閉諸惡趣；住法等中，於一切法中憶想分別，著心取相皆除滅，但見諸法空，空即是平等。有人得是諸法平等空，直趣菩薩道，於空不戲論；有人雖得平等而生戲論，若觀都空，有如是失，如是人於平等即是不等。是故此中爲眞平等故，說般若波羅蜜等，非是戲論；離平等不平等二邊。

是般若波羅蜜相。問曰：平等者，於般若波羅蜜相已具足，何以故更說離等是般若波羅蜜相？答曰：經中但說諸法等，故般若等，行者取是平等相而生著，是故說般若波羅蜜平等相，自性離，色等諸法自相離故。離義，如相無相品中說：得此諸法平等，又於平等離，安住空中，空中則不動；戲論不能動，諸煩惱山亦不動，無常時亦不動。所以者何？於一切法得實相故。菩薩住是二空，得不動般若波羅蜜，是則究竟。若有念，即是有相著處，是故說諸法無念故。當知般若波羅蜜亦無念。無動相是般若波羅蜜，般若波羅蜜諸相滅故。若不念是般若，或迷悶無所趣向。有戲論者，在大眾中，則生怖畏；或於涅槃中不了故，亦生怖畏，是故說無怖畏相是般若波羅蜜。是人雖不決定取諸法相，而深入法性故，於大眾中有難

論諸相者，心無所畏，於諸法得無相故。又入無生忍法時，知一切法不可得，於是中亦無所畏。所以者何？是菩薩善通達一切法故。復次，一切法一相，所謂性空，是故般若波羅蜜隨一切法故，亦性空一味。問曰：上已說諸法平等，今何以更說一味？答曰：空，或時有味，或時無味。若行者爲諸見取相分別，好醜籌量，爾時得是諸法平等空心，大歡喜故名爲味；如人爲熱渴所逼，得清冷水，以爲其味無比，隨時用故名味。真實畢竟空，則無味不味。復次，一味者，菩薩行般若波羅蜜時，所緣所觀，皆爲一味；空智力大故，餘法皆隨而爲空。譬如煮石蜜欲熟時，雖異物和合，皆爲石蜜；又如大海百川歸之，皆爲一味，所謂畢竟空味。色等諸法亦如是，凡夫心中各各別異，入般若波羅蜜中，皆爲一味。邊名爲相，若有，若無，實觀色

等諸法，非有非無故無相，無相即是無邊，觀是已即是無邊。般若波羅蜜。復次，有人言：邊有二種：常邊、斷邊。世間邊、涅槃邊。惡邊、善邊等。此中無如是等諸邊故，名爲無邊。般若波羅蜜。復次，有人言：邊名前際、後際。世間無始故無前際，入無餘涅槃故有前際；不復更出故無後際。如是等分別諸邊，著世間故畏涅槃。是故般若波羅蜜中，無是一切邊，但聞諸法實相無入無出。問曰：諸法平等，諸法離，皆是無邊，何以復別說？答曰：有人知諸法平等，知諸法離，則不須說。若有人取相，著是一味故，說無邊。曇無竭非但爲薩陀波崙故說，薩陀波崙亦不但自爲故問，但爲衆生有種種心、種種行故。於般若波羅蜜相中略說。無生無滅，如先種種因緣破生滅中說。虛空無邊，如摩訶衍虛空譬喻中說。大海水無邊，須彌莊嚴，先

未說故，今當略說。問曰：虛空無爲，常法故無得其邊者，可言無邊；大海水在四天中，繞須彌山，有由旬數量，有人能渡，何以言無邊？答曰：無邊有二種：一者實無邊，二者人不能到故無邊。海亦有二種：一者可度，二者繞須彌山在九寶山裏，廣八萬四千由旬，世間人不能得邊，故言無邊。如小海，船力可渡，大海水，船力不可渡，唯有神通者能渡。如外道凡夫能生禪定船，度欲界、色界、無色界，如大海深廣則不能渡，以不能破我心故。諸賢聖人智慧禪定，翅力破諸法邪相，得實相故能渡，是故說大海譬喻。問曰：須彌山一色，何以言莊嚴？答曰：外書說須彌山一色，純是黃金，六足阿毗曇中說：須彌山四邊各以一寶成，金、銀、玻瓈、瑠璃、莊嚴。若諸鳥隨所至方，各同其色。難陀、婆難陀、龍王兄弟，以身圍繞七布，山頂有三

十三天宮，其城七重，名爲喜見，九百九十九門，一一門邊，皆有十六青衣大力鬼神守護。城中高處作殿，名曰最勝；四邊有四大園。四天王在四邊，有山名遊乾陀，各高四萬二千由旬。四天王治其上。四大海水，諸阿修羅宮，及諸龍王宮殿，遊乾陀等九寶山，日月五星二十八宿及諸餘星，圍繞莊嚴。如是等種種雜飾，以爲莊嚴，視之無厭。般若波羅蜜亦如是。六波羅蜜果報故，作轉輪王，梵釋天王，淨居天王，大自在天，如是等果報。行般若波羅蜜未具足時，受此果報莊嚴。般若波羅蜜具足時，則有須陀洹果、斯陀含果、阿那含果、阿羅漢果。辟支佛道，阿鞞跋致菩薩，諸佛道果莊嚴。如須彌山上下皆有莊嚴，般若波羅蜜莊嚴亦爾。未具足時，諸天王第一莊嚴具足已，諸道果莊嚴。如須彌山者，劫初立時，四邊大風吹

聚地之精味，積爲須彌；更有風吹，令堅而成寶；般若波羅蜜亦如是，一切善法中第一堅實、牢固和合，以爲般若。如須彌山，四邊大風吹大海水波所不能動；般若波羅蜜亦如是，邪見外道戲論及諸魔民所不能動。如須彌山頂四圍，諸天到者，受種種樂；般若亦如是，行者能登般若頂，到四禪等諸定園中，受種種樂。復次，有人言：須彌山衆鳥到者皆同一色；般若波羅蜜亦如是，諸法入中，皆同一相，所謂無相。如虛空無分別者，虛空無分別是內，是外，是遠，是近，是長，是短，是淨，是不淨等；般若波羅蜜亦如是，諸法入般若中，亦無內外、善不善等分別。如五衆無邊者，五衆常徧滿世間，般若波羅蜜亦如是，不遠離於五衆，五衆實相即是般若波羅蜜。復次，如色等法，分析破裂，乃至微塵則無方，無方故無邊；無色法，無

形故無此彼，無此彼故無邊。般若波羅蜜亦如是，於一切法，分別色乃至微塵，分別無色法，乃至一念中，不見決定有常樂我淨，是故說色無邊，故般若無邊。乃至虛空六種，亦如是。如金剛等者，如天王所執金剛，無憎無愛，隨所用處，無不摧碎。諸佛一切智前心，此心中三昧，能斷一切結，使煩惱顛倒，及習皆滅，故名爲如金剛。如金剛三昧相應智慧，觀一切法皆平等，般若波羅蜜觀諸法平等，亦如是。何以故？般若先觀諸法平等，然後得是三昧。諸法無分別者，世間凡夫煩惱力故，種種分別諸法，得諸法實相，則皆破壞變異。是故聖人得般若波羅蜜，不隨憶想分別諸法，入空、無相、無作三昧中，若得諸法變異時，則不憂愁，以先來不分別取諸法相故。諸法性不可得者，一切法皆從因緣和合生，無有無因緣，若少

因緣而起者；若從因緣生，則無自性。自性者，名本有決定實事。若性從因緣和合邊生，當知未和合時則無；若先無，今從因緣和有者，則知無性。若從因緣而生性者，性即是作法，性名不相待，不相因，常應獨有；如是有爲法則無，是故言一切諸法性不可得。般若波羅蜜性亦爾。諸法無所有等故者，諸法性不可得故。衆緣亦不可得，衆緣亦不可得故，皆是無所有，入無所有中，則皆平等。所以者何？有故有分別，無故無分別。如草香、梅檀香，燒時有分別，滅時無分別。諸法無作者，衆生空、法空故，則皆無作。衆生所作者，所謂十善、十不善等。法作者，所謂火然、水流、風動、識能識，知能知，如是法，各各自有力。無衆生，乃至無知者、見者、無色等，乃至一切種智，先已破。破衆生故無作者，破法故無所作；但凡夫人顛倒覆故，

言有所作。諸法不可思議者。色等一切法不得決定。若常。若無常。若苦。若樂。若實。若空。若我。若無我。若生滅。若不生滅。若寂滅。若不寂滅。若離。若不離。若有。若無。等種種分別門。亦如是。不可得思議。所以者何。是法皆從心中憶想分別生。亦不可決定。一切法實性。皆過心。心數法。出名。字。語言道。如前品說。一切諸法平等。一切賢聖不能行。不能到。是故不可思議。般若波羅蜜亦爾。觀是法故生。是時。薩陀波崙即於座上得諸三昧。問曰。薩陀波崙先已知諸法空相。今種種勤苦。住立七歲。見曇無竭得何等利益。答曰。薩陀波崙先見諸佛。得諸三昧。貴重般若波羅蜜生著相。今曇無竭七歲從定起。爲說般若破其著心。一切法性自空。非般若波羅蜜令其空。是故說諸法等故。般若波羅蜜等。諸法離相。乃至諸法不可思

議故，般若不可思議。不令輕賤餘法，貴重般若。何以故？不令因般若故，更生垢著。般若波羅蜜雖畢，竟清淨，多所饒益，復不可取相而生著心；如熱金雖好，不可手捉。薩陀波崙得是教化，斷般若中著心，即得諸法等諸三昧。句句解說，散亂心中但有智慧，不名三昧；今從師聞已，一心思惟，名爲三昧。攝心不散，智慧變成三昧。如風中燈不能照明，在靜室閉門，明乃徧照。先已欲界心散亂故，智慧力未成就，今入攝心中，所聞諸法，皆名三昧，能破諸煩惱等及魔人民。如水，寒風未至，未成爲冰，則無堅用，若成凍冰，能有所蹈。得如是等六百萬三昧門。薩陀波崙得聞曇無竭所說法，得諸法中大智慧明，所謂種種諸法實相門。諸法平等，平等是智慧，入薩陀波崙禪定心中，變爲三昧。

今欲說三昧、智慧，今世、後世果報故，爾時，佛告須菩提：如我今在大衆中說般若，以是相、以是像貌、以是名字，說般若波羅蜜；薩陀波崙從曇無竭得是三昧，於三昧中見十方佛在大衆中說般若亦如是。須菩提！薩陀波崙從是以後，深愛樂法故，多集諸經，廣誦多聞；如阿難佛所說皆能持，薩陀波崙亦如是。多聞智慧不可思議，如大海水，即於是世常不離佛，如是等名爲今世果報。捨身常生有佛國中，好修行念佛三昧故，乃至夢中初不離見佛。地獄等諸難皆已永絕，隨意往生諸佛國土；以其深入般若波羅蜜，集無量功德故，不隨業生。薩陀波崙從一佛土，至一佛土，供養諸佛，度脫衆生，集無量功德；譬如豪貴長者，從一會至一會，乃至今在大雷音佛所，淨修梵行。若有欲求般若波羅蜜者，當如薩陀波崙菩

薩，堅正一心，不可傾動！是故當知般若波羅蜜因緣故，能成就一切功德者；諸菩薩得般若者，貪欲、瞋恚等在家罪垢、邪疑、戲論等出家罪垢，皆悉除滅，得心清淨，心清淨故，得一切功德成就。得一切種智者，所謂得阿耨多羅三藐三菩提。六波羅蜜者，從初地乃至七地，得無生忍法；八地、九地、十地，是深入佛智慧，得一切種智，成就作佛。於一切法得自在者，皆應受持，乃至華香、伎樂，須菩提雖常樂空行，佛共說般若，又得無諍三昧，故不應囑累。阿難得聞持陀羅尼，又常親近世尊，故廣囑累。

釋囑累品第九十

經爾時，佛告阿難：「於汝意云何？佛是汝大師，不汝是佛弟子不？」阿難言：「世尊！佛是我大師，修伽陀是我大師，我是佛弟子！」佛言：

「如是！如是！我是汝大師，汝是我弟子。若如弟子所應作者，汝已作竟。阿難！汝用身口意慈業供養供給我，亦常如我意，無有違失。阿難！我身現在，汝愛敬供養供給，心常清淨，我滅度後，是一切愛敬供養供給事，當愛敬供養般若波羅蜜，乃至第二、第三，以般若波羅蜜囑累汝。阿難！汝莫忘莫失，莫作最後斷種人。阿難！隨爾所時，般若波羅蜜在世，當知爾所時，有佛在世說法。阿難！若有書般若波羅蜜，受持讀誦，正憶念，爲人廣說，恭敬尊重，讚歎華香，旛蓋寶衣，燈燭種種供養，當知是不離見佛，不離聞法，常親近佛。」佛說般若波羅蜜已，彌勒等諸菩薩摩訶薩，慧命須菩提、舍利弗、大目犍連、摩訶迦葉、富樓那、彌多隸耶、尼子、摩訶俱絺羅、摩訶迦旃延、阿難等，并一切大衆，及一切世間諸天人、提闍婆、阿修羅等，

聞佛所說，皆大歡喜。

論問曰：佛已斷法愛，乃至一切種智，涅槃，不著不取相，今何以種種因緣囑累是法，似如愛著？答曰：諸佛大慈悲心，從初發意已來，乃至到涅槃門，常不捨離。於娑羅雙樹間，以金剛三昧爲衆生碎身如麻米，何況經法多所饒益而不囑累！又阿難是未離欲人，未盡知般若波羅蜜力勢果報，多所利益，是以慇懃囑累。汝當好受持，無令忘失，是故佛雖於一切法無憎愛，常寂滅相，而囑累是般若。問曰：阿難是聲聞人，何以以般若波羅蜜囑累，而不囑累彌勒等大菩薩？答曰：有人言：阿難常侍佛左右，供養所須，得聞持陀羅尼，一聞常不失。既是佛之從弟，又多知多識，名聞廣普，四衆所依，是能隨佛轉法輪第三師。佛知舍利弗壽短早滅度故，不囑累。又

阿難是六神通、三明、共解脫五百阿羅漢師，能如是多所利益，是故囑累。彌勒等諸大菩薩，佛滅度後，各各分散，隨至所應度衆生國土。彌勒還兜率天上，毗摩羅結、文殊師利，亦至所應度衆生處。佛又以是諸菩薩深知般若波羅蜜力，不須苦囑累。阿難是聲聞人，隨小乘法，是故佛慙勸囑累。問曰：若爾者，法華經、諸餘方等經，何以囑累喜王諸菩薩等？答曰：有人言：是時，佛說甚深難信之法，聲聞人不在。又如佛說不可思議解脫經，五百阿羅漢雖在佛邊而不聞，或時得聞而不能用，是故囑累諸菩薩。問曰：更有何法甚深勝般若者，而以般若囑累阿難，而餘經囑累菩薩？答曰：般若波羅蜜非祕密法，而法華等諸經，說阿羅漢受決作佛，大菩薩能受持用，譬如大藥師，能以毒爲藥。復次，如先說，般若有二種：一者，共

聲聞說；二者、但爲十方住十地大菩薩說，非九住所聞，何況新發意者！復有九地所聞，乃至初地所聞，各各不同。般若波羅蜜總相是一，而深淺有異，是故囑累阿難無咎。問曰：先見阿闍佛品中囑累，今復囑累，有何等異？答曰：菩薩道有二種：一者、般若波羅蜜道；二者、方便道。先囑累者，爲說般若波羅蜜體竟；今以說令衆生得是般若方便竟，囑累。以是故，見阿闍佛後，說遍和品。般若波羅蜜中雖有方便，方便雖有般若，而隨多受名。般若與方便，本體是一，以所用小異，故別說。譬如金師以巧方便故，以金作種種異物，雖皆是金，而各異名。菩薩得是般若波羅蜜實相，所謂一切法性空，無所有寂滅相，即欲滅度；以方便力故，不取涅槃證。是時，作是念：一切法性空，涅槃亦空，我今於菩薩功德未具足，不應取證，功德

具足，乃可取證。是時，菩薩以方便力，過二地，入菩薩位。住菩薩位中，知甚深微妙無文字法，引導衆生，是名方便。復次，有方便，菩薩知一切法畢竟空性，無所有，而能還起善法，行六波羅蜜，不隨空。若能生四種事：若疑，若邪見，若入涅槃，若作佛。以般若，有如是分別，若能除邪疑，不入涅槃，是爲方便。有人言：般若波羅蜜多所饒益，於大珍寶聚中最勝。佛知滅度後，多有怨賊欲毀壞者，品品囑累，猶當無咎，何況二處！問曰：若囑累，何以乃爾？慫慙鄭重。答曰：佛隨世俗法，引導衆生，譬如賈客主，欲遠出他國，雖以財寶囑累於子，大價妙寶，偏獨慫慙，以其子未識妙寶價重故。餘人以估客主是識寶價人，而慫慙囑累，必知其貴；若聞其子讚說寶價，則不信之。佛亦如是。復次，若於餘人異衆中，讚歎般若囑累，人則譏佛自

稱讚法，疑而不信；自於弟子中囑累，則無嫌。復有人言：佛上品中說寂滅相無戲論，是一切智，是中無有決定法可取，則人以爲無所可貴；今慇懃囑累，則知佛不著空法。一切衆生中，愛念般若無過佛者，佛知般若恩深故，貴重是般若而慇懃囑累。有人言：佛欲現中道故囑累，先說諸法空，以遮有邊；今慇懃囑累，則破無邊，是則中道。若人謂佛貪心愛著此法，佛已種種因緣說般若波羅蜜空相；若人謂佛墮斷滅中，是故慇懃囑累。如是，則離二邊。問曰：佛知阿難是弟子，何以故問阿難？汝是我弟子不？我是汝師不？答曰：佛有惡弟子，須那利多羅等，有少因緣故作弟子，欲於佛所取射法，佛不爲說，於是反戒言：我非佛弟子。又如須尸摩，爲盜法故作弟子。如是等，是名字弟子。又復外道等，謂阿難不得已而在佛邊，

阿難曾作外道弟子，著草衣，求神仙，今以佛是其親族，尊重故給侍。以如是等事故，於大眾中問阿難：汝是我弟子不？若言是真弟子，當隨我敕。是故阿難爲欲令人信，故重答。佛告阿難：弟子所應作法，汝盡具足。弟子法者，所謂以善身、口、意業供給師。有弟子心好，身、口業不稱；有弟子身、口業好，而心不稱。若弟子以善心深愛樂師，身、口相稱，不惜身命，不難勤勞，自捨其心，隨師教敕；阿難盡具足此事。佛告阿難：汝今現在恭敬於我，我滅度後，恭敬般若，亦當如是。問曰：般若是諸佛師，而阿難何以不恭敬其師，而恭敬佛？答曰：阿難雖得初道，漏未盡故，不深知法寶，如佛所知。是故佛告阿難：汝恭敬般若，如恭敬我。復次，衆生見佛三十二相、八十隨形好，丈光明，金色身，多愛敬；般若波羅蜜微妙甚深，無形無色，智者

能知佛身相好，愚智視之，皆無厭足，是故佛以身喻般若。佛在世時，能自遮魔，是故佛告阿難：我滅度後，好守護般若。問曰：一囑累則足，何以至三？答曰：佛深愛般若波羅蜜故。三囑。問曰：若深愛者，何限於三？答曰：諸佛常法，語不過三。若過三不從，執金剛神則以杵擬之。又執金剛神意：若過三不從，則是逆人，便當殛之，是故佛問不過三。復次，若一說猶緩，過三大急，似如凡夫貪著者。復次，受者心有三種：鈍根者至三，乃生善心。阿難雖復利根，心向聲聞，但一身求度，是故三告。所以囑累者，爲不令法滅故。汝當教化弟子，弟子復教餘人，展轉相教，譬如一燈復然餘燈，其明轉多。莫作最後斷種人者，世人有子，若不紹繼，則名斷種，最爲可恥。佛以此喻告阿難：汝莫於汝身上令般若斷絕。問曰：如先品中明般若波羅

蜜，說亦不增，不說亦不減，畢竟寂滅相。今何以言莫令斷滅？譬如虛空，誰能滅者？答曰：般若波羅蜜雖寂滅，無生無滅相，如虛空不可戲論，而文字語言書般若波羅蜜經卷，爲他人說，是此中般若於此因中而說其果。凡人聞般若波羅蜜微妙，即生著心，取般若相，分別諸法，所謂是善，是不善，是世間，是涅槃等，以分別故，於是法中生著心，著心故鬪諍，諍故起諸罪業，如是人名爲滅般若波羅蜜。佛告阿難：汝當如般若波羅蜜相，莫著文字語言，教化衆生，是名不滅。阿難！隨般若在世幾時，則知爾許時佛在世，如經中廣說。佛慇懃囑累，在會衆生有疑，是故佛說囑累因緣。所謂有般若在世，則爲佛在。所以者何？般若波羅蜜是諸佛母，諸佛以法爲師，法者即是般若波羅蜜。若師在，母在，不名爲失利。所以者何？利本

在故，是故說若般若在世佛亦在。又法寶不離佛寶，菩薩有三十
二相，八十隨形好，不名爲佛，得法寶故名爲佛，法寶即是般若波
羅蜜。如人從佛得利，乃至得解脫涅槃；若人於般若中能信行，亦
以三乘法而入涅槃。是故說般若在世，如佛在世說法無異。阿難！
若有人聽受般若及書持等，當知是人，不離見佛、聞法、親近諸佛。
問曰：有人重罪，三不善業成就，聽受書持般若，是人云何當得不
離諸佛、聞法、親近佛？「不」字應刪。答曰：是事先品中已答，所謂聽法者，
有二種人：一者，但聽而不信受行；二者，聽而信受奉行。如弟子不
聽，不信受行師語，是名不聽；若以一心聽聞，信受奉行，厭世愛涅
槃，離小乘樂大乘，作如是聽受，是名真聽。誦讀亦如是。正憶念，隨
如佛意，離有無二邊，行於中道。如所聞受持，及其義解爲他人解

說恭敬尊重供養，讚歎華香等，初始微薄，乃至正憶念，爲他人說，其心轉厚，功德轉多，牢固不動。若聞師說，若見經卷、華香等供養，若智者知般若功德供養者，福德重；不知者供養，福德微薄。福德純厚者，轉身不離見佛、聞法、親近諸佛；福德微薄者，不言轉身得三福報，償衆罪已，久後亦必當得佛。此中佛總說福德純厚、微薄，漸漸皆當見十方佛，聞佛所說，漸漸具足六波羅蜜，皆得作佛。以佛眼見般若，有如是大利，益衆生故，慫勸囑累。問曰：是諸大阿羅漢，已證實際，無復憂喜，小喜尚無，何況大歡喜？答曰：諸大阿羅漢，雖離三界欲，未得一切智慧故，於諸甚深法中，猶疑不了，是摩訶般若波羅蜜中，了解說，斷除其疑，是故大歡喜。復次，此諸大弟子，已證實際，實際者即是空、無相、無量，無所分別。佛以此寂滅

法種種分別名字、語言、譬喻廣說，亦不壞法性，又不與世間相違。諸阿羅漢是法中證故，大歡喜。佛善說是空、無相、無量寂滅法，諸餘大衆未悉漏盡，信力深故，亦大歡喜。言此法能盡我等生死苦，令得佛道。如是等無量因緣故，大衆皆歡喜。

問曰：若佛囑累阿難是般若波羅蜜，佛般涅槃後，阿難共大迦葉結集三藏，此中何以不說？答曰：摩訶衍甚深，難信、難解、難行。佛在世時，有諸比丘聞摩訶衍不信、不解，故從座而去。何況佛般涅槃後！以是故不說。復次，三藏正有三十萬偈，并爲九百六十萬言。摩訶衍甚多無量無限，如此中般若波羅蜜，有二萬二千偈，大般若品，有十萬偈。諸龍王、阿修羅王、諸天宮中，有千萬億偈等。所以者何？此諸天、龍、神壽命長久，識念力强。故今此世人，壽命短促，識

念力薄，小般若波羅蜜品尚不能讀，何況多者！諸餘大菩薩所知般若波羅蜜，無量無限。何以故？佛非但一身所說，無量世中或變化無數身，是故所說無量。又有不可思議解脫經十萬偈，諸佛本起經、雲經、大雲經，各各十萬偈；法華經、華手經、大悲經、方便經、龍王問經、阿修羅王問經等諸大經，無量無邊，如大海中寶，云何可入三藏中？小物應在大中，大物不得入小。若欲問，應言小乘何以不在摩訶衍中？摩訶衍能兼小乘法故，是故不應如汝所問。復次，有人言：如摩訶迦葉將諸比丘，在耆闍崛山中集三藏；佛滅度後，文殊尸利、彌勒諸大菩薩，亦將阿難集是摩訶衍。又阿難知籌量衆生志業大小，是故不於聲聞人中說摩訶衍，說則錯亂，無所成辦。佛法皆是一種一味，所謂苦盡解脫味。此解脫味有二種：一者、

但自爲身；二者兼爲一切衆生。雖俱求一解脫門，而有自利、利人之異，是故有大小乘差別。爲是二種人故，佛口所說，以文字語言分爲二種：三藏是聲聞法，摩訶衍是大乘法。復次，佛在世時，無有三藏名，但有持修多羅比丘、持毗尼比丘、持摩多羅迦比丘。修多羅者，是四阿含中經名，摩訶衍中經名。修多羅有二分：一者，四阿含中修多羅；二者，摩訶衍經名爲大。修多羅入二分，亦大乘、亦小乘。二百五十戒，如是語等，名爲修多羅。毗尼，名比丘作罪，佛結戒，應行是不應行，作是事得是罪，略說有八十部。亦有二分：一者，摩偷羅國毗尼，含阿波陀那、本生，有八十部；二者，罽賓國毗尼，除卻本生、阿波陀那，但取要用作十部。有八十部毗婆沙解釋。是故知摩訶般若波羅蜜經等，在修多羅經中，以經大、事異故別說；是故

不在集三藏中。

鳩摩羅耆婆法師，以秦弘始三年，歲在辛丑十二月二十日，至長安。四年夏，於逍遙園中西門閣上，爲姚天王出此釋論。七年十二月二十七日，乃訖。其中兼出經本、禪經、戒律、百論、禪法要解，向五十萬言；并此釋論，一百五十萬言。論初三十四卷，解釋一品，是全論具本；二品已下，法師略之，取其足以開釋文意而已，不復備其廣釋，得此百卷。若盡出之，將十倍於此。

大智度論卷第一百

音釋

分析

先的切亦分也

摩訶俱絺羅

梵語也此云大條縛音癡

漚和

梵語具云漚和俱舍羅此云方便漚音臨

殛

紀力切誅也又斥死也

緩

胡管切遲緩也

大智度論校勘記

僧叡序大智度論云：「二三唯案譯而書，不加備飾，幸冀明悟之賢，略其文而挹其玄也！」當時譯出智論，文句間固未盡善，此所以宋元來刻本，字或增損，每多同異。又印度舊制，經論別行，今譯本附論於經，先後編次，間亦未盡妥貼。今以排印之便，取蘇州刻經處刻本爲藍本，對勘各刻本（據大正藏校）而略爲校正。關於文字出入者，或古通今別，如「已」與「以」，或借假字，如「慧」作「惠」，或字增損而義無異，如「何以」與「何以故」，或字異而義相同，如「世界」與「國土」，凡此類，概仍底本之舊。比對各本，而知底本確有脫落、錯誤、顛倒、增字而無當者，則改正之；改正必有古本爲依據，不復一一注出。又羅什法師譯出大品，譯

語每異舊譯。然古人鈔寫，或隨順舊譯，致智論譯語，多不統一。如「五衆」與「五陰」，「釋迦文」與「釋迦牟尼」，「八解脫」與「八背捨」等並用，即是其例。此類文字異同甚多，惟其義無大異，不在校改之列。關於經論編次之錯亂者，古本曾發見而爲之改編者，採用而改正之。然讀大智度（經）論，字句與編合次第，古來雖各本相同，而實屬錯亂或訛誤者，不敢輒改，惟旁加※形符號，別附校勘於論末，以備讀者之參考。至標點一道，素非所長，未必能盡合。但求較勝古本之斷句，減少錯誤云爾。

民國六十四年十二月八日 印順校畢附記

附「大智度論」校勘

中文標頁行是舊刻本
阿拉伯文標頁行是今版

序 二頁 一六行 「常杖茲論焉淵鏡，憑高致以明宗。」「杖」應

作「仗。」「焉」乃「爲」字之訛。

卷三 四頁二十行 「婆翅多」六大城之一，「婆」應作「娑」

卷四 九頁五行 「不可以譬喻知」準下文義，「不」字

應刪。

卷五 廿三頁十三行 「發大正」，「正」乃「心」字之誤。

卷六 十五頁四行 「以是故說諸法如化」此衍文應刪。

卷九 四頁四行 「梵衆天」依釋論，應是「梵世天」

「眼耳無礙」，「耳」字石本作「可」本

文明天眼所見，不應言「耳」，應是「眼

見無礙」，「耳」乃「見」字之形誤。

卷十二 七頁四行 「復載鳥」麗本作「獼猴戴鳥」，「復」

字上應補一「猴」字。

二十八頁九行
41面6行

「瞻」餘處或作「膳」。施食得五果報，

此與「辯」相當。

卷十三

二十七頁二行
39面2行

「必至涅槃」下有：「釋初品中讚尸波

羅蜜義」品目，將四種居家持戒，從中間
隔，極為不合！今依宮本、石本，已刪去。

卷十五

二十頁三行
28面9行

「若乘山崖」之一「乘」，石本作「垂」，好！

卷十七

十二頁七行
17面4行

「除五蓋，復次，貪欲蓋者，」除五蓋，「是
總標。此下別說，先舉「貪欲蓋者，」中間
「復次」二字應刪。

卷十八

二十頁三行
28面9行

「十七聖行，」之一「七」字應作「六。」

卷十九

23十六頁7行

「是斷見，」「非斷見，」「見」字並應作「知。」

卷二十七

8六頁2行

「菩薩摩訶薩欲得道慧，當習行般若波羅蜜。」——十七字，石本缺。檢釋論無釋。

卷二十八

11八頁10八行

「五恆河伽藍牟那，」此文有誤。應作「五河：恆伽、監牟那。」藍牟那即「閻浮那，」故「藍」是「監」之誤

卷三十

19十三頁4行

「如一本生經中說，」之「一」字疑衍。「大也，」乃「天也」之誤。

卷三十七

11八頁11行

「不著」之「不，」準上下文義，應刪。

卷四十一

2 二面 10 五行

須菩提上二十四字，依經上下文不合，且與下「譬如內身」一段重複，檢釋論亦無釋，應是衍文。

31 二十一頁三行 3 行

「得是心不應念不應高，」準釋論，「得是心」乃「菩提心」之譌，應改。

卷四十四

32 二十二頁二行 6 行

「先滅憂喜故，」一喜，應作「苦。」

卷四十六

14 九頁十七行 2 行

「自立如幻師，」一自立，二字疑誤！

36 廿四頁十四行 4 行

「答曰，」依下文義，仍是問難，此處不應有此二字，應在「亦不生邪疑」下。

卷四十八

18 十二頁十八行 6 行

此處，經論編次不合。從此起，凡⁹²一百十五行餘，共二千三百零八字，論義並在前，應

與前段經文啣接，方合。

卷五十五

十二頁九行
十七面 11行

是下：舊有「五衆從因緣和合生」等一百九字，元藏移後，明藏又移於此。今檢論義，應依元藏移後爲正。十六頁十行十八字下
23面7行「深」字下

卷五十六

廿二頁十二行
32面 9行

「問曰」下八十字，經文無此義，實屬上段論末，誤編於此，應移前。

卷六十七

六頁十四行
8面 10行

「爾時」下百十九字，乃序起下段經文，應移至後段。12頁8行
12面11行論釋之前。

卷六十八

十六頁十三行
24面 2行

「弟子雖必欲行而不能知，」必字，疑「心」之誤。

卷六十九

十四頁十三行
21面 1行

「是魔相爾，」相爾，疑爲「法爾。」

卷七十

卅六頁二十行
39面5行

「白衣得道者多，」「多」應作「少。」

卷七十一

卅一頁十九行
46面5行

「上品未說，」「未」應作「末。」

卷八十

七五頁七行
75面6行

「色即生色不可得，」「色即」應是「即色」之倒。

卷八十一

十四頁三行
20面7行

「以尸羅波羅蜜故，」準上下文義，「尸羅」應爲「精進」之誤。

卷八十四

九頁十五行
14面5行

「不學無爲般若波羅蜜，」依下經文及論釋，「不」字衍文應刪。

卷八十七

十一頁三行
15面11行

「尸羅波羅蜜名爲學，」「蜜」下脫「禪波羅蜜」四字，應補。

卷八十八

卅三頁四行
48面6行

「彌帝隸力利菩薩，」「力利」乃「尸

利」之誤。

卷八十九

二十四頁三行

「令諸法非實非空，」令疑是「今。」

卷九十三

二十七頁十六行

「論議者正可論其事，不可測知，是故不應戲論。」此文疑脫落「其可論」

三字，「論議者正可論其可論；其事不可測知，是故不應戲論。」文義乃足。

卷九十六

二十九頁一行

「又如行遣，」遣疑「遠」之誤。

卷一百

二十九頁十七行

「云何當得不離諸佛、聞法、親近佛不？」上已有「云何」問詞，下「不」字應刪。

大智度論 校勘記

十

大智度論今版記

吾乃一介念佛僧。觀經云：上品上生者，讀誦大乘方等經典。是以吾念佛亦讀誦大乘經，于大乘經中好讀般若，于般若中尤好讀摩訶般若，且曾一時受持。由受持般若故，亦好讀般若論，于般若論中尤偏敬大智度論。開始恭讀時雖不甚明了，然卻頗有法樂。每見「空」字，輒喜多讀深思反覆審辨，如理諦觀，乃愈覺「空義」誠爲諸法之實相，至廣大、包含無量無盡一切法，圓妙常法，爾無始無終越三世，最爲究竟，其道平等一如。甚矣哉，法味之濃，喜極而淚。因此一讀再讀，屢讀而不倦，遂于般若甚深微妙理趣，稍獲了解。深感吾未早讀斯論，而太息而悲傷，復歎學佛法人，若不洞明般若（二諦）而言明佛法者，相似而已非眞明也。悲夫！

既非眞明，自修尙難了脫，而言利他者可乎？而言住持正法續佛慧命又可乎？捨本逐末無有是處。故爾，吾于六年前，倡印摩訶般若經以施送；今者相繼製版，敬印大智度論再結緣。普願讀者，至心研究，竭誠行持，展轉弘化，以廣流通；植般若無漏之慧根，登安樂不退之蓮台；共證無生法忍，同圓一切種智也。然今人不嫻古文句讀，每謂佛經深奧難懂，故不憚跋涉，禮請印順導師慈悲，改用新式標點，除去舊有隔闕，俾令初機易入耳。至云：易文言爲白話，此則須待因緣時節也。惟愧吾性遲鈍，于校勘學毫無認識，雖竭盡心力讎校，亦仍未獲滿意；此非事繁之難做，實乃無福慧之使然。噫！夫復何言。凡分段、字句、標點及小註有譌誤者，仰叩諸方大德，爲尊重法寶故、哀愍衆生故，不吝慈悲函示賜教，待再版時

改正，務令臻于完善，則佛法幸甚！衆生幸甚！是吾心香至禱者也。
佛曆二五二三年歲次己未重三香港青山念佛僧拜述

附略說今版餘意

一、今版所依底本，是光緒九年仲冬，姑蘇刻經處板；彼底本又依何藏而刻，則未見說明。然據大正藏校勘記對照，知爲明藏，但明藏有四種不同板，究竟是何藏則不得而知。因此今版雖有校改之字，而於每卷末頁「音釋」則完全照舊；將來若遇明藏，可依「音釋」查對，即知今版之原底本是依何種明藏矣。今版雖有校改，然每一字都經過謹慎參考，若無據雖明知是錯，亦未敢更動。讀者若見錯字，當依大正藏校勘記查對後，並參各種不同版本，始可依之擇善改正，否則存疑可也。如卷六

十八、六頁五行，「識、斷、壽」有人改爲「識、煖、壽」此即未查對而錯改，應當戒之。

一、關於標點，有時很難依通例：如三十六不淨，要用三十六個頓號。又如百八三昧等，要用百八逗點或分號，殊覺太長。因此每五個三昧用一分號，每十個用一句號。此則似易讀易記耳。

一、凡有此※符號之小註者，皆爲今版所加。若無此※符號之小註，則爲底本原有之舊註。復次，行末有此一符號者，以示一段不用此（「」）符號者，以免誤認爲引號耳。

一、今版費時數載，于茲始倉促而成，全仗三寶慈光加被，諸淨友發心協助，謹此至誠頂禮感謝。所有功德，悉皆回向——
摩訶般若波羅蜜。

大智度論（一～五冊）功德主名錄

法印文號：102027

五二、〇〇〇元：〔往生者洪吉村、往生者洪李允〕願以此功德，普及於一切，我等與眾生，皆共成

佛道。）

三五、〇〇〇元：〔陳信正、陳葉美枝。〕

一〇、〇〇〇元：〔陳淑華、高義雄、高石阿月、高令宗、高美莉、高嘉雯、吳雅汶、林子易、

林子寬、林恩舟、高芳真、葉宸辰上述等人之累劫冤親債主。〕

二八九、三二四元：佛陀教育基金會。

以上共計新台幣：三八六、三二四元，恭印一、〇〇〇套。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有冤枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；若有結餘，均續作本會之印（購）經書及運費，為施主廣積陰德，歡迎十方大德善加利用。

普為出資及讀誦受持
輾轉流通者回向偈曰

願以此功德
消除宿現業
增長諸福慧
圓成勝善根
所有刀兵劫
及與饑饉等
悉皆盡滅除
人各習禮讓
讀誦受持人
輾轉流通者
現眷咸安樂
先亡獲超昇
風雨常調順
人民悉康寧
法界諸含識
同證無上道

佛曆二五五七年／西元二〇一三年八月
大智度論（第五冊）

恭印：一〇〇〇套
流水號：11528
書號：GH510-01

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail：budaedu@budaedu.org

電話：(011) 3395111-198 傳真：(011) 3391134-115

劃撥戶名：財團法人佛陀教育基金會 郵局劃撥帳號：〇七六九九七七

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇四五九七五〇三

本會經書免費結緣之請取方式如下：

(一) 親臨本會二樓講堂。(二) 利用傳真：(02) 23965959

(三) 撥打電話：(02) 23951198 分機：11、12

(四) 網址：<http://www.budaedu.org/books/>。(五) 寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎ 本會經書，歡迎翻印（請勿增刪），贈送流通，功德無量。

◎ 本會交通

※ 捷運：善導寺站5號出口，至杭州南路右轉，過兩個紅綠燈。

※ 公車站牌：審計部站→212、299、232、205、276、605、257、262

台北商業技術學院→253、297、237 仁愛路二段→222、297

開南商工→208、295、297、15、22、671

行政院新聞局出版事業登記證局版臺業字第 三 八 六 九 號



